

UTL AT DOWNSVIEW




D RANGE BAY SHLF POS ITEM C
39 11 05 06 05 007 1

JN Haydar, 'Alī ibn Emīn
9711 Dürer ül-hükkām serh-i
H38 mecellet ül-ahkām
v.6-7

PLEASE DO NOT REMOVE
CARDS OR SLIPS FROM THIS POCKET

UNIVERSITY OF TORONTO LIBRARY

3333/6-7



Digitized by the Internet Archive
in 2010 with funding from
University of Toronto

Haydar, 'Ali ibn Emīn

الجزء السادس

من

درر الحکم شرح مجله الامانات

Dürer ul-hükkm

کتاب الامانات

serh-i mecellet ul-ahkām

مرتبی

علی میرزا

محکمه تمیز اعضاسندن ومکتب حقوق وملکیه

شاهانه مجله معلمی

۳۳۳

مؤلفک مهریله ممهور اولمیان نسخه ساخته ومتجاسری مسؤولدر



استانبول

(آ.آصادوریان) شرکت مرتبیه مطبعه سی — باب عالی جاده سنده نومرو ۵۲

۱۳۱۹

JN

9711

H38

v. 6-7

اللَّهُ الرَّحْمَنُ الرَّحِيمُ

LIBRARY

JUN 22 1971

UNIVERSITY OF TORONTO

الحمد لله رب العالمين والصلوة والسلام على سيدنا محمد
 الامين وهو خير البرية صلى الله عليه وسلم وعلى جميع
 الائمة والمجاهدين وعلى معلمهم وراحمين وماتوفيق الابالله
 مالك يوم الدين اياك نعبد واياك نستعين .

— كتاب سادس —

يعنى مجله نك منقسم اولديني اون آلى كتابدن آلتنجى كتاب

(امانات حقتنده اولوب بر مقدمه ايله اوج بابى) وكتاب
 كفالت ورهن كى آلتمش بر ماده يى (مشتعلدر).

امانتك اقسام ثلاثه سى واردرد. شويله كه انسانك معامله سى
 يا ربى يا عبادى يا نفسى ايله اولور. وبونلرك جمله سنده امانته
 رعايت لازمدر. انسانك ربى ايله اولان امانته رعايتى جميع
 مأموراتى ايشلمك وبالجمله منهيأتى ترك ايتمكه اولور. ايمدى
 انسانك من عندالله مكلف اولديني هرشى انسان مكلف عندنده
 واجب التأديه امانتدر كه بو قسم ساحلى اولميان بر دكر كيدير.
 انسانك عباد ايله اولان امانتى دخى انسانك كندى اولادى

وزوجه سی و ممالکی و اصحابی و بالجملة هم جنسی کی عامه مخلوقاتک
حقوقی محافظه ایلمک و هیچ برشیده آنلره خیانت ایلمامک ایله اولور.
بو کتابده موضوع بحث اولان امانات دخی بو قیلنددر. یعنی
انسانک عباد ایله اولان امانتی جمله سمندندر.

انسانک کندی نفسی ایله اولان امانته رعایتی دخی انسان
کندوسی ایچون دین و دنیاچه اصاح و انفعی اختیار و دنیاچه
و عقباده نفسنه مضر اولان شیدن نفسنی حفظ ایتمکدن عبارتدر
شیخزاده.

— ❧ — مقدمه — ❧ —

یعنی کتاب سادسک مقدمه سی

«اماناته متعلق» بعض «اصطلاحات فقهیه بیاننده در.»
امانات ، امانتک جمعی اولوب امانت دخی آتی الذکر مادهده
تعریف اولنیور.

امانت ، فی الاصل امین اولمق معناسنه مصدر ایسهده بوراده
مفعولی مصدر ایله تسمیه قیلندن اوله رق اسم اولدینی جهتله
جمعلمشدر شیخزاده.

امانتک جمع صیغه سیله ذکر اولنسی بوراده موضوع بحث

اولان امانتک تعدد انواعه منیدر که اوده لقطه ، وودیعه و عاریتدر .

علم جلیل فقهه دائر اکثر کتبه هربری کتاب عنوانی تحتند مذکور اولان لقطه وودیعه و عاریت حقنده کی مسائلک بعضیاری اشبو مجله ده بر کتابده جمع ایدلمشدر که اوچنکده امانت اولوق جهتند متحد اولملریله برابر قلیل المسائل بولملری ملاسه سیله بر کتابده جمع و کتاب الامانات دیو تلقیب ایتک مناسب اولور . واقعا مأجور دخی ۶۰۰ ماده ده ذکر اولندیغی وجهله یدمستأجرده امانتدر . نته کیم مال شرکت دخی مشارکدر اللرنده امانت اولدیغی ۱۳۵۰ ماده ده مذکوردر . لکن اجاره و شرکت مسائلی کثیر اولمغله بونلر کتاب مستقل اوله رق ایراد اولنسی مناسب کورلمشدر .

ابن نجیم اشباهنده کتاب الامانات عنوانی تحتند لقطه وودیعه و عاریتی و متولی یدنده بولنان مال وقف و اب و حاکم و یا وصی یدنده بولنان مال یتیم کی دیگر بر طاقم اماناتی و بعض احکامنی بیان ایلمش اولوب فقط مجله ده بونلردن یعنی مال وقف و الخ کی اماناتدن بحث ایدلمیه جکدر .

بناء علیه کتاب امانات عنوانی تحتند لقطه وودیعه و عاریتی ذکر ایتک اصولنی ایلک دفعه وضع و تأسیس ایدن مجله اولما مشدر . حفظ امانت داریجه موجب سعادت اوله جغی کی امانته خیانت دخی مستلزم شقاوت اولور . صلی الله تعالی علیه وسلم

امانت غنای جلب و خیانت فقری جر ایدر بیور مشدر تکمله
رد مختار.

ماده ۷۶۲

(امانت) لغة مصدر اولوب امین اولق معناسنه در .
اصطلاح فقهاده (امین اتخاذا اولنان کیمسه نزدنده بولنان
شیدر) یعنی مالدر .

سوال ، اتخاذ لغت عربده مصدر اولوب ایدنمک معناسنه در .
بناء علیه برکونه عقد و قصد اولمقسزین بر کیمسه نك یدینه کچن
امانته اتخاذا یوقدر . زیرا بو کیمسه اول امانتک صاحبی و مالکی
طرفندن اول مالده امین اتخاذا اولمش دکدر . بو حالده شو
مادهده قسیم ، قسم عد اولنیور .

جواب ، اتخاذدن مقصود حصراً اول شیئک مالکنک
اتخاذا یتیمی اولیوب کرک اول شیئک مالکی اتخاذا ایتسون .
بیع باطل اوزرینه اذن بایع ایله قبض اولنان میبع و مأجور
و ودیعه و مستعار و مال مضاربه و مال شرکته اولدینی کبی .
بو احوالده اول کیمسه نك نفس الامرده امین و معتمد اولسی
شرط دکدر . و کرک شریعت اتخاذا ایتسون . لقطهده و روزکار
ایله قومشوسنک خانه سنه دوشن مالده اولدینی کبی . شبهه یوقکه
برکونه عقد و قصد اولمقسزین بر کیمسه نك یدینه غیرک مالی کچدکده

اول کیمسه بی شر عشریف اول مالدہ امین اتخاذا یعنی بالمحافظہ اخیراً صاحبہ رد و اعادہ ایلہ امر ایلمشدر .

اول شی (کرک و دیعہ کی عقد استحفاظ ایلہ امانت ایدلسون) و دیعہ دن بشقہ عقد استحفاظ ایلہ امانت ایدی لان یوقدر بناء علیہ کی لفظی مقہمدر (و کرک) بیع باطل ایلہ صاتیلوب باذن البایع قبض ایدی لان میبع و (مأجور و مستعار) و مرہون و مال مضاربہ و مال شرکت و وکیلک جہت وکالتدن طولایی مأخوذی اولان مال (کی) دیگر (بر عقد) صحیح و غیر صحیح (ضمنندہ امانت اولسون) کہ مأجور عقد اجارہ و مرہون عقد رهن و مال مضابہ و دیگر لری دخی عقد شرکت و عقد وکالت ضمنندہ امانت اولمشدر . بو تفصیلاتدن اکلا شایکہ عقد ایداع بالکذاستحفاظ ایچون ایکن دیگر امانتلر مجرد استحفاظ ایچون یعنی استحفاظ مقصود اصلی اولیوب آنلردہ مقصود اصلی بشقہ شیدر . شویلہ کہ مثلاً مأجور امانت ایسہدہ آنده مقصود اصلی حفظ اولیوب بلکه تملیک منفعتدر . و بوندہ حفظ ۶۰۷ مادہ شرحنده دخی ذکر اولندیغی اوزرہ عند الامام الاعظم تبعی و ضمنیدر . چونکہ مستأجر عین مأجور ایلہ انتفاع ایدہ بیلمسی ایچون مأجوری محافظہ ایلمسی لازمدر (و کرک) اب و حاکم یدلرندہ بولنان مال یتیم و ملتقط بولوب مالکنہ رد ایتک اوزرہ اخذ ایتدیکی لقطہ کی (برکونہ عقد) اولمقسرین برکیمسہ نک یدینہ

امانت کچسون (و) کرک برکونه (قصد اولمقسزین برکیمسه نك
یدینه امانت کچسون.)

وصی یدنده بولنان مال یتیم و متولی یدنده اولان مال
وقف و برعینک انتفاعیله موصی له اولان کیمسه نك یدنده
موجود عین دخی امانت اولوب یوخسه ودیعه دکلدر بحر.

(نته کیم روزکار ایله برکیمسه نك خانه سنه قومشوسنك
بر مالی دوشسه عقد) و قصد (اولدینی جهته اول مال خانه
صاحبی نزدنده ودیعه) اولدینی کبی مال صاحبی دخی معلوم
اولدیغندن لقطه دخی (اولیوب فقط) یعنی یالکز (امانتدر)
شو «نته کیم..» فقره سی مجله نك «وقصد اولمقسزین..» فقره سنه
مثالدر.

ایضاحات سالفه دن آکلاشیلورکه امانت اعم مطلق وودیعه
و دیگر امانتدر اخص مطلق اولوب ودیعه امانتدر و مستعار
امانتدر و مأجور امانتدر کلاملرنده کی حمل، هر انسان حیواندر
سوزنده کی حمل کبی حمل العام علی الخاص قیلندندرکه حمل
مذکور صحیح اولوب اما عکسی یعنی حمل الخاص علی العام جائز
یعنی مثلاً هر حیوان انساندر سوزی صحیح اولماز.

ماده اجتماع و ماده افتراق

ایمدی امانت ایله ودیعه اولمق خصوصی عقد استحقاق

ضمننده ویریلان مالدہ یعنی ودیعہ دہ اجتماع ایدرلر۔ یعنی ودیعہ ہم امانت ہمدہ ودیعہ اولوب اما روزکار ایلہ بر کیمسہ نک خانہ سنہ قومشوسنک مالی دوشسہ بو مال امانت اولوب لکن ودیعہ دکلدر۔ بناء علیہ امانت ودیعہ دن بوندہ افتراق ایدر۔ تکملہ رد مختار۔

امانت ایلہ ودیعہ بینندہ ایکی درلو فرق واردر۔

امانت ایلہ ودیعہ آرہ سندہ ایکی درلو فرق واردر کہ برنجیسی، بالادہ ذکر اولندیفی اوزرہ بینلرنده عموم وخصوص مطلق اولمقدز۔

ایکنجیسی، ودیعہ ایلہ امانتک بعض صورتلرده حکما دخی مختلف بولنمیسیدر۔ شویله کہ ودیعہ دہ مستودع وکذا بیعه وایجار واستیجاره وکیل ومضارب ومستبضع وغنانا ویامفاوضۃ شریک ومستعیر للرهن بعدالخالفۃ وفاقه عودت ایتسمیلہ ضماندن بری اولدیغی حالده سائر امانتلرده بری اولماز۔ یعنی سائر امانتلرده امین امانتہ تعدی ایتدکدنصکرہ بر دها تعدی ایتماک نیتیلہ تعدی بی ازالہ ایتسہ بیلہ حکم ضمان زائل وبرکرہ تعدیلہ ید۔ امانت یدضمانہ تحول ایتدکدنصکرہ مجرد تعدی بی ازالہ ایتسمیلہ ید غصب یعنی ید ضمان ید امانتہ منقلب اولیوب بلکہ مالکنہ سالماً رد ایدنجه یه قدر ید ضمانندہ قالور۔ نتہ کیم ۷۸۷ ماده

شرحنده ایضاح اولنور بحر و تکمله رد مختار و مجمع الانهر
ورد مختار .

بو کتابده امانات مذکوره نك عمومندن صورت مخصوصه ده
بحث اولنمیوب بلکه لقطه و ودیعه و عاریت کبی بعض اماناتدن
بحث اولندیغی مطالعه سندن آکلاشیلوب فقط باطلا میبعک
امانت اولسندن ۳۷۰ ماده ده و مأجورک امانت اولسندن ۶۰۰
ماده ده و مرهونک امانت اولسندن ۷۴۱ ماده شرحنده کی
لاحقه ده و مال شرکتک امانت اولسندن ۱۳۵۰ ماده ده و مال
مضاربه نك امانت اولسندن ۱۴۱۳ ماده ده و وکیلک جهت
و کالتدن طولانی مقبوضی اولان مالک امانت اولسندن ۱۴۶۱ ماده ده
بحث ایدلمشدر .

❦ ماده ۷۶۳ ❦

«ودیعه» لغة ردع وزننده بولنان و دعدن مشتق اولوب
ودع دخی مطلقا ترکه دینیلور. فعیل وزنی هم رحیم کبی اسم
فاعل همده قتیل کبی اسم مفعول معناسنه استعمال اولنور ایسه ده
بوراده اسم مفعول معناسنه مستعمل اولدیغی تعریف شرعی
آتیسندن مستفاد اولور.

ایمدی فعیل اسم مفعول معناسنه استعمال اولندقدده موصوفی
تقدم ایدنجه تذکیر و تأییدی مساوی و بناء علیه رجل قتیل و امرأة

قتیل دینامسی صحیح اولمغله بوراده و دیعه لفظنک آخرنده کی تاعلامت تأنیث اولیوب بلکه معنای وصفیتدن اسمیته نقل اولندیغنه علامتدر .

ودع مصدرینک و فعل ماضیسنک استعمالی لغت عربده واقع اولوب حتی حدیث عالیده لینهین اقوام عن ودعهم الجماعات وارد اولدینی کی آیت جاملهده بر قرائتده ماودعک ربک وارد اولوب بوقرائته کوره ودعک تخفیف ایله در زیلعی [۱].

لکن شایع اولان مصدرینک و ماضیسنک تفعیل بابندن یعنی تودیع و ودع یا خود افعال بابندن یعنی ایداع و اودع اوله رق استعمالی اولمغله مجله دخی ماده آتیده افعال بابندن استعمال ایدیور .

ودیعه اصطلاح فقهاده (حفظ) قصدی (ایچون برکیمسیه ایداع اولنان مالدر) تکمله رد مختار و درر .

بعض کتب فقهیهده و دیعه تک تعریفه یالکز قیدی علاوه سیله یالکز حفظ ایچون الخ دیو تعریف ایدیلرک بوقیدله عاریت تعریفدن خارج براغلمق استلمشدر . چونکه عاریت هم حفظ همده انتفاع ایچون ویریلور تکمله رد مختار . فقط ماده آنفه شر حنده

[۱] هر قدر امام زنجانی عنی نام کتابنده و اما تواماضی بدع یعنی بدع مضارعنک فعل ماضیسنک استعمالی ترک اولنمش دیمش ایسهده . و لایقال ودعه و انما یقال ترک و لا وادع و انما یقال تارک سعدالدین علی العزی .

ذکر اولندیغی اوزره عاریت کی سائر اماناتده حفظ مقصود ایسهده مقصود اصلی اولوب آنلرده مقصود اصلی بشقه شی اوله رق حفظ ضمیدر. بناء علیه تعریفده کی حفظ ایچون تعیریله سائر امانات خارج قالد جغندن مجله، تعریفده یالکیز تعیرینک ذکر وعلاوه سنه لزوم کورمدی.

سوال و جواب

سوال ، ودیعہنک شو تعریفی فقہانک تعریفه موافق اولماغله برابر تعریف مذکورده تکرار واردر . زیرا فقہا ودیعہی « حفظ ایچون ترک اولنان امانتدر » دیو تعریف ایتشلردر . ایشته فقہانک تعریفه موافق اولمدیغی آکلاشلدی ومجله تعریفده ایداع لفظی ذکر ایدوب ایداعک ماده آتیده ذکر اولنان معناسنه کوره بوتعریف « حفظ ایچون برکیمسهیه محافظه سی احاله اولنان مالدر » جمله سنی حاصل ایدر. بوصورته تعریفده تکرار حاصل اولور .

جواب ، بو تعریفده واقع ایداع لفظی لغت یعنی امانت قومق معناسنده مستعمل اولماغله بو تعریف فقہانک تعریفنک عینی اولور . یعنی تعریف مذکور شویله اولمش اولور ودیعہ « حفظ ایچون برکیمسهیه امانت قونیلان مالدر » نته کیم قاموسده دخی ایداع بر نسنه یی امانت قومق معناسنده ایدوکی

ذکر اول نمشد . بو صورتده ایداع لفظی تجریده محمول یعنی بعض معانیسنده مستعملدر تعبیر دیگرله ایداع لفظی مجرد دیگره احاله معناسنده در دیو جواب و یروب تعریفده غیر مناسب اولان مجازی ارتکاب اتمکه لزوم یوقدر.

❦ ماده ۷۶۴ ❦

(ایداع) و استیداع (کندو مائک محافظه سنی دیگره)
 صراحةً و یا دلالةً (احاله اتمکدر که احاله ایدن کیمسه یه)
 یعنی مال صاحبنه (دالک کسریله) و افعال بابندن (مودع)
 و کذا دالک کسریله و استفعال بابندن اوله رق مستودع (و)
 احاله یی (قبول ایدن کیمسه یه و دیع) بو لفظ فعیل وزننده
 واسم مفعول معناسنده در (و دالک فتحیله مستودع) و ینه
 دالک فتحیله مودع دخی (دینیلور) تنویر و مجمع الانهر و شبلی .
 خلاصه ، احاله ایدن کیمسه یه مودع و مستودع و احاله یی
 قبول ایدن کیمسه یه و دیع و مستودع و مودع اطلاق اولنور
 ایسه ده دفع التباس ایچون مجله برر اسمی ذکر ایله اکتفا
 و مواد آتیسه ده دخی شو مقدمه ده تعریف ایلدیکی الفاظی
 استعمال ایلدی .

صراحه و دلالة احاله

صراحه احاله: بو مالى سكا ايداع ايتدم و امانت ويردم
كبي سوزلر ايله اولور.

دلالة احاله: مثلا يولده بولنان ييرتق برطوم كندولكنندن
آجيلوب آندن ياغ آققده ايكن بريسي آنى مالكنك غيبتنده
اخذ ايتسه حفظى دلالة التزام ايتمش اولوب حتى آندنصكره
ينه حاليله ترك ايتمكه آقسده ضايع اولسه آندنصكره آقانى
ضامن اولور بحر وتكملة رد مختار. اما اصلا اخذ ايتسه ياخود
اخذ ايتديكي صره ده مال صاحبي حاضر ايدبسه آخذك اخذى
حالنده بر ضرر ترتب ايتيويده بعده آقسده ضايع اواسه
ضمان لازم كلز.

سوال، طولم مسئله سننده احاله محافظه يوقدر. زيرا احاله
مالكك فعليدر. اوت بو مسئله ده التزام محافظه واردر. لكن
التزام امينك فعليدر.

جواب، مقصود، شرعك احاله سيدر. شويله كه اخذيله
شرعاً حفظى التزام ايلمشدر تكملة رد مختار.

بو كتابده كله جيك اولان موادده وديع لفظى استعمال
ايدلميوب مستودع كلمه سى قوللانديغندن وديع لفظلك بوراده

ذکر و بیانی شوکتابده لازم اوله جفنه مینی دکل ایسه ده ۱۶۳۷
ماده ده ودیع لغتی استعمال قلمشدر.

اسئله واجوبه

۱ سوآل، بو تعریف افرادینی جامع دکلدر. زیرا تعریف
مذکورده کندو مالک تعبیری بولندیغندن مستودعک ودیعه یی
آخره ایداع ایتسنه یعنی ۷۹۱ ماده ده مذکور بولسان ایداعه
مناول اولماز. بناءً علیه اولی اولان شویله دینلمکدر « ایداع ،
بر مالک محافظه سنی آخره احاله ایتکدر . »

جواب، مستودع ودیعه یی ۷۹۱ ماده وجهله مودعک اذنیله
آخره ایداع ایتدکده مجله نك ۱۴۶۰ و ۱۴۶۲ ماده لری حکمنجه
بونده حقیقه ایداع ایدن مستودع اولیوب بلکه مال صاحبیدر.
ومستودع آرده رسولدر .

۲ سوآل، مجله نك ۱۳۷۹ ماده سنده ذکر اولندیغی اوزره
شریکلردن هربری مال شرکتی ایداع ایدیه یلوب حالبوکه ایداع
ایتدیکی مالک بر قسمی کندی مالی دکلدر.

۳ سوآل، مجله نك ۷۸۰ ماده سنده بیان اولندیغی اوزره
مستودع ودیعه یی امیننه حفظ ایتدیره یلوب بو حفظ دخی
ایداع اولدیغی کی مجله نك ۷۸۳ ماده سنده ذکر اولندیغی وجهله
قابل قسمت اولیان وریعه یی متعدد مستودعلردن بری دیگرک
اذنیله حفظ ایدیه یلوب بواذن ایسه ودیعه یی ایداعدر. بناءً علیه
شو تعریف افرادینی جامع اولماز .

بوايکنجی و اوچنجی سو آله جواب، بومسائله مستودعک
ایداعی مودعک دلالة اذنیله اولمغله برنجی جوابده بیان اولندی
اوزره مودع حقیقه مال صاحبدر.

بو اوچ سو آله جمله سنه دیگر بر جواب، تعریف بالمساوی
جائز اولدیغی کی بعض علمایه کوره تعریف بالاعمده و تعریف
بالاخصده جائزدر. بناءً علیه شو تعریف بو علمانک قولارینه منیدر.

ماده ۷۶۵

﴿ عاریت ﴾ یانک هم تخفیفی همده تشدیدى جائزدر.
﴿ مجانا یعنی بلا بدل منفعتی تملیک اولنان مالدرکه ﴾ اول ماله
عاریت دینلدیکی کی میملرک ضمیمه ﴿ معار و مستعار دخی
دینیلور. ﴾

عاریت، لفظی عاره منسوب معناسنه اولمیوب نوبتاشمک
معناسنه اولان عاره لفظنه منسوبدر.

تعریف عاریتده اختلاف فقها

امام شافعی ایله امام کرخی عاریتی ملک غیر ایله انتفاعک
اباحه سیدر دیو تعریف و عاریتک اباحه اولسی اوزرینه شو
دلایلاری ذکر ایلمشلددر.

اولاً: عاریت اباحه لفظیله منعقد اولور .

ثانیاً ، عاریتده بیان مدت شرط اولمیوب حالبوکه بدون ذکر المدة تمليك جائز دکلدر. اجارهده اولدینی کی . « ۴۵۲ » مادهیه باق .

ثالثاً ، عاریتده نهی ومنع عمل وتأثیر ایدوب حالبوکه اجاره کی تمليکده نهی وعمل وتأثیر ایتمز . بناءً علیه معیر ، مستعاری استعمالدن مستعیری نهی ایتسه مستعیر آرتق استعمال ایده میوب اما موجرمأجوری استعمالدن مستأجری نهی ایتسه حکمی اولمیوب مدت اجارهدهینه استعمال ومعقودعلیها اولان منفعتی یامساویسنی یا مادوتنی استیفا ایده بیلور .

رابعاً ، مستعارك آخره اجارهسی جائز اولمیوب حالبوکه اعاره تمليك اولسه ایدی مالك مملوکنی آخره تمليك واجاره ایده بیلیمسی لازم کلوردی زیلعی . نته کیم مستأجر عقد اجاره ایله مالك اولدینی منفعتی آخره ایجار و تمليك ایده بیله جکی کی « ۴۲۸ » مادهیه و شرحه باق .

دیگر علما ایسه اعاره تمليکدن عبارت اولدیغنه قائل اولشلردر که مجله دخی بو قولی اختیار ایتدیکی شو تعریفدن مستفاد اولور . بونلرك دلیللری شونلردر شویله که :

اولاً ، عاریت بروجه مذکور اباحه دن عبارت اولسه ایدی مباح له غیره اباحه ایده میه جکی یعنی مثلاً برکسنه یه طعام اباحه اولندقدده او کسنه آتی غیره اباحه واطعام ایده .

میه جکی جهته مستعیر مستعاری آخره اعاره ایدمه مامک لازم
کلورکن ۸۱۹ ماده ده ذکر اولسدیغی اوزره معارک آخره
اعاره سی جائزدر زیلعی .

ثانیاً، اعاره تملیک اولوب اباحه اولسدیغنه اعاره نك لفظ
تملیک ایله انعقاد ایتسی خصوصی شهادت ایدر بحر .

ایمدی صحیح اولان اعاره نك تملیک اولمسنه دائر بولنان
قول اولوب عامه اصحاب حنفیه بوکا قائل اولدقلری جهته
مجله دخی بونی اختیار ایلمشدر تکمله رد مختار .

اباحه اولدیغنه قائل اولنلرک دلیللرینه شویله جواب
ویریه بیلور .

برنجی یه جواب، عقودده اعتبار مقاصده اولوب یوخسه
الفاظ ومبانی یه دکلدر. «۳» ماده یه باق .

ایکنجی یه جواب، عاریت عقد لازم اولیوب معیر دیلدیکی
زمان رجوع ایدمه یله جکندن جهالت مدت باعث نزاع اولماز.
ایمدی هر جهالتکه باعث نزاع اولمه مذکور جهالت فساد
عقدی ایجاب ایتمز . تسلیم وتسلمه محتاج اولیان مجهولک بیعی
کبی. «۲۰۰» ماده شرحنه باق . اما اجاره کبی معاوضات لازم
اولغله آنده کی جهالت باعث نزاع اوله جغندن بونده تعیین مدت
لازمدر زیلعی . بناءً علیه مجله اجاره ده منفعتی «معلومه» قیدیله
تقیید ایتدیکی حالده بوراده بو قیدی ترک ایتدی .

اوچنجی یه جواب، عاریت عقود لازمده دن اولیوب ۸۰۶

ماده حکم منجه معيرك ديلديكي زمان رجوعه حق اولديغنه مبنی
 نهی عمل و تاثیر ایدر. یعنی بو نهی اعاره دن رجوع اولور.
 دردنجی به جواب، مستعارك آخره اجاره سنك عدم
 جوازی ۸۲۳ ماده شرحنده ایضاح اولنه جنی اوزره لزوم مالا یلزم
 یا خود عدم لزوم مالا یلزم کی غیر جائز برشیئی الحجاب ایده چکنه مبنی
 اولوب یو خسه تمليك اولمديغنه مبنی دکلدر. حتی اعاره تمليك
 اولدینی جهتله مستعارك آخره اعاره سی جائزدر. «۸۱۹» ماده یه باق.

تقسیم التملیکات

تمليك اولتان شی یا مال یا منفعت اولور علی کلا التقديرین
 یابدل مقابلنده یا مجاناً تمليك اولنور.

ایمدی بر مالی بدل مقابلنده تمليك بیع و مجاناً تمليك هبه
 اوله جنی کی بر مالک منفعتی بدل مقابلنده تمليك اجاره و بلا
 بدل تمليك دخی اعاره اولنور.

و تمليك العین بحسب التحقق تمليك منفعتدن اخص مطلقدر.
 زیرا هر نوقت تمليك العین بولنور ایسه تمليك المنفعه دخی
 بولنور. کورلزمیکه بر کیمسسه بر مالی اشترا یا اتهاپ ایله آکا
 مالک اولدقده اول مالک منفعتنه دخی مالک اولوب اما هر نوقت
 تمليك منفعت بولنور ایسه هر حالده تمليك عین بولنسی لازم
 کلر. اعاره و اجاره و وصیت بالمنفعه ده اولدینی کی.

ایضاح قیود

قید اول مجانادر: بوراده کی مجانا قیدی تملیکه مربوط اولوب بحسب المعنی موقعی منفعتی قیدند نصکره در . ایمدی تعریفده کی مجانا قیدیله مأجور خارج قالدیغی کبی منفعتی قیدیله دخی قرض و مبیع و موهوب و عینیه موصابه کبی عینلری تملیک اولنان شیلر خارج قانور. لکن مجانا قیدیله قرض و مبیع خارج قاله جغندن منفعتی قیدیله اخراج له لزوم یوقدر دینیه مز . زیرا تعریف شویله در: عاریت منفعتی مجانا یعنی بلا بدل تملیک اولنان مالدر .

عاریتک بلا بدل اولسنه متفرع بعض مسائل

۱ مسئله، عاریتده بلا بدل اولمق قیدی معتبر اولمغله بر کیمسه ابنیه یاپوبده آنده ساکن و آندن چتدیغنده ابنیه مذکوره عرصه صاحبنه عائد اولمق اوزره دیگر کمنه دن بر عرصه استعاره ایتسه بو عقد عاریت اولیوب اجاره ناله اولور. زیرا مدت واجرت مجهوله در. بناءً علیه بنا مستعیرک ملکی اوله رق عرصه صاحبی یعنی معیر اجر مثل آلور هندیه فی الباب الثانی من العاریة. ۴۵۰ و ۴۶۲ ماده لره باق بحر.

۲ مسئله، مستعارك ویركوسى مستعیر اوزرینه شرط ایداسه عاریت اولمقدن چیقوب اجاره فاسده اولور. زیرا مستعارك ویركوسى معیر اوزرینه اولوب ۸۱۵ مادهیه مقیس دكادر بزازیه فی نوع فی الانتفاع بالدابة المستعارة من العارية.

ویركونك مستأجراوزرینه شرط ایدمسیله برابر اجارهك فاسد اولماسنده حیلله شودرکه ویركونك مقداری بدل اجارهیه ضم اولنهرق بدل اجاره آ كا كوره تسمیه اولئدقدنصكره موجره بدل مذكورك مقدار معینندن ویركونك اعطاسنی مستأجره امر ایدر. مستأجر دخی بدل مذكوردن بوویركویی ادانه وکیل اولور. «۱۴۵۹» مادهیه باق. تكملة رو مختار.

قید ثانى منفعتدر. بوراده منفعت تعبیری مطلق اولهرق ذكر اولئدیغندن تكمیل بر مالك منفعتته شامل اولهجنی كبی جزء شایعك منفعتته دخی شامل وبناء علیه قابل قسمت اولان وقابل قسمت اولیان مشاعك اعارهسی صحیح اولهجنی مستبان اولور. كرك شریكه اعاره ایدلسون وكرك اجنبیه. نتهكیم بر شیء ایکی كشی به اعاره ایتك دخی صحیحدر. كرك مناصفة قوللانمق اوزره اعاره ایدلسون وكرك ثلث وثلاثان اولهرق استعمال اولنمق اوزره اعاره اولنسون وكرك کیفیت استعمال تفصیل اولنیوب اجمال ایدلسون رد مختار فی اول العارية.

سوال، مشاعك اجارهسی جائز اولدیغی ۴۲۹ مادهده بیان

اولنمشیدی. حالبوکه اعاره سی جائز اولیور. اجاره ایله اعاره آره سنده بو مسئلهده فرق نهدر؟

منفعت مستعار: مال مستعارك منفعتی مواد آتیده بیان اولنه جنی اوزره مستعاری قولالانمق و کتاب رهنده بیان قلندیجی اوزره مال مستعاری آخره رهن ایتك کبی شیلر اوله جنی مثللو مستعاری دیگره ایجار ایلنك کبی شیلر دخی اوله بیلور هندیه فی اواخر کتاب العاریه .

تعریف عاریت اوزرینه سوآل وجوابلر

سوآل اول، شو تعریفده بر مالك منفعتی وصیت اولنان مال داخل اولور. شویله که بر کیمسه بن فوت اولور ایسه م شو خانه مده زید بر سنه مدتله او طور سون دیدکده بومعامله وصیت بالمنفعه اولوب تعریف عاریت بوکا صادق اولمغله تعریف مذکور اغیارینی مانع اولماز.

جواب، تملیکدن مقصود فی الحال تملیك اولمغله تعریفك مالی «عاریت . بلا بدل منفعتی فی الحال تملیك اولنان مالدر» دیمك اولوب وصیت مذکورده ایسه فی الحال تملیك بولنیوب تملیك مذکور مابعدالموته مضافدر .

سوآل ثانی، منفعتك هبه سی شو تعریفده داخل اولیور. شویله که بر کیمسه نك دیگر کمنه نك عرصه سنده رقبه طریقدن

تخرد اوله رق حق مروړی اولوبده اول کیمسه بو حق مروړینی
عرصه صاحبنه هبه ایتسه صحیح و بو هبه اسقاط ایکن عاریتک
شو تعریفده داخل اولمغله تعریف اغیارینی مانع اولماز .

جواب ، تملیکدن مقصود بطریق الجواز یعنی مملکتک
دیلدیکی وقت حق رجوعی اولمق اوزره تملیک اولوب یوخسه
بطریق اللزوم تملیک دکدر . حتی ۸۰۶ مادهده بیان اولندیغی
اوزره معیرک ایستدیکی وقت بو تملیکدن حق رجوعی واردر .
ایمدی تملیکدن بوجه بالا تملیک قصد اولندقدده حق مروړی
ابدا هبه کبی منفعتک هبه سی تعریفده داخل اولماز . و بناءً علیه
بو هبه یی تعریف عاریتدن اخراج ایچون بوراده کی تملیک
تعبیرینه لاعلی التأيید عباره سنی علاوه ایتک ایجاب ایتمز عبدالحلیم
فی العاریة .

— ۷۶۶ — ماده

(اعاره ، عاریت و یرمکدرکه) عاریت (و یرن کیمسه یه
معیر دینیلور .) بو تعریف دلالت ایدرکه اعاره مصدر و معیر
ایله قائمدر .

سوال ، عاریتک ماده آنفدهده کی تعریفی نظر مطالعیه
آله رق شو تعریف تفصیل یعنی عاریتک معناسی آنک یرینه
وضع اولندقدده شویله اولور : اعاره ، مجانا یعنی بلا بدل منفعتی

تمليك اولئان مال ویرمکدر: حالبوکه کتب فقهیه ده اعاره
«مجانا یعنی بلا بدل برمالک منفعتی تمليك ایتمکدر» دیو تعریف
ایدلکده اولدیغندن مجله نك تعریف مذکورى فقهانك تعریفلرینه
موافق دکلدر.

مثلاً معیر، شو آتمی شکا اعاره ایتدم دیو بر آتی مستعیره
اعطا وتسليم ایدلکده اعاره فقهایه کوره آتک منفعتی تمليكدن
ومجلاهیه کوره آتی مستعیره ویرمکدن عبارتدر.

خلاصه، اعاره مجله نك تعریفنه کوره مال مخصوصی ویرمکدن
وفقهانك تعریفلرینه نظراً منفعتی تمليكدن عبارت اولوب مجله نك
تعریفی کبی اعاره یی تعریف ایدن کتابی کورمدم.

ماده ۷۶۷

(استعاره، عاریت المقدرکه) عاریت (آلان کیمسه یه
مستعیر دینیلور.)

بو تعریفدن آ کلاشیلورکه استعاره مصدر ومستعیر ایله
قائمدر.

تعریفده کی عاریت لفظی ۷۶۵ ماده ده بیان اولئان معنایه
کوره تفصیل اولندقدده استعاره مجله یه کوره مجاناً یعنی بالابدل
تمليك اولئان مالی المقدر. اما فقهایه کوره مجاناً یعنی بالابدل،
برمالک منفعتی استملاک ایتمکدر.

— باب اول —

(اماناتہ دائر بعض احکام عمومیه بیانندہ در)

آتی الذکر ۷۸۶ ماده ده کی حکم بو کتابده موضوع بحث اولان عموم اماناتہ یعنی لقطہ و ودیعہ و عاریتہ شامل اولدیغی کی دیگر بر طاقم اماناتہ دخی عام اولغله مذکور ماده حقیقہ اماناتک احکام عمومیه سندندر « ۷۶۲ » ماده شرحنه باق . اما بوباب اولده کی مواد سائرہ احکامی احکام عمومیه دن اولسی ظاهر اولیوب ۷۶۹ و ۷۷۱ ماده لر غصب و برنوع امانتدن مرکب اولوب ۷۷۰ ماده دخی لقطه یه مخصوصدر .

۷۶۸ ماده

امانته ایکی قاعده واردر .

قاعده اولی ، (امانت) امین اوزرینه (مضمون دکلدر) شوفرده دن امانت امدی یا تقصیر ایله تلف اولسه بیله مضمون اولمیه جنی آکلاشیله جنی جهتله بو اطلاق مقصود اولمدیغی بیان ایچون بروجه آتی تفسیر ایدیور .

(یعنی امینک صنع) و تعدیسی (و) حفظنده (تقصیری

اولمقسزین) امانت امین یدنده (تلف یا ضایع) یا قیمته نقصان طاری (اولدینی تقدیرده) امینه (ضمان لازم کلمز.) کرك ممكن التحرز اولان سبیدن طولایی تلف اولسون سرقت کبی . وکرك ممكن التحرز اولمیان سبیدن طولایی تلف اولسون . حریق غالب کبی . وامانت مذکوره ایله برابر امینک مالی کرك تلف اولسون وکرك اولسون وامین اوزرینه ضمان کرك شرط ایدلسون کرك ایدلسون «۸۳» ماده شرحنه باق .

ایشته بوندن طولایی امانت غیرمضمون اولان ماله اسم اولوب مثلاً ۷۷۷ مادهده ودیعه ید مستودعه امانتدر دینلیورکه مضمون دکلدردیمکدر رد مختار .

تلف ، فتحین ایله تباه وهلاك معناسنه اولدینی کبی ضایع دخی لفظ ترکی اولوب مثلاً امانت تلف اولماش ایسهده نرهده اولدینی نامعلوم وبنابرین صاحبنه ردی غیرممکن اولقله اولور . یوخسه ضایع لفظی ضیاعدن مأخوذ لفظ عربیدر دینیه مز . چونکه بوحالده ضایع دخی تلف وهلاك معناسنه اوله جغندن بوتقدیرده عطف تفسیر اولمق لازم کله جکی جهتله اومعناسنه اولان یا ایله عطف اولمق جائز اوله ماز . بوقاعده اوزرینه علم فقهک ابواب متفرقه سندن مسائل تفرع ایدرکه بعضیلرینی بوجه آتی بیان ایدرز .

بیوع

- ۱ تسمیه ثمن اولغیه رق سوم شرا طریقیله قبض اولنان مال ید مشتریده امانتدر. « ۲۹۸ » مادهیه باق .
- ۲ سوم نظر طریقیله قبض ایدیلان مال ید مشتریده امانتدر. « ۲۹۹ » مادهیه باق .
- ۳ خیار تعیین ایله مشتریك مقبوضی بولنان ایکی مالدن بریسی یاخود اوچ مالدن ایکیسی ید مشتریده امانتدر. « ۳۱۸ » ماده شرحنه باق .
- ۴ بیع باطل ایله بیع ایدیلوبده باذن البایع قبض اولنان مال ید مشتریده امانتدر. « ۳۷۰ » مادهیه باق .
- ۵ بیع الوفا طریقیله قبض ایدیلوبده قیمتی دیندن زیاده اولان مالک دیندن فضله مقداری ید مشتریده امانتدر. « ۴۰۱ » مادهیه باق .

اجاره

- ۶ مأجور، ید مستأجرده امانتدر. « ۶۰۰ » مادهیه باق .
- ۷ مستأجر فیه، ید اجیرده امانتدر. « ۶۱۰ » مادهیه باق .

رهن

- ۸ رهنك قیمتدن دیندن زیاده اولان مقداری ید مرتهنده امانتدر. « ۷۴۱ » ماده شرخنده کی لاحقیهیه باق .

امانات

- ۹ ید ملتقطده لقطه امانتدر. « ۷۶۹ » مادهیه باق .

۱۰ وديعه يد مستودعه امانتدر . « ۷۷۷ » ماده يه باق .
۱۱ مستودعك امينه ويرديكي وديعه يد امين مرقومه
امانتدر . « ۷۸۰ » ماده يه باق .

۱۲ مستودع ، اميني يديله وديعه يي مودعه ارسال
ايتدكده بو وديعه امين مرقوم ينده امانتدر . « ۷۹۵ »
ماده يه باق .

۱۳ مستودع ، فوت اولوبده تركه سنده عينا موجود
اولان وديعه ورثه سي يذرنده امانتدر . « ۸۰۱ » ماده يه باق .
۱۴ عاريت ، يد مستعبرده امانتدر . « ۸۱۳ » ماده يه باق .

غصب

۱۵ مغصوبك زواڭدي يد غاصبه امانتدر . « ۹۰۳ » ماده
شرحنده بومسئله ايضاح اولنور .

اكراه

۱۶ شرايه مكره اولان كي مسه غيرك مالني بالا كراه اشترا
وبالا كراه قبض ايدر كن بعد زوال الا كراه مال صاحبنه اعاده
ايتك نيتيله قبض ايتسه بومال مشترئ مكره ينده امانتدر .
بومسئله « ۱۰۰۶ » ماده شرحنده تفصيل اولنور .

شرکت

۱۷ شرکت اموالده مشاركلردن برينك حصه سي ديكرينك
ينده امانتدر . « ۱۰۸۷ » ماده يه باق .

۱۸ شریک کردن هر برینک یکنده مال شرکت امانتدر .
« ۱۳۵۰ » مادهیه باق .

۱۹ مضاربك یکنده کی سرمایہ امانتدر . « ۱۴۱۳ »
مادهیه باق .

وکالت

۲۰ وکیلک و رسولک جهت وکالت و جهت رسالتدن
طولانی مقبوضی اولان مال بونلرک یدلرنده امانتدر . « ۱۴۶۳ »
مادهیه باق .

وصیت

۲۱ برمالک منفعتی برکیمسهیه وصیت اولنوبده بعد موت
الموصی اول مال بر موجب وصیت انتفاع ایتک اوزره اول
کیمسهیه تسلیم اولنسه مذکور مال آنک یکنده امانتدر بحر .

استثنا

بوقاعدهدن ۷۷۷ مادهنک مثالنده « یاخود الندن برشی
دوشوبده ساعت قیراسه ضمان لازم کلور » فقره سی مستشار
اشباه .

قاعدۀ ثانیہ ، امانت امینک صنعیلہ یاخود امر محافظهده
وقوع بولان تقصیرندن یاخود مال صاحبک شرعا معتبر اولوب
مخالفتی جائز اولمیان امرینه مخالفتدن ناشی تلف یا ضایع
اولدقدہ امین ضامن اولور .

بوقاعده اوزرینه دخی فقهک ابواب متفرعه سندن مسائل
تفرع ایدر . بعضیلرینی ذکر ایدلم .

بیوع

۱ وفاء مشتری مبیعه تعدی ایدوب تاف اولدوقده ضامن
اولور . « ۴۰۱ » مادهیه باق .

اجاره

۲ مستأجر تعدی یا موجرینک معتبر اولان امرینه
مخالفت ایتدکده ضامن اولور . « ۵۴۵ و ۵۴۶ و ۵۴۷ و ۵۴۸
و ۵۵۰ و ۵۵۱ و ۵۵۲ و ۵۵۶ و ۵۵۷ و ۵۵۹ و ۶۰۲ و ۶۰۳
و ۶۰۴ و ۶۰۵ و ۶۰۶ » مادهلره باق .

۳ اجیر، مستأجرینک امرینه مخالفت یا تعدی ایتدکده
مستأجر فیهی ضامن اولور . « ۵۷۱ و ۶۰۷ و ۶۰۸ و ۶۰۹
و ۶۱۱ » مادهلره باق .

مثلاً برکیمسه حمامه کیروبده ثیابییه البسه سنی براغوب
ایچرویه کیردکدن صکره دیگر برشخص اول کیمسه نك البسه سنی
کیمکده اولدیغنی ثیابی کورمش ایسه ده اول البسه کیانک
بولندیغنی ظنده بولنوب حالبوکه بشقه سنک یغنی اول کیمسه نك
ایدوکی ظاهر اولسه ثیابی آنی ضامن اولور . نته کیم حمامی
اویومقله البسه سرقت اولدوقده اگر قاعدا اویومش ایسه
ضامن اولماز . اما مضطجعاً اویوسه ضامن اولور مجمع الانهر .

کفالت

۴ بری نزدنده برکیمسه نك امانت مالی اولدیغی حالده
اول مالدن ادا ایتمك اوزره اول کیمسه نك بورجه کفیل
اولدقن صکره اول مالی صاحبنه رد ایتسه ضامن اولور .
« ۶۵۰ » مادهیه باق .

رهن

۵ مرتهن ، مرهونه تعدی ایدوب تلف اولسه قیمتی
ضامن اولور . « ۷۴۱ » ماده شرحده کی لاحقیه ایله ۷۵۹
مادهیه باق .
۶ عدل مخالفت ایتسه ضامن اولور . « ۷۵۴ » مادهیه باق .

امانات

۷ مستودع بالاجر تقصیر ایتسه ضامن اولور . « ۷۷۷ »
مادهیه باق .
۸ مستودع تعدی ایتسه ضامن اولور . « ۷۷۹ و ۷۸۲
و ۷۸۳ و ۷۸۴ و ۷۹۴ و ۷۹۹ و ۸۰۱ و ۸۰۲ » مادهلره باق .
۹ مستعیر تعدی ایتسه ضامن اولور . « ۸۱۴ و ۸۱۵
و ۸۱۶ و ۸۱۷ و ۸۱۸ و ۸۲۰ و ۸۲۱ و ۸۲۳ و ۸۲۵ و ۸۲۶
و ۸۲۷ و ۸۲۸ و ۸۲۹ » مادهلره باق .

شرکت

۱۰ شریک ملک تعدی ایتسه ضامن اولور . « ۱۰۸۷ »
مادهیه باق .

- ۱۱ شريك عقد تعدی ایتسه ضامن اولور. « ۱۳۷۹ و ۱۳۸۰ و ۱۳۸۲ و ۱۳۸۳ ماده لره باق .
۱۲ مضارب تعدی ایتسه ضامن اولور. « ۱۴۱۵ و ۱۴۱۶ و ۱۴۲۱ و ۱۴۲۲ و ۱۴۳۰ » ماده لره باق .

وکالت

- ۱۳ وکیل مخالفت ایسه ضامن اولور . « ۱۴۹۴ و ۱۴۹۸ و ۱۵۰۱ و ۱۵۱۵ » ماده لره باق .

ماده ۷۶۹

بر کیمسه کاندوسنک اولیان مالی کندوسی ایچون آلسه غاصب اولور هندیه ورد مختار. کرك عن علم آلسون و كرك عن جهل آلسون .

عن علم آلسنه مثال : بو جهتله ﴿ بر کیمسه یولده یاخود دیگر محله ﴾ صاحبندن ضایع اولمش منقولات و حیوانات کبی ﴿ بر شی ﴾ یعنی بر مال ﴿ بولوبده ﴾ اخذ ایتدکده بونده اوچ احتمال واردر .

۱ ﴿ کندوسنه مال اولمق اوزره اخذ ایتسه غاصب حکمنده اولور ﴾ صاحبی کرك معلوم اولسون کرك اولسون . « ۹۶ » ماده یه باق .

غاصب حکمنده اولسی کندوسنه مال اولمق اوزره آلمق ممنوع و بروجه آتی موجب ضمان اولدیغندن طولاییدر رد مختار.

بوراده غاصب اولور دیمه ویده غاصب حکمنده اولور
 دینلمسنگ سببی شودر که کتاب غصبده غصبک تعریفنده ایضاح
 اولنه جنی اوزره غصب ید محقه نک ازاله سی ویدمبطله نک اثباتی
 ایله حاصل اولوب مذکور شی ضایع اولدینی یعنی مال صاحبک
 یدی اوزرنده بولمدینی جهتله آخذ طرفندن ید محقه ازاله یعنی
 مال صاحبک یدندن نزع ایدلمش اولماز.

(بونک) یعنی مذکور مالی کندوسنه مال اولوق اوزره
 اخذ ایتسی (اوزرینه اول مال) اول کیمسه یدنده (تلف
 یا ضایع اولدینی حالد) تلف یا ضیاعنده (کندوسنگ صنع
 و تقصیری) اولدقده ۹۱۲ ماده حکمنجه ضامن اوله جنی کبی
 صنع و تقصیری (اولسه بیله) ینه (ضامن اولور) ۸۹۱ ماده یه
 باق. بو تقدیرده اول کیمسه مذکور مالی بولدینی محله اعاده
 ایتسه ضماندن بری اولیوب بلکه صاحبنه رد و اعاده ایتدکجه
 ضماننده قالور «۸۹۲» ماده یه باق رد مختار.

عن جهل آلمسنه مثال اول، برکیمسه، دیکرک سوریسندن
 کندو سوریسنه فرار ایدن برقیونی کندی سوریسندندر ظنیله
 اخذ ایتسه ده یدنده ایکن تلف اولسه ضامن اولور. بومسئله
 ۸۸۱ ماده شرحده ایضاح اولنور.

عن جهل آلمسنه مثال ثانی، مستودع یدنده ودیعه بولنان
 البسه نک ایچنه کندوسنگ برروبه سنی قیوبده مؤخرا صاحبک
 طلبی اوزرینه ودیعه یی ویررکن مستودع روبه سنی اونوتوب

مذکور ربه دخی کیدیورسده صاحب ودیعه آکا مطلع اولدندن صکره نزدنده تلف اولسه ضامن اولور. ومودعک جهلی عذر دکدر هندیه وردمختار. «۲» ماده شرحه باق. فیه بحث وهو انه ان کان موضوع المسئلة ان المستودع دفع ثوب الودیعة الی ربها ناسیا فیه ثوبه فقد دفع المستودع ماله الی غیره فکان هذا من قبل ۷۷۱ ماده حیث دفع صاحب المال ماله الی غیره والغیر اخذه باذن صاحبه فكیف یلزم علیه الضمان ولو بعد العلم به الا ان یقال ان المقصود یلزم علیه الضمان لو اخذه بعد العلم به واطلاعه علیه لنفسه واخفاء عن صاحبه فکان هذا من قبل ۹۰۱ ماده او یقال ان المودع اخذ ثوب الودیعة بلا امر من المستودع وکان فیه ثوب المستودع وذهب به فح یلزم علیه الضمان حیث اخذ مال الغیر بلا امر من صاحبه.

«اما» اولشی «صاحبه ویرمک اوزره آدیغی صورتده»
 ۲ «اگر صاحبی معلوم ایسه یدنده صرف» یعنی لقطه اولمق صفتندن عاری «امانتدر» یولده کیدرکن سرخوش یا دیکر بر کمنه دن دوشوب دیکر بر آدمک کندوسندن دوشن کمنه بی دخی کوره رک آدیغی مال کبی. نته کیم بر کیمسه اشترا ایتدیکی خانه نک دیوارنده مدفون پاره بولدقده باقیلور. بایعی کندوسنک ملکی ایدوکنی ادعا ایدر ایسه آنک اولوب مشتری نك آکا ویرمسی لازم کلور. اما بایع کندوسنک اولمدیغی سویلر ایسه اول حالده لقطه اولور رد مختار.

فقره اولی شرح داده ذکر اولندینی اوزره اول شیدین
مقصود، ضایع اولان شیدر. ائمدی ضایع تعبیرله ایکی مسئله دن
احتراز اولنیور.

مسئله اولی، صاحبك قصدا آتدینی و براقدینی شیرلقطه
صایلمیه جنی کبی مال صاحبی معلوم اولورسه آکا رد ایتک
دخی لازم کلز. شویله که فی زماننا باغ و بستان بوزدقلرنده
اصحابی دوکوتی اوزوملری وقارپوز و سائرینی و مزروعات
تارالارنده بعدالحصاد بقیه باشاقلری ترک ایتمکده و بونلری اوتکی
بریکی آلمقدهدر. ائمدی مذکور بقیه لری مالیکلری کیم استر
ایسه آلق اوزره براقشلا ایسه آلمقده بئس یوقدرکه بونلرک
اصحابی معلوم اولدینی حالد مباح حکمندهدر هندیه. نته کیم
کندوسنه فساد تسارع ایدوب آتلمسی معتاد اولان و قیمتی
اولیان شیرلقطه صایلماز. بناء علیه نهر جاریده بولنان الما
و آرمود مثللو اثمار لقطه اولمیوب اصحابی آنلری قصدا آتدقلری
و اصحابی بونلری طلب ایتیه جکی جهتنله بونلری تملک ایچون
اخذا تملک جائزدر عبدالحایم عن الخلاصه. اما نهر جاریده بولنان
آغاچ و کراسته مثللو کندوسنه فساد تسارع ایتیمان و آتلمسی
معتاد اولمیوب ذی قیمت بولنان اشیا لقطهدر. اگر اصحابی معلوم
دکل ایسه.

مسئله ثانیه، ضایع اولمیوبده صاحبی یدنده بولنان شیرل
لقطه دکلدر. شویله که بر کیمسه نك جنبده یا خانه سنده بولمان

بر مالی ینه آکا و یرمک اوزره دیگر کمنه خفیا یا جهرا وقهرا
بلا اذن المالك آله سارق یا غاصب اولور .

بناءً علیه بومالی موجود اولنجه عینا (صاحبنه) وصاحبی
فوت اولمش ایسه جمله ورثه سنه و ورثه سی یوغیسه بیت الماله رد و
(تسایم ایتسی لازم کور.) ۷۹۴ ماده یه باق. اما تلف اولمش
ایسه بلا تعد و لا تقصیر تلف اولنجه ضمان لازم کلیوب فقط
تعدی یا تقصیر ایله تلف اولور ایسه ضامن اولور. ماده آنفه
ایله شرحه باق .

ایشته بویله صاحبی بللو اولان مال، بعض فقههایه کوره
لقطه دکلدرد. بناءً علیه حین اخذده اشهاد و آتی الذکر ۷۷۰
ماده وجهله صاحبنک تحریری ضمننده اعلانه حاجت یوقدر.
دیگر بعض قوله کوره بوده لقطه ایسه ده اعلانه حاجت یوقدر.
ایمدی مجله فقره آنفه ده «صرف» تعیریله قول اولی اختیار
ایلمشدر .

اخذ لقطه ده اختلاف علماء

ضایع اولان مالی صاحبنه و یرمک اوزره اخذک حلنده
اختلاف اولنوب بعض علمایه کوره بواخذده مال غیر اوزرینه
بلا اذن وضع ید اولغله ۹۶ ماده حکمنجه آنک اخذی حلال اولماز.
دیگر بعض علما دخی اخذک حلنه قائل اولمشدر که مجله دخی

بوراده شو ایکنجی قولی اختیار ایلمشدر . یعنی اول مالی صاحبنه ویرمک اوزره اخذایتمک جائزدر . زیرا حدیث عالیده من اصاب لقطه فلیشهد ذا عدل وارد اولمشدر . فقط اخذایتمک یعنی آکا اصلا طوقونماق دخی جائزدر که بعض علمایه کوره افضل اولانده بودر . زیرا صاحبی ضایع ایتدیکی محل و مکانده آنی آرار فتح القدر . نته کیم قریبا ایضاح اولنور .

لکن فقره آنفه شرحنده ذکر اولندیغی اوزره لقطه شول شی اولسه که صاحبی آنی طلب ایتیمه جکی معلوم اولور — قارپوز و نار قبوقلری و سبزه سپور و تیلری کبی — بونلری آتمق اباحه اوله جغندن بولان کیمسه ماده آتیه وجهله اعلان و اشهاده مجبور اولمیه رق بونکله انتفاع ایده بیلوب یعنی مثلا طوپلایوب حیواننه یدیره بیلوب بومسئله ده بین العلماء اختلاف یوقدر . شوقدر وار که بونلر ینه مالیک ملککنده قاله جغندن مال صاحبی آنی اخذ ایدن یدنده بولدقده استرداد ایده بیلور . چونکه بونلری القضا اباحه اولوب یوخسه تملیک دکلدر و اباحه ده ایسه اباحه ایدیلا مال موجود اولنجه مال صاحبک ملکندن چیقیمیوب حق استرداد ی باقیدر فتح القدر .

۳ ﴿واکر صاحبی معلوم دکل ایسه﴾ یدنده — لامک ضمی وقافک فتحیله و بعض رایه کوره قافک سکونیله ﴿لقطه در که ملتقط یعنی بولوب الان کیمسه یدنده امانتدر﴾
لقطه بی ایکی شخص بولدقده ایکسیده تعریف ایدرک لقطه

حکمنده مشترک اولورلر. بو حالده صدر ماده ده کی بر لفظی ایکی یا زیاده کیمسه لر دن احتراز ایچون دکلدر. بلکه بر لفظی تنکیه و تعمیم ایچون اولیور که اول کیمسه هر کیم اولور ایسه اولسون دیمکدر .

لقطه امانت اولمق ایچون اوچ شرط لازمدر

شوفقرده لقطه نك امانت اولدیغی تصریح ایدلمکده اولوب فقط لقطه نك امانت اولسندره اوچ شرط وارددر.

شرط اول، اخذ و رفع اولنورکن صاحبی ایچون آلمقدر که بو شرط مجله ده فقره سالفه ده « صاحبنه ویرمک اوزره آلدینی صورتده » عباره سیله بیان ایدلمشدیر .

شرط ثانی، حین اخذ و رفعده اشهاد اولنمقدر که بو شرط مجله ده مذکور دکلدر .

شرط ثالث، بعد الاخذ اعلان اولنمقدر که بو شرط آتی الذکر ۷۷۰ ماده ده مذکوردر. ایمدی لقطه نك امانت اولسی اوزرینه شو مسائل تفرع ایدر.

لقطه نك امانت اولسی اوزرینه متفرع مسائل

۱ لقطه ید ملتقطه بلا تعد ولا تقصیر تلف یا ضایع یا

قیمته نقصان طاری اولدقه ضمان لازم کلز. «۷۶۸» ماده
شرحده کی قاعده ثانیه باق. حتی ملقط لقطه یدمده بالاعد
ولا تقصیر تلف اولدی دیسه ۱۷۷۴ ماده یه مبنی تصدیق اولنور.

۲ ملقط، «۷۸۰» ماده حکمنجه لقطه یی برای حفظ امنینه
اعطا ایده بیلور. حتی لقطه امین مرقوم یدنده بالاعد ولا تقصیر
تلف اولسه ۹۱ ماده یه مبنی ضمان لازم کلز رد مختار.

۳ لقطه، ملقط تعدیبی یا تقصیرندن طولای تلف یا ضایع
اولدقه ضمان لازم کله جکی کی ملقط لقطه یی صاحبیه تسلیمه
مجبور اولدیغی حالد ویرمیوبده آندنصکره تلف اولسه ضامن
اولور. ماده آنفه شرحده کی قاعده ثانیه ایله ۷۸۷ ماده یه باق
هندیه.

شو تفصیلاتدن آکلاشلیکه بولسان مالک صاحبی کرک
معلوم اولسون و کرک اولسون اول مال ایکی صورتده دخی
امانت اولوب فقط بینارنده کی فرق شودرکه مال صاحبی معلوم
اولورسه اول مال لقطه اولیوب اما معلوم دکل ایسه لقطه
اولور.

تعریف و تفصیل اللقطه

مجله نك شو بیانندن لقطه نك تعریفی آکلاشیلوب فقط

بروجه آتی لقطه نك تعریفنه و بعض احكامنك بیسانه مبادرت اولنور.

۱ لقطه، ضایع اوله رق یرده بولنوب مالکی معلوم و مباح اولمیان مالدر.

ایضاح القيود

قید اول، ضایع، بوتعیریایله منازلده و حافظی نزدنده بولنان مالدر خارج قالدیکه بولنری آلان غاصب یاسارق اولور که غصبک تعریف و احکامی کتاب نامنده کلور. بناءً علیه منازل و قرا جوارنده و مرعالرده اولان یاخود چادرلرده اقامت ایتمکده بولنان کوچه بدلر اطرافنده و قافله نازله جوارنده بولنان حیوانلر لقطه دکلدر. بو جهتله بولنر اخذ اولنه ماز. و بولنری اخذ ایدن غاصب یاسارق اولور. ینه ضایع تعیریایله صاحبنک قصدا آتدینی مال خارج قالب آفا بیان اولندینی اوجمه عطفه آتمق اباحه اولور.

نته کیم بر کیمسه بر مالی بر یره آت

آنک اولسون دیسه بو سوزی اولی اوله بیلورمی

بالذات ایشتمش ایسه شخص مره

ایتمکه صلاحیتی اولدینی کی بالذر اولان تعریفی مستغنی عنه

قنغی شخصک سمعنه واصل

اخذ وتملك ايمكة صلاحيتي واردر. كذلك في زماننا وليه لدره
صاحبان پاره لرك اخذ واستملاكي جائز اولديني كي مارين
وعابرين ايچمك اوزره قپو اوكنه وضع اولنان سودن دخی
ايچمك جائدر .

وكذلك بر كيمسه نك ملكي اوليان بر موضعهه يعني مثلا
مغازده بر شخص ميوه آغاجي غرس ايدرك اثماريني ناسه
اباحه ايتسه آندن يعني اول آغاجك اثمارندن هر كس تناول
ايد بيلور .

قيد ثانی ، مالكي معلوم اوليان ، بو تعبير ايله مالكي معلوم
اولان امانت كي مال خارج قالور كه مال مذکور صاحبنه رد
اولنور. اعلانه حاجت يوقدر . ومجمله نك شو ماده سندن منفيهم
اولديني اوزره بو مال لقطه دكلدر عبدالحليم .

قيد ثالث ، مباح اوليان : بو تعبير ايله دخی اثنای محاربه ده
ام حربي سدن اغتنام قلنان مال خارج قالديكه بوكا غنيمت اطلاق
اولورسه . . . وبو مال ، لقطه دكلدر .

اولور . ، مالدر : بو تعبير ايله لقيط خارج قالور . يعني
اوليوبده چوجق اوله جق اولور ايسه بوكا
تعريف واطلاق ايديلور . بوكا دائر مسائل كتب

مجله نك شو بيانندن لقطه نك

ملتقط نه وقت غاصب وضمین ونه زمان امین اولور

٢ ملتقط عادل ایکی شاهد حضورنده ولقطه نك حین اخذ ورفنده یعنی لقطه یی بولدنی یردن قالدیره جنی زمانده لقطه یی بولوب صاحبنه رد ایتک اوزره آلدیغنی اشهاد ایلر یعنی ایکی عادل و مقبول الشهاده کمنه یه سویلرایسه صاحبنه و یرمک اوزره آلدینی آکلاشیلور تنویر ودر مختار. شاهدلره سویلمکدن مقصد صاحبنه و یرمک اوزره اخذ ایتدیکنی لدی الايجاب اثبات ایدمک اولمغله بو شاهدلر مقبول الشهاده یعنی عادل کیمسه لر اولمیدر عبدالحلیم.

بند ضایع برشی اولمغله کیمکه لقطه یی آرار اولدیغنی ایشیدیرسه کز بنی کوستریکز دیمکه یعنی شاهدلره بویله سویلمکه اشهاد حاصل اولورکه بوکا اشهاد علی اللقطه دینیلور.

لقطه کرک چوق و قیمتدار برشی اولسون و کرک آز و قیمتسز برشی اولسون بو وجهله اشهاد لازم اولوب فقط اشهادده لقطه دیو تصریح ایتک امر لازم اولدیغنی کبی لقطه آلتون یا کموشدر دیو بیان جنس دخی لازم دکدر رد مختار.

اعلان ایله اشهاد یکدیگردن مغنی اوله بیلورمی

اشهاد ، ماده آتییه ده مذکور اولان تعریفی مستغنی عنه

قیلماز. یعنی اشهادیله برابر تعریف مذکور دخی لازم ایدوکی محیطده تصریح ایدلمشدر. فقط امام حلوانی اشهاد اولندقدده آرتق تعریف لازم دکلدر. یعنی حین اخذ و رفعده اشهاد ایدلدکده آرتق آندن صکره برده ماده آتیه وجهله تعریف و اعلان ایتک اقتضا ایتیه جکنی بیان ایللمشدر.

نته کیم تعریف مذکور یعنی اعلان دخی بو اشهادی مستغنی عنه قیلمیوب بناء علیه تعریف مذکورک اجرا سندن اول، حین اخذ و رفعنده اشهادک لزومی متفق علیهدر. یعنی بعداخذ تعریف و اعلان اولندقدده بو تعریف و اعلان اولجه اجرا ایدلیان اشهاد ایچون کافی دکلدر رد مختار فی اللقطه.

محل الاشهاد علی اللقطه

۳ اشهاد علی اللقطه بوجه بالا لقطه نك بولندیغی محلدن حین اخذ و رفعنده اجرا اولنسی لازم اولوب بو موضعه ترك اشهاد ضامنی ایجاب ایدر. حتی ملتقط لقطه نك بولندیغی محلدن حین اخذنده اشهاد مقتدر ایکن اشهاد ایتیموبده محل مذکورى تجاوز ایتسه ضامن اولور بزازیه. مکرکه ملتقط لقطه بی مغازه ده بولمق کی لقطه نك حین اخذ و رفعنده اشهاد ایده جک شاه دلی بوله میه یاخود اشهاد ایتدیکی تقدیرده بر غاصبک لقطه بی ملتقط الندن اخذ ایتسندن خوف اولنه. ائمدی شو

ایکی سبیدن طولایی اشهاد ایدہ من ایسہ ینہ بالاجماع ترک اشهاد
 باعث ضمان اولماز. چونکہ اشهاد صیانت اموال یعنی غیرک مالی
 بالمحافظہ صاحبی ظہورندہ آکا رد و اعادہ ایچون مشروع
 قلندیغی حالہ بویله غاصبک اخذندن خوفی حالندہ اشهاد ،
 مالک ضیاعنہ سبب اولور ہدایہ وفتح القدر. واسباب مذکورہ دن
 طولایی اشهاد ایدہ مدیکی حقنہ یمینی ایلہ سوز ملتقط کدر .
 یعنی ملتقط فلان سبب مشروع دن طولایی اشهاد ایدہ مدیکی
 سویلر ایسہ مع الیمین سوزی قبول اولنور . فقط شاہدی
 بولہ مامسندن طولایی اشهاد ایدہ مدیکی تقدیردہ بعدہ اشهاد
 ایدہ جک شاہدلرہ دست رس اولنجہ ہمان اشهاد ایتسی لازم
 کلوب بوندن صکرہ ترک اشهاد موجب ضماندر .

لکن بلا سبب ترک اشهاد ایکی صورتدہ موجب ضمان دکدر

صورت اولی ، ملتقط بروجہ بالا اشهاد ایتہ مدیکی حالہ
 صاحب اللقطہ ملتقطک التقاطی یعنی لقطہ بی آلمسی کندوسنہ
 رد ایتک ایچون اولوب تملک ایچون اولمدیغی اقرار ایدرسنہ
 ضماندن بری اولور. زیرا بونلرک تصادقلری کندی حقلرندہ
 حجت اولور عنایہ.

صورت ثانیہ، بلا عذر ترک اشهاد ایدن ملتقط التقاطی
 صاحبہ اعادہ ایتک ایچون ایدوکنی ادعا ایلر و صاحب اللقطہ
 تملک ایچون آلمدیغی درمیان ایدر ایسہ امام ابی یوسفہ کورہ
 تملک ایچون آلمدیغنہ یمینی ایلہ قول ملتقط قبول اولنور. زیرا

صاحب اللقطه ملتقط علیهنه ضحانی و وجوب بدلی ادعا ایتمکنده
و ملتقط ایسه انکار ایلنمکنده در که مجله نك ۸ ماده سی حکمنجه
سوز برائت ذقی ادعا ایدنك و ۷۶ ماده سی موجبجه سوز
منکر کدر عنایه . و برده انسان کاملک ظاهر حالی معصیتی
ارتکاب ایتیموب حسبیه ی اختیار ایدنجه دلاله و شهادت
ایدنجه کی جیهله آنک اخذی شرعاً حلال اولان صورته محمول
اولور که اوده صاحبنه رد ایتک اوزره آلوب یوخسه نفسی
ایچون آنا مقدره ایشه شو دلیل شرعی اشهاد مقامنه قائمدر .
امام ابی یوسفک شو قولی وبه ناخذ عباره سیله ترجیح دخی
ایدنشدرد مختار . اما امام اعظم و محدوده کوره ضمان لازم
کلور که ظاهر هدایه بونک ترجیحنه دلاله ایدر . کرک بومادهده
و کرک ماده آتیادهده بویکی مذهبندن برینک اختیار ایدلدیکنه دأثر
بر اشارت یوقدره .

امام اعظم ایله امام ابی یوسف بیننده کی شو اختلافک محلی

معلوم اولمایدور که امام اعظم ایله امام ابی یوسف آزه سنده
واقع اولان شو اختلافک محلی مال صاحبی ایله ملتقط مال
مذکورک لقطه ایدورکنه اتفاق ایتدکلری صورتهدر . اما ملتقط
لقطه اوله رق سکا ویرم ایچون آلدن دیدیکی حالده صاحبی
لقطه یعنی اساساً بندن ضایع اولمیوب بندن غصب ایتدک دیو

اختلاف ایتدکرنده بلا تفصیل ملتقطه ضمان لازم کلور رد مختار
فی اللقطه و خیریه .

لقطه نك بولندینی محله اعاده سی حالنده کی احکام

ملتقط، لقطه یی اخذ و رفع ایتدکدنصرکه ینه محله اعاده
ایتدکده بونده ایکی احتمال واردر .

احتمال اول ، ملتقط لقطه یی صاحبنه ویرمک اوزره
آلدقنصرکه ینه بولدینی موضعه اعاده ایتدکده بونده اختلاف
فقها بولنوب خانیه ده مذکور اولدیغنه کوره ضماندن بری اولور .
کرك بولدینی یری تجاوز ایتدکدن صکره اعاده ایتسون و کرك
تجاوز ایتدن اعاده ایتسون . ظاهر روایت دخی بودر بحر .
وبزازیه نك غصبنده بیان اولدیغنه کوره بولدینی یردن قبل
التحویل و النجاوز اعاده ایدرسه ضمان لازم کلیوب اما
بعدالتحویل اعاده ایدرسه صاحبنه رد و اعاده ایدنجیه قدر
آنك ضماننده اولور .

احتمال ثانی، صاحبنه ویرمک اوزره آلیوب کندوسنه مال
اوله رق اخذ ایتدکدنصرکه آلدینی موضعه اعاده ایتسه ضماندن
بری اولیوب صاحبنه سالمأ تسلیم ایدنجیه قدر تحت مسؤولیت
و ضماننده قالور خانیه نته کیم بوماده نك فقره ثانیه سی شرحنده
بیان اولمشیدی .

لقطه يي آلمق مى آلماق مى اولادر

مجله نك شو فقره ثانيه سى شرحنده اشعار اولندينى اوزره
فقره مذكوره دن آكلاشيلور كه ضايع اولان مالى صاحبنه ويرمك
اوزره آلمق جائزدر. بو مال يعنى لقطه كرك باركيير و طيور كي
حيوان اولسون و كرك آلتون و كهوش كي اشياى سائر و واقعه
اولسون. و ملتقط نفسنه امين ايسه آنى صاحبنه رد ايتمك
اوزره آلمق مندوب و افضلدر. زيرا اوراده ضياعى متوهم اولمغله
صيانة لاموال الناس آنى اخذ و تعريف ايتليدر. نتهكيم آنلره
ايلشمامك يعنى بولندينى محلدن لقطه اولمق اوزره آلماق دخى
جائزدر. زيرا صاحبي ضايع ايتديكي محلد آرار بولور مالنه
دسترس اولور فتح. والا يعنى نفسنه امين اوليوب حرص
و طمعى سبيله صرف و استهلاك ايتسى ملحوظ ايسه اخذ و رفع
ايتمامليدر هدايه و عبدالحليم.

شوقدر وار كه آنلره يعنى مذكور حيوانات و اشياى سائر
بولندقلرى يرده تلف اولملرندن خوف اولننجه آنى بولان
و نفسنه امين اولان كيمسه لقط اوله رق آوب حفظ ايتسى
واجب و لازم ايسه ده شو لزومك تركى ائمى موجب اولوب
يوخسه ضمانى دعوت ايلمز عبدالحليم و مجمع الانهر. يعنى بوكي
ضياعدن خوف اولنان لقطه يي بولندينى حالده آكا طوقونميان

واخذ ايتيمان کيمسه اوزرينه - اول لقطه ضايع اولدقده -
ضمان لازم کلز .

لاحقه

شروط ملتقط حقنده در

ملتقطك عاقل اولمسی شرطدر.

بناءً عليه مجنونك وسكرانك ومدهوشك ومعتوهك التقاطي
يعني لقطه آلمسی صحيح دكلدر. حتى مجنون برمالی لقطه اوله رق
آلوده يدندن بر شخص اخذ ونزع ايتدكدنصكره كسب افاقت
ايتسه شخص مرقومدن لقطه يي دعوى واخذ ايده مز . اما
عاقلك التقاطي صحيح اولوب ملتقطك حر وبالع اولمسی شرط
دكلدر .

بناءً عليه عاقل اولان ملتقط يدندن بر شخص لقطه يي
جبراً اخذ ايتدكدن ياخود ملتقط لقطه يي ضايع ايتمكه ديكر
بر شخص آنى بولدقده ملتقطك آندن ادعا واسترداده صلاحيتي
اولديني سراجيه ده ذكر اولنشددر . زيرا ملتقطك يدى اسبق
اولديني كي ملتقط بعد التعريف كندوسى فقير اولنجه حق
تملكي دخى واردر رد مختار في اللقطة .

وعبدك وصي ميترك دخى لقطه آلمسی جائز اولوب مأذون

ایسه تعریف یعنی ماده آتیه وجهله اعلان کندوسنه عائد اولوب
اما مأذون دکل ایسه تعریف مذکوری مولاسی یا ولیسی
ووصیسی یاپار رد مختار. حتی صبی مرقوم حین اخذ و رفعله
اشهاده مقتدر ایکن اشهاد ایتسه ضمان لازم کلور رد مختار.

ماده ۷۷: ❦

(ملنقط برلقطه بولدیغی) لقطه یی بولدیغی مکانده واسواق
وشوارع وابواب مساجد کی مجامع ناسده منادیلر واسطه سیله
(اعلان ایتدیرر.) یاخود بالذات کندوسی اعلان ایدر.
اعلانک محال مذکوره ده اولمنسک سببی شودرکه اعلاندن
مقصود او مالک صاحبی ظهور ایدوبده آکا تسلیم ایدلسی
ومال صاحبنک مالنه نائل اولسی اولوب بو مواضعده تعریف
اولمنسی مقصود مذکوری زیاده سیله تسهیل ایدر.

غزته لرله اعلان

فقها عصرنده زمانمزرده کی اوراق حوادث غیر موجود
اولغله بو واسطه ایله اعلان حقنده کتب فقهیه ده بحث یوقدر.
لیکن اوراق مذکوره ایله اعلان دخی زمانمزرده جاژدر. فقط
هرکس غزته او قومدیغی کی هریرده غزته دخی بولمندیغی جهله

ينه فقهانك ديدىكى كېى مجامع ناسده منادى واسطه سياه اعلان
دخى ايدىلىدر .

اعلانك زمانى ومدتى ومقدارى

بو ماده ده كى اعلان ، وقت اخنده اولسى لازم دكلدر .
بناء عليه وقت اخندنده اعلان ايدلسه جائز اولدىغى كېى قبل
هلاك اللقطه اولمق شرطيله وقت اخندن صكره اعلان اولنسه
ينه صحيح و معتبردر . و بونىكه ملتقط لقطه يى نفسى ايچون
آليوب صاحبي ايچون اخذ ايتدىكى آكلا شيلور . « ۶۸ » ماده يه
باق عبدالحليم .

مدت اعلان نه قدر ايدوكنده اختلاف اولنش ايسه ده
متون فقهيه ده قبول اولنانه و شمس الاثمه طرفندن اختيار
ايديلانه كوره مدت اعلانك بر سنه اولمق كېى معين بر وقت ايله
مخصص اولماسيدر بلكه شوقدر مدت اعلان ايتديرر كه بوندى
صكره صاحبي مذكور لقطه يى طلب ايتيه جكنه كندوسنجه ظن
غالب حاصل اوله . « يعنى مدت اعلان اعلان ايتدير مك مجبوريتنده
بولنان ملتقطك رآينه تفويض ايدلمشدر » ويا لقطه ده محافظه
ايدلسه فساد بولور شيلردن اوله . اطعمه و اثمار كېى .

ولوا لجه نك بياننه كوره ملتقط بردفعه اعلان ايتدكده دفع

دفع ضمان ایچون کافی ایسه ده واجب اولان تعریف و اعلان
تکرار ایدملیدر فتح .

(و) ملتقط لقطه یی (صاحبی ظهور ایدنجه یه دک نزدند
امانت اولمق اوزره حفظ ایدر .)

لقطه یی بندر دیانه تسلیمی جائز اولان و اولمیان
صورتلر و بشقه صاحبی ظهور ایتدکده کی حکم

لقطه نك صاحبه یعنی بندر دیانه تسلیمی مجوز اولان
احوال اوچدر .

برنجیسی ، (و برکیمسه ظهور ایله) مذکور لقطه
(کندو مالی اولدیغنی) بالینه حضور حاکمه (اثبات)
و حاکم دخی بر موجب بینه اول کیمسه یه تسلیم ایله حکم
(ابدسه) ملتقط لقطه یی (آکا تسلیم ایتمی لازم کلور .)
یعنی ملتقط بوکا مجبور اولور . و بو حالده یعنی برکیمسه لقطه
کندوسنك اولدیغنی ادعا و بالینه اثبات ایدوب آله حق اولدقه
ملتقط اول کیمسه دن کفیل بالمال یا بالنفس طلب ایده مز هدایه .
اما بلا بینه و حکم ملتقط تسلیم لقطه یه اجبار ایدیله مز .
زیرا بونده مدعی صاحب لقطه اولمغله ۷۶ ماده حکمنجه
اقامه بینه ایتمی لازمدر فتح .

برکیمسه بووجهله بالینه اثبات ایدوب حکم حاکمه لقطه یی

ملتقطدن آلدقن صکره دیگر بر شخص دخی چیقوب لقطه
کندوسنک مالی اولدیغنی ادعا واثبات ایتسه ملتقطه آرتق ضمان
لازم کلز . « ۹۱ » مادهیه باق . ومستحقك اول کیمسه دن
دعوی ایتسی لازم کلور .

ایکنجیسی ، برکیمسه ظهوریه لقطه نك نفس الامر
موافق اولان بالجمله علاماتی یعنی مثلاً پاره اولدیغنی تقدیرده
عددی و جنسی و کیسه سنی یعنی پاره نك موضوع اولدیغنی ظرفی
تعداد و توصیف ایتدکه ملتقط رضاسیله مذکور لقطه یی
اول کیمسه یه ویره بیلور . یعنی ویردیکی تقدیرده معاقب اولماز .
لکن بوحالده رضاسیله ویرمه جك اولسه بعض فقهایه کوره
ملتقط ویرمه اجبار ایدیله میوب بینه طلب ایتمه حق واردرکه
فتحك ظاهر عبارته سی بونك ترجیحنه دلالت ایدر .

نته کیم ایکی کیمسه ظهور ایدوبده ایکیسیده لقطه یی
بروجه بالا توصیف ایله برابر هربری لقطه کندوسنك ایدوکنی
بیان ایلر ایتسه بلاجبر ابکیسنده بالاشترک اعطا ایده بیلور .

وبوایکنجی صورتده ملتقط لقطه یی تسلیم ایده جك اولدقده
اول کیمسه دن کفیل طلب ایده بیلوب کفیل ویرمدیکی حالده
تسلیمدن امتناع ایتمه حق واردر .

اوچنجیسی ، برکیمسه ظهوریه لقطه کندوسنك ایدوکنی
بیان وملتقط دخی مذکور لقطه اول کیمسه نك ایدوکنی
تصدیق ایلدیکی تقدیرده اول کیمسه لقطه یی بوجه بالا توصیف

ایتمه بیله ملتقط ینه آکا تسلیم ایدر. فقط شو او چنجی صورتده ملتقط لقطه یی اول کیمسه یه تسلیم ایتمسه تسلیم ایتمکه بعض فقهایه کوره اجبار ایدیلور که محقق کال جبر جهتی ترجیح ایتمدر عبدالحلیم. و بو حالد ملتقط اول کیمسه دن کفیل طاب ایده بیلور. و دیگر بعض فقهایه کوره اجبار ایدیله من.

فقط بالاده مذکور ایکنجی و او چنجی مسئله لرده ملتقط لقطه یی اول کیمسه یه ویره بیلور دیمک صور مذکورده ویردیکی تقدیرده معاقب اولماز یعنی غیرک مالی بشقه سنه تسلیم صورتیله بالتعدی اتلاف ایتدی دیه تعزیر ایدلر و من جهة الآخرة مسئول اولماز دیمک اولوب یوخسه صاحب حقیقیسنه قارشو ضماندن بری اولور دیمک دکلدر.

بناءً علیه ملتقط بوجه بالا بیان علامت ویا تصدیق ملتقط ایله لقطه یی بر کیمسه یه تسلیم ایتدکن صکره دیگر بر شخص چیقوبده لقطه کندوسنک مالی ایدوکنی بالینه اثبات ایدرسه لقطه موجود اولنجه ذی الیددن عینا اخذ ایده بیله جکی کبی تلف اولدینی صورتده اول شخص دیلرسه ملتقطه و دیلرسه اول کیمسه یه یعنی قابضه تضمین ایتدیرر. «۹۱۰» ماده یه باق. قابضه تضمین ایتدیرد کده ۶۵۸ ماده شرحنده ذکر اولدینی اوزره قابض ملتقطه تضمین ایتدیره میوب اما ملتقطه تضمین ایتدیردیکی حالد ملتقط اول کیمسه یه یعنی قابضه رجوع ایده بیلور که صحیح اولانده بودر. زیرا ملتقطک اقرار و تصدیق

حکم حاکم ایله تکذیب ایدلدی. وکوبا بلاق تصدیق تسلیم ایلیمش
وسکره لقطه کندوسنک اولمادیگی آکلاشلیمش کی اولدی فتح.
مجله نك « ۷۹ » ماده سی شرحیه ۱۶۵۴ ماده سنه باق .

فقط بعض فقها دیدیلرکه اظهر اولان بیان علامت ایله
تسلیم ایتدکده رجوع وتصدیق ایله تسلیم ایلدکده عدم
رجوعدر عبدالخلیم . یعنی ایکنجی صورتده رجوع واونجی
صورتده عدم رجوعدر دیدیلر .

استثنا

ملتقط لقطه یی بر شخص ایچون اقرار ایدوبده برموجب
اقراره آکا تسلیم ایله حاکم حکم ایتسندن طولانی تسلیم
ایدلسده صکره بریسی لقطه کندوسنک مالی اولدیغنی بالینه
اثبات ایتسه ملتقطه ضمان لازم کلز .

لقطه نك صاحبي ظهور ایتینجه اولنه حق معامله

ملتقط ، ۷۷۰ ماده ده متنا وشرحا مذکور اولان مدت
اعلان ایتدیکی حالده صاحبي ظهور ایتسه وجوه اربعه آتیه
ایله تصرفده مختردر .

۱ دیار سه مدت مذ کورده دن صکره دخی کندوسی صاحبی
ایچون ایدا حفظ ایدر . و کندوسنک فوتندن خوف ایتدکه
ورثه سی آتی میراثه بالادخال اقشام ایتسونلر ایچون آخره
وصیت ایدر . یعنی یدنده لقطه اولدیغنی بالیان فوتندن صکره
دخی حفظنی توصیه ایلر فتح .

۲ دیار سه مدت مذ کورده دن صکره صاحبنک ظهورنده
آکا رد واعاده اولمق اوزره بیت الماله وضع ایدرکه بیت المالده
دخی لقطانک حفظنه مخصوص بر بیت واردر .

۳ دیار سه مدت مذ کورده دن صکره لقطه بی حاکمه اعطا
ایدر . حاکم دخی قابل اقراض برمال ایسه برملی به اقراض
ایدرکه بوتقدیرده ملتقط دخی استقراض ایتسه جائز اولور .
یاخود حاکم آتی بالمضاربه برملی به اعطا ایلر . و بیعه محتاج
بولنان برشی ایسه ملتقط یا حاکم آتی بیع ایله ثمنی حفظ ایدر .
واکر حاکم صاتمیش ایسه صکره بویعی صاحبی فسخ ایده مز .
اما لقطه قابل فساد برشی ایکن ملتقط آتی صاتمیبوده بوزولسه
ضمان لازم کلر . « ۷۸۵ » ماده به باق .

۴ دیار سه ثوابی صاحبنه عائد اولمق اوزره برفقیره تصدق
ایدرك بووجه به بقدر الامکان حقنی مستحقنه ایصال ایدر .
یعنی ملتقط لقطه نك عیننی صاحبنه ایصاله مجبور ایسه ده عیننی
صاحبنه ایصال ممکن اولمینجه عوضی یعنی ثوابی - صاحبی مجیز
اولور اعتباریله - صاحبنه ایصال ایدر یوخسه غنی به تصدق

ایده میه جکی کبی برغینک صغیر ولدینه یا مملوکنه دخی تصدق
ایده من هدایه و عبدالحلیم .

و ملتقط فقیر اولنجبه کندو نفسنه و کندوسنک فقیر
ولدینه و زوجه سنه دخی تصدق و بیعه محتاج ایسه صاتوب
پاره سنی اولوجهله صرف ایده بیلور . لکن بعض فقهایه کوره
ملتقط فقیر اولوبده نفسنه صرف ایده جک اولدیغنده حا کمدن
اذن آلتی لازم اولوب اذن المقسزین نفسنه صرف ایتک حلال
اولماز دیمشلرایسه ده متون فقهیه نک اطلاقدن آکلاشلدیغنه
کوره بوضورتده نفسنه صرفک حلی اذن قاضیه موقوف
دکدر عبدالحلیم .

وبعد التصدق مال صاحبی ظهور ایتدکده تصدقی مجیز
اولور ایسه ثوابی کندوسنه عائد اولوب بو اجازتک صحتده
لقطه نک ید فقیرده قیامی شرط اولمیوب مستهلک اولسه دخی
اجازت ویره بیلور . واقعا تلف اولان شیئه اجازتک لاحق
اولماسی قواعد فقهیه دن ایسه ده بوقاعده دن اشبو مسئله یعنی
لقطه نک ید فقیرده تلفدن صکره اجازت مسئله سی مستنادر .
شوقدرکه صاحب لقطه قاصر بولندیغی صورتده بونک وایسی
یا وصیسی تصدقی مجیز اوله میوب آتیده ذکر اولنه جنی اوزره
تضمین ایتدیرمی لازم کلور . « ۵۸ و ۸۵۹ » ماده لره باق .
ایشته ملتقط وجوه اربعه مذکوره ایله تصرفه مختار
ایسه ده بو مختاریت مال صاحبنک حقمک ابطالنه باعث اولماز .

بناءً عليه تصدق وبيع صورته مال صاحبك حق تضميني
وارد. شویله که :

تصدقده حق تضمین

ملتقط اجنبی برفقیره یاخود کندوسی فقیر اولمغله نفسنه
تصدقدن صکره صاحبی ظهور ایتسه تصرف مذکوری حاکم
اذنیله اولسه بیله لقطه عینا موجود اولنجه واضع الیددن اخذ
واسترداد ایده بیله جکی کبی مستهلاک اولدقده ملتقطه یا فقیره
تضمین ایتدیرر هدایه .

ملتقطه تضمین ایتدیرر. زیرا ملتقط دیگرک مالنی صاحبک
اذنی اولمقصرین غیره تسلیم ایتشد. « ۹۶ » مادهیه باق .
سوآل ، واقعا صاحبک اذنی اولمقصرین تسلیم ایتمش
ایسهده لکن شرعک اذن و اباحه سیله تسلیم ایتمش وجواز
شرعی ایسه ۹۱ ماده حکمنجه ضمانه منافی بولمش اولمغله
ملتقطه ضمان لازم کلاملی ایدی .

جواب ، شارعدن ثابت اولان تصدقه اذن اولوب یوخسه
ایجاب تصدق دکلدر. یعنی شارع ملتقط اوزرینه لقطه یی تصدق
ایتمنی واجب قلما مشدر بلکه تصدقه یالکیز رخصت و یرمشدر
فتح القدیر .

فقیره دخی تضمین ایتدیرر. زیرا فقیر غیرک مالی آنک
اذنی اولقسزین اخذ ایلدی.

سوال، فقیر لقطه‌ی ملتقطدن قبض ایتدکده آنده اذن
شرعله ملکی ثابت ایکن نصل استرجاع ایدیور. یعنی مال صاحبی
فقیردن نصل تضمین ایله کیرو آله‌بیلیور.

جواب، اذن شرعله ثبوت ملک، ثبوت حق استرداد مانع
دکدر. هبه‌ده اولدیغی کی. «۸۶۴» ماده‌یه باق فتح.

قنغیسی ضامن اولورسه دیکرینه رجوع ایده‌مز. یعنی
ملتقط لقطه‌ی آخر برفقیره تصدق ایتدکنصکره اوده استهلاک
ایدوبده بعده صاحبی ظهور ایدرک فقیره تضمین ایتدیردکده
فقیر ملتقطه رجوع ایده‌مز.

سوال، فقیر مغرور من جهة الملتقط اولغله آکا رجوع
ایتملی ایدی.

جواب، غرور عقد معاوضه یاخود نفعی دافعه عائد اولان
عقد تبرع ضمننده اولمینجه موجب ضمان دکدر عنایه. «۶۵۸»
ماده شرحنه باق.

نته‌کیم ملتقطه تضمین ایتدیردکده ملتقط دخی فقیره رجوع
ایده‌مز. زیرا ملتقط ضمان ایله لقطه‌یه وقت تصدقه استنادا
مالک اولوب کندی مالی تصدق ایتمش کی اولور.

کذا لقطه حاکمه ویریلوبده اوده برفقیره تصدق ایتدکن
صکره صاحبی ظهور ایتدکده دیلرسه حاکمه تضمین ایتدیرر.

زیرا حاکم عائبك اموالی محافظه مأمور اولوب یوخسه اتلافه
دکل قح. و دیلر سه فقیره تضمین ایتدیرر. و قنغیسی ضامن
اولور سه دیکرینه رجوع ایده مز. «۶۵۸» ماده شرحه باق.

بیع ملتقطه و بیع حاکمه حق تضمین

نته کیم ملتقط پاره سنی حفظ ایتمک اوزره لقطه یی آخره
صاندقده بعده صاحبی ظهور ایتسه باقیلور. ملتقط اگر حاکم
امریله صاتمش ایسه ثمن میعی آله ییلور. یوخسه بیعی فسخ
ایده مز. نته کیم بالذات حاکم صاتار ایسه ینه حکم بویلددر. اما
حاکم امری اولمقسزین صاتمش ایسه باقیلور. میبع یدمشتزیده
موجود ایسه صاحبی بیعی دیلر سه مجیز اولور. استرایسه ابطال
ایله مالی استرداد ایدر. «۳۷۸» ماده یه باق. اما میبع یدمشتزیده
تائف اولمش ایسه صاحبی مخیر اولوب دیلر سه باعه تضمین
ایتدیرر که بو تقدیرده بیع نافذ اولور. دیلر سه مشتری یه تضمین
ایتدیرر. «۹۱۰» ماده باق. بو تقدیرده بیع پاطل اولوب
مشتری ویردیکی ثمن میعی بایعدن آلور.

لقطه نك جعل ونفقہ سنی کیم تسویه ایدر

ملتقط، التقاطی مقابلنده جعل یعنی اجرت طلب ایده مز.

كرك مكان قرييدن التقاط ايتسون و كرك مكان بعيددن التقاط ايتسون . ولو كه مال صاحبي «شويله بر مالی ضایع ایتدم کیم بولوب بکا تسلیم ایدر ایسه شو قدر غروش اجرت ویرهیم» دیمش اوله. ۴۴۹ ماده شرحنه باق .

و ملتقط ، خود بخود ایتدیکی انفاقده متبرع اولوب صکره صاحبنه رجوع ایده مز . زیرا کندوسنک ولایتی قاصره در . لکن حاکم امریله ایتدیکی انفاقده متبرع اولیوب صکره مال صاحبنه رجوع ایدر . شویله که ملتقط حاکمه بالمراجعه یدنده شویله بر حیوان لقطه اوله رق موجود اولدیغی بیانیله مؤشراً صاحبی ظهور ایتدکه آکا رجوع ایتک اوزره انفاقه اذنی طلب و مذکور حیوان یدنده لقطه اولدیغی اقامه بینة اثبات ایلر ایسه حاکم دخی اولوجهله انفاقله امر ایدر . لان للقاضی ولایة فی مال الغائب نظرا له وقد یکون النظر فی الانفاق هدایه . هر تقدیر بینه منکر علیه اقامه ایدیلور و بناء علیه حین اقامه بینده مدعی علیه حضوری شرط ایسه ده بو بینه کشف حال یعنی مذکور حیوانک لقطه ایدوکی نزد حاکمه منکشف اولمق ایچون اولوب یوخسه برای حکم اولدیغندن بو بینه نك استماعنده خصم لازم دکلدر فتح . فقط ملتقط بو حیوانک لقطه اولدیغنه بینهم یوقدر دیسه حاکم ملتقطه شهود ثقات مواجهه سنده دیر که «اگر سوزکده صادق ایسه ک آکا انفاق

ایت « حاکم بو وجهله معلق اوله رق اذن ویرمسنک سایی
ایکی ضرردن برینک لزومندن حذردر.

شویله که حاکم صورت قطعیه ده اوله رق انفاقله امر ایتدکده
اول حیوانک مغضوب ظهوری تقدیرنده مالک اوزرینه ضمان
یعنی لزوم نفقه تقرر ایدر که بو حال مالکک ضرردر . و حاکم
انفاقله امر ایتدکده اول حیوانک لقطه چقمسی صورتسده
ملتقط انفاق ایتدکده انفاقنده متبرع اوله رق ملتقط متضرر
اولور عنایه.

انفاقله صورت امر و بو مصرفه مقابل لقطه نك مرهونی

شوراسیده معلوم اولماید که روایت اصحه کوره یالکز
انفاقله حاکم امری صحت رجوعده کافی اولوب بلکه مؤخرأ
صاحبنه رجوع ایتک اوزره انفاقله امر لازمدر. زیرا حاکم
امر رجوع ایله حسبه بیننده متردد اولمغله انفاق مذکورک
جهتنده شک حاصل اولوب حالبو که شک ایله دین اوله ماز .
«۸» مادهیه باق.

• ملتقط جا مک صورت مشروحه وجهله امری اوزرینه
لقطهیه انفاق ایتدکده ملتقط مصرفی لقطه صاحبندن آلور .
ملتقط کرک کندی مالندن انفاق ایتسون. و کرک حاکم امریه
استدانه ایدرک انفاق ایتسون حتی صاحب لقطه مذکور
مصرفی ویرمکن امتناع ایتدکده حاکم مذکور لقطه نی

صاته رق مصرفی تسویه و فضله سنی لقطه نك صاحبنه رد ایدر .
ولقطه نك تلفی شو مصرفك سقوطنی ایجاب ایتمز .
بناءً علیه لقطه ملتقط یدنده تلف اولدقدنصكره صاحبی
ظهور ایتسه حاكمك امریله ملتقطك صرف ایتدیكى نفقه
ساقط اولیوب ملتقط شو مصرفیله ینه صاحب اللقطه یه رجوع
ایده بیلور .

فقط ملتقط، لقطه یه ایتدیكى مصرفی برای استیفا لقطه یی
یدنده امساك یعنی صاحبنه تسلیمدن امتناعه حق بولندیغندن
بووجهله امساك ایتدكدن صكره تلف اولورسه رهنده اولدیغی
اوزره نفقه ساقط اوله جنی هدایه و غرر و ملتفی و درمختار و هندیه
و بیتینده ذكر اولنمش ایكن شرنبالینك و یردیكى ایضاحاته كوره
بو صورتده سقوط نفقه امام زفرك مذهبی اولوب اما ائمه ثلاثه
منك مذهبلرنده بو تقدیرده نفقه ساقط اولماز .

لقطه نفقه سنك صورت تدارکی و انفاك

موقت اولمسی

نفقه اولاد ایلجاردن تدارك اولنور . شویله كه لقطه
حمار و استر و اسب كبی قابل ایلجار شیلر اولنجه ملتقط بولنری
باذن الحاكم بالایلجار اجرتندن انفاق ایلر .
ثانیا ملتقط كنندی مالندن موقه باذن الحاكم انفاق ایلر .

شویله که لقطه ایچون مستأجر بولمیوبده نفقه‌نک یعنی مصرفک حیوانک قیمتی استغراق ایتمنندن خوف اولنور ایسه یاخود لقطه قیون اولوق کی قابل‌الحجار اولمیان حیوان اولورایسه حاکم ایکی اوچ کون اشاق ایتمسایله ملتقطه اذن ویررده صکره صاهررق ثمنی حفظ ایدر . زیرا حاکم امری نظربدر . « ۵۸ » ماده‌یه باق . نته‌کم بیع لقطه مسئله‌سی آنفا‌ایضاح اولندی . و بوئمندن حاکم ایکی اوچ کونلک مصرفی ملتقطه اعطا ایدر . آه‌حق حاکم صامسی دخی ملتقطک بروجه بالا لقطه اولدیغنی اثبات ایتمی ایله مشروطدر درمختار و رد مختار .

غلبه‌لکده آباق قابک دکشمی

برکیمسه ، غلبه‌لکده سهوا‌کندی آباق قابی ترکله دیگرک آباق قابی آله لقطه حکمنده اولمغله صاحبک تحریمی لازمدر . اما غلبه‌لکده بر شخصک آباق قابی قصدا آلنوبده آندن ادنی بر آباق قاب براغلسه اوشخص بو آباق قابیله انتفاع ایده بیلور . زیرا اعلاسنی آلوبده ادناسنی ترک ایدن اول ادنی ایله غیرک انتفاعنه رضا کوسترمش اولور .

لکن ترک ایدیلن آباق قاب آلانه مساوی یا آندن ده اعلا ایسه لقطه حکمنده اولور رد مختار .

ماده ۷۷۱

(بر کیمسه نزدنده دیکرک مالی قضاوا) یعنی بالاتعد ولا تقصیر (تلف) یا خود قیمته نقصان طاری (اولدینی صورته) بونده ایکی احتمال وارددر.

احتمال اول، (اگر) اول کیمسه او مالی (صاحبنک اذنی اولمقیزین آلمش ایسه) کرک بشقه سنک مالی اولدینی بیله رک آلسون و کرک کندی مالی ظنیله آلسون (بهر حال ضامن اولور.) زیرا ۸۸۱ ماده دن دخی اکلاشیله جنی اوزره بو خصوص غصب قیلندن اولغله بونده «۸۹۱» حکمی جاری اولور.

ایضاح القیود

قید اول، آلمش ایسه: بورادده کی آلمق لفظی مطلق اوله رق مذکور اولمسندن آکلاشیلور که «۶۴ ماده یه باق» کرک غیرک مالی اولدینی بیله رک آلسون و کرک بیلمیه رک آلسون ضمان لازم کلور. شویله که بر کیمسه دیکرک مالی کندوسنک ظنیله اتلاف ایتسه ضامن اولور.

مثلا قصار برینه آنک ظنیله غیرک ثوبی و یروب اوده اتلاف ایتسه ایکسیده ضامن اولور. «۹۱۲» ماده یه باق. وجهل عذر دکلدر. و مال صاحبی ایکسندن قنغیسندن استر ایسه

تضمین ایندیره یلور که مستها که تضمین ایتدیرر ایسه، مستهان
قضاره رجوع ایده من. «۶۵۸» ماده شرحه باق. اما قضاره
تضمین ایتدیرر ایسه قضار دخی مستها که رجوع ایدر تکماه
رد مختار.

قید ثانی، بهر حال: بو تعبیر تعمیم ایچون اولوب بو تعمیم
یا «کرك قضاارا یعنی بالاتعد ولا تقصیر تلف اولسون وکرك
تعدی و تقصیر نندن ناشی تلف اولسون» دیمکدر که مثاله قضارا
قیدی کتور نامسی شو تعمیم مقصود اولدیغنه دلالت ایتدیکی
کبی ۸۹۱ ماده ده مصرح اولدیغی اوزره تعمیم مذکور نفس
الامرده صحیح اولدیغنه شبهه یوغیسه ده صدر ماده ده کی بالاتعد
مقامنده مذکور اولان قضارا قیدینه ملایم دوشمز. و بو
تعمیم یاخود «کرك باقق وکرك دیکرینه کوسترک ایچون آلسون
کرك قوللانمق کبی بشقه برشی ایچون آلسون» دیمکدر که
بزازیده مذکور اولدیغی اوزره شو تعمیم دخی صحیح اولوب
فقط عبارده ده بوکا دلالت ایده جک برشی یوقدر. و بو تعمیم
یاخود «من کرك تسمیه اولنسون وکرك اولنسون» دیمکدر که
ظہیریده بیان اولدیغنه کوره بوده صحیح اولور.

احتمال ثانی، «اکر» اول کیمسه یدنده قضارا تلف اولان
اول مالی «صاحبک» صراحة یا دلالة «اذنیله آلمش ایسه
یدنده امانت اولغله» اولوجهله قضارا یعنی بالاتعد ولا تقصیر
تلف اولدیغی حالده «ضامن اولمازه» ۷۸۶ ماده یه باق. شرحا

اشارت اولندیغی اوزره شو فقره ده صدر ماده ده کی قضارا قیدینک معتبر اولدیغنه شبهه یوقدر . نته کیم آتی الذکر ایکنجی مثالدن دخی استفاد اولور .

بو فقره یعنی صاحبک اذنیله آنان مال امانتدر فقره سی برقاعده اولوب اوزرینه علم فقهک ابواب متفرقه سندن مسائل تفرع ایدر . بعضیلرینی ذکر ایدم .

اقراض

۱ بر کیمسه دیگر کمنه دن اللی آلتون اودنج استمکه او کمنه سهوا آلتش آلتون ویرسه ده اول کیمسه اون آلتونی بالا فراز او کمنه یه کوتور مکده ایکن یولده تلف اولسه اون آلتونک بش سدسی قرض اولمغله مذکور بش سدسی ضامن اولور . یعنی بومقدار بورجی بولمغله تأدیه ایتسی لازم کلور . امامت باقیسی ودیعه وصاحبک اذنیله آلتش اولمغله ضمان لازم کلز انقروی .

ادای دین

۲ بر کیمسه نک دیگر کمنه یه اون آلتون بورجی اولمغله اول کیمسه سهواً اون ایکی آلتون ویروده مؤخر قابض مطلع اولسه امام اعظم وابی یوسفه کوره فضله ایکی آلتون امانت اولور خانیه فی الغصب .

بیوع

۳ « ۳۱۸ » ماده شرحنده بیان اولندیغی اوزره خیار تعیین ایله قبض ایدیلان ایکی ویا اوچ مالدن بری مبیع ایتسهده دیگرلری بایعک اذنیله قبض ایدلمکله امانت اولوب قضارا تلف اولسه ضمان لازم کلز .

۴ سوم نظر طریقیله قبض ایدیلان مال ید قابضده تلف اولسه ضمان لازم کلز . « ۲۹۹ » مادهیه باق .

۵ سوم شرا طریقیله تسمیه ثمن اولنیهرق قبض ایدیلان مال امانت اولوب ید قابضده تلف اولسه ضمان لازم کلز . « ۲۹۸ » مادهیه باق .

۶ باطلا صاتیلان مالی مشتری باذن البایع قبض ایتسهده یدنده تلف اولسه ضامن اولماز . « ۳۷۰ » مادهیه باق .

۷ وفاء مبیع مال صاحبک اذنیله قبض ایدلمکله امانت اولغله قابض یدنده قضارا تلف اولسه دیندن فضله سنک ضمانی لازم کلز . « ۴۰۱ » مادهیه باق .

اجاره

۸ مستأجر یدنده کی مأجوری باذن المالك قبض ایتمکله امانت اولغله یدنده قضارا تلف اولسه ضمان لازم کلز . « ۶۰۱ » مادهیه باق .

۹ اجیر خاص یدنده کی مال قضارا تلف اولسه ضمان لازم کلز. «۶۱۰» مادهیه باق.

کفالت

۱۰ کندی یدنده کی امانت مالدن ادا ایتک اوزره کفیل اولان کیمسه یدنده کی مذکور امانت تلف اولسه کفیله ضمان لازم کلز. «۶۵۰» مادهیه باق.

رهن

۱۱ ید مرتهنده مرهون مال بلاتعد ولا تقصیر تلف اولسه اول مالک دیندن فضله سی مضمون اولماز «۷۴۱» ماده شرحه باق.

امانات

۱۲ بر کیمسه برینک اذنیله خانه سنه داخل اولدقده میدانده طوران قدح ایله صو ایچرکن قضارا یدندن قدح دوشوب قیرلسه ضمان لازم کلز. «۷۷۲» مادهیه باق.

۱۳ ید مستودعه و دیعه تلف اولسه مستودع اوزرینه ضمان لازم کلز. «۷۷۷» مادهیه باق.

۱۴ ید مستعیرده عاریت تلف اولسه مستعیر ضامن اولماز. «۷۱۳» مادهیه باق.

شرکت

۱۵ ید شریکده مال شرکت تلف اولسه شریک مرقوم
ضامن اولماز. «۱۳۵۰» مادهیه باق.

۱۶ ید مضاربده مال مضاربه تلف اولسه مضارب مرقوم
ضامن اولماز. «۱۴۱۳» مادهیه باق.

وکالت

۱۷ ید وکیلده جهت وکالتدن طولایی مقبوضی اولان
مال تلف اولسه اول وکیل ضامن اولماز. «۱۴۶۳» مادهیه باق.
(فقط) احتمال ثانیدن درت مسئله مستنادرکه بو مسائلده
مال صاحبنک اذنیله قبض ایدیلان مالک ضامنی لازم کلیور .
برنجی مسئله (سوم شرا صورتند) آلوده یدنده تلف
اولورایسه عدم ضمان شرط ایدلسه بیله (من تسمیه اولندیغی
حالده ضمان لازم کلور.) بزازیه فی اول البیع . بو فقره نك
تفصیلاتی ۲۹۸ مادهده و شرحنده سبق ایلمش اولمغله اورایه
مراجعت اولنه.

ایکنجی مسئله ، سوم رهن صورتیله قبض ایدیلان مالک
ضامنی لازم کلورکه ۷۱۰ ماده شرحنده کی مبحث ثالثده ایضاح
اولنمشیدی .

اوجنچي مسئله ، جهت بيع ايله مقبوض مستثنا اولوب
بو مقبوض سوم شرا صورتيله مقبوض کيدير . شويله که بايع
خطا ايدرك مبيعك غيريسني مشتري يه تسليم ايدوبده مشتري
مرقوم ينده تاف اولسه بدلي ضامن اولور بزازيه .

دردنجي مسئله ، وثيقه طريقيه يعنى رهن صورتيله مقبوض
مستثنا اولوب بومقبوضك دينه معادل مقداري دينيله مضموندر .
« ۷۴۱ » ماده شرحه باق .

۱ (مثلا بر کيمسه صرچه جي) يعنى طباق و کاسه کي
اواني زجاجيه بي صانانك (دکانندن خودبخود) يعنى صرچه جينك
اذني اولمقسرين (بر کاسه آلوده الندن دوشهرك قيرلسه
ضامن اولور .) زيرا اول کيمسه دلالة بوكا مأذون دکلدر
خانه . کرك قضارا دوشمش اولسون کرك تعدی و تقصيرندن
طولايي دوشمش اولسون . والقياس والاستحسان في هذا واحد
وليس ما وضع للبيع نظير دخول الرجل منزل غيره بامر
بزازيه في الثالث في مسائل الضمان من البيع .
بو مثال ، شو ماده نك فقره اوليسنه مثالدر .

۲ (واکر) اول کيمسه (صاحبنك اذنيه آلوده نظر
ايدركن قضا را يره دوشوب قيرلسه ضمان لازم کلز .) زيرا
آني صاحبنك اذنيه آلمش اولغله ينده امانت اولوب امانت
ايسه « ۷۶۸ » ماده حکمنجه مضمون دکلدر .

بو مثال شو ماده نك ايکنجی فقره سنه مثالدر .

نته کیم بر کیمسه یاغ صانون آلق قصدیه بقال دکانسه
گیروبده یاغ کوپنه باقدیغنده انفندن قان سیلان ایدوب قضارا
یاغ ایچنه آغله یاغ دخی مایع اولدیغندن متنجس اولسه نظر
اولور . اکر بقالک اذنیله باقمش ایسه ضامن اولماز . والا
ضامن اولوب بوتقدیرده مذکور یاغ غیر مأ کول ایسه نقصان
قیمتی و مأ کول ایسه تکمیل بدلتی ضامن اولور .

۳ ﴿ واول کاسه ﴾ یعنی فقره ثانیه وجهله صاحبک اذنیله
آنان کاسه ﴿ دیگر بر طاقم کاسه لر اوزرینه ﴾ قضارا ﴿ دوشهرک
قیریلوب آنلری دخی قیرسه بو کاسه لرک ﴾ یعنی اول کاسه نک
دوشدیکی کاسه لرک ﴿ ضمانی لازم کلور . ﴾ زیرا بو کاسه لر آنک
فعلیله بغیر اذن المالك تلف ایدلمشدر . ۹۱۲ ماده یه باق خانیه .
شومادهده صاحبک اذنیله واذنفسر اخذ اولنانلردن بحث
اولنمقده اولوب اول کاسه بونلردن بری اولدیغی جهته شوققره
بوراده استطرادا مذکور اولوب یوخسه بومادهیه مثال دکلدر .
بلکه بو فقره ثالته ۹۱۲ مادهده مذکور اولدیغی اوزره برکمنه
دیگرک کرک کندوسنده و کرک امینی یدنده بولسان مالی کرک
قصدا و کرک من غیر قصد اتلاف ایتسه ضامن اولور . مسئله
عمومیه سنک فرعیدر .

۴ ﴿ آنجق ﴾ باقدیغی ﴿ اول کاسه صاحبک اذنیله
آلندیغی جهته ﴾ امانت اولغله ینه ﴿ یعنی واکر صاحبک اذنیله
آلوبده نظر ایدرکن ... ﴾ فقره سنده اولدیغی کی ﴿ آنک ضمانی

لازم کلز. شو مثال رابع، مثال ثانینک یعنی واگر صاحبک اذنیله آلوده نظر ایدرکن فقره مثالیه سنک عینی اولدیغنه نظراً آروجه ذکرى تکرار اولوب «ینه» تمیزینک استعمالنک موقعنده وقوعی شایان تأملدر.

۵ (اما) بر کیمسه (بو کاسته قاچ غروشه در دیوب دکانچی دخی شو قدر غروشه در آل دیدکن) واول وجهله منن تقرر ایتدکن (سکره انه آلوده قضارا یره دوشه رك) یالکتر کندوسی (قیرلسه) یاخود هم کندوسی قیرلسه همدە دیگر برطاقم کاسه لری قیرسه اول کیمسه جمله قیریلانلری (ضامن اولور). شو مثال فقره ثالثیه یعنی فقط سوم شرا الخ فقره سنه مثالدر.

۶ (کذلک بر کیمسه) شربتچیدن (شربت ایچرکن شربتچینک بارداغنی) قضارا (الندن دوشوبده قیرلسه) مذکور بارداق (عاریت قیلندن اولغله) ۸۱۳ مادهیه منی (ضمان لازم کلز) که بومسئلهده ایکی عقد وارد بری شربتک بیعی دیگریده بارداغک اعاره سیدر بو صورتده شربتی بارداغیله قبض ایدوبده ایچمدن الندن دوشه رك بارداق منکسر اولوب شربت دخی دوکولسه شربتک پاره سنی ویرمک لازمدر. «۲۹۴» مادهیه باق. اما بالاده ذکر اولندیغنی اوزره بارداغک ضمانی لازم کلز.

شو مثال سادس دخی بو مادهنک فقره ثانیه سنک آروجه بر مثالیدر.

۷ (فقط) اول کاسه و بارداق (کندوسنک سؤاستعمالندن ناشی دوشمش) یاخود قصداً آتوب قیرمش (ایسه) ۷۸۷ ماده یه مبنی (ضامن اولور.) ۷۶۸ ماده شرخنده کی قاعده ثانیه یه باق. نته کیم اول کاسه دیگر کاسه لری دخی قیرسه آنلرکده ضمانی لازم کله چکی ۹۱۲ ماده ده مصر حدر.

شو یدنجی مثال بو ماده ده کی قضارا قیدینک محترز عنهی بیان ایچوندر. بونک مسئله عمومیه سی ۷۸۷ ماده ده مذکور اولدینی اوزره «مستودعک تعدی یا تقصیری حالنده ودیعه تلف یاخود قیمتته نقصان طاری اولسه ضمان لازم کلور» ماده سیدر.

۷۷۲ ماده

(دلالة اذن) حکمده (صراحة اذن کبدر.) بو جهته ماده آنفهنک فقره ثانیه سی وجهله صاحبینک اذن صریحیه آنوبده قضارا آلانک یدنده تلف اولان مالک ضمانی لازم کلدیکی کی دلالة اذنیله آنوبده بوجه مذکور تلف اولان مالک ضمانی دخی لازم کلز.

(فقط صراحة نهی) و ممنوعیت (وار ایسه دلالة) یعنی دلالة اولان اذنه (اعتبار اولماز.) ۱۳ ماده یه باق.

فقره اولایه یعنی دلالة اذن صراحة اذن کبی اولسنه
متعدد مثاللر ایراد اولنور .

۱ (مثلا بر کیمسه برینک اذنیله خانهسنه) یا دکانه
(داخل اولدقده میدانده طوران) یعنی صو ایچمک ایچون
قونیلان (قدح ایله صو ایچمکه) اول کیمسه (دلالة مأذوندر).
یعنی آنک اذنیله خانهسنه کیرمش اولسی میدانده طوران مذکور
قدح ایله صو ایچمکه مأذون ایدوکنه دلالت ایلر. (و) دلالة
اولان شو مأذونیتیه بناءً قدحی آلوده (صو ایچرکن قضارا
یدندن قدح دوشوب قیرلسه ضمان لازم کلز). ماده آنفیه باق.
نته کیم مذکور بارداق ایله صو ایچمکه صراحة اذن
ویروبدی ایچرکن بلا تعد ولا تقصیر تلف اولسه ضمان لازم
کلیه جکی کبی . «۸۱۳» مادهیه باق . لکن صو ایچمک ایچون
معد اولیوب مثلا زینت ایچون وضع اولنان چینی کاسه ایله
یاخود دکانه بیع ایچون وضع اولنان بارداقلردن برینی بلا اذن
آلوده آنکله صو ایچرکن قضارا دوشوب قیرلسه ضمان لازم
کلور رد مختار عن الولوجیه .

۲ بر کیمسه حمامه داخل اولوب قورنه طاسنی آلوب
دیگرینه ویرسه ده آنک یدندن دوشوب قیرلسه نه ویرانه نه ده
آلانه ضمان لازم کلز . چونکه اول کیمسه بوکا دلالتیه مأذوندر.
۳ بر کیمسه آنک خانهسنه کیران جماعتدن بری اول خانهده
میدانده طوران آینهیی آلوب باقدقندن صکره دیگرینه ویرسه ده

بعده ضایع اولسه برینه ضمان لازم کلز . زیرا آینه یه باقیه
دلالت اذن واردر . فقط برشی آله که آنی الموق ممنوع اوله
خاص اولور . نته کیم آنفا ذکر اولندی .

۴ اب ، ابنک یا ابن ابک یا زوج زوجنه نک یا زوجنه
زوجک استریله دکر منه کتسه ده استر قضارا تلف اولسه ضمان
لازم کلز . زیرا بوکا دلالت اذن واردر .

۵ برکیمسه دیگر کمسنه یی کندی ایشیچون بریره کوندر مکه
مبعوث یعنی او کمسنه آمرک یعنی اول کیمسه نک حیوانی بلا اذن
صریح بالاخذ را کب اولوب یولده حیوان تلف اولسه باقیلور .
اگر آمرایله مبعوث آره سنده انبساط یعنی تکلیف سزک و ارایسه
ضامن اولماز . و اگر انبساط یوغیسه ضامن اولور .

۶ مشترک بر حیوان خسته لنگله بیطارلر لزوم کی بیان
ایتمریله حصه دار غائب ایکن مشارک حاضر آنی کی ایتدیره
بیلور . بوصورتنده حیوان تلف اولسه ضمان لازم کلز .
۹۱ ماده یه باقی .

۷ راعی ، حیاتندن قطع امید اولنان قیون کبی ما کول
اللحم حیوانی ذبح ایتسه قول صحیح ومفتا بهه کوره استحسانا
ضامن اولماز . زیرا بوکا دلالت اذن واردر . فقط اجنبی ذبح
ایتدکده بر قوله کوره ضامن اولماز . و دیگر قوله کوره ضامن
اولور . اما راعی حمار کبی غیر ما کول اللحم بر حیوانی ذبح

ایسه حال ذبحنده کی یعنی حیاتندن امید منقطع اولدینی حاله کی قیمتی ضامن اولور فصولین .

۸ برکیمسه قصابک کسمک اوزره آیاقلرینی باغلا دینی قیونی ذبح ایسه ضامن اولمیه جنی کپی بر آدم برای طبخ اتی تجرمیه وضع ایدوبده اوجاغه قویدقدن صکره دیگر کسمسه تجرمه نك آلتنه آتش قیوب اتی پشورسه ضامن اولماز .

۹ برکیمسه نك حیواننك اوزرندن یوک دوشمکه دیگر کسمه آتی بلا اذن اول حیوانه یوکلتمکه حیوان تلف اولسه ضامن اولماز . زیرا بونلره دلالة اذن ثابتدر .

۱۰ برکیمسه دیگر کسمه برقاب ایچنده هدیه کوندردکده اول هدیه دیگر قابه بوشالتدقدنه لذتی زائل اولور شی ایسه اوکسمه مذکور هدیه یی اوقابده اکل ایده بیلور . زیرا دلالة بوکا اذن واردر . واکر هدیه فوا کهدن برشی اولمق کپی دیگر قابه بوشالتدقدنه لذتی زائل اولماز شی ایسه اوکسمه مذکور قابده آتی اکل ایده من . مکرکه اوکیمسه ایله اوکسمه بیننده انبساط وتکلیف سزلک بولنه .

۱۱ برکیمسه صدیق یعنی دوست ومحبتک باغنه کوروب صراحة اذنی اولمقسزین بر مقدار شی یعنی مثلا اوزوم تناول ایتدکده باغ صاحبی بوکا واقف اولنجه مبالغات اتمیه جکی معلوم اولور ایسه بونده نأس اولماق موجودر تکمله رد مختار عن الخلاصة فی العاریه .

۱۲ ایکی کیمسه سفره کیدوب بولردن بریسی شول
موضعده فوت اولسه که آنده مراجعت ایدیله جک حاکم بولمیه
حیاتده بولسان رفیقی متوفانک امتعه و حیواناتی بالیغ اثمانی
ورثه سنه کوتوره بیلور . زیراً صاتموبده عیننی نقل ایده جک
اولدقده برچوق مصارف نقلیه حاجت مس ایده جکندن
بوکی مواضعده رفیقی دلالة بیعه مأذوندر . انجق بومساغ بابع
ومشتری معاقب اولمازلر معناسنه اولوب یوخسه بیع مذکور
نافذ اولور دیمک دکلدر « ۳۷۸ » مادهیه باق . و بیعه محتاج
اولیان نقود واشیاسنی دخی حفظ ایچون قبض ایده بیلور .
ویدنده بلا تعد ولا تقصیر تلف اولسه ضمان لازم کیز علی
افندی . « ۹۱ » مادهیه و شرحنه باق .

(فقط صاحب خانه) یا صاحب دکان (اول قدحه طوقمه
دیونهی ایتیشیکن) آندن یعنی نهی مذکوردن صکره (الیه
آلوبده) قضارا یدندن (دوشه رک قیرلسه) ۸۹۱ مادهیه مبنی
(ضامن اولور .) امانهی مذکوردن اول دلالة اولان
مأذونیه بناء آلوبده قضارا تلف اولدقدن صکره نهی ایتسه
نهییک حکمی یوقدر . « ۱۳ » ماده شرحنه باق .

— ❧ باب ثانی ❧ —

(ودیعہ حقندہ اولوب ایکی فصلی شاملدر)

ایدا عک مشروعیتی ادله اربعه دن کتاب ایله ثابت اولمشدر .
آیت جلیله ده ان الله یأمرکم ان تؤدوا الامانات الی اهلها وارد
اولمش واداء الامانات آنحق بعدالقبول اوله جنی درکار بولمشدر .
بناء علیه بو آیت کریمه ایداعک مشروعیتنه دلالت ایدر .

بو آیت جلیله عثمان بن طلحه حقندہ نازل اولمشدر .
شویله که فتح مکه کوننده عثمان کعبه یی کلتدی سطحنه چیقدی
رسول اکرم صلی الله تعالی علیه وسلم آناختاری آرادی عثمانده در
دینلدی صکره آندن استدی عثمان ایسه اعطادن امتناع ایتدی
رسول الله اولدیغکی بلیدم ویرردم دیدی علی رضی الله عنه
عثمانک النی بوکدی آناختاری آلدی قپوی آچدی رسول اکرم
کعبه یه داخل اولدی ایکی رکعت نماز قیلدی صکره کعبه دن
چقدی عموجه لری عباس کعبه آناختارینک کندوسنه اعطاسنی
واولوجه له سقاییت ایله سدانه نک یعنی خادم الکعبه اولمق شرفنک
کندوسنده جمعنی استدی متعاقبا شو آیت جلیله نازل اولدی .
رسول اکرم علی یه امر ایتدی آناختاری عثمانه رد ایتدیردی
وعذر دیتدیردی عثمان ایسه یا علی دمنیجک بکا اجباروا کراهله

آناختاری آلدك اذا وجفا ايتدك شمدي رفق وملايمت
ايدك كلدك ديدى على ايسه شو آيت جليله نك نزولنى خبر ويردى
عثمان دخى اشهد ان لا اله الا الله واشهد ان محمدا رسول الله ديدى
وجبرائيل نازل اولدى سقايت وسدانت ايدا عثمان وااولادنده
اولمى امرالهى مقتضاسندن ايدوكنى خبر ويردى عثمان ايسه
مؤخرا هجرت ايتمكه مفتاحى برادرى شبيهه ويردى بناء عليه
مفتاح وسدانه الى يوم القيمة شبيهه اولادنده بولنه جقدر
شيخ زاده .

وبرده قبول وديعه همجنسسه حفظله اعانه بابندن اولوب
اعانه ايسه وتعاونوا على البر والتقوى آيت جليله سى ايله مندوب
بولنشدر تكمله رد مختار .

علم فقهك موضوعى نكاح وبيع واجاره وكفالت وحواله
ورهن كى افعال مكلف اولوب بناء عليه فقها دخى بعض
مباحثى عنوان مذكور ايله ذكر ايدرك كتاب النكاح وكتاب
اليوع ديدكلى حالده ديكربعض مباحثى افعال مكلفه متعلق
برشيئى عنوان بحث اتخاذا ايله كتاب عاريت وكتاب مأذون
ديديلر . بونك سببى ظاهر دكلدر . ايمدى مجله دخى بو عنوانى
بوراده بويله جه يازمش ايسه ده ظاهر وموضوع علم فقهه موافق
اولان « ايداع حقنده اولود » ديمكدر در متقى وتكملة
رد مختار .

— فصل اول —

(عقد و شرط ایداعه متعلق مسائل بیاننده در)

مجله بیع و اجاره و کفالت و حواله و رهنده شرطی «عقد»
عنوانه ادخال ایدرك «عقد» تعبیری رکن ایله شرطه شامل
قلدینی حالدہ بورادہ اسلوبی تغییر ایلمشدر .

۷۷۳ ماده

ایداعك ركنی ایجاب و قبولدر .
بناءً علیه ۱ (صراحة یا خود دلالة) یعنی ۲ دلالت قوی
و ۳ دلالت فعلی ایله و ۴ کنایه (ایجاب و قبول ایله ایداع
منعقد اولور .) ۱۴۹ ماده یه باق .

ایداعده بعد الایجاب قبول لازم
اولوب اولمیان مسائل

اما یالکز ایجاب ایله ایداع منعقد اولماز . نته کیم آتی الذکر
« واکر دکان صاحبی قبول ایتتم . » فقره سندن دخی آکلاشیلور .
چونکه مستودع اوزرینه و دیعه نك حفظی لازم کله جکندن

بدون الالتزام لزوم اوله ماز . فقط ايداعده ايجابدن صكره قبولك لزومى مستودع اوزرينه حفظك وجوبى ايجون اولوب اما مالك امانت اولمق صفتى اكتساب ايمسى ايجون يالكز ايجاب كافى اولوب بونده قبول لازم دكلدر . حتى ايجاب مذكوردن صكره مال ، مستودع اوله حق كسبه نژنده بلا تعد ولا تقصير تلف اولسه ضمان لازم كلز .

مثلا مغضوب منه غاصبه ، يدكدهكى مال مغضوبى سكا ايداع ايتدم ديسه غاصب ايجابى قبول ايمسه وحتى رد ايتسه بيله ضماندن برى يعنى مال مغضوب يدنده امانت اولمق حالى اكتساب ايتمش اولور بحر وتكملة رد مختار .

ايداعك انعقادى بش وجهله اولور

بو ماده دهكى صراحة ودلالة لفظلى هم ايجاب وهمده قبوله مرتبط اولمق احتماله مبنى انعقاد ايداعده مجله يه كوره درت وجه اوله بيلور .

وجه اول ، صراحة ايجاب و صراحة قبول ايله ايداع منعقد اولور . مجله نك آتى الذ كر برنجى مثالنده اولدينى كى . وجه ثانى ، دلالة ايجاب و دلالة قبول ايله ايداع منعقد اولوب بو دلالت دخى ايكي نوع اولوب نوع اول دلالت قوليدر . مجله نك آتى الذ كر ايكنجى مثالنده اولدينى كى . نوع ثانى ،

دلالت فعلیدر. مجله نك آتی الذکر او چنجی مثالنده اولدینی کبی.
 وجه ثالث صراحة ایجاب ولالة قبول ایله ایداع منعقد
 اولور. مجله نك دردنجی مثالنده اولدینی کبی. وجه رابع
 دلالة ایجاب و صراحة قبول ایله ایداع منعقد اولور. مجله ده
 شوکا مثال ذکر اولنماش ایسه ده بوکا بروجه آتی بر مثال
 ذکر اولنور. شویله که بر کیمسه مالی بر دکانجینک یانسه
 براغوب هیچ برشی سویلمدیکی حالد کتمکده ایکن دکان صاحبی
 ودیعه اولمق اوزره قبول ایتدم دیسه دلالة ایجاب و صراحة قبول
 ایله ودیعه منعقد اولور.

تفصیلات آنفهدن بوماده ده تعدد مثالك اسبابی آکلاشلدینی
 کبی مجله ده کی دلاتدن مقصود دلالت قبولی ایله دلالت فعلیدن
 اعم اولدینی مستبان اولدی.

وجه خامس، کنایة ایداع منعقد اولور. شویله که بر
 کیمسه دیگر کمسنه یه شو اون درهمی یاخود شو روبه بی بکا
 ویر دیسه ده اوده ویرسه ودیعه اولور. زیرا اعطا یعنی دراهمی
 یاخود روبه بی ویرمک هبه یه دخی محتمل ایسه ده ودیعه هبه دن
 ادنی اولمغله ودیعه متیقن و هبه مشکوک و بناء علیه لفظ مذکور
 ایله کنایة ودیعه منعقد اولور در مختار و تکمله رد مختار فی
 آخر الودیعه.

(مثلا صاحب ودیعه شو مالی سکا ایداع ایتدم یاخود
 امانت ایلم دیوب مستودع دخی قبول ایتدم دیسه صراحة)

ایجاب و صراحة قبول ايله ﴿ ايداع منعقد اولور . ﴾ اما مستودع ایجابی رد ایتیشکن صاحب ودیعه و دیعه یی ینه براغوب کتدیکی جهته مستودع حفظ ایتماکله ضایع اولسه ضمان لازم کلز . بلکه بو تقدیرده مستودع اول مالی کندوسنه مال اولمق اوزره آلوب خانه سنه کوتورسه غاصب اولور . « ۷۶۹ » ماده شرحه باق . فقط مال صاحبنه ویرمک اوزره آلوب کوتورر ایسه ذخیره ده مذکور اولدیغنه کوره ینه لایق اولان غاصب اولمقدر . بناء علیه یدنده تلف اولسه لایق اولان ینه ضامن اولور . لکن فصولین صاحبی صاحب ذخیره یه اوچ وجهله اعتراض ایدرک ظاهر اولان ضامن اولماقدر دیمشدر .

وجه اول ، غصب ید مالکک ازاله سندن عبارت ایکن بو مسئله ده ید مالک موجود و بناء علیه ید مذکوره ازاله ایدلمش اولماغله غصب اولماز . بوکا جوابا دیرزکه ازاله تصرفده عصبه مساوی اولان حال و کیفیت حکما غصب قییلندن عد اولنور . « ۹۰۱ » ماده یه باق .

وجه ثانی ، مستودعک اول مالی آلوب کوتورمسی ضرر فصدیله اولیوب بلکه نفع قصدیله در . جواب ، غصبک حکمی نیت ايله تخلف ایتمز . بو جهته بر کیمسه سکرانک جبندن — ضایع اولیوب یارین کسب افاقت ایتدیکنده کندوسنه رد اولمق

اوزره - پاره کيسه سنی آلسه غاصب اولور. « ۲ » ماده شرحه
دخی باق .

وجه ثالث ، مستودعك ردندن صكره مالكك او مالی
ترك ايتمی ايداع ثانی و مستودعك دخی رفع ايلمسی قبول
ضعنی اولوب بناء عليه ظاهر اولان ضمانك عدم لزوميدر .

جواب مستودع صراحة رد ايلمش و صراحة ايسه
ضمينات و دلالتدن اقوی بولنش اولمغله صراحة موجود
اولان يرده دلالته اعتبار اولماز . « ۱۳ » ماده يه باق .

شو ايضاحات ايله صاحب فصولينك صاحب ذخيره
اعتراضی غير وارد اولمغله ذخيره صاحبك لایق اولان ضمان
لازم كلكدر دیدیكى اعتراضدن سالم قالمشدر .

نته کیم بر کیمسه دیگر کمنه دن امرسز او کمنه نك
خانه سنه وضع ایتش اولدینی متاعی او کمنه ، محافظه ایتماكله
ضایع اولسه او کمنه اوزرینه ضمان لازم كلز . زیرا او کمنه
حفضی التزام ایتماشدر . و بدون التزام لزوم یوقدر .

شو قدر وار که او کمنه مذکور متاعی خانه دن طشره
آتسه ده ضایع اولسه ضامن اولور زیرا بو ، اتلافدر . « ۹۱۲ »
ماده يه باق . ۷۶۲ ماده دهده محرر « نته کیم روزکار ايله بر
بو کیمسه نك خانه سنه الح » فقره سیبله بونك بیننده فرق
ظاهر در که مذکور فقره ده مال صاحبك احاله سی اولیوب

اما بوراده مال صاحبك قصدا احواله سی وار ایسه ده دیگرینک قبولی یوقدر .

لکن بر کیمسه دیگرک دارینه دابه سنی ادخال ایتکله خانه صاحبی مذکور دابه یی دارندن اخراج ایتسه ضمان لازم کلز .
زیرا دابه داره مضر در . فقط غیرک دابه سی آخورنده بولنوبده آخور صاحبی آنی طشره چقاروب ضایع اولسه ضامن اولور تکمله رد مختار .

۲) وکذا بر کیمسه خانه داخل اوله رق خانجی به حیوانی زهیه باغلیه یم دیدکده خانجی بر یرکوستروب اودخی) حیوانی (اورایه باغلیسه دلالة) یعنی هم ایجاب همده قبول دلالت قوی ایله اوله رق (ایداع منعقد) و خانجی مستودع (اولور .) تکمله رد مختار . حتی بوندنصرکه صاحبی کلوبده حیوانی اوراده بوله ماقله صور دیغندن خانجی « آرقداشک صوارمق اوزره کوتوردی » دیسه و حالبوکه صاحب حیوانک آرقداشی اولسه حفظده تقصیر ایتش یعنی ودیعه یی بغیر حق الان آدمی کورمش ایکن مانع اولماش اولغله خانجی ضامن اولور .

نته کیم بر کیمسه دیگر کمنه یه شومالکی خانه مک شوراسنه قوی لکن بن حفظی التزام ایتم دیسه ده اوده قویسه اول کیمسه مستودع اولور . زیرا صریحین متعارض اولغله تساقط ایدرک مال مذکور یدنده ودیعه قالور تکمله رد مختار قیه ان

الثانی رجوع عن الاول فالظاهر ان لا يكون ذلك المال وديعة لازم الحفظ الا ان يقال ان بعد الرجوع لما دفع الى داره المال وراى صاحبه و سكت صار قابلا لدالة .

۳) كذلك بر كيمسه مالى بر دكانجيك ياننه براغوب) هيج برشى سويلميه رك يا بوسكا وديعه در ديه رك) (كتسه واو) دكانجى) (دخى كوروب سكوت ايتسه) بونكله فعلا يعنى هم ايجاب همده قبول دلالت فعلى ايله اوله رق ايداع منعقد اوله جنى جهته له) (اول مال دكان صاحبي نرذنده وديعه اولور .) حتى دكان صاحبي وديعه يي اوراده تركله كيدر ك ضايع اولسه ضامن اولور تكمله رد مختار .

بو مثال ثالثه كوروب دينلدى . زيرا كورمينجه دلالت فعلى يا قولى ايله قبول ايدلمش اولماز . بناء عليه او مالى دكانجى محافظه ايتماكله ضايع اولسه ضمان لازم كلز . لكن دكانجى آنى طشره يه آتامز . آتار ايسه ضامن اولور . نته كيم برنجى مثال شرخنده بيان اولمشيدى .

۴) كذلك بر كيمسه رعى ايتك اوزره چوبانه حيوانى ديكر كسنيه يديله كوندروبد چوبان او كسنيه قبول ايتم صاحبه اعاده ايت ديمكله اوده صاحبه اعاده ايدر كن تلف اولسه او كسنيه ده چوبانه ده ضمان لازم كلز . زيرا چوبان قبول ايتماكله امانت منعقد اولما مشدر . و او كسنيه حيوانى

چوبانه تسایم ایده مدیکی جهته رسالتی منتهی اولیوب بناء علیه
ید امانتی باقیدر تکمله رد مختار .

۵ کذلک بر کیمسه حامده صوینوب روبه سنی نیایی به
براقسه اوده کوروب سکوت ایتسه ایداع منعقد اولور . حتی
اول کیمسه حامدن یعنی مغتسلدن چیقدیغنده روبه سنی
بوله مینجه نیایی، بر شخص مذکور روبه یی کیوب کتدی بن
آنی کندوسنک ظن ایتدم دیسه سو آل و تفحص ایتمکی ترکله حفظده
تقصیر ایتمش اوله جغندن ضامن اولور . لکن نیایی بر آدم
روبه کی قالدیر رکن کوردم فقط قالدیرانی سنی ظن ایتدم دیدکبه
یو تقدیرده کتب فقهیه ده ایکی وجه بیان اولنمشدر .

وجه اول ، مستودعه ضمان لازم کلامکدر . زیرا مستودع
وقتا که رافعک مال صاحبی بولندیغنی ظن ایتمشدر حفظده
تقصیر ایتامشدر تکمله رد مختار .

وجه تانی ، مستودعه ضمان لازم کلور که آتفا شرحا بیان
اولسان « حتی بوندنصره صاحبی کلوبده حیوانی اوراده
بوله مامغله خانجی به صور دیغنده الح ، مسئله سی شونک نظیریدر .
۶ » و کذلک بر کیمسه مانی بر دکانجی یانسه بو سکا
ودیعهدر دهرک براغوب کتسه و او دخی کوروب سکوت
ایتسه ایداع منعقد اولور . و اگر دکان صاحبی قبول ایتم دهرک
رد ایتسه ایداع منعقد اولماز .) زیرا عرفا قبول صریحا رد

زماننده ثابت اولماز . ودلالت صریحه معارضه ایده من . « ۱۳ »
ماده یه و شرحه باقی تکمله رد مختار .

بناء علیه بوندنصره اول مال ضایع اولسه دکانجی یه ضمان
لازم کلمز . شو فقره اوچنجی مثاله مرتبط اولوب « او دخی
کوروب سکوت ایتسه » فقره نك مقابلی در .

۷ ﴿ وکذلک برکیمسه مالی و دیعه اولمق اوزره برقاچ
کشینک یانسه براغوب کتسه و آنلر دخی کوروب سکوت
ایتسه لر ﴾ بونکله هم ایجاب همده قبول دلالت فعلی ایله اولان
ایداع منعقد اوله جنی جهتله ﴿ اول مال جمله سنک نزدنده
ودیعه اولور ﴾ یعنی بوجمله براغوب کتمک یعنی وضع
مرقوم ایداع اولور بناء علیه بونلرک جمله سی بردن اول محلدن
قالقوب کتملری اوزرینه مذکور مال ضایع اولسه ۷۸۷
مادیه بناء جمله سی بالاشتراك ضامن اولور لر .

بوفقره ده « آنلر دخی کوروب » دینلدی . زیرا آنلر کورمه لر
سکوت ایله قبول اولیه جفندن اول مال و دیعه اولماز . آنفا
ذکر اولدیفی اوزره برکیمسه دیگر کسنه نك خانه سنه اوکسنه نك
امری اولمق سزین وضع ایتدیکی مالد اولدیفی کی .

ودیعه نك مستودعه تسلیمی ایله مستودعک و دیعه یی

مودعه ردی سیاندر

مجله نك شو مسئله سنیدن آکلاشیلور که و دیعه نك مستودعه

تسلیمی اوکنه قویمقله تمام اولوب انه یا قوجاغنه قویمق شرط
دکدر . نته کیم و دیعه نک مودعه رد و اعاده سی دخی مودعک
اوکنه قویمقله تمام اولوب انه یا قوجاغنه قویمق شرط دکدر .
بناء علیه ابتداء ایداع ایله انتهاء ایداع مساوی اولدی .

مدیون بورجنی داینک قوجاغنه یا یدینه
وضع ایتمسی شرطدر

حالبوکه دینده بویله اولمیوب مدیون بورجنی داینک انه
یا قوجاغنه وضع ایتمسی شرطدر . حتی اوکنه قویمقله بورجنی
اوده مش اولماز تکمله رد مختار .

﴿فقط﴾ اول کشیلر بروجه بالا کوروب سکوت ایتدکارندن
صکره ﴿برر برر اول محلدن قالقوب کتسه لر اک صکره قالان
کیمسه حفظه تعین ایتمکه﴾ اول مال حصرا ﴿آنک نزدنده
ودیعه اولمش اولور﴾ بحر . بناء علیه اک صکره قالان اول کیمسه
دخی اول محلدن قالقوب کتسمکه اول مال ضایع اولسه ضمان
حصرا اول کیمسه اوزرینه لازم کلور . بو مسئله اوزرینه
بروجه آتی سو آل ایراد اولنور .

شویله که فقره اولی وجهله اول کشیلر جملة مستودع
اولدقلری جهته ایچلرندن قنغی بری کیدرسه حصه سنی دیگرلرینه
ایداع ایتمش اوله جغندن ۷۹۰ ماده یه بناء کیدن اوزرینه حصه سی

مقداری ضمان لازم کلمی ایدی. بناء علیه طحطاوی بومسئله‌یی قابل قسمت اولیان و دیعه‌یه حصر ایدرك ۷۸۳ ماده قییلندن صایوب اما و دیعه قابل قسمت اولور ایسه لایق اولان کیدن اوزرینه حصه سنك مقدارینك ضمانی لازم کلمکدر دیمشدر تکمله رد مختار.

ماده ۷۷۴

ایداع عقد لازم دکلدرد. یعنی طرفیندن هیچ بری حقنده لازم اولماز. «۱۱۴» ماده شرحه باق.

بناء علیه ﴿مودع ایله مستودعدن هر برینك نه وقت دیلرسه عقد ایداعی فسخه صلاحیتی واردر.﴾ عقد ایداع كرك برسنه کبی موقت اولسون كرك اولسون. وموقت اولنجه وقت معین كرك حلول ایتیش اولسون كرك اولسون.

مودعك یالکز باشنه اوله رق فسخه صلاحیتی اولدیغی ۷۹۴ ماده دن دخی مستفاد اولور.

بر مسئله ده ایداع عقد لازم اولور

فقط ۷۷۷ ماده نك فقره ثانیه سننده بیان اولندیغی اوزره حفظ، اجرت مقابلنده اولدیغی تقدیرده بو عقد و دیعه عقد حفظ اوله رق بونده مستودع اجیر مشترك اولدیغی جهته عقد

مذکور اجاره اولمغه کتاب اجاره ده بیان اولندیغی اوزره احد طرفین بوعقدی قبل تمام المدة فسخ ایده مز. «۴۰۶» ماده یه باق اقروی و عناه.

ماده ۷۷۵

«ودیعہ نك وضع یدہ» یعنی مستوعك وقت ایداعده آکا وضع ید ایده یلمسنه «قابل و قبضه صالح» و قابل «اولمی شرطدر». زیرا ودیعہ عقد استحقاق اولوب مستودعك ودیعہ اوزرینه یدی اثبات ایتمدن یعنی ودیعہ یی قبض ایلمدن حفظ ایتمی ممکن دکلدر. قبضه صالح عباره سنك وضع یدہ عطفی عطف تفسیردر.

«بناءً علیه هواده کی قوشك» و دکره دوشوب اخراجی ممکن اولیان مالک و فراری حیوانك «ایداعی صحیح دکلدر». چونکه وقت ایداعده بونلر وضع یدہ قابل دکلدر شو جهته مثلا اول قوش ضایع اولدقه مستودع آنی محافظه ایتمدی دیو ضمان ایله محکوم ایدیه مز.

بالفعل وضع یدی یوخسه وضع یدہ
یا لکنز قابیلمی شرطدر

زیلعی کی بعض فقها بالفعل وضع ید شرط اولدیغنه قائل

اولدقلری حالده دیگر بعض فقها وضع یده قابل اولمسی کافی اولوب بالفعل وضع ید شرط اولدیغنه ذاهب اولمشلردر که مجله نك ۷۷۳ ماده سنك ايكنجي واوچنجي مثاللرندن و کذا بوماده نك ظاهر عباره سندن آکلاشیلور که مجله ايكنجي قولى اختيار ايلمشدر تکمله رد مختار ،

ماده ۷۷۶

(مودع ايله مستودعك عاقل و عييز اولملری) و مستودعك فضله اوله رق مأذون اولمسی (صحت عقد و دیعه ده شرطدر). بحر .

اما مودع ايله مستودعك (بالغ اولملری شرط دکلدر .)
(بناء علیه مجنونك وصی غیر ممیزك ایداع و ودیعه یی قبول ایتملری صحیح دکلدر .)

ایمدی مجنونك وصی غیر ممیزك ایداعی صحیح اولما مغله برکیمسه مجنونك یا صبی غیر ممیزك مالی آنلرك ایداعی اوزرینه و دیعه اولق اوزره قبول ایتسه غاصب اولور .

و مجنونك وصی غیر ممیزك و دیعه یی قبول ایلمسی جائز اولما مغله برکیمسه مجنونه یا صبی غیر ممیزه برشی ایداع ایدوبده اوده استهلاك ایتسه بالاجماع ضامن اولماز . یعنی بونده ۹۱۶

ماده ده کی حکم جریان ايلامز. فقط بونلرك ماللرينى وصى و حاكم ايداع ايدە بيلور .

« اما مأذون اولان صبي ميمزك ايداعى و وديعه يي قبول ايلمسى صحيحدر . » كرك اذن عام ايله مأذون اولسون و كرك بالخاصه وديعه مذكورەنك قبولنه مأذون اولسون . « ۹۶۶ و ۹۶۷ » ماده يه باق .

ايمدى مأذون اولان صبي ميمزك ايداعى صحيح اولمغله بر كيمسه آندن بر وديعه آلسه ده بلا تعد ولا تقصير يندە تلف اولسه ضامن اولماز . « ۷۷۷ » ماده يه باق .

و مأذون اولان صبي ميمزك وديعه يي قبول ايلمسى صحيح اولمغله صبي مرقوم آلدغى وديعه يي مجهلا فوت اولسه تركه سندن تضمين ايتديريلور . « ۸۰۱ » ماده يه باق . و استهلاكى كې تعديسيله يا خود حفظده واقع اولان تقصيرى ايله تلف اولسه ضامن اولور . « ۷۸۷ » ماده يه باق . زيرا صبي مأذون تضبيع وديعه دن طولاي ضمان ايله مو آخذە اولنور .

صبي ميمزك وديعه يي ياستقراض و استعاره ايتديكى

مالى اتلاف ايتديكى حالده لزوم ضمانده كى

اختلاف فقها

بوماده ده صبينك مأذون ايله تقيدى احرازيدر . زيرا صبي ميمزك مججورك وديعه يي قبول ايلمسى صحيح دكلدر . حتى

صبي ممیز محجور وديعه ي قبول ايدوبده محافظه ايتماكله يدنده
تاف اولسه بالااجاع ضامن اولميه جني كبي صبي مرقوم اول وديعه ي
حال صباوتنده استهلاك ايتسه - وديعه طعام اولوبده اكل ايتك
كبي - نه في الحال نه ده بعد البلوغ امام اعظم و محمد حضراتنه
كوره ضمان لازم كلز . زيرا صبي محجور ك عادتى تضبيع اموال
اولوب مودع بو عادتى بيلديكي حالده آنى صبي به تسليم ايتسه يله
اتلافه راضى اولمش اولمغه وديعه ي استهلاك ايلمسندن طولاي صبي
موآخذه اولنماز تكمله رد مختار .

بوجهته صبي محجور كندوسنه ايداع اولنان مالى آلق
اوزره بر سارقه دلالت اياسه ياخود بر سارق مذكور وديعه ي
آلور كن كوروب منعه مقتدر اولدينى حالده منع ايتسه ضمان
لازم كلز . حالبوكه مستودع بالغ اولنجه ضامن اولور . « ۷۸۷ »
ماده يه باق . اما بعد البلوغ استهلاك ايتسه ۹۱۲ ماده يه بناء
ضمان لازم كلور .

ينه بوجهته صبي محجوره بر مال ايداع اولنوبده قبل البلوغ
مجهلا وفات ايتسه ضمان لازم كليه چكى كبي بعد البلوغ وفات
ايلسه ضمان لازم كلز . مكر كه بعد البلوغ وديعه يدنده موجود
اولدينى اثبات اولنه . حالبوكه بالغ اولنجه ضمان لازم كلور .
« ۸۰۱ » ماده يه باق .

بونده معتوه صبي كيدر .

امام ابى يوسف رحمه الله تعالى به كوره صبي محجوره بر مال

ایداع اوانسوب اوده استهلاك ایتسه ضمان لازم کلور . امام شافعی دخی بوجهله اجتهاد ایلمشدر .

مجاهده بوایکی قولدن برینک ترجیحنه دلالت ایده جاک برشی یوغیسه ده امام اعظم قولی خصوصیه امامیندن بری برابر بولندیغی حالده عند الفقهاء مرجح طوتیلور .

صی محجوره برمال اودنج یا عاریت ویریلوبده یا بیع وتسلیم قلموبده صی مرقوم آنی اتلاف ایتسه بوصورتلرده دخی اختلاف مذکور جاری اولور .

اما صی محجور من غیرسبک الایداع والاقراض غیرک مالنه تعدی ایتسه ضامن اولور .

بوجهتله صی غیرک مالنی استهلاك ایتسه ضامن اولور . وصی محجور اولسنک بونده تأثیری یوقدر . زیرا حجر اقوالده جریان ایدوب یوخسه افعالده حجر جریان ایلمز . بناء علیه بومسئله ده صی مرقومه بالاتفاق ضمان لازم کلور . شو شرح ۷۷۸ ماده سی شرحیه مجله نك ۹۱۶ ماده سنه منافی دکلدر .

ینه بوجهتله برصی محجور بلا اذن غیرک مالنی دیگر صی محجوره ایداع وبوجهله ایداع ایدن ایله قبول ایده نك ایکسیده تعدی ایدوبده تلف اولسه مال صاحبی مذکور صیلردن یعنی دافع ایله آخذدن قغیسندن استر ایتسه تضمین ایتدیره بیلور تکمله رد مختار .

من غیرسبک الایداع اتلافیه بعد الایداع اتلاف بیننده فرق

ظاهر در . شویله که بر کیسه صبی محجوره مالی ایداع ایتدکده
آنفا ایضاح اولندیغی اوزره اتلافه دلالة اذن ویرمش اولوب
اما بلاسبق الایداع اتلاف ایتدکده بونده اتلافه اذن یوقدر .

— فصل ثانی —

(ودیعه نك احکامی و ضماناتی بیاننده در .)

ضماناتك احكامه عطفی عطف الخاص علی العامدر . و دیعه نك
باشلوجه اوچ حکمی واردر .

۱ مالک ید مستودعه واجب الحفظ امانت اولمسیدر که
۷۷۷ ماده ده ذکر اولنیور .

۲ عند الطلب لزوم رد و اعاده در که ۷۹۴ ماده ده بیان
اولنیور .

۳ و دیعه یی قبولك مستحب بولمسیدر بحر . بواوچنجی
حکم اخروی اولغله مجله ده ذکر اولنیور .

ماده ۷۷۷

(و دیعه ید مستودعه) لازم الحفظ (امانتدر .)
بوحالده اوچ شی بیلمك لازمدر . برنجیسی حافظ وایکنجیسی

محل حفظ و اوچنجیسی کیفیت حفظدر. ایمی دی برنجیسی ۷۸۰
مادهده وایکنجیسی ۷۸۱ مادهده و اوچنجیسی ۷۸۲ مادهده
بیان اولنیور .

﴿ بناء علیه مستودعك صنع و تعديسی و حفظده تقصیری
اولقسزین ﴾ و دیعه کلا یا بعضا و قسما ﴿ تلف یا ضایع اولسه ﴾
مثلا و دیعه نك کلیسی یا بعضیسی سرقت اولنسه ﴿ ضمان لازم
کلز ﴾ یعنی خساری مودعه عائد اولور. «۷۶۲» ماده شرحنده کی
قاعده اولایه باق . زیرا صلی الله تعالی علیه وسلم لیس علی المستعیر
غیر المغل ضمان ولا علی المستودع غیر المغل ضمان بیور مشدرکه
غلول و اعلال خیانت دیمکدر. و برده ایداعک مشروعتی احتیاج
ناسه بناء تجویز اولمشیکن مستودع اوزرینه ضمان لازم کلسه
ناس قبول و دیعه دن امتناع ایدر لر و بوحالده تعطیل مصالح لازم
کلور تکمله رد مختار .

مستودع و دیعه بندن دوشدی و یا و دیعه یی دوشوردم
دیعی بیننده فرق اولیوب ایکیسیده بلا تعد ولا تقصیر ضایع
اولد یغنی اعدادن عبارتدر. ۶۰۷ ماده شرحنه دخی مراجعت اولنه.

و دیعه نك امانت اولسنه متفرع

مسائل عدیده

۱) مسئله ، بر کیسه دیکر کسنه یه بر مال و یرو بده بونی

بوکون فلان شخصه ویر دیشیکین اول کون شخص مرقومه ویر مامکله یدنده تلف اولسه مستودع یعنی اول کمنه مذکور مالی شخص مرقومه ویر مکله « پکی » دیمسیله مجبور اولدیغندن و مال مذکور دخی و دیعه ایدو کندن ضمان آنک اوزرینه لازم کلز.

۲ مسئله ، ید مستودعه کی و دیعه استر بلا تعد ولا تقصیر ضایع اولمغله مستودع مودعه « سنک استریکی بولوب اعاده ایدنجیه قدر قولان » دیو کندی استری ویر سه ده شو استر مودع یدنده بلا تعد ولا تقصیر تلف اولسه و صکره مستودع ضایع اولان استری بولوب اعاده ایلسه مودع تلف اولان استری ضامن اولماز .

۳ مسئله ، برکیمسه دیگرندن الی آلتون قرض استمکه مقرض دخی غلط ایدرک التمش آلتون ویر دیکنه مستقرض مؤخرًا مطلع اولدیغنده اون آلتونی آیروب مقرضه اعاده ایدرکن یوله دوشورسه اون آلتونک بش سدسی قرض اولمق جهتیه مقرض ضامن اولوب اما بر سدسی ینه صرف و دیعه اولمغله ضمان لازم کلز . و کذا الوهلاک الباقی تکمله رد مختار .

۴ مسئله ، و دیعه نک کلیسی تلف اولدیغنی مستودع ادعا ایتدکده « ۱۷۷۴ » ماده یه مبنی سوز مع الیمین کندوسنک اولدیغنی کبی بعضیسی تلف اولدقده تلف اولدیغنی مقدارده ینه سوز مع الیمین مستودعکدر . فقط مستودع یمیندن نکول ایتدکده شو نکول و دیعه نک عینا موجود اولدیغنی اقرار عد

اولنوب بناءً عليه مستودع ودیعه یی اظهار یاخود تلفی اثبات
ایدنجیه دکن اجبار وحبس اولنور . وایکسیده اقامه ینه
ایلدکده یعنی مستودع بلا تعد ولا تقصیر تلف اولدیغنه یارد
واعاده ایلدیکنه مودع مستودعک ودیعه یی اتلاف ایلدیکنه
اقامه ینه ایتدکده کذلک مستودعک ینه سی ترجیح اولنور .
۵ مسئله ، ودیعه مستودع یدنده ایکن بلا تعد ولا تقصیر
قیمته نقصاناتق طاری اولسه مستودعه ضمان لازم گلیه جکی کبی
ودیعه یی آخر بر شخص استهلاک ایتسه ینه مستودعه ضمان لازم
کلیوب بلکه ضمان شخص مرقومه لازم کلور . « ۹۱۲ »
ماده یه باق .

۶ مسئله ، مودع مستودعه بنم اذمنسر ودیعه یی سن
استهلاک ایتدک دیوومستودع مودعه سن استهلاک ایتدک یاخود
سنک امرکله فلان کسنه استهلاک ایتدی دیواختلاف ایتدکارنده
سوز مستودعکدر .

۷ مسئله ، والی کری نهر ایچون یعنی ۱۳۲۱ ماده ده
محرر اسباب مثللو مشروع بر سبیدن طولای بر کیمسه دن پاره
آلوبده اول پاره یی بر شخصه ایداع ایدرک مستودع یدنده
بلا تعد ولا تقصیر ضایع اولدقده والی اکر کندی یاخود کری
نهر نامی ایله ایداع ایتش ایسه عمومک مالندن تلف اولور .
واکر اول کیمسه نک نامیه ایداع ایتش ایسه « ۱۴۶۰ » ماده یه
باق « خساری خاصة آکا عائد اولور هندیه .

۸ مسئله ، برکیمسه نك ديكر کمسنه به بيك غروش ديني اولوبده اول کيمسه اولا بيك غروش ثانيا بيك غروش دها ياخود دفعة ايکي بيك غروش ويردکدن صکره بيك غروش آله جغه طوت ديوب آله جق ايچون شو بيك غروشدر ديو تعيين ايتدين مذکور ايکي بيك غروش داین نزدنده تلف اولسه امانه تلف اولور . اما شو بيك غروش سنك الاجغك ايچوندر ديو تعيين ايلمش ايسه بيك غروش اله جنی ايچون آلمش عد اولنوب ديكر بيك غروش امانه تلف اولور هنديه .

مستودعه ضمان لازم گلز دينلمسندن اوچ حکم
مستفاد اولور

بومادهده عدم ضمان مطلق اوله رق ذکرندن اوچ حکم
مستفاد اولور .

حکم اول ، وديعه بروجه مذکور يعنی بلا تعد ولا تقصير تلف اولديغی صورته ضمانی شرط ايدلسه بيله شرط مذکور باطل اولوب ينه ضمان لازم گلز . « ۸۳ » ماده شرحنه باق .
حکم ثاني ، وديعه يالکز اوله رق يعنی مستودعك مالی برلکده اوليه رق ضايع اولمسيه يعنی مثلا وديعه چالسه ایدی مستودعك مالی برلکده اوله رق چالنور ایدی مادام که مستودعك مالی چالندی وديعه دخی چالنامشدر ديو مستودع اتهام وضمان ايله محکوم ايديله من .

حکم ثالث، کړک ممکن التحرر اولان سیدن طولای تلف
یا ضایع اولسون وکړک ممکن التحرر اونیان سیدن طولای
تلف یا ضایع اولسون ایکی صورته دخی ضمان لازم کړز. ۶۰۷۵
ماده شرحه باقی بحر .

بناءً علیه مستودع و دیعه ضایع اولدی اما فصل ضایع
اولدیغنی بیلمم دیسه سوز مع المین کندوسنک اولوب ضامن
اولماز . زیرا امیندر .

فقط مستودع و دیعه بی یامه قوبدم صکره اونوتدم قانقدم
دیسه امر محافظه نقصیر ایتش اولدیغنی اقرار ایامش
اوله جفندن ضمان لازم اولور تکمله رد مختار .

(فقط) بر مال (اجرتله حفظ ایچون ایداع ارنش
ایسه سرقت کی ممکن التحرر اولان بر سیبله تلف یا ضایع
اولدیغنی صورته) اول مال مستودع اوزرینه (مضمون اولور).
لکن ممکن التحرر اونیان بر سیبله تلف اولورسه حریق
غالب کی ینه ضمان لازم کړز .

بو فقره دن آکلاشیلورکه مودع و دیعه کندی مالی اولسه
بیله حفظ و دیعه مقابنده مستودع ایچون اجرت شرط ایتسه
حییج و مودع اوزرینه مذکور اجرتک اعطاسی لازم کلورکه
اجاره آدمی قیبلندن اولور .

حتی غاصب مال مفصونی آخره ایداع ایدوبده حفظ

مقابلنده اجرت شرط ایتسه صحیح اولوب اجرتک ایفاسی .
غاصب اوزرینه لازم کلور .

اجیر مشترک ایله مستودع بالاجر آره‌سنده‌کی فرق

سوال ، اجیر مشترک یدنده مستاجر فیه تلف اولدقده
امام اعظم رحمه الله تعالی حضر تفرینه کوره ضمان لازم کیه‌جکی
۶۰۷ ماده و شرحنده بیان و ۴۸۲ ماده‌سنده‌کی « و بو وجهله
حبس ایدوبده یدنده مال تلف اولسه الح » فقره‌سیله ۶۰۹
ماده‌سنده « اما آنک آرقه‌سی صره الح » فقره‌سنده ضمان
لازم کلامسی امام مشارالیهک مذهبی اولوب اما امامین حضراتنه
کوره مذکور فقره‌لرده ضمان لازم کله‌جکینه نظراً مجمله‌نک
کتاب الاجاره‌سک باب ثامنک اوچنچی فصلنده اجیر مشترک
عدم ضماننه متدائر مسائل امام اعظم مذهبنه منی ایدوکی
بیان اولمشیدی . ائمدی شو فقره‌ده ضمان لازم کله‌جکی یازلمسی
اجیر مشترکده‌کی امام اعظم مذهبنه مخالف و امامین مذهبنه
موافق ایدوکی یعنی مستودع بالاجرده دخی سالف البیان
اختلاف جاری بولندیغی ظن اولنورکه زیلعی و هدایه و بزازیه‌ده
بروجه مذکور یعنی بونده دخی اختلاف جریانی محرردر . یعنی مذکور
کتب فقهیه‌ده اجرتله حفظ ایچون برمال ایداع اولنوبده و دیعه

مستودع یدنده تلف اولدقده بونده دخی مذکور ۶۰۷ ماده شرحنده بیان اولان اختلاف جاری اولدینی ذکر اولمشدر. شو حالده کتاب الاجارده اجیر مشترک عدم ضماننه دائر اولان مسائل امام عظم مذهبی اوزرینه بنا اولدینی حالده شو فقرده امامین مذهبی قبول اولمش و بناء علیه بر مسئلهده یکدیگره مخالف ایکی مذهبک ایکیسی دخی اختیار ایدلمش اولور.

جواب، اجیر مشترکده کی اختلاف مستودع بالاجرده جاری اولیوب مستودع بالاجر ممکن التحرز اولان شیله تلف اولان ودیعه یی بالاتفاق ضامن اولور. مستودع بالاجر ایله اجیر مشترک بیننده فرق شودرکه اجیر مشترکده عند الامام معقود علیه عمل اولوب مستاجر فیهک حفظی تبعاً واجبدر. اما اجرتله مستودعه حفظ مقصود و بدل مقابلنده واجبدر. بو جهتله مستودع بالاجریدنده ممکن التحرز اولان بر سببله ودیعه تلف اولسه آنی بالاتفاق ضامن اولور.

ایمدی برکیسه حمامه کیرونده ناطوره البسه سنی بر اقدقه یدندن سرقت اولننجه نظر اولنور. اگر البسه سنی محافظه ایچون اجرت شرط ایتش ایسه ضامن اولور. و الا اولماز. واقعا حمامه کیرن اول کیسه حمامچی یه بر اجرت ویره جکسهده بو اجرت حمام ایله انتفاع مقابلنده اولوب یوخسه محافظه ثیاب مقابلنده دکدر تکمله رد مختار.

وديعه نك مضمون اولمديغنه مثاللار

مثال اول ، ﴿ مثلا بر كيمسه نك يدندن قضارا ﴾ يعنى بلاتعد ولا تقصير ﴿ وديعه اولان ساعت دوشوبده قيرلسه ضمان لازم كلز . ﴾

مثال ثانى ، مستودع وديعه يي حرز مثلنده وضع و محل مذكورى كليدليوب آناختاريني بر شخصه اعطا ايدرك بريره كندكدنصكره كلديكنده وديعه يي بوله مسه ضمان لازم كلز . يعنى وديعه نك محفوظ بولندينى محلك مفتاحنى غيره ويرمك تعدى ويا تقصير عد اولماز .

مثال ثالث ، مستودع وديعه اولان اوراقى صنديغه وضع ايتدكدنصكره صندوق اوزرينه ايجيله جك صوقابى قويمغله صوقاظر ايدرك كاغلدى افساد ايتسه ضمان لازم كلز .

﴿ اما ﴾ وديعه مستودعك صنع و تعديسى يا حفظده تقصيرى ايله تلف ويا ضايع اولسه ضمان لازم كلور . نته كيم ۷۸۷ ماده ده تصريح ايدلمشدر . مثلا مستودع ﴿ ساعتى ﴾ قضارا ﴿ چكنه سه ياخود ﴾ قضارا ﴿ النذن ﴾ ساعت اوزرينه ﴿ برشى دوشوبده قيرلسه ﴾ تعدى ايدلمش اوله جغندن ﴿ ضمان لازم كلور . ﴾ چكنسه تعبيرندن يعنى فعل تعدينك مستودعه اسنادندن مستفاد اولور كه مستودعه ضمان لازم كلمسى تعدى يي مستودع ايقاع ايتديكى صورتده اولوب اما مستودعك غيرى بر كيمسه

ودیعہ یہ تعدی ایسے ضمان آنحق تعدی ایدہ لارم کلور کہ
 بو مسئلہ ۷۷۸ مادہ دہ تصریح اولنیور .

شو شرحدن آکلاشیلور کہ بو اما ساعتی چکنہسہ الح
 فقرہ سی بو مادہ دہ کی «ضع و تعدیسی و حفظدہ تقصیری
 اولقسزین الح» قیدینک محترز غنی اولوب مذکور محترز غنہ
 بو مادہ دہ مذکور اولمدیغی خالدہ ۷۸۷ مادہ دہ مسطور
 بولنشدور .

ودیعہ اولان ساعت قضارا دوشوب قیرلسہ

ضمان لازم کلز ایکن اول ساعتی مستودع

قضارا چکنہسہ ضمان لازم

کلیور فرق نہ در

سوال اول، بومثالث فقرہ اولیسیلہ فقرہ ثانیہ سی بینندہ

فرق نہ در ؟

جواب ، مستودع ساعتی حفظ و امسا کہ مأذون یعنی

امساك دخی حفظ اولوب فساد ودیعہ یعنی و دیعہك تانی

مستودعك مأذون اولدینی فعلدن یعنی امسا کدن تولد ایتمکله

مستودعه دخی ضمان لازم کلز . « ۹۱ » مادہ یہ باق . اما

فقرہ ثانیہ دہ کی فساد یعنی تلف مستودعك مأذون اولدینی

فعلدن متولد اولمیوب بلکہ غیر مأذون اولدینی فعلدن نشبت

ایتمشدور .

وديعه ي قضا را چکنه سه ضمان لازم کلور کن
 عاریتی قضا را چکنه سه ضمان لازم کلیور
 فرق نه در ؟

سو آل ثانی، ۸۱۳ ماده ده ذکر اولندیغی اوزره عاریت آینه
 قضا را مستعیر النذن دوشمکه یا خود مستعیرك آیانی قایوبده کندوسی
 آینه یه چارمغه قیراسه ضمان لازم کلبه جکی کبی عاریت کیجه
 اوزرینه قضا را بر شی دوکولمکه لکه لئوب قیمتنه نقصان کلسه
 ضمان لازم کلز ایکن ودیعه ده ضمان لازم کلور . یعنی بر فعل
 ودیعه ده موجب ضمان اولدبغی حالدہ عاریتده مستلزم ضمان
 اولیور فرق نه در ؟

جواب ، عاریتده مستعیر شو فعله مأذون یعنی مستعیر
 مثلاً عاریت کچی یایوب اوزرینه کز مکه حسب العاریه صلاحیتی
 موجود ایکن مستودع ودیعه یی چکنمکه مأذون دکلدرد . تعبیر
 دیگرله باعث تلف اولان فعل عاریتده مأذون فیه ایکن ودیعه ده
 مأذون فیه دکلدرد اشباه و شرحی تنویر الاذهان .

﴿کذلک برکیمسه مالتی دیگره ایداع وحفظ ایچون آکا اجرت
 اعطا﴾ یعنی آنکله اجرت مقاوله ﴿ایتدکدن صکره اول مال سرقت
 اولتمق کبی ممکن التجرز اولان بر سبیدن ناشی ضایع اولسه
 مستودع، ضمان لازم کلور .﴾ شو فقره « فقط اجرتله حفظ
 ایچون الح » فقره سنک مثالیدر .

اما حریق غالب کبی ممکن التحرر اولیان بر سبيله تلف
اولورسه اجیره ینه ضمان لازم کلیه جکی کتاب اجاره شرخنده
بیان اولمشیدی .

ودیعہ غیرک مالی اولدینی ظاهر اولنجه ید

مستودعه بلا تعد تلف اولسه بیله

ضمان لازم کلور

شوراسیده خفی اولمیه که بو حکم یعنی ودیعہ ید مستودعه
امانت اوله رق بلا تعد ولا تقصیر تلفی تقدیرنده ضمان لازم
کلامسی ودیعہ مودعک مالی اولدینی صورتده اولوب یوخسه
ودیعہ غیرک مالی بولندینی ظاهر اولسه مستودع ایله مودعدن
هر بری مسؤل اولور . شویله که مثلاً غاصب مال مقصوبی
بر شخصه ایداع ایدوبده شخص مرقوم یدند ولو که بلا تعد
ولا تقصیر تلف اولسه مقصوب منه مخیر اولوب دیلرسه غاصبه
نضمین ایتدیررکه غاصب مستودعه رجوع ایده مز . زیر اغاصب
ضمان ایله بطریق الاستناد وقت غصبده مالک اوله جغندن کندی
مالی ایداع ایتش اولورکه شو ۷۷۷ ماده حکمنجه ودیعہ ید
مستودعه امانتدر . مکر که مستودع آنده تعدی یا تقصیر
کبی بر شی ایقاع ایدوبده تلف اوله . اولخالده غاصب دخی
مستودعه رجوع ایدر . و دیلرسه مستودعه تضمین ایتدیررکه

بو تقدیرده مستودع مودعك غاصب اولدیغنی بیلیمدیکی صورتده مودعه رجوع ایدر. «۶۵۸» ماده شرحنه باق. و بیلیمدیکی تقدیرده بعض فقها ینه رجوع ایدر و بعض فقها رجوع ایده من دیمشلردر. غاصبه تضمین ایتدیره بیلیمسی ۸۹۱ مادهیه مبنی اوله جنی کی مستودعه تضمین ایتدیره بیلیمسی دخی مستودع مذکور مالی مالکک یعنی مغضوب منهک رضاسی اولیه رق اخذ ایتدیکی جهتهلدر.

۷۷۸ ماده

مستودعك غیر برکیمسه و دیعه یی اتلاف یا خود آکا تعدی ایدرک ایراث نقصان ایتسه ضمان متلف و متعدی اولان کیمسه اوزرینه در. یوخسه مستودع اوزرینه دکل. زیرا ۸۹ ماده حکمنجه برفعلک حکمی فاعلنه مضاف قلنور. «۹۱۲» مادهیه باق. متلف و متعدی کرک صغیر اولسون و کرک کبیر اولسون کرک مستودعك عیالنده بولنالردن بری اولسون و کرک اجنبی اولسون. شو مسئلهده صغیر متلفه و متعدییه ضمان لازم کله جکننده ائمه حنفیه متفق اولوب ۷۷۶ ماده شرحنده کی اختلاف بوراده جاری اولماز. و متلف و متعدی صغیرک مالی بوغیسه حال یسرینه انتظار اولنوب یوخسه صغیرک فعلندن طولای و لیسنه تضمین ایتدیرلمز. ۹۱۶ مادهیه باق.

مثلاً (مستودعك خدمتکاری یدندن ودیعه اوزرینه برشی دوشوبده ودیعه تلف اولسه خدمتکار ضامن اولور.)
 بو وجهله اجنبی بر شخص ودیعه یی اتلاف ایتدکده ضامن اولوب مستودع بونده ملتقه خصم اوله جغتدن بدانی طلب وادعا ایده بیلور. «۱۶۳۷» ماده یه باق .

۷۸۷ ماده سنده «و کذا مستودعدن بشقه برکیمسه مذکور آلتونلری اولوجهله قارشیدیررسه اول کیمسه ضامن اولور» فقره سی شو ماده نك فرعیدر.

ایضاحات آنفهدن آکلاشلدیکه بو ماده مسئله عمومیه نك بر مثالی اولدینی جهته مجله ده معتاد اولدینی اوزره مسئله نك صورت عمومیه ده ذکرند نصکره بوماده نك مثال اوله رق اتیانی مناسب ایدی .

ماده ۷۷۹

(ودیعه حقنده صاحبك راضی) و شرعا جائز (اولمدینی شیئی یایمق تعدیدر.) غایه . شو ماده ایله مستودع اوزرینه ضامنی ایجاب ایدن تعدی تعریف اولنمقده اولوب بو تعریفدن آکلاشیلورکه تعدی تقصیردن بشقه اوله رق مستودعك فعل مخصوصیدر. یعنی تعدی مستودعك فعلی اولوب بوده ودیعه یی اتلاف ایتك وامینی اولیان کیمسه یه برای حفظ ودیعه یی ویرمك

وودیعہ ہی آخرہ ایداع ایتک یا استعمال ایلماک وودیعہ اولان
ساعتی قضا را چکنمک وساعت اوزرینہ قضا را برشی دوشورمک
کی شیلردر .

تقصیر ایسه وودیعہ ہی سارق سرقت ایدرکن کوروبده
منعه مقتدر ایکن منع ایتماک وحفظی معتاد اولیان محله حفظ
ایلماک کی خصوصلردر .

بناء علیہ ۷۸۷ ماده سنده تقصیر تعدی به عطف اولمشدر .
شو حالده مستودعک مودعه مجرد «ودیعہ ہی بکا هبه یا بیع
ایتمشیدک دیسی و مودعک انکار ایلماسی تعدی اولیوب
بو سوزدن صکره وودیعہ تلف اولسه ضمان لازم گلز بحر .
مکرکه مودع وودیعہ نک کندوسنه اعاده سنی طلب ایتدکن صکره
مستودع اعاده دن امتناع ایدوب بعده تلف اوله . «۷۹۴» ماده به باق .
نته کیم باغلی کیسه ومقفل صندوق ایداع اولنوبده مستودع
بونلری کشاد ایتسه ده درونندن کندوسی برشی آلمیه رق ضایع
اولسه ضمان لازم گلز . یعنی اولوجهله کشاد تعدی یا تقصیر
دکلدر .

تعریف مذکورده «۷۸۴» ماده شرحنده تفصیل اولنه حق
احکام اربعه داخل یعنی تعریف مذکورده کوره احکام اربعه
مذکورہ نک هر برینه مخالفت تعدی اولمق لازم کله چکنندن
بو تعریف اغیارینی مانع اولماش اوله جغندن دفع اشکال ایچون
شرحا «وشرعا جائز» قیدی علاوه اولندی .

تعدی یا تقصیردن معدود اولان

واولیان بعض مسائل

بو ماده زیاده ایضاح اولنق ایچون ضمانی ایجاب ایدن
تعدی یا تقصیر حقمده بعض مسائل بروجہ آتی ذکر اولور .

۱ مسئله، « ۷۸۰ » ماده شرحنده ذکر اولنه جنی اوزره
ودیعه امین اولیان بر کیسهیه برای حفظ اعطا ایتک تعدی
اولدینی کی ۷۸۱ ماده شرحنده ذکر اولنه جنی اوزره مستودع
کندو مالکک محافظه ایتدیکی « اجنبی بر شیخصک کندو مائی
محافظه اینمکده اولدینی » محله و دیعهی حفظ ایتسی تقصیردر .

۲ مسئله ، ۷۸۱ ماده شرحنده ذکر اولنه جنی وجهله
مستودع سفره کیدوب یول امین اولمدینی حلاله و دیعهی برابر
کوتورمسی تعدیدر .

۳ مسئله، ۷۸۳ مادهنک فقره رابعه سی و ۷۸۴ مادهده
بیان اولنان حکم اول و ثانی خلافتده حرکت تعدی اولدینی کی
۷۸۸ ماده ایله ۷۹۰ و ۷۹۲ مادهلرک فقرات ثانیه لری و ۷۹۳
ماده ایله ۷۹۴ مادهنک فقره ثانیه سی تعدیدر .

۴ مسئله ، ۷۹۶ مادهنک فقره ثانیه سنه مخالفت تعدی
اولدینی کی ۷۹۹ مادهنک فقره ثانیه سی و ۸۰۱ مادهده بیان
اولدینی اوزره تبجیل الودیعه تعدیدر .

۵ مسئله ، مستودع ودیعه یی خانه سندن بشقه بر محله اوکومه قویوب او طور دقدنصره قالدیغمده اونو تدم دیسه ضامن اوله جنی کبی برای بیع دلالة ویریلان مالی دللال بر دکانه قویدم اما قنئی دکانه قویدیغمی اونو تدم دیسه ضامن اولور .

۶ مسئله ، مستودع ودیعه یی خانه مه می محل آخره می قویدم بیلیم دیسه ضامن اولور هندیه وتکمله رد مختار .

۷ مسئله ، درزی به تعمیر ایتدیرمک اوزره بر کیسه دیگر کسینه به البسه ویروده اوکسینه دخی بر درزی به ویردیکی حاله قنئی درزی به ویردیکنی اونو تسه ضمان لازم کلیه جکی کبی مستودع ودیعه ضایع اولوب اولمیدیغی بیلیم دیسه موجب ضمان دکلدر . فقط ضایع ایدوب ایتدیگمی بیلیم دیسی مستلزم ضمان ایدوکی فصول عمادیده ذکر اولنمشدر .

۸ مسئله ، « ۹۰۱ » ماده ده بیان اولندیغی اوزره مستودعک مودعک طلبنه قارشو ایداعی انکار ایله برابر حال انکارنده منقول ودیعه نک بولندیغی یردن دیگر محله نقل ایتسی تعدیدر . زیرا مستودعک انکاری رفع عقد اوله رق بونکه عقد ودیعه منفسخ اوله جغندن آندنصره عقد جدید اولمقسزین عقد ودیعه عودت ایتمز بحر . انکار ودیعه نک تعدی اولسی درت شرطه مقید ومشروطدر .

شرط اول ، مودعه قارشو انکار ایتلیدر بناء علیه مودعک

غیریسنه قارشو انکاری تعدی اولیبوب بلکه حفظ اولدیی
 کبی حال جحودنده بولندی مکاندن نقل ایلمسه یاخود ودیعه
 عقار اولوبده نقلی قابل اولسه امام اعظم ایله ابی یوسفه کوره
 ضمان لازم اولیبوب فقط امام محمد کوره ضمان لازم کلوربحر.
 مثلاً اجنبی بر کیسه فالانک سنده شویله بر ودیعه بی
 وارمی دیو سوآل ایلمسی اوزرینه مستودع یوقدر دیسه
 تعدی صایلمیبوب بلکه سائلک بر سو قصدندن ودیعه بی محافظه
 ایلمش اولور.

شرط ثانی، مودع ودیعه بی ائقی فیکریله طلب ایلدیکنده
 انکار ایلملیدر اما مودع، مستودعک، محافظه سنی تذکر و تشکر
 ایتک ایچون ودیعه نک حالی صورمی اوزرینه مستودع بند-
 سنک ودیعه ک یوقدر دیمسی امام ابی یوسفه کوره انکار و جحوددن
 معدود دکلدر بحر. بو مسئله ۷۸۷ ماده شرحنده دهه زیاده
 تفصیل اولور.

شرط ثالث، مستودعک انکاری سبب شرعی یه مبنی اولمالیدر.
 بناء علیه مودع، ودیعه بی طلب ایلدیکی صروده بر عدو حاضر
 بولنسه که آنک یاننده مستودع ودیعه بی اقرار ایلمسه عدو مرقوم
 ودیعه بی جبراً آلمسندن خوف اولنه بو صروده مستودع ودیعه بی
 انکار ایتمده آند نصکره ودیعه تلف اولسه مستودع ضامن
 اولماز. زیرا مستودع بو انکار ایله حفظ قصد ایلمدی بحر.
 شرط رابع، مستودع بعدالانکار ویعه بی احضار ایتملیدر

بناءً علیه مستودع وديعه يي انكار ايتدكدنصكره احضار ايدرك
مودعه ويرمك استدكده صاحب وديعه مستودعه يدكده وديعه
اولمق اوزره قالسون ديدكدنصكره مذكور وديعه تلف اولدقده
مودع اول صروده وديعه يي اخذه مقتدر اولديغي صورتده
مستودع مذكور وديعه يي ضامن اولماز. زيرا بو، ايداع جديد
اولور. اما مودع اول صروده وديعه يي اخذه مقتدر دكلسه
مستودع يته ضماندن خلاص اوله ماز. زيرا رد واعاده تمام
اولماشدر بحر.

۹ مسئله، مستودع وديعه يي سارقه دلالت ايتكله سارق
مرقوم اول وديعه يي سرقت ايلسه مستودعه ضمان لازم كلور.
شوقدر واركه بو وجهله دلالتدن صكره سارق وديعه يي اخذ
ايدركن مستودع منع ايتديكي حالده سارق جبرا وقهرا آلسه
يته ضمان لازم كلز رد مختار.

۱۰ مسئله، وديعه حقنده كي معاملاتك بعضيلري تعدى
اولوب اولماسنده عرف وعادت معتبردر. « ۳۶ » ماده يه باق.
شويله كه مستودع وديعه اولان حيوانى عرفا تعدى عداولنه جق
محملة باغلايوب مستودعك كوزندن غيبوت ايتدكدنصكره تلف
اولسه ضامن اولور.

نته كيم بر دكانجى نزدنده كي وديعه يي قپوسى آچيق دكانده
براغوب ياخود دكانك قپوسنه بر آغ كره رك ترك ايدوب ديكر
بر ايش ايچون بر يره كتدكدنصكره وديعه ضايع اولدقده

عرف و عادت بویله یعنی دکانده بکچی اولمדיنی حالدده دروننده
امتعده بولنان دکان قپوسنی آچیق براقق عادت اولنججه ضمان
لازم کلز. زیرا مستودع و دیعه یی بونده جیرانیله و کندی مانی
محافظه ایتدیکی کی محافظه ایتش اولوب یوخسه جیرانه قصدا
ایداع ایتش اولمازکه حتی ۷۹۰ ماده یه مخالف دوشسون تکمله
رد مختار. اما عادت بویله اولمینگجه ضامن اولور. دکانده حفظه
مقتدر اولمیان برصیی براقق دکانی خالی براقق کیدر تکمله
رد مختار.

کذلك مستودع و دیعه یی برخان او طه سنه قویه رق قپوسنی
یالکز قپامقله اکتفا ایتسه یعنی آناختار ایله کلیدلمسده و دیعه
سرقت اولنسه بو مثللو مواضعده یالکز قپوسنی قپامق توثیق
و حفظ عد اولنورسه ضمان لازم کلز. و اگر اغفال و تضییع
عد اولنور ایتسه ضمان لازم کلور.

۱۱ مسئله، و دیعه اولان بقری بلاذن صحرايه صالیویر مک
تعیدین معدود اولمغله صحرايه ضایع اولسه یاقورت تلف ایتسه
مستودع ضامن اولور. شو قدر وارکه مذکور حیوان صحرايه
حتفانغه تلف اولنججه بعض فقها ینه ضمان لازم کلور دیدکاری
حالدده دیگر بعضیلری ضمان لازم کلز دیمشلر در.

۱۲ مسئله، و دیعه اولان قوشك قفسنی یا خود و دیعه اولان
حیوانک بولندینی آخورك قپوسنی آچیق تعیدر.
بناء علیه مستودع بولری آچوبده دروننده کی قوش

و حیوان فرار ایدوبده ضایع اولسه ضامن اولور . کړك قېو
آچېلنجه درحال فرار ایتسونلر وکړك براز مدت طور دقندن
صکړه فرار ایتسونلر .

۱۳ مسئله ، اکراه غیر ملجی اوزرینه مستودع ودیعه یی
آخر کمسنه یه ویرسه تعدی ایتمش اولوب اما اکراه ملجی
اوزرینه ویرسی تعدی دکلدر . «۱۰۰۷» ماده یه باق .

بناءً علیه بر کمسنه مستودعه شو ودیعه یی بکا ویرمن ایسه ک
سنی بر آی حبس ایدرم دیو اکراه ایتسی اوزرینه مستودع
ودیعه یی او کمسنه یه ویرسه ضامن اولوب اما بر کمسنه شو ودیعه یی
بکا ویرمن ایسه ک سنی قتل ایدرم یا عضوکی کسرم دیو اکراه
ایتمسیله مستودع دخی بو و دیعه یی آکا ویرسه اکراه واقع شرائطی
جامع اولنجه ضمان مستودعه لازم کلیوب مجبره لازم کلور .
کل مالک یعنی قدر کفایه کیروده قالیه جق صورتده
مستودعک مالنک جمعیتنک اتلافیه تهدید دخی بو باده اکراه
ملجی و بعض مالک یعنی مستودعه مقدار کفایه مال قاله جق
صورتده اتلافیه تهدید اکراه غیر ملجی عد اولنشددر . زیرا
کل مالک اتلافی تلف نفسه مؤدی اولوب اما قوت کفایه
کندوسنه مال براغیله رق باقیسنک اتلافیه تهدید اولندقدده
بو اکراه معتبر دکلدر . آنجق قدر کفایه دن مقصود کفایه
شهر یا یوم یا عمر غالب میدر ؟ ظاهر اولان کفایه شهر یا یومدر
تکمله رد مختار .

۱۴ مسئله ، ودیعه اولان نقودك برای حفظ مفارده دهن
دفن اولنق تعدی اولدینی کبی ودیعهك آخره بیع و تسلیم
اولنسی دخی تعدیدر . اما یالکیز بیع اولنسی تسلیم اولنمدجه
تعدی صایلماز .

بو جهتله مستودع ودیعه یی آخره صاتوب پاره سنی آلام
دیسی موجب ضمان اولیوب اما آخره بیع و تسلیم ایتدم
دیسی مستلزم ضماندر . «۷۹۰» ماده یه باق .

۱۵ مسئله ، ودیعه اولان حیوانه معالجه ایتدیرمك تعدیدر .
بناء علیه مستودع بر شخصه امر ایدوبده یدنده بولنان ودیعه
حیوانه معالجه ایتدیرمسيله بوندن طولای حیوان تلف اولسه
مستودعه ضمان لازم کلور . نته کیم اول شخصه دخی ضمان
لازم کلور . شویله که مودع مخیر اولوب دیلرسه مستودعه تضمین
ایتدیررکه بو تقدیرده مستودع اول شخصه رجوع ایده مز .
ودیلرسه معالجه تضمین ایتدیررکه بو تقدیرده معالج یعنی اول
شخص دخی مذکور حیوان مستودعك ملکی اولدینی ظننده
ایسه اوده مستودعه رجوع ایدر . «۶۵۸» ماده شرحه باق .

۱۶ مسئله ، مستودع ودیعه یی بر مکانده وضع ایتشیدم
لکن زرده وضع ایتدی کم ییله تم اونو تدم دیسه ضامن اوله جنی
کبی مستودع ودیعه اولان اچیه یی جبهه قویدم ظنیه یره دوشوردم
ضایع اولدی دیسه ضامن اولور .

۱۷ مسئله ، مستودع ودیعه یی یانسه قویوب یاسالانوب

اویومقله سرقت اولنسه ضامن اولور . مکرکه بو حال سفرده
وقوعبوله . اولخالده ضامن اولماز . اما یاسلامیهرق اوتوردینی
یرده اویوقلاسهده ضایع اولسه ضامن اولماز .

۱۸ مسئله، مستودع صوینوب ودیعه یی البسه سیله دکر
کنارنده براغوب دکره کیرمکه صویه طالیدیغنده یعنی ودیعه
کوزندن غیبوت ایتدیکنده چالسه ضامن اوله جنی کی اوراده
اونوتسهده ضایع اولسه ضامن اولور .

۷۸۰ ماده

(مستودع) مطلق اولهرق ایداع اولنان یعنی ۷۸۴ ماده
وجهله تقید اولنمیان (ودیعه یی کندو مالی کی) یعنی کندو
مالی بالذات یا امینی ایله حفظ ایتدیکی کی ودیعه یی دخی
(بالذات حفظ ایدر . یاخود امینی اولان) یعنی کندوسنک مالی
اینانه سیله جکی وحفظه مقتدر اهل بر (کیمسه یه حفظ ایتدیرر)
اما امینه ویرمکن مودع نهی اتمش ایسه باقیلور آ کا ویرمکه
مجبوریت وار ایسه نهی معتبر اولیوب ینه ویره ییلور . زیرا
اضطرار ممنوع اولان شیرلی مباح قیلار . ومجبوریت یوغیسه
نهی معتبر اولوب ویره مز . «۷۸۴» ماده یه باق بحر بو امین
دخی بالذات حفظ ایده جکی کی امینه دخی حفظ ایتدیره ییلور
بحر .

شو « یاخود فقره سی » بالذات کلامنه معطوفدر . یعنی مستودع کنندی مالی بالذات حفظ ایده بیله جکی وامینه حفظ ایتدیره بیله جکی کبی ودیعه یی دخی بالذات حفظ ایدر یاخود امینه حفظ ایتدیرر . یعنی مستودع اوزرینه بروجه مذکور ودیعه یی حفظ ایلمسی لازم کلور . بو وجهله محافظه ایتمکه ایکن ضایع اولسه مستودع مسؤل وضامن اولماز . زیرا مستودع کنندی مالی حفظ ایلدیکی کبی ودیعه یی حفظ ایلمش وودیعه یی کنندی مالی کبی قیلمش اولغله مستودع اوزرینه بوندن زیاده شی واجب اولماز تکمله رد مختار .

اما بلا عذر ترك حفظ ضمانی ایجاب ایدر . لکن بعذر اولان ترك حفظ ینه ضمانی ایجاب ایتمز . شویله که بر کیمسه امتعه معلومه سیله یوکللی حمارینی بر محله قاطر لرله کیتمک اوزره بولنان قاطر جییه تسلیم ایدوب محل مذکورده فالانه کوتور مسنی امر ایتمکه کوتور مکده ایکن اثنای طریقده کنندی قاطری دوشمکه آنکه مشغول ایکن ودیعه اولان حمار کیدوب ضایع اولسه مذکور حماری آرقه سی صره کتدیکی تقدیرده کنندی قاطری واموالی ضایع اوله جفی معلوم اولدینی تقدیرده مذکور حمار ومتاعك ضمانی لازم کلز . نته کیم اجارده دخی حکم بویله ایدوکی ۶۰۹ ماده ده وشرخنده ذکر اولندی .

مجله ده امینی اولان کیمسه یه حفظ ایتدیرر دنیلمسندن مستبان اولور که امین مرقومه برای حفظ اعطا ایده بیلوب

یوخسه امین مرقوم ودیعه بی نفسنه صرف ایتک ایچون طلب
ایتدیکی حالدده مستودع دخی ویرسه مستودع مرقوم ضامن
اولور تکمله رد مختار.

مستودع حفظ ایچون بلا مقاوله اجرت آله بیلورمی

مستودع بو حفظ مقابلنده مودعدن اجرت طلب ایده من.
مکرکه مقاوله اولنه. زیرا غیر ایچون امانه عامل اولان ایچون
اجرت یوقدر. مکرکه وصی وناظر اوله رد مختار.

﴿و﴾ ودیعه ید مستودعده بلا تعد ولا تقصیر تلف یاضایع
اولدیغی تقدیرده «۷۷۷» مادهده بیان اولندیغی وجهله کندوسنه
ضمان لازم کلدیکی کی «امینی عنندنه تعدی و تقصیری اولمقسزین»
ودیعه «تلف یاضایع اولسه» ۹۱ مادهیه مبنی «کرك مستودعه»
و ۷۷۷ مادهیه مبنی «کرك امینه ضمان لازم کلز.» اما امین
مرقوم عنندنه تعدی و تقصیرندن طولای تلف یاضایع اولدقده
امین مرقومه ضمان لازم کلور. یوخسه بوندن ناشی مستودعه
ضمان لازم کلز.

مثلا بر جامه شوی البسه بی یاقایوب دکاننده آصه رق برای
حفظ دکاننده ابن اخنی یعنی برادر زاده سنی براغوب کتدکن
صکره ابن اخ دکانک بودرومنه کیردیکی صروده البسه دکاندن

سرقت اولندقدہ ابن الاخ اگر جامہ شویک چراغی واجیری
وبالغ یا صبی مأذون ایسه باقیلور. بودرومدن دکانده کی البسه
کورینور حالده ایسه جامہ شویده ابن اخده ضمان لازم کلز.
جامہ شویہ ضمان لازم کلامسی آنی عیالنده اولان امینی ایله
« مجله نك اختيار ایتدیکی قوله کوره علی الاطلاق امینی ایله »
محافظه ایتدیکنه مبنی اولدیفی کی ابن اخده ضمان لازم کلامسی
کیردیکی یردن البسه یی کورمکده اولدیفی جهتله حفظی ترک
ایتمدیکندن ناشیدر. واکر کیردیکی یردن البسه کورونمز ایسه
اولحالده یالکمز ابن اخه ضمان لازم کلور. زیرا واجب اولان
حفظی ترک ایتمشدر. اما جامہ شویہ ضمان لازم کلز. زیرا
جامه شوی البسه یی امینی ایله محافظه ایتمشدر. فقط صبی غیر
مأذون ایسه آکا ضمان لازم کلز. زیرا صبی محجور استهلاک
وتضییع ودیعه ایله موآخذہ ایدلمز جامع احکام الصغار. نته کیم
۷۷۶ ماده شرحده ایضاح اولندی.

امینده اختلاف فقها ومجله نك اختيار

ایتدیکی قول

بو امین مستودعک عیالنده اولمسی شرط مییدر؟ بونده
اختلاف فقها واقع اولوب بعض فقها بو امینک مستودعک

عیالنده اولمسی یا عیالی منزلنده بولمسی شرط اولدیغنه قائل اولملردر بحر .

عیاله مثال ، مستودع ودیعه یی عیالنده بولنان امین و بالغ یا صبی مأذون اوغلنه حفظ ایتدیره بیلوب بنابرین مستودع ودیعه یی مستودعک عیالنده بولنان والحاله هذه غائب عن البلد اولان اوغلنه برای حفظ اعطا و اوغلی دخی حاضر بولنان شو شخصیہ تسلیم ایلدیکنی ادعا ایتدکده ابن مرقومه و یردیکی حقنده سوز یمینله مستودعک اولور . وکویا مستودع ابن مرقوم قلنهرق ودیعه ابن مرقومدن سوآل ایدیلورده حکم شرعی ابن مرقوم حقنده اجرا اولنور تکمله رد مختار .

بو صورتده مستودع ودیعه یی عیالنده بولنان شو امینی اوغلنه و یردیکنی ادعا ایتدیکی حالده اوغلی انکار ایتدکدنصکره وفات ایدوب اب آکا وارث اولسه ودیعه ابنک ترکه سندن تضمین ایدیلور .

عیالی منزلنه مثال ، بر کیمسه خانه سنک بر او طه سنی دیگر کیمسهنیه ایجار ایدوب ودیعه یی بو مستأجره تسلیم ایتدکده باقیلور . اکر موجر ایله مستأجرک آرو آرو کلیدلری اولیوب هر بری دیگرک اقامتگاهنه بلا منع داخل اولیور ایسه ضمان لازم کلز . زیرا بو مستأجر عیالی منزلنده در . واکر هر برینک آرو آرو کلیدلری وار ایسه مستودعه ضمان لازم کلور . زیرا

بو مستأجر مستودعك عيالنده اولمديني كي عيالي منزلنده دخی
دكلدر تكمله رد مختار .

شو قول فقهایه كوره مستودع عيالنده اوليان بر كيمسه يه
وديعه بي ویرسه بو كيمسه مستودعك اميني اولسه بيله وديعه
تلف اولنجه مستودع ضامن اولور .

عيالك تعريفی ايچون ۷۲۲ ماده شرحه مراجعت اولته .
ديكر بعض فقهایه كوره مستودع وديعه بي اميني اولان بر
كيمسه يه حفظ ايتدير دكه بو امين مستودعك عيالنده اولسه
بيله شو حفظ جائز اولور كه قول مذكوره كوره مستودع
وديعه بي اميني اولان و كيلنه و مفاوضة يا عنايا شريكه الحاصل
كندوسنك مالنك محافظه سني اينانه بيله چكي بر شخصه حفظ
ايتديره بيلور . ولو كه مثلاً وكيل عيالنده بولميه . زيرا بو وجهله
حفظ مستودعك كندی مالن حفظ ايتسي كي اولوب مستودع
اوزرينه بوندن زياده سي واجب و لازم اولماز . فتوى بو قول
اوزره اولديني كي على افندی نام فتاواده دخی بو وجه اوزره
افتا ايدلمسكه مجله ده كي امين لفظی على الاطلاق يازلمسندن
بو قول اختيار ايدلديكي آكلاشيله چني كي ۷۸۴ ماده ده يا خود
كندی مالن حفظ ايده كلان كيمسه يه عباره سندن و كذا ۷۲۲
ماده سنده « رهني مرتهن بالذات حفظ ايدر يا خود عيالي و يا
شريكي و يا خدمت چيسي كي اميني اولان كيمسه يه حفظ ايتديرر »
دنيلمسندن قول مذكور اختيار اولنديني مستبان اولور . زيرا

هر فعلکه آندن طولای مستودعه ضمان لازم کاور او فعلدن ناشی مرتنه دخی ضمان لازم کلوب اما هر فعلکه او فعل سببیه مستودعه ضمان لازم کلز مذکور فعلدن ناشی مرتنه دخی ضمان لازم کلز شو قدرکه ودیعه تلف اولسه مضمون اولماز زیلعی ورد مختار.

امینی اولمیانہ حفظ ایتدیرملک

سالف الذکر ایکی قوله کوره دخی مستودع ودیعه بی عیالنه حفظ ایتدیرمسئنده اول عیالک امین اولسی شرطدرکه مجله دخی امین لفظیه بوکا اشارت ایلمشدر بناء علیه امین اولمیان کیمسه مستودعک عیالنده بیه اولسه بوکا حفظ ایتدیرملک جائز اولماز.

امینده احوال ثلاثه

الحاصل امینده اوچ حال واردر.

- ۱ مستودع، ایداع ایتدیکی کهنه نك امین اولدیغنی بیلور.
- ۲ یاخود حالی اصلا بیلمز. ۳ یاخود غیر امین اولدیغنی بیلور.
- ایمدی صورت اولاده ایداع اولنه بیلوب اما صورت ثالثه ده ایداع اولنه ماز. صورت ثانیه یه کلنجه بوکا دخی ایداع اولنه بیلوب بناء علیه مستودعه ضمان لازم کلز طحطاوی و تکمله رد مختار.
- بو صورتده بر کیمسه ودیعه بی دیگر محله ده ساکنه بولنان

امینہ زوجہ سنہ حفظ ایتدیرہ بیلور ایسہ دہ امینہ اولیان زوجہ سنہ حفظ ایتدیرہ مز .

نتہ کیم قول ثانیہ کورہ مفاوضۃ شریکنہ دخی حفظ ایتدیرہ بیلوب فقط بو شریکک امین اولسی شرط اولغلہ امین دکل ایسہ حفظ ایتدیرہ مز . حتی ایتدیرہ رسدہ بعدالمفارقہ ولو بلا تعد تلف اولسہ مستودع ضامن اولور .

بورادہ کی بعدالمفارقہ قیدینک فائدہ سی ۷۹۰ مادہ شرخندن آکلاشیلہ جغندن اورایہ مراجعت اولنہ .

امیندہ کی ایکی قول بیندہ کی فرق

تقریر مشروحندن مستبان اولور کہ مارالذکر ایکی قول بیندہ عموم وخصوص مطلق اولوب قول اول اخص مطلق و قول ثانی اعم مطلق اولہرق ہرنہ وقت قول اولجہ مستودعک بشقہ سنہ ایداعی و حفظ ایتدیرہ می صحیح اولہ قول ثانی جہ دخی صحیح اولور .

غیر امینہ حفظ ایتدیرہ لمکدہ کی حکم

مستودع، امینی اولیان برکیمسہ یہ ودیعہ بی - فظ ایتدیرہ ویدہ اول کیمسہ یدندہ ودیعہ تلف اولسہ مودع مخیر اولوب دیلرسہ مستودعہ و دیلرسہ اول کیمسہ یہ تضمین ایتدیرہ . « ۸۹۱ »

ماده‌یه باق. آنجق ۷۸۳ ماده شر خنده ایضاح اولنه جفی اوزره
امام اعظمه کوره اول کیمسه یدنده ودیعه بالاعد ولا تقصیر
تلفی تقدیرنده اول کسه‌یه ضمان لازم کمالیدر. اما مستودع
اوله هر حالده ضمان لازم کلور.

امینه حفظ ایتدیرلمسی ایله غیره ایداع آره‌سنده کی فرق

بو فقره وجهله مستودع ودیعه‌ی امینه حفظ ایتدیردکه
آکا ایداع ایتمش اولور. حالبوکه ۷۹۰ ماده‌ده مستودع ودیعه‌ی
آخره ایداع ایده‌یه جکی مصر حدر. بناءً علیه شو ایکی ماده
بیننده تنافی حاصل اولور. جواباً دینلورکه مارالذکر ۷۹۰
ماده بو ماده ایله مقید بولنمشدر. یعنی مستودع ودیعه‌ی آخره
یعنی امینی اولیانه ایداع ایده‌مز دیمکدر در منتقی و تکمله
ردمختار و علی افندی.

ماده ۷۸۱

(مستودع کندو) سنک ودیعه‌یه مائل اولان (مالی زرده
حفظ ایدرسه ودیعه‌ی دخی اوراده حفظ ایده‌یلور.)

مکان حفظ

زرده حفظ ایدرسه تعبیرندن مستبان اولورکه محل حفظ

مأجور و مستعار دخی اوله بیلور . بو جهته مستودع و دیعه یی
 کندی مالیکی اولان خانه سنده و اوطه سنده و دکاننده حفظ
 ایده بیله جکی کبی و دیعه نك حفظی ایچون بر محل معینی استیجار
 یا استعاره ایدوبده اوراده دخی حفظ ایده بیلور . ولوکه مستودع
 کندو مالی اوراده بولمیه .

نته کیم مستودع و دیعه اولان اچیه یی جنبه قویه بیلور . حتی
 جنبه قیوبده مجلس فسقه حاضر بولمغه اوراده سرقت اولسه
 یا بشقه صورتله ضایع اولسه ضمان لازم کلز . زیرا مستودع
 کندو مالی استیجار و استعاره ایتدیکی محله و پاره سنی جنبه
 حفظ ایده جکی کبی و دیعه یی دخی اولوجهله حفظ ایده بیلور .
 شوقدرکه مستودع سرخوش و زائل العقل اولوبده مذکور اچیه
 ضایع اولدینی صورتده بعضی فقها ضمان لازم کله جکنه قائل
 اولمشدر .

شخص آخرک مالی محافظه ایتدیکی محله

مستودع و دیعه یی محافظه ایده مز

اما مستودع و دیعه یه مائل اولمیان مالی حفظ ایتدیکی
 محله و دیعه یی حفظ ایده میه جکی ماده آتیهدده بر اولدینی کبی
 مستودع کندو مالی بولمیان « بر شخص آخرک کندی مالی
 محافظه ایتمکه اولدینی » محله و دیعه یی حفظ ایده مز . زیرا

محل مذکور مستودع یدنده بولنمیوب شخص مرقوم النده
بولنمقدن ناشی اول محله وضع ایلمسی ودیعه‌ی غیره یعنی امینی
اولیان شخصه تسلیم دیمک اولوب بو ایسه ۷۹۰ ماده حکمنجه
ضمانی مستلزمدر بحر.

ودیعه‌نک محل حفظی محافظه‌لی بر محل اولسنی شرطدر

بو ماده‌ده ودیعه‌نک محل حفظی بیان اولنیور .
ودیعه‌نک محل حفظی محافظه‌لی بر یر اولسنی شرطدر .
حتی بر کیسه ودیعه‌ی بر خانه‌ده براقسه که آنک اطرافی
آچیق اولوب دیوارله محاط اولمدیگی کی اوطه‌لرینک دخی
قبوسی یوقدر وکندوسی مذکور خانه‌دن چیقوب بر محله کتسه‌ده
اوراده ضایع اولسه ضامن اولور . وقد سئلت عن خیاطه
فی داربهذه الصفة خرجت منها فی زوجها لیلایا لعرس جارتها
فسرقت اثوابها منها فافتتت بالضمان والحالة هذه لان مثل ذلك
یعد تضییعا تأمل تکمله رد مختار .

ودیعه‌ی سفره کتورملک

مستودع سفره یعنی یقین یا اوزاق بر یره کیده‌جک اولدقده
یول امین اولنجه امام اعظمه کوره ودیعه‌ی برابر کو توره بیلور . ودیعه

كرك حمل و مؤنثه محتاج اولسون كرك اولسون بخر . نته كيم
۷۷۹ ماده شر حنده افاده اولمشیدی . زیرا امر بالحفظ مودعدن
مطلق اوله رق صادر اولوب بناءً علیه زمان ایله تقید ایتیه جکی
کبی مکان ایله دخی تقید ایلمز . « ۶۴ » ماده یه باق . بو حالد
ودیعه تلف اولسه ضامن لازم کلز . « ۹۱ » ماده یه باق .
حمل و مؤنثه محتاج اولان شی شول شیدرکه آنک حملنده
یعنی نقلنده ظهره یاخود اجرت حمایه یه محتاج اولور تکمله
رد مختار .

و مؤنث رد مودعه عائد اولوب مسافه سفر دن رد و اعاده
مؤنثی زیاده اوله جغندن سفره کوتورمک مودعه ضرر در دینلمز .
زیرا بو مؤنث مودعک امرینک صحتک لوازم ضروریه سیندندر .
فقط مستودع و دیعه یی بو وجهله سفره کوتور دکه مؤنث
حملة احتیاج و ارایسه مؤنث مذکوره مودعه می یوخسه مستودعه می
عائد اولور طحطاوی . لعل مودعه عائددر . زیرا منفعت حفظ
مودعه راجعدر . « ۸۸ » ماده یه باق . لکن مستودع بلا امر
مذکور مصرفی اختیار ایدرسه متبرع اولوب صکره مودعه رجوع
ایده مز .

اما یول امین دکل ایسه بو تقدیرده باقیلور . مجبوریت
اوزرینه سفره کیدیور ایسه ینه کوتوره بیلوب اما سفره کتمکده
مجبوریت اولمینجه بو حالد اهلیله برابر سفره کیدیور ایسه
ضامن اولماز . وا کر یالکز باشنه کیدیور ایسه ضامن اولور بخر .

وديعه يي سفر بحري يه کوتورمک

مخاطره لی سفردن بریده سفر بحريدركه آنده تلف و هلاك
غالب اولديغنی صاحب بحر ذکر ايلمشدر . آنجق زمانزده
واپورلر ايله اموال تجاريه نك نقلی متعارف اولوب غالب احوال
سلامت اولغله لایق اولان سفر بحري ايله بری آره سنده
فرق اولمايوب مستودع وديعه يي برآ سفره کوتوره بيله چکی کبی
بحر آدخی کوتوره بیلور تکمله رد مختار .

مقدمین فقها زماننده واپورلر غیر موجود و سفر بحري
یلکن کیلری واسطه سیله اجرا ایدلمکده ایدی بناء علیه سفر بحري يي
مخاطره لی و غالب حالی هلاکه مقارن عد ایدرلردی اما الحاله
هذه شدید فورطنه لره مقاومت ایده جک سفن جسيمه موجود
اولغله بونلر ايله سفرده مخاطره یوقدر . بو صورتده مستودع
وديعه يي یلکن سفینه سیله نقل ایدرسه صاحب بحرك دیدیکی کبی
مخاطره لی اما واپورله نقل ایدرسه سلامتلی عد اولنمیلدر .

مودع مکان حفظی تعیین یا سفردن نهی ايلمش ایسه
مستودع وديعه يي سفره کوتوره من .

لکن مودع وديعه ایچون مکان حفظ تعیین ايلمش ایسه
مستودع وديعه يي سفره کوتوره میه چکی کبی وديعه يي سفره

کو تورو مگدن نهی ایلمش ایسه ینه کوتورومز. ته کیم ودیعه نك
حفظی مقابله ادرت شرط اولمش ایسه ینه کوتورومز .
زیرا اجرتله استحقاق عقد معاوضه اولمغه مکان عقدده تسلیم
ایدلمک لازم کلور قعلوبغا فی الودیعه وفيه تفصیل مسئله.

❧ ماده ۷۸۲ ❧

ودیعه نك اختلافیه محل حفظ دخی مختلف اولور . زیرا
(ودیعه نك امثالی وجهه محافظه سی) مستودع اوزرینه
(لازمدر) یعنی هرودیعه حرز مثله محافظه سی لازم اولوب
بر نوع و دیعه یه حرز اولان دیگر نوع و دیعه یه حرز اوله ماز.
بو صورتده و دیعه بر محله وضع و حفظ ایدلمه که او مثلو
ودیعه او محله حفظ ایدلمز شو وضع و حفظ تقصیردر .

ودیعه ده کی حرز ایله سرقتده کی
حرز بیننده فرق.

اما سرقتده بویله اولیوب بر نوع ماله حرز اولان دیگر
نوع ماله دخی حرز اولوب بناءً علیه نقود و مجوهرات مثلو
غالبه الثمن اولان اموالی آخوردن سرقت ایدن کیسمه اوزرینه
حد سرقت لازم کلور تکمله رد مختار.

حرز مثلی اولیایندہ حفظ ایدلمکده کی حکم ایله
آکا متفرع بعض مسائل

(بناءً علیه) ودیعه اولان حیوان آخوردہ حفظ اولنه بیلوب
آندہ ضایع اولسه ضمان لازم کلز ایکن (نقود و مجوهرات)
وغالبه الثمن بونجه شال (مثلاً اموالی آخور و صمانلق) و بانجه
وعرصه (کی یرلرده طوتمق حفظده تقصیر اولمغله بوحالده)
اموال مذکوره او کی یرلرده طوتیلوبده (تلف یا ضایع اولسه
ضمان لازم کلور.) تکمله رد مختار.

ینه بوجهته مستودع برچوق کیمسه لک کوروب چقمقده
اولدقلری خانه سنه و دیعه یی قویسه باقیلور. اول و دیعه اول
کیمسه لک کوروب چقمقده اولدقلری حالده اول خانه ده حفظ
اولنور شی ایسه مستودعه ضمان لازم کلز. دکل ایسه ضمان
لازم کلور.

ینه بوجهته و دیعه یی بر خانه یه قیوب قپوسنی آچیق
براقسه ده خانه ده کسنه بولنماقده ضایع اولسه ضامن اولور.
ینه بوجهته مستودع و دیعه یی حمامده یا طریقه ده یا مسجده
براقسه ده غائب اولوب ضایع اولسه ضامن اولور. زیرا حفظده
نقصیر ایتیش اولور تکمله رد مختار.

ینه بوجهته و دیعه فاره نک کزدیکی محله قونمغله فاره
ودیعه یی افساد ایتسه باقیلور. مستودع محل مذکوره فاره نک

کیرمکده اولدیغنی مودعه بیلدیروبده آنک امر واذنیله قویمش
ایسه ضمان لازم کلز. واکر مستودع، فاره لرك کزدیکنی بیلدیکی
حالده مودعه اخبار ایتدیکی کبی کندوسی دخی دلیکلری سد
ایتمدیکی جهته ویدیعی فاره افساد ایتسه مستودعه ضمان
لازم کلور.

مستودع ویدیعی امثالی وجهله محافظه ایدرکن
ضایع اولدقده حکم

اما مستودع ویدیعی امثالی وجهله محافظه ایتکده ایکن
ضایع اولسه ۷۷۷ مادهیه مبنی مستودعه ضمان لازم کلیه جکی
کبی ۱۷۷۴ ماده حکمنجه بو بایده کی قولی دخی مع الیمین قبول
اولنور تکمله رد مختار.

ماده ۷۸۳

ودیعه بردن زیاده کیسه لره دخی ایداع اولسه بیلور.
بو صورتده «مستودع، متعدد» یعنی ایکی یا زیاده «اولدقده
اکر ویدیعه قابل قسمت دکلسه» یعنی اصلاً تقسیمی ممکن دکل
ایسه — ویدیعه بر حیوان اولق کبی — یاخود قابل تقسیم
ایسه ده تقسیم اولندیخی صورتده عیله جق اولور ایسه —
ودیعه بر روبه اولق کبی — مستودع لردن «برینک اذنیله

دیگری حفظ ایدر. تکمله رد مختار. زیرا مودع متعدد مستودع ارك کیجه وکوندز حفظده اجتماع ائمه جککریخی بیلدیکی حالده بویه قابل قسمت اولیان برمالی بووجهله بردن زیاده کیمسه لره ایداع ایتدکده هر برینک ثبوت یدینه راضی اولمش اولور. « ۷۷۲ » ماده یه باق. بوجهتهله شو حکم ۷۹۰ ماده یه منافی دوشمز. چونکه مذکور ماده شرحنده بیان اولنه جنی اوزره اوراده بلا اذن قیدی معتبر اولوب بوراده ایسه دلالة اذن موجوددر.

(یاخود بالمنابیه) یعنی مهائیه طریقیله (حفظ ایدرلر) که بومهائیه من حیث الزمان حفظده مهائیه اولور بحر.

ایکی فقره بیننده فرق

بوفقره نك فقره اولایه «یاخود» ایله عطف ایدلدیکنه نظرا ایکی فقره آره سنده فرق واردر. ظاهر فرق شودرکه مستودع مثلا ایکی کیمسه اولدقده بوفقره اولی وجهله بری دیگرینک اذنیله دائمی صورتده حفظ ایده بیلور. یعنی فقره اولاده بیان اولنان دائمی صورتده حفظدر. واقعا حموی بوصورتک جوازنده بیان اشتباه ایدرک دیورکه قابل قسمت اولیان مالده مستودع لره مهائیه طریقیله حفظه قرار ویروب بری کندو نوبتدن زیاده مدت دیگری نزدنده براقسه بونک

حکمی نظر و تأمله متوقف در اتی. لکن مجله بوضوحی تجویز ایتش
دیمک اولور .

« و بوحالده » یعنی صورت اولاده برینک اذنیله دیکری
دائمی صورتده حفظ ایتدیکی و صورت ثانیله بالمشاوبه حفظ
ایتدکری حالده « و دیعه بلا تعد ولا تقصیر تلف اولسه برینه »
یعنی نه الا نه ونهده ویرانه « ضمان لازم کلز » ۹۱ ماده یه باق .
اما تعدی یا تقصیر ایله تلف اولدقده « ۷۸۷ » ماده حکمنجه
تعدی یا تقصیر ایدن ضامن اولوب دیکرینه نسنه لازم کلز .
شوفره نك حکمنده ائمه خفیه متفقدر .

« واکر و دیعه » دراهم و دنانیر و سائر مثلیات کی « قابل
قسمت ایسه مستودع لر آتی بیلرندده سویا تقسیم ایله هربری »
کندوسنه اصابت ایدن « حصه سنی حفظ ایدر . » تکمله
ردمختار . یعنی مثلا مودع اوتوز آلتونی ایکی کشی یه ایداع
ایتدکده هربری اون بشر آلتونی و اوچ کشی یه ایداع ایتدکده
هربری اونر آلتونی حفظ ایدر لر .

« و بریسی » تکمیل « حصه سنی » یا خود حصه سنک برازینی
« مودعک اذنی اولمدقجه مستودع آخره ویره مز . » زیرا
مالک بوکی قابل قسمت و دیعه ده متعددک حفظنه راضی اولوب
یوخسه یا لکزر بعضی سنک حفظنه راضی اولما مشدر و مثلا
ایکی سنک حفظنه رضاسی بری سنک حفظنه رضاسنی استلزام
ایلمز تکمله ردمختار .

بومسئله امام اعظم مذهبی اولوب امام مشارالیه شو مسئله ايله امثالی حقنده شوقاعده نی ذکر ایلمشدر . « مثلا ایکی کشینک فعلی تجزی یه قابل بولنان برشیئه مضاف قلندقدده بعضه تناول ایدر . یوخسه کله تناول ایتمز . و بنا برین بری دیگرینه تسلیم ایتدکده بوکا مال صاحبک رضاسی اولمیه جفتدن ضامن اولور . »

شوقاعده آتی الذکر مسائله دخی جاریدر . شویله که متعدد مرتهن ووکیل بالشر و رهنده عدل اولنلر ووصیلر و مستبضعلرده دخی حکم بویله در . یعنی بولنردن بری یعنی مثلا متعدد مرتهنلردن بری کندی حصه سنی دیگر مرتهنه تسلیم ایتسه ده آنک یدنده تلف اولسه ضمان غصب ايله ضامن اولور . نته کیم ۷۲۰ ماده شرحنده بیان اولمشیدی .

اما امامین رحمهما الله تعالی یه کوره ودیعه کرک قابل قسمت اولسون و کرک اولسون بریسی دیگرک اذنیله حفظ ایده بیلور . زیرا مودع آنلرک امانتیله راضی اولمشدر بحر .

بوفقرده اذنی اولمدقچه دینلدی . زیرا مودعک اذن سابقیه مستودعک ایداعی جائز اولدینی کبی اذن لاحقیله دخی ایداعی جائزدر . نته کیم ۷۹۰ ماده شرحیله ۷۹۱ ماده ده بیان اولنور .

و مستودعلردن بریسی ودیعه دن حصه سنی مودعک اذنی اولمقسزین مستودع آخره « و یروبدہ آخرك یدنده ایکن بلا تعد

ولا تقصیر تلف یا ضایع اولسه) قابضه یعنی (آلا نه) اول
حصه نك (ضمان) ی (لازم كلز .) زیرا امام اعظمه كوره
الان مستودع المستودع اولوب مستودع المستودعه ایسه ضمان
لازم كلز . « ۷۷۷ » مادهیه باق بحر وتكملة رد مختار (اما
ویرن كندو حصه سی ضامن اولور .) ۷۹۰ مادهیه باق .

مثلا آنفا شرحا ذکر اولنان برنجی مثالده ویرن اون بش آتون
وايكنجی مثالده اون لیرا ضامن اولوب اما الان اوزرینه اصلا
ضمان یوقدر .

شرح اول حصه نك دنیلدی . زیرا شو مادهده مقصود بالذات
اودر . اما دیگر حصه نك عدم ضمانی ۷۷۷ مادهیه مبنیدر .

ماده ۷۸۴

(عقد ایداعده) یعنی عقد ایداع ائناسنده یاخود بعد
عقد الايداع مودع طرفدن (ایراد اولنان شرط اکر) هم
(ممکن الاجرا) یعنی اول شرطك ایفا واجراسی قابل (و)
همده (مفید) یعنی مودعه نافع (اولور ایسه معتبردر .)
بناءً علیه مستودعك اول شرطه رعایت ایتسی لازم كلوب حتی
رعایت ایتیبوده ودیعه تلف یا قیمتته نقصان طاری اولور ایسه
ضامن اولور . « ۷۸۷ » مادهیه باق . اکر ممکن الاجرا ومفید
(دكل ایسه لغودر .) بناءً علیه مستودعك اول شرطه رعایت

ایتمی لازم کلیوب بوندن طولای و دیعه تلف یا ضایع اولسه
ضامن اولماز . « ۸۳ » ماده شرحنه باق .

شوماده تحلیل اولندقدده احکام اربعه حاصل اولور .
چونکه مثبت طرفدن ایکی منفی وجهته دخی ایکی حکم واردور .
حکم اول ، عقد ایداعده ایراد اولنان شرط ممکن الاجرا
ایسه معتبردر .

حکم ثانی ، عقد ایداعده ایراد اولنان شرط مفیدر اولور
ایسه معتبردر .

حکم ثالث ، عقد ایداعده ایراد اولنان شرط ممکن الاجرا
دکلسه لغودر . ولوکه مفید اوله .

حکم رابع ، عقد ایداعده ایراد اولنان شرط مفید دکلسه
لغودر . ولوکه ممکن الاجرا اوله .

اشبو احکام اربعه نك هربری آتی مثالر ایله نشرعلی غیر
ترتیب الف اوله رق ایضاح اولنمشدر .

﴿ مثلا مستودعك خانه سنده حفظ اولنمق شرطیله برمال
ایداع اولنمشیکن حریق وقوعیله ﴾ فقط بو حریق مستودعك
خانه سنی محیط حریق غالب اولمسی شرط اولوب اما حریق
مذکور مستودعك منزانی محیط دكل ایسه بوتقدیرده و دیعه نك
محترق اولمسندن خوف اولنمیه جعی جهته اجنبی به تسلیم ایتمسی ایله
مستودعه ضمان لازم کلور بحر و تکمله رد مختار . اول مالک
﴿ دیگر محله نقلنه مجبوریت کلدکده ﴾ شرط مفید اولماغله اول

(شرطه اعتبار اولنماز .) حتی مستودع بوحالده وديعه ي آخر
يره نقليله حريقدن قورتارمغه مقتدر اولديغي حالده قورتارمسه
ضامن اولهجنی ۷۸۷ مادهده مصر حدر .

(بوصورته وديعه ديكر محله نقل اولنوبده) اوراده
(بلا تعد ولا تقصير تلف يا ضايع اولسه ضمان لازم كلز .)
۹۰ مادهيه باق .

بوماده حكم رابعك مثاليدر .

في الحقيقة بوصورته مستودع شرط مذكوره رعايت
ايتمى ممكن ايسهده رعايت ايدرك وديعه يي آخر يره نقل ايتماسى
مودع حقنده مفيد اوليوب وديعه نك محترق اولسى جهتيلاه
مضر اولور . لكن مستودع وديعه يي آخر يره نقل ايدوبده
اوراده تلف اولسى اوزرينه بوكي مجبوري ادعا ومودع انكار
ايتدكده مستودع بلا بينه تصديق اولنه ماز . زيرا بووجهيله
آخر يره نقل حد ذاتنده موجب ضمان اولوب ضرورتى دعوى
ايتك بعد وجود السبب مسقط ضمانى دعوى اوله رق بلا بينه
تصديق اولنه ماز . شو قدر واركه مستودع خانه سنده حريق
وقوعندن طولاي محل آخره نقل ايتك مجبوريتنده بولنديغى
ادعا ايتدكده حقيقه خانه سنده حريقك وقوعى معلوم ايسه
مستودع يمينيله تصديق اولنور بحر وتكملة رد مختار .

خلاصة كلام ، مستودعك خانه سنده حريقك وقوعى بالينه

ثابت اولدقده وديعه نك احراقى خوفدن ناشى آخره ويرديكنى اثباته حاجت قالماز تكملة رد مختار .

(مودع مستودعه وديعه نك) بنفسه وبالذات (حفظنى امر و شرط ايدوبده زوجه سینه یا اوغلنه یا خود خدمتکارینه یا خود کندو) یعنی مستودعك (مالى حفظ ایده کلان) و ۷۸۰ ماده و شرحنده مذکور اولدینی اوزره وکیل و مفاوضه شریکی کبی اجنبی اولان (بر کیمسه یه ویرمکدن نهی ایتدکده اول کیمسه یه ویرمکده مجبوریت) و احتیاج (وار ایسه) بو نهی و شرط ممکن الاجرا اولماغله (نهی) و شرطی (معتبر اولماز .)

سوآل، مودع طرفدن وديعه نك حفظى مستودع اوزرینه شرط ایدلمسی امر لازم اولیبوب ۷۷۷ ماده شرحنده ذکر اولندینی اوزره عقد وديعه ایله مستودع اوزرینه حفظ لازم کلور . بو حالده بوقررده امر و شرط ایدوبده دینلمکه لزوم یوقدر .

جواب، مقصود شرحا ذکر اولندینی اوزره بنفسه یعنی بالذات حفظنى شرط ایدوبده دیمکدر .

اول کیمسه ویرمکه مجبوریت

نه زمان حاصل اولور

اول کیمسه ویرمکه مجبوریت شول زمانده اولورکه وديعه

اول کیمسه نك یدیه محافظه ایدیلور شیردن بولتور. ودیعه مجوهراتدن اولوبده زوجه سنه ویرمکدن ویا آت اولوبده سائنه اعطادن نهی کبی تکمله رد مختار وزیلعی .

(بو صورتده مستودع ودیعه یی اول کیمسه یه) فقط اول کیمسه نك امین اولسی شرطدر (ویروبده) یدنده (بلا تعدولا تقصیر تلف یا ضایع) یاخود قیمته نقصان طاری (اولسه ضمان لازم کلز .) زیرا بو صورتده مودعك شرطنه مراعات ایله برابر حفظی غیر ممکن اولغله شرط مذکور مفید دکلدر بحر . ظاهر اولان ممکن الاجرا دکلدر دیمکدر .

مثلا بر کیمسه دیگر شخصه بر حیوانی ایداع ایتدیکی حالدده خادمه ویرمکدن نهی ایتدکده او شخص مذکور حیوانی با مجبوریه خادمه ویرسه یعنی مستودعك آندن بشقه ودیعه یی حفظ ایتدیره جك امین کسنه سی بولنماغله آکا ویرمه مجبور اولسه ده یدنده ضایع اولسه ضامن اولماز . اما آندن بشقه ودیعه یی حفظ ایتدیره جك امین خادمی وار ایکن آکا ویروبده تلف اولسه ضامن اولور .

کذا مودع ودیعه اولان عقد جوهرك مستودعك زوجه سی فلانه یه ویرمکدن نهی ایتدکده مستودعك مذکور ودیعه یی محافظه ایده جك دیگر امینه مثلا بر زوجه سی دها وار ایسه نهی معتبر در . یوغیسه معتبر دکلدر تکمله رد مختار وزیلعی .

وديعه نك كندوسنه اعطادن نهی ايديلان
كيمسه ده ايكي احتمال واردر

احتمال اول ، اول وديعه نك اول كيمسه ايله محافظه .
اولنه جق شی اولمسيدر . وديعه جوهر اولوبده زوجه سینه
يا وديعه فرس اولوبده سائسینه ويرمكدن نهی كی .
احتمال ثانی ، اول وديعه اول كيمسه ايله محافظه اولمیه جق
شی اولمسيدر . وديعه جوهر اولوبده خد متكارینه و فرس
اولوبده زوجه سینه ويرمكدن نهی ايتك كی . زيلعينك ايضاحنه
كوره مجله ده بيان اولنان اولكي صورت اولوب اما ايكنجی
صورتده نهی مذکور مفید اولغله آكا مخالفت موجب ضماندر
تكملة رد مختار و بجز .

شو مثال ، حكم ثالث مثالی اولوب آنجق آتی « واكر
يوق ايكن الخ » فقره سی اعتباريله حكم ثانی به دخی مثال اولور .
حكم ثالث مذکور ایکنجی . مثال ، مستودعه بولنان
قادینه حال وقات تقرب ایتكله مزبوره وديعه بی قومشوسنه
دفع و تسلیم ایتدكده اكر مزبوره نك ياننده دفع وديعه جائز
اولان امینی یوغیسه مزبوره به ضمان لازم كلز خانیه تكملة
رد مختار .

حكم ثالث مذکور اوچنجی مثال ، مودع وديعه بی فلان
اوطه ده حفظ ائمه زیرا اوراسی مخوفدر دیدیکی حالده مستودع

اول اوطهده حفظ ایتسهده ضایع اولسه اکر اول اوطهده
بشقه محافظهلی یری یوغیسه مستودع آتی ضامن اولماز . واکر
محافظهلی یری بولنوب اورایه نقله مقدر ایدیسه مثال آتی
حکمی جاری اولور .

حکم ثالث مذکوره دردنجی مثال ، مودع ، مستودعه
ودیعه پی الکه حفظ ایدوب کیجه وکوندز الکن برافه
دیسی یعنی بو شرط ممکن الاجرا اولدیغندن لغودر .

(واکر) اول کیسهیه ویرمکده (مجبوریتم) و احتیاج
(یوق ایکن ویرسه) ده ولوکه بلاتعد ولا تقصیر تلف یا ضایع
اولسه بوتقدیرده کی نهی مفید اولغله مستودع (ضامن اولور)
تلفی اکر مستودع اولک مستودع نائیدن مفارقت وکوزندن غیوبت
ایتدکنصکره واقع اولور ایسه . بو صورتده کی ضمانده « ۷۹۰ »
ماده شرحنده ذکر اولنهجق تفصیلات جاری اولور . بو
صورتده ضمانت سببی شودرکه انسانلر امانت ، کیاست و دینده
شین ویرهجک شیرلی معرفتده مختلفدرلر . بناء علیه شرط
مذکور مفید اولور .

اما و دیعه نك تلف و ضیاعی مستودع اول هنوز مستودع
نائیدن مفارقت ایتمدن وقوعبولورسه چونکه بو حالده و دیعه
مستودع اولک حفظنده دیمک اولغله بلا تعد ولا تقصیر تلفی
حائلهده مستودع اول یا ثانی اوزرینه ضمان لازم کلز .

وديعه نك غيره ويرمكده مجبوريت اولماق ايكى وجهله در

مجبوريت يوق ايكن دنيلور كه مجبوريت اولماق ايكى
وجهله اولور .

وجه اول ، وديعه قيون ساعتى و يوزوك كى شى خفيف
اوله رق مستودع بنفسه استحساب و محافظه ايتمه مقتدر
ايكن امينه ويرمسيدر . بو تقديرده وديعه بوكى امينه ويرمه
مجبور اولقسرين حفظ ايدمك شى خفيفى مستودع بشقه سنه
ويره ميوب بالذات كندوسى حفظ ايتمى لازم كلور .

وجه ثانى ، مودعك ويرمكدن نهى ايتديكى اميندن بشقه
وديعه يى محافظه ايدمك امينى بولمسيدر بحر .

(كذلك) وديعه (خانه نك فلان او طه سنده حفظ اولمق شرط
اولنمشيكن) كرك بشقه او طه ده حفظ اولنمندن نهى ايدلسون كرك
ايدلسون (مستودع آنى اول خانه نك ديكر او طه سنده حفظ
ايتديكى صورتده اكر اول او طه لر امر محافظه ده مساوى
ايسه لر) يا خود اول ديكر او طه حفظده ده اقوى ايسه بو
تقديرده بو مثالو شرط مفيد اولماغله (اول شرطه اعتبار
اولماز) . زيرا خانه نك كليسى حرز واحددر . بوكا دليل
شودر كه سارق مالى بر او طه دن آلوب ديكر او طه يه نقل ايتسه
سارقه حد سرقه لازم كلز تكمله رد مختار .

نته کیم ودیعه آچه فلان کیسه یه قونمق شرط اولشیکن
دیگر کیسه یه قونسه ده ضایع اولسه ضمان لازم کلز. کذا کیسه یه
قونمق شرطیله ایداع اولنان پاره صندیغه وضع اولنه بیله جکی
کبی صندیغه قونمق شرطیله ایداع اولنان پاره اوپه ده حفظ
اولنه بیلور. زیرا بو شرطار ممکن الاجرا ایسه ده مفید دکلدر.
(و بو حالده ودیعه تلف اولسه کذلک) یعنی حکم رابع
و حکم ثالث مثلاً الرنده ضمان لازم کلدیکی کبی بونده دخی
(ضمان لازم لازم کلز.) شو مثال حکم رابعک بشقه جه
مثالیدر.

کذلک ودیعه یی صاغ الیکه آل صوله آله یا ودیعه یه صاغ
کوزیله باق صول کوزیله باقه کبی شرطار لغو اولملریله بونلره
مخالفت موجب ضمان دکلدر.

نته کیم بر کیسه دیگر کمسنه نک خانه سنه کیروبدنه بلاذن
بر اوپه سندن آلدیغی روبه یی دیگر اوپه یه نقل ایسه باقیلور. اوپه لر
حرزده مساوی ایسه ضمان لازم کلیوب فقط مساوی دکل
ایسه ضمان لازم کلور.

(اما اوپه لرک بری) یعنی آنده حفظی شرط اولنان
اوپه (کارگیر و دیگری) یعنی مستودعک خلاف شرط
حفظ ایتدیکی اوپه (اخشاب اولمق) یا بری زقاق اوستنده
اولیوب دیگری زقاق اوزرنده بولمق (کبی بینلرنده) امر
محافظه ده (تفاوت بولنسه شرط) مفید اولمغله (معتبر اولوب

مستودع آنی مشروط اولان) و کارگیر بولنان یازقاق اوستنده اولیان) اوطهده حفظ ایتکه مجبور اولور و) بناءً علیه) حفظده اول اوطه نك مادونی اولان اوطه یه قیوبده) ودیعه) تلف اولسه ضامن اولور .) بو مثال حکم ثانی مثالیدر تکمله رد مختار .

نته کیم شو صندوقده حفظ اولنق شرطیله ایداع اولنشیکن دیگر صندوقده حفظ ایتسه ضمان لازم کیلوب فقط صندوق بری تخته و دیگری تیموردن معمول قاصه اولنجه تخته صندوقده حفظ ایتدیکی حالده تلف اولورسه ضمان لازم کلور .

شو « کذلک خانه نك فلان اوطه سنده الح » مثالنده واقع « اول خانه نك » قیدی بعض فقهایه کوره احترازیدر . زیرا فلان محلهده کی شو خانهده حفظ اولنق شرطیله ایداع اولنان مال اول محلهده دیگر خانهده حفظ اولنه ماز . ولو که اول دیگر خانه اولکندن احرز اوله . چونکه غالباً ایکی خانه حرزده مختلف و بناءً علیه شرط مذکور مفید اولور . دیگر بعض فقهایه کوره دیگر خانه حفظده او خانه یه مساوی یا آندن محافظه لی اولنجه مذکور دیگر خانهده حفظ اولنه بیلور . شوقول ثانی یه کوره « اول خانه نك » قیدی احترازی دکلدر تکمله رد مختار و هندیه .

نته کیم شو بلدهده حفظ اولنق شرطیله ایداع اولنشیکن دیگر بلدهده حفظ اولندقدده ضمان لازم کلور ۷۸۷ ماده یه باق .

تفصیلات محرره دن شو ماده ده تعدد امثله نك اسبابی ظاهر
اولدی .

ماده ۷۸۵

(ودیعہ نك صاحبی غائب اولوبده) بوانسدیغی مکانی
و (حیات و مماتی معلوم اولسه) یعنی مفقود اولسه (مستودع
آنی صاحبك وقتی تبين) و ورثه سی تحقق (ایرنجه نك
حفظ ایدر) . یعنی بو زمانه قدر حفظ ایتسی لازم کلوب
یوخسه و دیعه صاحبك فقد و غیوبتی اوزرینه کمنه یه تصدق
یا ورثه سنه اعطا یا امورینه صرفله استهلاك یا خود بیت امانه
رد ایدمه جکی کبی بیت المال مأموری دخی آنی مستودع دن
طلب ایدمه مز . زیرا رساله مفقود نام اثر مزده یعنی ۱۱
مسئله سنده ذکر اولندیغی اوزره مستودعك یدی مفقودك
یدی مقامنه قائمدر . بناء علیه امین بیت المال بالذات مفقودك
یدنده بولنان مالی اخذ ایدمه جکی کبی مستودع یدنده کنی دخی
اخذ ایدمه مز .

(فقط و دیعه طور مغله بوزیله جق شیلاردن) یعنی مثلاً یوکللی
برشی (اولدیغی حالده حاکم اذنیاه صاتوب ثمنی) اصلی کبی
(تزدنده امانت اوله رق حفظ ایدمه یلور) . یعنی مستودعه لایق
اولان و دیعه مذکورہ بی بروجہ محرر اذن حاکمه صائمق و ثمنی

حفظ ایتک اولوب فقط بلدهده حاکم بولمسه و دیع کندوسی ساتارق ثمنی حفظ ایدر. اما حاکمه مراجعت ایتک ممکن ایکن بدون المراجعة ساتارایسه بیع فضولی و بناء علیه بونده بیع فضولی احکامی جاری اولور.

﴿اما صامیوبده طور مغله بوزولسه ضمان لازم کلز.﴾ زیرا مستودع مأمور اولدینی وجهه اوزره و دیعه یی حفظ ایلمش و و دیعه یی صامامسی مأمور اولدینی وجهدن زیاده ایولک ایتکدن امتناع بولمش اولمغله التزام ایتدیکی ایشی پامامسی و کذا و دیعه نک بوزولسی تعدی اولمدینی کی تقصیر دخی دکدر.

مثلا و دیعه صوفدن و کووه نک افساد ایده چکی برشی اولوبده مستودع اذن حاکمه صامدینی کی یازین آنی کونشه و هوایه دخی عرض ایتما مکه آنی کووه افساد ایتسه ضمان لازم کلز.

غائبک وفاتنک تبینی اینکی

وجهله اولور.

مجلدهده غائبک وفاتی تبین ایدنجیه دک دینلیور که غائب مرقومک وفاتی رساله مفقود نام اثر مرزده بیان اولندینی اوزره ایکی وجهله در.

وجه اول، مفقودک حقیقه وفاتنک تبین ایتسیدر. حقیقه وفاتنک تبینی شهادتله ثابت اولور. شویله که مفقودک ید مستودعده

مالی یا خود بر کیسه ده آله جنی بولند قدده وارثی مستودعدن
ودیعہ یی یا مدیوندن دینی طلب و ادعا ایدہ بیلور. یعنی مثلاً
مفقودك اوغلی پدرینك مدیونندن پدرم فوت اولمغله سنك
ذمتكده کی شو قدر غروش آله جنی بکا میراث قالدی ویر دیو
ادعا و مدیون دخی بورجنی اقرار ایله برابر پدرینك وفاتی
انکار ایدوب ایکی شاهد ایله موتی اثبات ایتدکده مفقودك
حقیقه موتی ثابت اولور. نته کیم غائب و مفقود مرقومك وارثی
مورثنك فلان وقتده وفاتی جهتیه و دیعه حصرا کندوسنه
موروث اولمغله تسلیمنی دعوی وینه ایله موتی اثبات ایتدکده
غائب مرقومك موتی ثابت اوله رق شو حالده ۸۰۲ ماده و جهله
معامله اولنور.

وجه ثانی، مفقودك حکما وفاتنك تبین ایلمسیدر. شویله که
مفقود حین ولادتندن اعتباراً طقسان یاشنی اکال ایتدکده
وفاتیه حکم اولنور زیرا بو وقتدنصکره حیات نادر اولوب
مجله نك ۴۲ ماده سنده بیان اولندیغی اوزره نادره اعتبار یوقدر.
آنجق مفقودك حکما وفاتی طقسان یاشنی اکالندنصکره حکم
حاکم ایله حاصل اولور. یوخسه حاکمک حکمی اولمقسزین مجرد
طقسان یاشنی اکالیه حکما وفات ایتمش عد اولنماز.

و مفقودك وارثی وجه اول اوزره مفقودك حقیقه وفاتی
بالبنیه اثبات ایتدکدنصکره مورث حیا کلیرسه مخیر اولوب دیلرسه
اول وارثه واستر ایسه اول شاهدلره تضمین ایتدیرر. یوخسه

مستودعه تضمین ایتدیزه من. زیرا مستودعك بوحالده ودیعه بی وارثه ویرمی جائز و بلکه حکم حاکمه بناءً بوکا مجبور اولوب جواز شرعی ایسه ۹۱ ماده یه بناءً ضمانه منافیدر.

لکن مفقودك وفاتنه وجه ثانی ایله حکم اولنه رق ودیعه وارثه اعطا اولندقدنصکره حیا کلیرسه وارث یدنده عیناً موجود اولانی اخذ ایدوب اما تلف اولانی تضمین ایتدیزه من رساله مفقود.

ماده ۷۸۶

﴿آت واینك كی نفقه یه محتاج اولان ودیعه نك نفقه سی صاحبنه﴾ یعنی مودعه ﴿عائدر﴾ ۸۸ ماده یه باق . بو تقدیرده مودع ودیعه نك نفقه سنی مستودعه بر اقمیدنی جهته مستودع دخی مالندن انفاق ایتما مكله ودیعه تلف اولسه مستودعه ضمان لازم كلز. اما مودع نفقه بی بر اقمش ایكن مستودع انفاق ایتدیكى كی فسخ عقد ودیعه ایله ودیعه بی مودعه تسلیم ایتسه ده یدنده تلف اولسه ضامن اولور تكمله رد مختار .

﴿صاحبی غائب اولدقده﴾ بوراده كی غائبدن مقصود مفقودمی یوخسه ۷۹۹ ماده ده كی غائبده اولدنی كی مسافه سفرده بولنان كیمسه می یوخسه علی الاطلاق مستودعك مقیم بولندنی بلده ده اقامت ایتیوب دیگر بر بلده و قصبه ده اسكان

ایلیان کیمسه می بو مسئله دسترس اوله مدیغم جهتهله تحرییه محتاجدر (مستودع اولان کیمسه حاکمه مراجعت ایدوب) انفاقه اذن و رخصت طلب ایدنجیه مذکور مال یدنده ودیعه اولدیغنی وصاحبی غائب ایدوکنی اثبات ایتدکده (او) یعنی حاکم (دخی صاحب ودیعه حقنده اصلح وانفع اولان صورتک اجراسنی) مستودعه (امر ایلر) زیرا ۵۸ ماده حکمنجه رعیه اوزرینه تصرف مصلحته منوطدر (شویله که) ودیعه اسب واستر کبی شی اولق مثللو (ودیعه نک ایجاری ممکن ایسه مستودع آنی رأی حاکمه ایجار ایدوب اجرتهندن انفاق و فضله سنی مودع ایچون حفظ ایدر) واقعاً ۷۹۲ مادهده مستودع ودیعه یی آخره ایجار ایده میه جکی محرر ایسه ده او مسئله دن بو مسئله شرعیه مستنادر (یاخود) آنی رأی حاکمه (ثمن مثلیله صاتار) ده ثمن مذکوری مودع ایچون حفظ ایدر . و بو بیع بیع فضولی اولماز .

(و) ودیعه نک (ایجاری ممکن دکلسه کذلک رأی حاکمه همان) یعنی فقره آتیه وجهله اوچکونه قدر کندی مالندن انفاق ایتکسزین (یاخود) مالک حاضر اولور امیدیه بر یا ایکی ونهایت (اوچکونه قدر کندو مالندن انفاق ایتدکن صکره ثمن مثلیله صاتوب) صاحبی کلدکده نهایت (اوچکونلک مصرفی دخی صاحبندن استر) اوچکونه قدر انفاق ، مالک حاضر اولور امیدیه در . اوچکوندن زیاده انفاق ایله امر اولسه ماز

تکمله رد مختار. و زیاده مصرف ایتسه زیاده سنی مودعدن طلب
واخذ ایده مز .

فقط ودیعه حیوان اولنجه شو مصرف حیوانک قیمتی
تجاوز ایده میوب ایتدکده مستودع یالکز قیمتی استیه بیلور
یوخسه اندن زیاده سنی طلب ایده مز .

(اما) مستودع (حاکمک اذنی اولقسزین) ودیعه مذکور
اوچکونده یا دهها مقدم (مصرف ایدر ایه) تبرع اولوب
بومصرفی (مودعدن آله ماز) ۷۲۵ ماده شرحنده بیان اولنان
قاعده و ۱۵۰۸ ماده یه باق .

انفاقه اذنی طلب ایدن مودعدن

بینه نك طلبی

شرحاً ذکر اولندیغی اوزره مستودع انفاق یا بیع ودیعه
ایچون حاکمه مراجعت ایتدکده او مال کندو یدنده ودیعه
وصاحبی غائب اولدیغنه حاکم مستودعدن بینه طلب ایدر. زیرا
او مال یدنده ودیعه اولمیوب مغضوب یاخود مال صاحبی حاضر
بولنق محتملدر . بو بینه استکشاف حال ایچون اولوب یوخسه
حکم ایچون اولمادیغی جهتله بونده خصمک حضوری شرط
دکدر . «۷۷۰» ماده شرحنده بیان اولندیغی اوزره لقطه یه
انفاقده دخی حکم بروجه مشروحدر .

ماده ۷۸۷

(مستودعك تعدی) سی (ویا تقصیری حالنده ودیعه تلف یاخود قیمتته نقصان طاری اولسه ضمان لازم کلور.) یعنی ودیعه بروجہ محرر تلف اولدینی تقدیرده بدلنك اوده مسی مستودع اوزرینه لازم کله جکی کی قیمتته نقصان طاری اولدقده نقصان مذکورك ضمانی لازم کلور. «۸۰۳» ماده یه باق.

بو ماده ده درت حکم واردر. برنجیسی، مستودعك تعدیسی حالنده ودیعه تلف وایکنجیسی مستودعك تقصیری حالنده ودیعه تلف و اوچنجیسی، مستودعك تعدیسی حالنده ودیعه یه نقصان قیمت عارض اولق و دردنجیسی، مستودعك تقصیری حالنده نقصان قیمت عارض اولقدركه جمله سی موجب ضمان اولوب مجله نك آتی الذکر مثاللرندن برنجی وایکنجی مثالی برنجی حکمه مثال اولدینی کی اوچنجی مثالی دخی ایکنجی حکمه مثالدر.

تعدی و تقصیره دائر بعض مسائل ۷۷۹ ماده شرحنده بیان اولدینی کی بعض مسائل دخی شو ماده ده ذکر اولنیور.

امانات ایکی قسم اولوب بعضیسنده بعدالتعدی
وفاقه عودتله ضمان زائل اولور
وبعضیسنده اولماز

عاریتده بو ماده مقامنده بولنان ۸۶۴ مادهده «مستعیرک
بر کونا تعدیسی یا تقصیری واقع اولدقده آرتق هر نه سببله
اولور ایسه اولسون عاریت تلف اولسه یاخود قیمته نقصان
کلسه ضمان لازم کلور» دینلدیکی حالدده بو مادهده تعدی
یا تقصیری حائنده دینیلرک تعدی یا تقصیرک موجب ضمان اولمی
ودیعه حال تعدی یا حال تقصیرده تلف یاخود قیمته نقصان
کلسیه مشروط اولدیغنه اشارت اولندی. بوجهتله شومسئله نك
ایضاخنه بروجه آتی مسارعت اولنور. شویله که امانات ایکی
قسمدر.

قسم اول، شول اماناتدر که امین اتخاذا اولنان کیمسه نك
اول امانات اوزرینه وضع یدینك نفعی یعنی حفظ عملنك فائده سی
مال صاحبنه عائد و امینك یدی مالکنك یدی مقامنه قائم اولور.
ودیعه کبی. زیرا و دیعهده مستودعك وضع یدینك نفع وفائده سی
مال صاحبی بولنان مودعه عائد اولوب مستودع ایچون بووضع بدده
بر کونا نفع دینوی یوقدر.

بو قسم اماناتده امین تعدی ایتدکدنصکره وفاقه عودت

ایسه ضماندن بری اولور . چونکه بو امینک یدی تقدیراً مال صاحبک یدی اولدینی جهتله بعدالتعدی وفاقه عودت ایتدکده تعدی ایله مغضوب حکمی آلا ن امانت وفاقه عودتله مال صاحبک یدینه اعاده ایدلمش حکمنده اولور .

ایمدی غاصب مال مغضوبی مال صاحبنه حقیقه رد و اعاده ایتدکده ۸۹۲ ماده وجهله غاصب بری اولدینی کبی امین دخی بعدالتعدی وفاقه عودت ایتدکده تعدینک حکمندن بری اولور درمختار و تکمله درمختار و بحر .

بو قسم اول امانتله شونلردر ۱ و دیعه ۲ برای رهن استعاره اولنوبده هنوز رهن اولیان مال ۳ شرکت غنان یا مفاوضه ایله شریک یدنده کی مال شرکت ۴ مضارب یدنده کی مال مضارب ۵ مستبضع یدنده کی بضاعه ۶ بیعه یا ایجاره یا استیجاره وکیل اولان کمنه یدنده کی مال تکمله درمختار . بومسائل ۸۱۴ ماده شرحنده تفصیل اولنه جقدن .

ایمدی مستودع و دیعه یه تعدی ایدوبده مذکور تعدیدن طولایی و دیعه یه برکونا ضرر ترتب ایتدین بردها تعدی ایتماک نیتیه تعدی یی ترک ایدوبده صکره بلا تعد و لا تقصیر تلف اولسه یعنی بعد التعدی وفاقه عودت ایلدکن صکره ۲ ماده موجبنه ضمان لازم کلز .

برکونا ضرر ترتب ایتدین دینلدی . زیرا تعدی و استعمال سببیه نقصان ترتب ایتماک ایسه اول نقصانی ضامن اولور .

چونکہ بو نقصانی مال صاحبندن علی وجه التعدی حبس ایش
اولور تکمله رد مختار و بحر .

ایشته و دیعهده بعدالتعدی ازاله تعدی ایله ضمان زائل
اولدینی حالده قریبا ایضاح اولنه جنی وجهله عاریت و مأجورده
بعدالتعدی ازاله تعدی ایله ضمان زائل اولماز . زیرا ضماندن
برائت و دیعهنک و امانتک مال صاحبنک حقیقه یا حکما یدینه
اعاده سیله حاصل اولوب حالبوکه مستعیر ایله مستأجرک یدلری
کندولری ایچون و عمللری نفسلریچون اولغله مجرد ترک خلاف
ایله مال صاحبنک حقیقه یدینه واصل اولمیه جنی کی حکمادخی آنک
یدینه واصل اولمش اولماز . اما و دیعهده بویله دکلدرد . زیرا
مستودعک عمل و حفظی مودع ایچون اولغله آنک یدی مودعک
یدی حکمنده در بحر و تکمله رد مختار .

مثال .

بعدالتعدی ، ازاله تعدی ایله ضماندن برائتی حقیقه کی
مسئله آنقه بی مثال ایله ایضاح ایدم :
مثلا مستودع ، و دیعه یی اولان حیوانه بلا اذن بینوب
اولوجهله استعمال ایتدکده تعدی ایلمش و غاصب حکمنده
اولمش اولور . فقط بو وجهله استعمال ایتدکدنصره اول حیوانه
برکونا ضرر ترتب ایتدین یعنی تلف اولدینی کی قیمته دخی

نقصان کمدین بر دها تعدی ایتماک یعنی بینامک اوزره بینمکی
ترکه کافی السابق حفظ ایتسه ضماندن بری وید ضمان کماکان
ید امانته منقلب اولوب حتی بوندنصکره مذکور حیوان بالاتعد
ولاتقصیر تلف یا ضایع اولسه ضمان لازم کمر.

اما مثلاً بر کون بیندکدنصکره اقسام اولغله صاحبان
ینه بینمک اوزره یعنی بینمک نیتیه آخوردده باغلاسهده اوکیجه
سرقه اولنسه یا حتف انفه تلف اولسه مستودع ضامن اولور.
«۲» مادهیه باق بحر.

مستودع، ودیعه اولان البسهیی کیدکدنصکره چیقارسه
ویا ودیعه اولان خالی یی فرش ایتدکدنصکره قالدیرسه یاخود
ودیعهیی «او مثللو ودیعه اوراده حفظ اولنه ماز» بر محله وضع
ایتدکدنصکره اورادن قالدیرسهده دیگر بر محل مأمنده صاقلاسه
یاخود ودیعهیی امینی اولمیان بر کیمسهیه حفظ ایتدیردکدنصکره
آندن آلهده صکره بالاتعد ولاتقصیر یدنده تلف اولسه حکم
منوال مشروح اوزوه در.

ازاله تعدیده اختلاف

شوحالده تعدی ازاله اولنوب اولنمدیغنده اختلاف اولنسه
باقیلور. مودع ازاله تعدی یی اقرار ایدرسه فیه. انکار ایلر
ایسه مستودع اوزرینه اقامه بینه ایتمک لازمدر. ایسته علمانک
اعتقاد ایتدکری بوجه مشروح اولوب فقط بعض فقها وفاقه

عووث ايتديكى حقنەدە سوز مستودەك اولوب مستودە اقامە
بىنەيە مجبوز دكلدر . زيرا مستودە نفسندن ضمانى نفي ايدىور
دېشلردر تكملة رد مختار .

مثلاً، امينى اوليان بر كيمسەيە وديعەي حفظ ايتدير دكن
صكرە يديە اعادە ايلدمە آندە نصكرە تلف اولدى بناءً عليه
ضمان لازم كلز ديو ادا و مودە يديكە اعادە ايلمدين تلف
اولدى بناءً عليه ضمان لازم كلور ديو ادا ايتەدكە سوز
مودەك اولوب مستودە دفعنى اثبات ايتمكە مجبوردر . «۱۶۳۲»
مادەيە باق .

نتە كيم مستودە وديعەي امينى اوليان بر كيمسە ايلە مودە
ارسال ايلديكنى وواصل اولديغنى ادا ايلديكى حالە مودە
وصولى انكار ايتسەدە اثبات اولنە مديغى كې مودە دخى يمين
ايتسە ضامن اولور . و مستودە رسول مرقومك ايصالنى تصديق
ايلمش ايسە اول رسولە رجوع ايلە تضمين دخى ايتديرە مز .
شوقدر وار كە وديعە يد رسولە موجود ايسە استرداد
ايدە بيلور .

استثنا

وديعەدە بعد التعدى ازالە تعدى ايلە ضماندن برائتى
مسئله سندن آتى الذ كر مسائل مستنادر .
مسئله اولى ، مستودە ، مال صاحبك وديعەك رد

واعاده سنی طلب ایتمی اوزرینه ودیعه یی انکار یعنی بکا ایداع
ایتمک دیمک ایله یعنی مودعه قارشو ججود ایله برابر منقول
اولان ودیعه یی زمان انکارده بولندیغی مکندن نقل ایتمکدن
صکره اول ودیعه یی اقرار ایلسه وبعدا لججود ودیعه یی احضار
ایتمسه ودیعه مذکور دی صاحبنه اعاده و تسامیم ایتمکجه ضماندن
بری اولماز . یعنی ججود مذکور تعدی ایکن بعد الججود
مجرد اعتراف ایتمسبله تعدی یی ترك ایتمش عدد اولماز . زیرا
مودع ودیعه سنی طلب ایتمسبله ایداع منتهی و منسوخ اوله رق
آندن صکره منع ایتمسبله مستودع غاصب اولوب آنک یدی
مالکک یدی کبی اولمیه جغندن آندن صکره اقرار ایله مالکک
یدینه نه حقیقه نه ده حکما رد حاصل اولماز تکمله رد مختار .

ایضاح قیود مسئله

۱ « و دیعه نك رد واعاده سنی طلب ایلمسی اوزرینه »
دینلدی . زیرا مودع مستودعدن و دیعه نك حالنی سو آل ایلمسی
یعنی ودیعه هم نه حالده در دیسمی اوزرینه مستودع ودیعه یی انکار
ایتمسه ده صکره ودیعه تاف اولسه ضمان لازم کلز . چونکه
بوانکار حقیقه انکار اولمبوب بلکه حفظدر . شو سبله که
ودیعه یی سارق و غاصب کیلرک آگاه اولماریغی موجب اوله جغندن
ججود حفظ بایندندر تکمله رد مختار .

۲ « و دیعه یی انکار یعنی بکا ایداع ایتمک دیمک ایله »

دیندی. زیرا مستودع آنی مال صاحبی بکا هبه ایتدی یا عاتدی دیو ادا ایدوبده مال صاحبی بیع یا هبه یی انکار ایتدکن صکره اول مال مستودع دنیلان کیسه یدنده تلف اولسه ضمان لازم کلز. چونکه بومسئله ده یدده اتفاق وجهته اختلاف ایتاریله محقق اولان امانته حمل اولنور. نته کیم ۷۷۹ ماده شرحنده بیان اولندی.

۳ «زمان انکارده بولندی مکندن نقل ایتسه» دیندی. زیرا بولندی مکندن بعدالانکار نقل ایتسه ده اوراده تلف اولسه بونده اختلاف اولمشدر. بعض فقهایه کوره ضمان لازم کلز که در مختار صاحبی دخی خلاصه دن بو وجهله نقل ایلمشدر. دیگر بعض فقهایه کوره مستودع بعدالانکار بولندی مکندن نقل و تحویل ایتسه بیله بعدالانکار اوراده تلف اولسه ضامن اولور. اصحاب متونه بوایکنجی قولک صحتی ظاهر اولندی جهته بوقوله اعتماد ایتدکریخی خیر رملی ذکر ایلمش ایسه ده مجله نك ۹۰۱ ماده سنك ظاهرندن بوایکنجی قول آکلاشیلور تکمله رد مختار.

۴ «منقول اولان» دیندی. زیرا ودیعه عقار اولوبده مستودع اولوجهله انکار ایتسه ده بعده تلف اولسه بونده اختلاف فقها بولنوب بعض فقهایه کوره ضمان لازم کلز. یعنی عقار جحود ایله مضمون اولماز. چونکه عقارده غصب تصور اولماز. و دیگر بعض فقهایه کوره ودیعه عقار اولسه دخی

مستودع انکار ایله ضامن اولورکه بوقول امام محمد رحمه الله تعالیندر تکمله رد مختار. بومسئله ان شاء الله تعالی ۹۰۵ ماده شرحنده تفصیل اولنور تکمله رد مختار.

۵ « مودعه یا وکیلنه قارشو ججود ایله » دینلدی. زیرا مودعک یا وکیلنک غیر برکیمسه نک ودیعه یی طلب ایتسی اوزرینه مستودع آنی انکار ایتسه ده بعده تلف اولسه ضامن لازم کلز. چونکه بوانکار، سائلک ودیعه یی جبرا آلمق فکرنده بولمسی کبی بر مقصد غیر مشروعی منع ایچون اوله جغندن انکار مذکور حفظدر.

۶ « بعدالججود ودیعه یی احضار ایتسه » دینلدی. زیرا بعدالججود مستودع ودیعه یی احضار یعنی مودعه ویرمک اوزره حاضر ایتمکه مودع براق ودیعه اوله رق طورسون دیدکده نظر اولنور. اگر مستودعک احضار مذکورنده مودع ودیعه یی آله بیله جک براده ده یعنی احضار مذکور مودع قابض عد اولنور درجه ده ایسه مستودع ضامن اولماز. زیرا بو، ایداع جدیددر. واکر احضار مذکور مودع قابض عد اولنور درجه ده دکل ایسه مستودع ضامن اولور. زیرا رد واعاده تمام اولماشدر در مختار.

قسم ثانی، شول اماناتدرکه امین اتخاذا اولنان کیمسه نک آنلر اوزرینه وضع یدینک نفی وحفظ عملنک فائده سی مال صاحبنه عائد وامینک یدی مالکنک یدی مقامنه قائم اولیوب

کندینه یعنی امینه راجع و امینک حفظه مأموریتی مقصود
اولیوب تبعاً اولور . بو اماناتده امین تعدی ایتدکن صکره
وفاقه عودت ایله امین بری اولماز . زیرا بعدالتعدی ترتب
ایدن ضماندن برأت امانتی صاحبک حقیقه یا حکما یدینه رد
و اعاده سی ایله حاصل اولوب مجرد ترك تعدی حقیقه اعاده اولمדיنی
کبی مثلاً مستأجرک و مستعیرک یدلری و عمللری نفسلریچون
اولغله حکما اعاده دخی حاصل اولماز . مثلاً مستأجر مأجوری
محافظه ایدر لکن مأجورک منفعتنه مالک اولغله استیفای
منفعت یعنی کندی فائده سی ایچون محافظه ایلر هدایه و کفایه
فی الاجاره .

مأجورک بو ضابطه اوزرینه صورت تفرعی ۵۴۵ ماده
شرحنده ایضاح اولندیغی کبی مستعارک دخی کیفیت تفرعی
دخی ۸۱۴ ماده شرحنده ایضاح اولنه جقدر .

«مثلاً مستودع کندوسنده و دیعه اولان نقودی امورینه»
یعنی مستودع کندی امورینه یاخود مستودع اول نقودی بلا
امرا المودع مودعک امورینه «صرف ایله استهلاک ایتسه»
یاخود بشقه سنه و یروب استهلاک ایتدیرسه تعدی اولدیغندن
«ضامن اولور .»

بعض و دیعه بی استهلاک

مستودع، نقود مذکورہ نك بر مقدارینی صرف ایتدیکنی

اقرار ایتدکده تعیین مقدارده سوز زیاده اولمديغه يمينيه مستودعکدر . « ۸ » مادهیه باق .

و مستودع مذکور ودیعه نك مثلا نصفی اولوجهه استهلاك ایتدکدن صکره دیگر نصفی دخی یدنده بلا تعد ولا تقصیر تلف اولسه یالکز استهلاك ایتدیکی نصفی ضامن اولوب دیگر نصفی ضامن اولماز . زیرا مستودعك تعدیسی یالکز نصفده اولوب ضمان ایسه جنایت مقداريله در تکمله رد مختار .

فقط شو حکم یعنی نصف ودیعه استهلاك اولندقدده یالکز نصفك ضمانی ودیعه یه تبعیض مضر اولمديغی تقدیرده در . دراهم ودنانیر ومکیل وموزون کی .

مثلا ودیعه الی آلتون اولوبده مستودعك یکر می بش آلتونی استهلاك ایتمی کی .

اما ودیعه یه تبعیض مضر ایکن مستودع بوجه محرر بعضیسنی استهلاك ایتدکده ودیعه نك جمعیتنی می ضامن اولور یوخسه باقی قالانك نقصانیه برابر استهلاك ایتدیکی مقداری می ضامن اولور تحری اولنمیدر تکمله بحر .

۹۰۰ مادهیه توفیقاً شو سو آله بوجه آتی جواب ویريله . بیلور می ؟ باقینك نقصانی ربع قیمتدن دون ایسه استهلاك ایتدیکنك تمامنی ضامن اوله جنی کی باقینك نقصانی دخی ضامن اولوب اما ربع قیمتده بالغ یا آندن زیاده ایسه مودع مخیردر . نته کیم مذکور ماده ایله شرحنده تفصیل اولنور .

مستودعك تعدیسی یا تقصیریله تلف مودعك امریله
اولدیغنی ادعا ایتسی حقنده کی احکام

مستودع ، نقود مذکورہ نك یا خود دیگر و دیعہ نك
اولو جہلہ امورینہ صرفلہ استہلاک ایللمسی یا خود آخرہ استہلاک
ایتدیرمسی مودعك اذنیلہ ایدوکنی ادعا ایتسه مودع اقرار
ایدرسه فیہا . انکار ایلدیکی تقدیرده مستودعدن پینہ طلب
اولنور . اثبات ایدرسه فیہا . ایدہ مدیکی صورتده مودعه یمین
ویرر . « ۷۶ » ماده یه باق . مودع یمین ایدرسه مستودع ضامن
اولور . « ۱۶۳۲ » ماده یه باق تکملہ رد مختار .

ایضاح قیود مثال اول

مجلہده « امورینہ » دینلدی . قید مذکور احترازی دکلدر .
زیرا مستودع کندوسنده و دیعہ اولان نقود ایلہ بلا امر
مودعك جنس و دیعہ دن اولان بورجنی ادا ایتسه مودع مجیز
اولمینجه ضامن اولور . « ۷۹۳ » ماده یه باق . بوتقدیرده مستودع
ادای دینده متبرع اولہ جفندن اول اچہ یی دایندن استزاد
ایده من . فقط حاکمک امریله من له النفقه یه اعطا ایدہ بیله جکی
۷۹۹ ماده ده محرردر .

« صرفلہ استہلاک » دینلدی . زیرا مستودع و دیعہ اولان

آقچه بی امورینه صرف ایتمک اوزره آلوب صرف ایتدین ینه
یرینه یعنی حرز مثله قویدقدنصکره ضایع اولسه ضمان لازم
کلز . چونکه بو ، مجرد تعدی یه نیت اولوب بوکا ضمان ترتب
ایتمه چکی ایکنجی ماده شرحنده ایضاح اولمشیدی .

مثلا بر کیمسه دیگر کمنه نك مالی غصب ایتمینی نیت
ایدوبده غصب ایتدیکی حالد او مال صاحبی یدنده تلف اولسه
مجرد نیت ایدنه ضمان لازم کلز .

نته کیم مستودع ودیعه اولان نقودک بر مقدارینی صرف
ایتمک اوزره آلدقدنصکره صرف ایتدین یرینه اعاده یعنی دیگر
ودیعه نقودیله خلط ایتسه ضمان لازم کلز حاشیه اشباه پیری زاده
عن النهایه .

«یاخود بشقه سنه استهلاك ایتدیرسه» دینلیدی . بو تقدیرده
مودع مخیر اولوب دیلرسه مستودعه تضمین ایتدیرر . زیرا
مستودع ، تعدی یا حفظده تقصیر ایتمش اولور . واستر ایسه
استهلاك ایدنه تضمین ایتدیرر .

مثلا ودیعه اولان حیوانه برمرض اصابت ایدوبده مستودع
بیطاره تداوی ایتدیرسه ده بو تداویدن طولای حیوان تلف
اولسه مالک مخیر اولور . دیلرسه مستودعه تضمین ایتدیرر .
زیرا مستودع کندوسنه امر اولنمیان شیئی یا مقوله تعدی ایتمش
اولور . بو صورتده مستودع بیطاره مراجعت ایده مز . «۶۱۰»
ماده یه و شرحنه باق . دیلرسه بیطاره تضمین ایتدیرر . و بیطار

اول حیوان بشقه سنک مالی اولدیغنی بیلیمور ایدیسه مستودعه رجوع ایدر. والا ایده مز. «۶۵۸» ماده یه و شرحه باق. فقط جامع الفصولینک بیاننه کوره ببطار اول حیوان غیرک اولدیغنی کرک بیلسون و کرک بیلسون رجوع ایدر. شوقدر وار که مستودع اول حیوان بنم دکلدر دیمکه برابر معالجه ایله امر ایدوبده اوده معالجه ایتسه ده بوندن طولانی تلف اولسه معالج مستودعه رجوع ایده مز درمختار و تکمله رد مختار.

مستودع استهلاک ایتدیکی و دیعه نك یرینه مثانی
قویمسیله ضماندن خلاص اوله ماز

(بو صورتده) مستودع نزدنده امانت اولان نقودی اولوجهله صرف ایدوبده بعده آندو مالندن یرینه قویدقدن صکره) یرینه قویدیغنی پاره (تعدی و تقصیری اولمقسزین ضایع اولسه ضماندن قورتیله مز.) زیرا بروجه مذکور قویدیغنی نقود، کندوسنک یعنی مستودعک ملکندده باقی اولوب مودعک اول نقودی قبضی وقوعبولدقجه و دیعه یه محسوب ایدیه مز بحر. و شخص واحد هم مؤدی و همده قابض یعنی هم مسلم همده متسلم اوله ماز. کورلمز میکه بر کیمسه نك دیگر کیمسنه یه جهت قرضدن اون آلتون بورجی اولوبده اول کیمسه اون آلتونی آیروب او کیمسنه یه ویرمک اوزره حفظ ایتکده ایکن آکا

ویرمدین یدنده تلف اولسه خساری کندیسنه یعنی اول کیمسه یه عائد اولور. بونک نظیری دخی ۹۵ ماده شرخنده ذکر اولندیغی اوزره مدیون، داینه ویرمک اوزره کتوردیکی پاره یی داینک امریله صویه آتسه مدیون دیندن بری اولماز.

نته کیم مستودع، امانت اولان نقودک مثلاً نصفی استهلاك ایدوبده یرینه کندی مالندن و باقیسنک جنسندن نقود کتور و بده باقی قالان نقوده علاوه ایتسه یعنی شول وجهله خلط ایتسه که تمیزی ممکن اولمه و بعده کلیسی ضایع اولسه کلیسنی ضامن اولور. اتفاق واستهلاك ایتدیکنی استهلاك سببیه ضامن اولدیغی کبی باقیسنی دخی خلط ملابس سببیه ضامن اولور. چونکه کندو مالی غیرک مالیله خلط ایتک استهلاك کدر. «۷۸۸» ماده یه باق. خلاصه کلام، بو تقدیرده یعنی بعض و دیعه یی استهلاك ایتدکنصکره یرینه او جنسندن قویه رق خلط ایتدیکنی صورتده ماده آتیه نک حکمی جاری اولور. شوقدر وارکه کندی مالندن علاوه ایتدیکنی نقوده علامت وضع ایدوبده مذکور علامت ایله تمیز ایتک ممکن ایدیسه یا لکن استهلاك ایتدیکنی مقدارک ضامنی لازم کلور.

﴿و کذا مستودع بدنده و دیعه اولان حیوانه بلا اذن ینوبده کیدرکن کرک فوق العاده سورمکه و کرک دیگر سببیه و کرک بلا سبب تلف اولسه و یا خود اثنای راهده سرقت اولنسه مستودع اول حیوانی ضامن اولور.﴾ زیرا مستودعک بلا اذن

وديعه اولان حيوانه بينمسی تعدی اولديغندن اول حيوان
شوتعدینك وقوعی صردسندہ آرتق نہ صورتله تلف اولورایسه
اولسون آنک ضمانی ایجاب ایدر.

ایضاح قیود مثال ثانی :

۱ « حیوانه » بو تعبیر احترازی اولیوب مستودع وديعه
اولان روبه یی بلا اذن کیوبده حال استعمالنده ضایع اولسه
ضامن اولور .

نته کیم مستودع وديعه اولان طبق کونک اوزرینه وضع
ایتمکه دوشوب قیراسه شو وضع علی وجه الاستعمال اولنجه
ضمان لازم کلور . اما علی وجه الاستعمال دکل ایسه ضمان
لازم کلز . کوبده برشی یوق ایسه یاخود کوبده کی شی اورتمکه
محتاج دکل ایسه بووضع علی وجه الاستعمال اولیوب اما کوبده
صو واون کی اوزری اورتمکه محتاج برشی واریسه وضع مذکور
علی وجه الاستعمالدر .

۲ « کیدرکن واثنای راهده » قیدلرینک فائده سی صدر
ماده ده ویریلان ایضاحاتدن آکلاشیلور .

۳ « بلااذن » دینلمسی ایله آکلاشیلور که ۷۹۲ ماده
شرحنده ذکر اولندیغی اوزره اذنیله بینه ییلور .

۴ « بینوبده » دینلمسی ایله اشارت اولنیور که مثال اول

شرحنده ایضاح اولدینی وجهله بینمک اوزره آخوردن
چیقاروبده هنوز بینمیدن تلف اولسه ضمان لازم کلز .

(کذلک حریق وقوعنده مستودع ودیعه یی) آخر شخصه
ولوکه اجنبی بولنه دفع وتسلیمه یا (دیگر محله نقله مقتدرایکن)
دفع وتسلیم یا دیگر محله (نقل ایتیموبده محترق اولسه) حفظده
تقصیر ایتیش اوله جغندن مستودعه (ضمان لازم کلور.)
بو مثالدن چوق مسائل فقهیه معلوم اولور . بعضیسنی
ذکر ایدلم .

۱ مسئله ، مثلاً از میرده معین بر شخصه ویرمک اوزره
مستودعه ویریلان امانت ایله از میره سفینه ایله کیدرکن واپور
زده لیمکه باتمق اوزره اولدینی جهتله دیگر را کبلر ایله برلکده
مستودع نفسی بر قایغه آتوب قورتاروب فقط اول امانتی
برلکده قایغه آلمغه یا خود دیگر واپوره نقل ایتیمکه مقتدر اوله مامغله
امانت تلف اولدینی تقدیرده ضمان لازم کلز ایسه ده لکن
امانت مذکوره نك دیگر محله نقلیه دکره باتمقندن محافظه ایدلمسی
ممکن ایکن محافظه ایتسه ضامن اولور تکمله رد مختار . نته کیم
مستاجر فیهده دخی حکم بویله ایدوکی ۶۰۹ ماده ده محرردر .
۲ مسئله ، امانتی سفینه ده ترک ایدرک کندوسی یعنی مستودع
اسر یا قتلدن خوف دکره آتیلوب یوزه رک قورتاسه ضمان
لازم کلز .

۳ مسئله ، مکاری یوک کوتوررکن لصوص یعنی خرسزلر

قارشوسنه چیقمقله یوکی اتوب حیوان ایله فرار ایتدکده باقیلور. مکاری ایچون هم یوک همده حیوان ایله فرار ممکن اولیوبده یوکی برابر کوتورسه لصوص آرقه سندن یتیشه رک هم حیوان همده یوکی آله جقلری معلوم اولسه مکاری یه ضمان لازم کلز.

۴ مسئله، ودیعه یی اجنبی بر کمنه اخذاید رکن مستودع کوردیکی ومنعه مقتدر بولندیغی حالدله منع ایتسه ضامن اولور. ولوکه مستودع، اول ودیعه آخذک مالی بولندیغی ظن ایتسندن طولایی منع ایتامش بولنه. « ۷۲ » ماده یه باقی. زیرا بو حال حفظ ودیعه ده تقصیر اولور.

مثلا مستودعک یدنده ایکی شخصک آرو آرو ودیعه سی بولنوبده مودع لر دن بری مستودعک اذنیله سهوا دیکرک ودیعه سی اخذ ایلسه مستودعه ضمان لازم کلور. امانعه مقتدر اولمندیغی حالدله ضمان لازم کلز. « ۷۷۹ » ماده شرحنده کی طقوزنجی مسئله یه باقی.

۵ مسئله، مستودع ودیعه یی خانه سنده براغوب زوجه سی غیر امینه اولمقله زوجه مزبوره اول خانه ده بولنوب مذکور ودیعه یی اخذ واضاعه ایتسه مستودعه ضمان لازم کلور. زیرا مستودع حفظ ودیعه ده تقصیر ایلمش اولور تکمله رد مختار.

ماده ۷۸۸

﴿وديعه ي صاحبك اذنى اولمقسين ديكر مال ايله يكدىكر دن
تفريق اولنه ميه جق﴾ يعنى تفريقى متعذر يعنى تفريقى اصلا ممكن
اولميه جق يا خود تفريقى متعسر بولنه جق يعنى تفريقى ممكن
ايسه ده تفريقنده عسرت اوله جق ﴿صورتده قارشى ديرمق
تعديدر﴾ يعنى موجب ضماندر . زيرا مستودعك فعلندن
طولايى مودع ايجون عين حقه وصول امكانى مفقود و متعذر
اولدى .

قارشى ديرمقك معناسى

مجله ده قارشى ديرمق دينيلوب فاعلى يعنى قارشى ديران ذكر
اولنماسى تعميم ايجوندر . يعنى قارشى ديران كرك مستودع اولسون
و كرك اجنبى بولنسون و كرك مستودعك عيالنده بولنان صغير
يا كير اوغلى كى ديكر كمسنه اولسون . ضمان هر حالده قارشى ديران
اوزرينه لازم كلور .

يعنى قارشى ديران مستودع ايسه ضمان آكا لازم اولدنى كى
قارشى ديران مثلا مستودعك صغير اوغلى ايسه ضمان اول صغيره
لازم كلور . «۷۷۸» ماده يه باقى . يوخسه صغير مرقومدن طولايى
مستوعه ضمان لازم كلور . «۹۱۶» ماده يه باقى . ايمدى بو وجهله

مستودعك غيرى بر كيمسه قارشدير سده ضمان آنك يعنى خالطك
اوزرينه لازم كلسه مخطو مذكور خالطك مالى اوله رق مذكور
مخلوطه نه مستودع نه ده مودع مداخله ايده مز .

خالطك انتفاعى

خالط كرك مستودع اولسون و كرك مستودعك امينى اولسون
و كرك اجنبى اولسون مخلوط بوجه محرر خالطك مالى اولور
ايسه ده خالط مخلوطى مال صاحبنه ضامن اولدقچه مخلوط ايله
انتفاع ايتيمسى مباح اولماز. شوييله كه بر كيمسه نزدنده وديعه اولان
اون كيله بغدايى كندى بغداينه قارشدير سه مخلوط بغداى
خالط اولان مستودعك ملكى اولوب فقط مخلوط بغدايك بدلى
مودعه ادا ايتدكجه مستودع اول مخلوط ايله انتفاع ايتيمسى مباح
اولماز تكمله رد مختار. بو تقديرده خالط مودع ايله مستودعك
غيرى بر كيمسه اولوبده اول كيمسه مثلاً مودعك آرپه سنى
مستودعك بغداينه خلط ايتدكدنصكره كندوسنه مراجعت ممكن
اوليه جق صورتده غيوت ايتدكده مودع و مستودعدن برى
ديكرينك بدلى بالاعطا مخلوطى آلق استيوبده ديكريده راضى
اولور سه كوزل اولور. بو وجهله تراضى ايده مز لر ايسه مخلوط
رضالرييله بيع اولنوب حاصل اولان ثمنه صاحب حنطه نك
غير مخلوط حنطه سى قيمتى ضرب اولنه جنى كى صاحب شعيرك

دخی غیر مخلوط شعیری ثمنیه ضرب اولور . و حاصل ضرب مخلوطك مجموع ثمنه تقسیم اولسه رق خارج قسمت و ضرب صاحبك حصه سی اولور تکمله رد مختار .

فيه نظر و هوان الخلط يوجب انقطاع حق المالك عن المخلوط و يقتضى كون المخلوط ملكا للخالط فكيف يسوغ لهما التصرف بهذا الوجه فى مال الغير والجواب بان التصرف فيهما بهذا الوجه اجازة للخالط من الخالط لا يجدى نفعا اذا كان الخلط اتلافا فان الاجازة لاتلحق الاتلاف على ما سيحجى فى شرح ۱۴۵۳ مادة .

مجله ده «ديكر مال ايله» دينلمسيه آكلاشيلور كه مستودع كرك كندى ماليله قارشديرسون و كرك بشقه سنك ماليله قارشديرسون . حكمه ده فرق يوقدر .

حتى مستودع كندوسنك نزدنده وديعه بولسان بر مالى ديكر بر شخصك كذلك كندوسنك نزدنده وديعه اولان ماليله خلط ايتسه ايكي وديعه يي دخی ضامن اولوب مخلوط كندويه قالور تکمله رد مختار .

﴿ بناءً عليه مستودع كندوسنده وديعه اولان بر مقدار يوزلك آلتوتلري كندوسنك ﴾ ياخود بشقه برينك ﴿ يوزلك آلتوتلريه بلا اذن ﴾ المودع ﴿ قارشدير دقدنصكره ضايع اولسه ياخود سرقت اولسه ﴾ ياخود مخلوطا موجود بولسه ﴿ ضامن اولور ﴾ زیرا خالط وديعه يي استهلاك ايتمش اولور بحر .

ایضاح القیود

۱ «کندوسنک الخ» بو تعبیر احترازی اولمیوب بشقه سنک مالیه قارشیدر مق دخی حکما بویله در. نته کیم آنفا شرحا بیان اولندی.

۲ «ضایع اولسه یا خود سرقت اولنسه» بو تعبیر قید احترازی اولمیوب مخلوط عینا موجود بولنسه ینه ضمان لازم کلور که تنویر ایله شرحنده کتاب غصبده بوجه مشروح مذکور در. بو تعبیر لر یعنی ضایع اولسه یا خود سرقت اولنسه تعبیر لری هدایه، تنویر، ملتی وکنز کبی مثنون فقهیه ده مذکور دکلدر. نته کیم مجله نك آتی الذکر مثالنده دخی مذکور اولمدیغی کبی.

۳ «بلا اذن» بو تعبیر احترازی اولوب محترز غنی آتی الذکر ۷۸۹ ماده ده ذکر اولنیور.

(وکذا مستودعن بشقه بر کیمسه مذکور آلتونلری)

یعنی مستودعک یا خود کندوسنک یا خود بشقه بر آدمک آلتونلریله مودعک و دیعه اولان آلتونلری (اولوجهله) بلا اذن (قارشیدر سه اول کیمسه ضامن اولور.) مذکور آلتونلر کرک ضایع یا سرقت ایدلسون و کرک مخلوطا موجود بولنسون خلط مذکور ضمانی ایجاب ایدوب آتیده تفصیل اولنه جنی اوزره امام اعظم رحمه الله تعالی یه کوره مخلوطدن مودع ایله مستودعک حق لری منقطع اوله رق مخلوط مذکور خالطک مالی اولور.

خلطك وجوه اربعه سيله

احكامى

خلطك تفصيلاته بوجه آتى مبادرت اولنور . شويله كه خلط ، يعنى قارشدير مق درت وجه ايله اولور .

وجه اول ، خلط بطريق الجاوره مع تيسر التميزدر .

يعنى قارشدير لان ايكي مالک تفريق و تميزى يعنى افراز و فصلى بالسووله ممکن اولور . جوزى بادم ايله ياخود آلتونى سيم مجديه ايله ياخود تکميل سيم مجديه لرى نصف يا ربع سيم مجديه لر ايله ياخود تکمل يوزلک آلتونلرى نصف يا ربع آلتونلريله وياخود عثمانى يوزلک آلتونلرى انکليز يا فرانسز آلتونلريله خلط کي .

بو وجهله اولان خلط بالاجماع موجب ضمان اوليوب مخلوط تفريق اولنه رق وديعه قسمى صاحبه اعاده قنور . وقبل التفريق مخلوط تلف اولسه قبل الخلط کي امانه تلف اولنور تکمله رد مختار .

مجاهه بو مسئلهيه « تفريق اولنه ميه جق » عباره سيله اشارت ايدور .

وجه ثانى ، خلط بطريق الجاوره مع تعسر التميزدر .

يعنى قارشدير لان ايكي مالک تفريقى بالعسر يعنى کوچلکه

ممکن اولور . خطه یی شعر ایله قارشدیرمق کی .

بو وجهه اوزره اولان خلط موجب ضمان اولوب
اولدینی حقنده اختلاف اولمشدر . بعض فقهایه کوره موجب
ضمان اولور که درمختار و هدایه ده شو قول ترجیح ایدلمش
اولغله برابر نهاده شو وجهله مخلوطك تفریقی دخی متعذر
ایدوکنی ایضاً دینلمشدر که « مخلوط مذکور صویه آتدقده
بغدای ترسب ایدوب آرپه یوزه حقیقه جنی جهته تفریقی ممکن
اولور دیو ایدیلان سوآله جوابا بو نقدیرده مخلوط ایصالغله
عیلانه جنی کی هر بغدایده جزئی آرپه و هر آرپه ده جزئی
بغدای دانه لری بولنسی طبیعی اولدیغدن ینه قابل تفریق
اوله ماز » بناءً علیه مجله نك شو ماده سی شو قول اوزره شرح
ایدلمشدر . دیگر بعض فقهایه کوره بو وجهله خلط ایدلده
مالکک مخلوطده کی حق منقطع اولیوب وجهه رابع آتیده
امامین قوللارنده اولدینی کی مالک مخیر اولور تکمله رد مجتار .
وجه ثالث ، خلط بطریق الممازجة للجنس بخلاف الجنس در .
بوده بر نوع مایعک دیگر نوع مایع ایله خلط ایدلمسیله اولور .
سرکه یی یاغ و طحنی بکمز ایله خلط ایتمک کی .

بو وجهله اولان خلط بالاتفاق موجب ضماندر قهستانی .

وجه رابع ، خلط بطریق المجاورة للجنس بالجنسدر .

بغدای بغدای ایله یا جوز یاغنی جوز یاغیله یاخود سودی

سود ایله یاخود آلتونی آلتون ایله خلط کی .

بو وجه اوزره خلطده اختلاف فقها واقع اولمشد .
 امام اعظم رحمه الله تعالى به کوره خايط مذکور، مخلوطی
 استهلاك اولمغله مخلوطدن حق مالک منقطع و مخلوط خالطک
 مالی اولوب خالطه ضمان یعنی مخلوط مثایاتدن ایسه مثلی
 و قیامتدن ایسه یوم خالطده کی قیمتی لازم کلوب یوخسه آرتق
 مالک مخلوطه مشارکت ایده من . شو قدر وارکه خايط ضامن
 اولمدین مخلوط ایله انتضاع ایتسی مباح اولماز بحر .
 فقط مودع خالطی ابرا ایتسه هم دین همده عیندن حق
 ساقط اولور تکمله رد محار .

امامین رحمهما الله تعالى به کوره مودع مخیر اولوب دیلرسه
 خالطه تضمین ایتدیرر . دیلرسه مخلوطده حصه سی مقداری
 مشارکت ایدر . لانه لا یمكنه الوصول الى عين حقه صورة
 و امکنه معنی بالقيمة فکان استهلاكاً من وجه فیمل الی ایها
 شاء وهذا لان القسمة فیما لا تیفاوت احاده افراز و تعیین حتی
 ملک کل واحد من الشریکین ان یأخذ حصته عیناً من غیر قضاء
 و لارضاء فکان امکان الوصول الى عين حقه قائماً معه زیلعی .
 فقط مودع خالطی ابرا ایتسه مشارالیهما به کوره مودعک
 مخیرلکی ساقط اولوب مخلوطده شرکت تعیین ایدر .

مجلهده بو ایکی مذهبدن قنغیسی اختیار ایدلایکنه دائر
 بر قید و اشارت یوقدر . زیرا لزوم ضمان امام اعظم مذهبنده
 اولدینی کی امامین مذهبنده دخی واردر .

شو قدر وارکه امام اعظم مذهبنجه ضمان متعین ایکن
امامین مذهبنجه ضمان متعین دکدر .

فقط مجله نك شو بیانی امامین مذهبنه حمل اولنسه مذهب
مذکورک یالکز بر قسمی بیان ایدلمش و دیگر قسمندن سکوت
اولنمش اوله جنی جهتله امام اعظم مذهبنه حمل دها اولی اولور .

❦ ماده ۷۸۹ ❦

ودیعه ده تعدی عد اولنان تصریفی مستودع مودعک امریله
پایسه مستودعه ضمان لازم کلز . زیرا ۱۵۱۰ ماده ده ذکر
اولندیغی اوزره بر کیسه نك امری کندی ملکی حقنده
جاری اولور .

بو جهتله مستودع ، باذن المودع و دیعه یی آخره ایداع
و اعاره ورهن و ایجار و بیع و هبه ایده بیلور . « ۱۴۵۲ » ماده یه
باق . و کندوسی استعمال ایلیه بیلور . « ۷۹۲ » ماده یه باق .
و اقراض و مودعک دینی ادا ایده بیلور . « ۷۹۳ » ماده یه باق
و امینی اولیان ایله رد ایده بیلور . « ۷۹۹ » ماده یه باق . و مودعک
اهل و عیالی کبی نفقه سی اوزرینه واجب اولانه صرف
ایلیه بیلور . « ۷۹۹ » ماده ایله شرحنه باق .

ینه بو جهتله ﴿ مستودع اکر و دیعه یی صاحبک اذنیله
ماده آتفه ده بیان اولندیغی اوزره ﴾ یعنی یکدیگرندن تفریق

اولنه میه جق صورتده (دیگر مال ایله قارشیدیرسه یاخود کندوسنک) یعنی مستوعک مدخل و (صنی اولمقسزین ایکی مال بربریه کذلک یکدیگردن تفریق اولنه میه جق صورتده قارشسه مثلا) بوتمثیل «یاخود کندوسنک صنی اولمقسزین الح» ففره سنک تمثیلدر (بر صندوق دروننده ودیعه اولان) عثمانلی (آلتون کیسه سی یرتیلوب ایچنده کی آلتونلر دیگر) عین وزن و مقدارده بولنان عثمانلی (آلتونلرله قارشسه) یعنی مثلا بهری یوزر غروشلق اون عدد ودیعه عثمانلی آلتون بهری کذلک یوز غروش قیمتده بولنان دیگر بش عدد عثمانلی آلتونیلله قارشسه ده تمیز و تفریقی ممکن اولسه ضمان لازم کلیوب (مجموعنده) یعنی مخلوطده (مستودع ایله صاحب ودیعه حصه لری مقدارنجه) شرکت ملک ایله وقارشیدیرمق صورتنده شرکت اختیاریه و قارشمق تقدیرنده شرکت جبریه ایله (شریک اولورلر) زیرا ودیعه نك بلاتعد ولا تقصیر تلفی تقدیرنده ضمان لازم کلیه جکی ۷۷۷ ماده ده محرر اولمغله آرتق شو ماده وجهله قارشمقله ضمان لازم کلامسی الویتله معلوم اولور.

بلا صنع قارشدقده ضمان لازم کلامسی شو وجهله دخی اثبات اولنورکه بلاصنع اولان قارشمقده مستودعک صنع وتعدیسی یوقدر بحر.

مثلا ودیعه اولان آلتون اون و دیگر آلتون بش عدد

اولوبده بروجہ مذکور یکدیگرہ قارشسہ مذکور اون آلتون
اتلانا مشترک اولورکہ ثلاثی صاحب ودیعہ نک و ثلثی دیکرینک
اولور .

﴿ بوحالده ﴾ قاریشان آلتونلرک کلیسی یا بعضیسی ﴿ بلا تعد
ولا تقصیر تلف و ﴾ یا ﴿ ضایع اولسہ ﴾ تلف یا ضایع اولان
ودیعہ نک کلا یا بعضا ﴿ ضمان ﴾ ی مستودع اوزرینہ ﴿ لازم
کمز . ﴾ و قاریشان آلتونلرک بعضیسی تلف اولنجہ ۱۰۶۱
ماده حکمی جاری اولور .

اذنیله خلطده اختلاف

الائمہ

خفی اولیہ کہ شو مادهده صاحبنک اذنیله مستودع
قارشیدرینی صورتده مستودع ایله مودعک شریک اولملری
امام محمد رحمہ اللہ تعالینک مذہبی اولوب امام اعظم رحمہ اللہ
تعالی بو صورتده دخی ماده انفہ نک حکمی جاری اولدیغنه
یعنی مخلوط خالطک ملکی اولوب خالط مستودعک حصہ سنی
ضامن اولہ جفنه قائل اولمشدر . نتہ کیم امام ابی یوسف رحمہ
اللہ تعالی اقلی اکثرہ تابع قلمش یعنی کیمک مالی زیادہ ایسہ
مخلوط آنک ملکی اولوب دیکرینک حصہ سنی ضامن اولور .
مجلہده « یکدیگردن تفریق اولنہ میہ جق الح » دینلمسیلہ
اشارت اولنیورکہ یکدیگردن تفریق اولنہ جق صورتده قارشسہ

شرکت ثابت اولیوب بالتفریق هر برینک مالی صاحبنه ویریلور.
مثلا ودیعه اولان بشیوز غروشلق بر عدد آلتون دیگر
هری یوزر غروشلق بش عدد آلتونلر ایله قاریشمق کبی .

مستودعک و دیعه بی مودعک

اذنیله قارشیدیردیغنی ادعا

ایتمسی

فقط مستودع و دیعه بی مودعک اذنیله قارشیدیردیغنی ادعا
ایتدکده مودع اقرار ایدرسه فیها . انکار ایلر ایسه مستودع ،
اذنی اثبات ایتمکه مجبور اولوب ایده مدیکی حالده مودعه یمین
تکلیف ایده ییلور . مودع یمین ایدرسه مستودع ضامن اولور .
اجنبی یه ایداع ایتسه یا استهلاک ایتدیرسه ده مودعک اذنیله
اولدیغنی ادعا ایتسه حکم منوال مشروح اوزرده در جواهر الفقه .
« ۷۸۷ » ماده شرحنه باق . نته کیم بونک نظیری ماده آتیه
شرحنده دخی کلور .

❧ ماده ۷۹۰ ❧

(مستودع) ۱ (و دیعه بی) ۲ بلا عذر ۳ بلا اذت
۴ قصدا ۵ (آخره) یعنی امینی اولیان کیمسه یه (ایداع
ایده مز) ۹۶ ماده یه باق . زیرا صاحب و دیعه مستودعک

غیر یستک ید و حفظه راضی اولماش اولوب ایادی امانتجه مختلف اولور .

و برده برشی کندی مثلی تضمن ایده مز . مضارب مال مضاریه بی مضاربه وجهله اعطا ایده میه جکی کی .

طقوز شی وار که انسان آکا مالک ایکن
آخره تملیک ایده مز

طقوز شی واردر که انسان آکا مالک ایکن آنی آخره تملیک ایده مز که برنجیسی ده بو ماده ده بیان اولنیور . یعنی مستودع ایداع ایده مز . تعیر دیگرله مستودع ، حفظه مالک ایکن حفظی آخره تملیک ایده مز . ایکنجیسی ، مرتهن رهن ایده مز . « ۷۴۳ » ماده یه باق . اوچنجیسی وکیل بالیع بیعه آخری توکیل ایده مز . ۱۴۶۶ ماده یه باق . دردنجیسی مستعملینک اختلافیه مختلف اولان شیئک مستأجری مأجوری آخره ایجار ایده مز . « ۴۲۷ » ماده یه باق . بشنجیسی ، مستعیر ، مستعملینک اختلافیه مختلف اولان معاری آخره اعاره ایده مز . « ۸۲۰ » ماده یه باق . آلتنجیسی ، مزارع ارضی مزارعه طریقیله آخره ویره مز . یدنجیسی ، مضارب ، مال مضاربیه بی آخره مضاربیه طریقیله ویره مز . « ۱۴۱۵ » ماده یه باق . سکننجیسی ، مستبضع ابضاع ایله مز . طقوزنجی مساقی بغیر اذن آخره مسافات ایده مز تکمله رد مختار .

ایضاح القيود

۱ «وديعه يي» بوتعيردن آكلاشيلوركه وديعه نك بولنديني اوطه نك مفتاحني آخره ويرمك اول اوطه يي آكا تسليم ايتمك اولمديغندن بونكله وديعه آخره ايداع ايدلمش اولماز . و بناءً عليه مستودعه بو قدرله ضمان لازم كلز بجر .

۲ «بلاعذر» دينلدي . زيرا ۷۸۴ ماده ده ذكر اولنديني اوزره مستودع خانه سنده حريق وقوعيله اول ساعتده وديعه يي بالذات ياخود اميني ايله محافظه يه مقتدر اوله مامقله قومشوسنك خانه سنه وضع ايتسه ده اوراده تلف اولسه شووضع قومشوسنه ايداع ايكن ضمان لازم كلز .

آنحق بوكي اعذاره بناء آخره ايداع ايتمكه مجبور اولدقن صكره عذر زائل اولديني حالده استرداد ايتمه قاضيخانك بياننه كوره مستودع اوله ضمان لازم كلز . «۹۱» ماده يه باق . فقط امام محمد رحمه الله تعالى نك بياننه كوره مستودع وديعه يي اول آخردن استرداد ايلمسي لازم كلور . زيرا ۲۲ ماده حكمنجه ضرورتله ثابت اولنلر ضرورت مقداريله تقدير اولنه جفندن وبعد زوال الحريق ضرورت مرتفع اوله جفندن اجبي مرقومدن استرداد ايتديكي حالده اجنبي مرقومه ابتداء وبلا ضروره ايداع ايتمش حكمنده اوله جفندن بعد زوال العذر وقبل الاسترداد

اجنبی مرقوم یدندہ تلف اولسہ مستودع اولہ ضمان لازم کلور تکملہ رد مختار .

نتہ کیم مستودعک بولندیغی سفینہ غرق اولمق تہلکہ سی حاصل اولوب کندوسی محافظہ یہ مقتدر اولہ مدینگی کبی اورادہ ودیعہ یی تسلیم ایدہ جک امینی دخی بولنامغلہ زردندہ کی ودیعہ یی سفینہ اخرا دہ کی اجنبی یہ ویرسہ ضامن اولماز . « ۲۱ » مادہ یہ باق تعلیقات ابن عابدین علی البحر وتکملہ رد مختار .

۳ « بلا اذن » دینلدی . زیرا مستودع مودعک ابتداء اولان اذنیلہ ودیعہ یی آخرہ ایداع ایدہ بیلہ جکی کبی بلا اذن ایداع ایتدکن صکرہ مودع مجیز اولسہ ینہ جائز اولور . مادہ آتیہ ایلہ شرحہ باق .

بووجهلہ مستودع ودیعہ یی مودعک اذنیلہ آخر کمسنہ یہ ایداع ایتدکنہ مستودع اول آرہ دن چیقارق اوکسنہ مستودع اولور . « ۱۴۵۲ و ۱۴۵۹ » مادہ لرہ باق خلاصہ .

حتی مستودع ودیعہ یی مودعک اذنیلہ آخر کمسنہ یہ ایداع ایتدکن صکرہ بلا اذن اوکسنہ دن کپرو آلسہ دہ یدندہ تلف اولسہ بوتلف بلا تعد ولا تقصیر اولسہ دخی ضامن اولور تکملہ رد مختار .

تعیین شیخصده سوز مستودعکدر

وتعیین شیخصده سوز مستودعک اولور. شویله که مستودع مودعک امریله ودیعه بی آخر شیخصده اعطا ایتدکن صکره مودع، اول شیخصده اعطا ایله امر ایتیوب فلان آدمه اعطا ایله امر ایتشیدم دیو و مستودع اول شیخصده اعطا ایله امر ایتشیدک دیو اختلاف ایتدکارنده سوز مستودعک اولور. زیرا طرفین اصل اذنده اتفاق ایتدکاری جهته مستودع امین اولمغله سوزینک قبولی لازمدر. « ۱۷۷۷ » مادهیه باق.

فقط مستودع امرکله فلان شیخصده ویردم دیمسایله یعنی مجرد بوسوزله اول شخصک آلمش اولدیغی ثابت اولماز. « ۷۸ » مادهیه باق. شویله که مودع، مستودعه امر ایتمکله مستودع دخی آکا ویردم دیدیکی حالدله شخص مرقوم آلمدم دیدیکی کبی مودع دخی ویرمدک دیسه برأت نفسی حقنده سوز مع الیمین مستودعک اولور. « ۱۷۷۴ » مادهیه باق. لکن شخص مرقوم اوزرینه ایجاب ضمان حقنده مستودعک شوسوزینک تأثیری اولمغله اول شخصک آلدیغی اثبات اولنه مدیغی تقدیرده اول شخصک مسؤولیتی لازم کلز.

نته کیم مودع، سندن قبض و دیعه ایتسنی فلان شیخصده امر ایتدکن صکره نهی ایتدم دیدیکی حالدله مستودع اول شخص کلدی امرک موجبجه و دیعه بی بندن آلدی دیوب شخص

موقوف ایسه مستودعك ياننه واردم اما وديعه يي آلمدم ديسه
مستودع بری اولور .

۴ « قصدا » دینلدی . زیرا ایداع تبعی جائزدر . شویله که
برکیمسه حمامه داخل اولدیغنده روبه سنی چیقاروبده نزدنده کی
ودیعه سیله برابر حاججی اوکنه وضع ایتسه ده بعده سرقت
اولنسه انساب اولان ضمان لازم کلامکدر چونکه بونده وديعه
آخره ایداع اولنش اولیور ایسه ده شوایداع ضمنی اولوب
قصدی دکلدر . « ۵۴ » ماده یه باق .

۵ « آخره » دینلدی . زیرا مستودع وديعه يي امیننه ایداع
ایده بیلور . « ۷۸۰ » ماده یه باق .

بناء علیه برکیمسه دیگر کسنه یه ویرمک اوزره برشخصه
مال ویروبده اوشخص دخی مذکور مالی اوکسنه یه ویرمک
اوزره بر آدمه ویردکدن صکره مذکور مال ضایع اولسه اول
آدم اوکسنه نك امینی ایسه اوکسنه یه ضمان لازم کلز . اما امینی
دکل ایسه ضامن اولور رد مختار .

مستودع وديعه يي بلا اذن آخره ایداع « ایدوبده » عینا
موجود اولسه مستودع موقوف آنی استرداد ایده بیلور .
واسترداد ایتیموبده « بعده » یعنی بعد الایداع مستودع ثانی
یدنده بلا تعد ولا تقصیر « تلف اولسه » تلفی اکر مستودع
اولک مستودع ثانیدن مفارقتدن صکره اولور ایسه مستودع اول

(ضامن اولور .) زیرا مستودع اول وديعه نك حفظی ترك ايتمدر تكملة رد مختار .

صورت ضمان وديعه مثليادن ايسه مثلي وقيميادن ايسه مستودعك ايداع و مستودع ثاني به تسليم ايله تعدي ايتديكي كونده كي قيمتي اعطادن عبارتدر . ۸۰۳ ماده به باق .

لزوم ضمانده كي ايكي قيد و شرط

قيد اول ، بوتقديرده ضمان لازم كلسي شرحا اشارت اولنديني اوزره اول وديعه مستودع اولك مستودع ثانيدن مفارقتي وقوعبولقدن صكره تلف اولديني صورتده در . اما قبل المفارقة تلف اولور ايسه برينه ضمان لازم كلزكه مستودع ثاني به ضمان لازم كلما سي مستودع ثاني مالي يد اميندن قبض ايلمش اولمسندن ناشي اولديني كي مستودع اوله ضمان لازم كلما سي دخی مستودع اول وديعه يي مستودع ثاني به اعطا ايتدكدن صكره مستودع اول مستودع ثانيدن مفارقت ايتدكه وديعه نك حفظنده ينه مستودع اولك رأيي حاضر و موجود اوله رق حفظی ترك ايتمش عد اولنماز . اما بعد المفارقة مستودع اول التزام ايتديكي حفظی ترك ايتديكي جهته ضمان لازم كلور .
نته كيم ۷۸۴ ماده شرحنده ايضاح اولمشيدي .

كذا بر كيمسه ديكر كمپنه به قدسده امتعه و يرو بده مذكور امتعه يي او كمپنه كندی حيوانيله واجرت معلوم ايله حبله نقل

ایتمک اوزره مقاوله ایدوب اوده حیواننه تحمیل ایتدکدن
صکره دیگر شخصه ویرسده بعد المفارقه تلف اولسه ضامن
اولور .

کذلک برکیمسه فلان آدمه ایداع ایتمک اوزره دیگر کمسنه یه
برمال ویروبده او کمسنه دخی فلان کیمسه شومالی سکا ودیعه
کوندردی دیه رک مذکور مالی اول آدمه تسلیم واول آدم دخی
قبول ایتدکدن صکره اول آدم مذکور مالی ینه او کمسنه یه اعاده
ایتسده یدنده تلف اولسه اول آدم ضامن اولور .

مستودع ثانی یه لزوم ضمانده اختلاف الاثمه

بالاده ایضاح اولندیغی وجهله مستودع ودیعه یی بلا اذن
آخره ایداع ایدرک مستودع ثانی یدنده تلف اولدقده امام
اعظمه کوره ضمان یالکمز مستودع اوله لازم کلوب یوخسه
مستودع ثانی یه لازم کلز . زیرا مشار الیه کوره مستودعک
مستودعی ودیعه یی یدامیندن قبض ایتدیکی جهتله ضامن اولمازه اما
مودع الغاصب ضامن اولور . چونکه مودع الغاصب دخی
غاصدر بحر .

اما امامین ایله ائمه ثلاثه مودعی مخیر قلمشراولوب مودع
دیلسه مستودع اوله ودیلرسه مستودع ثانی یه تضمین
ایتدیره جکنی بیان ایلمشلردر . بونلرک مذهب لرنبجه مستودع

ثانی به تضمین ایتدیردیکی صورتده ۶۵۸ ماده شرحنده کی
ایضا حاته مبنی آنکده مستودع اوله رجوعه حق بولنوب اما
مستودع اوله تضمین ایتدیردیکی تقدیرده مستوع اول مستودع
ثانی به رجوع ایده مز . زیرا مستودع اول ضامن اولمسيله
ودیعیه مالک اولمغله کندی مالی ایداع ایلمش اولدی «۷۷۷»
ماده به باقی . مکرکه مستودع ثانی یدنده تلفی تعدی یا تقصیر
ایله اوله .

مجلهده فقره آنفدهده «مستودع اول ضامن اولور» دینلوبده
مستودع ثانی به دخی تضمین ایتدیریه بیله جکی بیان اولمدیغنه
وامامین قولنه حمل ایدیله جک اولسه مسئله نك بر قسمی بیان
اولنه رق دیگر قسمی مسکوت عنه قلمسی لازم کله جکنه ۷۸۳
ماده دخی بوجنس مسائلدن ایکن اوراده «الانه ضمان لازم
کلز» دینلمسی امام مشار الیهک مذهبنه مبنی ایدوکنه نظرا
مجلهده امام مشار الیهک قولی اختیار ایدلمش اولور .

قید ثانی، ودیعیه بعد الايداع تلف اولدقده ضمان لازم
کلمسی مستودع ثانی یدنده تلف اولدیغی صورتدهدر . اما مستودع
ودیعیه بی بلا اذن ایداع ایتدکدن صکره ینه استرداد ایدوبده
بعده یدنده ایکن تلف اولسه ضامن اولماز . زیرا ۷۸۷ ماده
شرحنده ایضاح اولمدیغی اوزره مستودع بعد الخالفه وفاقه
عودت ایتدکده ضمان لازم کلز .

شوحالده مودع ودیعیه مستودع ثانی یدنده تلف اولدیغی

بیانیه بروجہ بالا ضامی ادعا ایتدیکی حالدہ مستودع اول ،
مستودع ثانی ودیعه یی کندوسنہ رد واعادہ ایتدکن صکرہ
تلف اولدیغی ادعا ایتسه بلاینہ تصدیق اولنہ ماز . وسوز
مع الیمین مالککدر . چونکہ مستودع ، کندی اوزرینہ ضامی
اقتضا ایتدیرن سببی یعنی بلا اذن غیرہ ایداعی اقرار ایتیکده
اولوب بوندن صکرہ دعوی برانته بینه سز تصدیق اولنہ ماز
بحر وتکملہ رد مختار . « ۷۸۷ و ۷۸۹ » ماده لر شرحه باق .

اما ودیعه ، مستودعدن غصب اولندقدن صکرہ مستودع ،
ودیعه بکا رد واعادہ اولنوب بعدہ یدمده تلف اولدی دیو
ومودع غاصب یدنده تلف اولدی دیو ادعا واختلاف ایتدکلرنده
سوز مستودعکدر . زیرا مستودع ضامی ایحاب ایدن برشی
پامدینی جهتله کماکان امین اولق اوزره قالور .

مستودع الغاصب بالاتفاق ضامندر

خفی اولمیه که امام اعظم ایله امامین پینده کی سالف الذکر
اختلاف مستودع المستودع حقنده اولوب یوخسه مستودع
الغاصب حقنده اختلاف یوقدر . شویله که غاصب مال مغضوبی
برشخصه ایداع ایتدکن صکرہ آنک یدنده تلف اولدیغی
صورتده مغضوب منه مخیر اولوب دیلرسه غاصبه تضمین
ایتدیررده بوتقدیرده غاصب مستودعه رجوع ایده مز . مکرکه

مستودع یدنده تلفی آنک تعدیسی یا تقصیری ایله اوله. و دیلارسه
مستودعه تضمین ایتدیررده مستودع دخی غاصبه رجوع ایدر
«۶۵۸» ماده شرحنه باق. مستودع مودعک غاصب اولدیغنی
کرك بیلسون و کرك بیلمسون تکمله رد مختار و بحر.

لکن مودع الغاصب و دیعه مذکوریه مودعنه رد و اعاده
ایتسه بری اولور. نته کیم غاصب الغاصب مقصوبی غاصب اوله
رد ایتسه بری اولدیغنی کی تکمله رد مختار. «۹۱۱» ماده یه باق.

مستودع الغاصبک بعد التضمین غاصبه

مراجعت ایتسندنه اختلاف

فتها

ایشته درر و بحرده بو وجه اوزره بیان و جزم ایدلمش
اولوب لکن قهستانینک عمادیه دن نقلنه و باقانی و برجندینک
ذکرینه کوره مستودعک غاصبه رجوعی مستودع، مودعک
غاصب اولدیغنی بیلمدیکه صورته در «۷۷۷» ماده شرحنه باق.
«واکر مستودع ثانینک تعدی و تقصیری ایله تلف اولمش
ایسه» مستودع آنی استهلاك ایتسی کی «مودع» مخیر اولوب
«دیلارسه مستودع ثانی یه تضمین ایتدیرر.» بو حالده مستودع
ثانی مستودع اوله رجوع ایده مز. غاصب الغاصب غاصب اوله
رجوع ایده میه جکی کی. «۹۱۰» ماده یه باق. «و دیلارسه مستودع

اوله تضمین ایتدیروب اودخی مستودع ثانییه رجوع ایدر.)
 زیرا مستودع اول ضامن اولمسیله و دیعهیه مستودع ثانییه تسلیم
 ایتدیکی زمانه استنادا مالک اولمشدر .

❧ ماده ۷۹۱ ❧

(مستودع و دیعهیه) بلاذن (آخر کسینه ایداع ایدوبده)
 مؤخر و دیعهیه مستودع ثانی یدنده موجود ایکن (مودع) بو
 ایداعی (مجیز اولسه مستودع اول آره دن چقوب) مستودع
 ثانی یعنی (اول کیمسه مستودع اولور .) یعنی طوغریدن
 طوغرییه مودع طرفندن او کسینه ایداع اولنش حکمنده
 اوله رق مستودع اول، آره دن بالکلیه چقمش اولور. شو حالده
 ماده آفنده بیان اولنان ضمان مستودع اول اوزرینه لازم کلز.
 زیرا احازت اقواله لاحق اولدینی کی افعاله دخی لاحق اولور
 مسئله سی بر قاعده فقهیه در که شوماده قاعده مذکوره اوزرینه
 متفرع بر جزئیدر . «۱۴۵۳» مادهیه باق .

اما مستودع و دیعهیه بلاذن آخره ایداع ایدوب مستودع
 ثانی یدنده تلف اولدقدن صکره مودع اول، بو ایداعی مجیز اولسه
 جائز و بو اجازته بناء مستودع اول ضماندن بری اولور می ؟
 «۷۹۳» ماده شرحنده بر نظیر مذکوردر .

کذا مستودع و دیعهیه مودعك ابتداء اذنیله آخره ایداع

ایتنه حکمک بر منوال مشروح اولسی بظریق الاولیدر.

ماده ۷۹۲

(مستودع ودیعه یی صاحبک اذنیله) ۱ (استعمال ایده - بیله جکی کبی) ۲ (ایجار و) ۳ (اعاره و) ۴ (رهن) و ۵ بیع و تسایم و ۶ هبه و تسلیم و ۷ کندی آلاجنی ایچون اخذ و نقاص و محسوب (دخی ایده بیلور) که بونلر بوجه آتی تفصیل اولنور.

۱ استعمال، مستودع ودیعه یی صاحبک اذنیله استعمال ایتدکده بو استعمال استعاره قیلندن اولور. «۷۶۵» ماده یه باق.

۲ ایجار، مستودع ودیعه یی ایجار ایتدکده بوا ایجار یا مودع ایچون اولور که بو تقدیرده مستودع وکیل بالا جاره اولور. یا خود بوا ایجار مستودع ایچون اولور که بوده اعاره اولور. یعنی مودع مستودعه اعاره ایلمش و مستودع دخی ودیعه یی آخره ایجارله انتفاع ایلمش اولور. «۷۶۵» ماده شرحنه باق

۳ اعاره، مستودع ودیعه یی مودعک اذنیله و مودعک نامیله اعاره ایدرسه مستودع وکیل یعنی رسول بالا اعاره اولور. «۱۴۶۰» ماده یه باق. و اگر مودعک اذنیله کندی نامیله اعاره ایدرسه بوده جائز اولور.

۴ رهن، مستودع ودیعه‌ی صاحبك اذنیله کندی یعنی مستودعك بورجی ایچون رهن ایتسه رهن مستعار قیلندن اوله رق تفصیل احکامی ۷۲۶ ماده ایله مواد لاحقه‌سندہ متن و شرحده بیان اولنمشیدی . اما مودع ایچون رهن ایدرسه مودع طرفندن وکیل یعنی رسول‌بالرهن اولمش اولور. «۱۴۶۰» ماده‌یه باق .

۵ بیع، مستودع ودیعه‌ی مودعك اذنیله بیع ایتدکده مودع طرفندن بیعه وکیل اولمش اولور . ۱۴۵۲ ماده‌یه باق . بو تقدیرده مستودع عقد بیعی مودعه مضاف قیلار ایسه حقوق عقد مودعه عائد اولدینی کبی مستودع عقد بیعی نفسنه مضاف قیلارسه حقوق مذکوره مستودعه عائد اولور ۱۴۶۱ ماده‌یه باق .

۶ هبه و تسلیم، مستودع ودیعه‌ی مودعك امر و اذنیله ۱۴۶۰ ماده وجهله آخره هبه و تسلیم ایده‌بیلور . ۱۴۵۹ ماده‌یه باق .

۷ تقاص و اجرای محسوب، بر کیمسه‌نك دیگر کیمسنه ذمتنده جهت قرضدن اون عدد عثمانلی آلتونی آلاجنی اولوبده او کیمسنه اول کیمسه‌یه ودیعه طریقیله اون عدد عثمانلی آلتونی اعطا و تسلیم ایتدکده او کیمسنه‌نك اذن و رضاسیله اول کیمسه مذکور آلتونلری آلاجنه تقاص و محسوب ایده‌بیلور . و حین تراضیده ودیعه بولنان مذکور آلتونلر مستودعك النده ایسه

تجدید قبضه حاجت اولیہ رق تقاص واقع اولور . اما حین تراضیدہ ودیعہ بولنان مذکور آلتونلر مستودعک یدندہ بولنیوبدہ بلکہ خانہ سندنہ بولنسه اول کیمسه تجدید قبض ایتزدن اول تقاص واقع اولماز . ۳۶۲ ماده شرحندہ کی قائدہ یہ باق . لکن بلاتراض تقاص واقع اولماز .

((اما صاحبک اذنی اولمقسزین)) ۱ استعمال و ۲ ((آخرہ ایجار)) و ۳ ((با)) آخرہ (اعارہ و) ۴ ((با)) آخرہ (رهن) و ۵ آخرہ بیع و تسلیم و ۶ آخرہ هبه و تسلیم و ۷ آلاجنه تقاص و محسوب ایدہ مز کہ بو تصرفلر دین برینی یایسه ضمان لازم کله چکی فقرہ آتیہ دہ بیان اولنیور .

تفصیل الاسباب

استعمال ایدہ مز . زیرا استعمال مذکور غیرک مالندہ بلا اذن تصرف اولوب بو ایسه مجله نک ۹۶ ماده سی حکمنجه جائز دکلدر . ایمدی صاحبک اذنی اولمقسزین مستودع ودیعہ بی بالذات استعمال ایدہ میہ چکی کی آخرہ دخی استعمال ایتدیرہ مز . بو فقرہ ده استعمالک عدم جوازی ذکر اولنما سی ۷۸۷ ماده نک ایکنجی مثالندہ مذکور بولنسنه مینیدر .

استثنا

ودیعہ نک بلا اذن استعمال ایدیلہ مامسی مسئلہ سندن آتی

الذکر مسئلہ مستثنی بولنشد. شویله که بر کیمسه یه کتب علم ایداع اولندقدہ مستودع اول کتبه نظر و آنی مطالعه ایدہ بیلور. اکر نظر واوراقتک تقلیبی کتب مذکور یه مضر دکل ایسه. و بونظر غیرک حائطیلہ استظلال و آتشیله استضاء قیلندن اولور. نته کیم مستودع ودیعه اولان مصحف شریفدن قرائت ایدہ. بیلور. بناءً علیہ حال قرائتندہ تلف اولسه ضمان لازم کلز. زیرا مستودعک بو وجهله تصرفه ولایت واقتداری اولوب جواز شرعی ایسه ضمانه منافیدر درمختار و تکملہ رد مختار.

۲ آخره ایجار ایدہ مر. زیرا اجاره عقد لازم ایکن ایداع عقد غیر لازم اولمغله مستودع اجاره یه مالک اولسه یا لزوم مالا یلزم لازم کلور. یعنی عقد ودیعه عقد لازم دکل ایکن لازم اولسنی موجب اولور. یا خود عدم لزوم مایلزم لازم کلور. یعنی اجاره لازم ایکن لازم اولماسی لازم کلور.

ایمدی مستودع ودیعه یی کندی منافی ایچون بلا اذن ایجار ایدہ میه جکی کی مودع ایچون دخی ایجار ایدہ مر. «۹۶» ماده یه باق.

۳ اعاره ایدہ مر. زیرا مستودع ودیعه نک منافعه مالک اولمیوب اعاره ایسه تملیک منافعدن عبارت اولمغله بر کیمسه نک مالک اولمدینی بر شیئی آخره تملیک ایتسی ممکن دکلد.

۴ آخره رهن ایدہ مر. زیرا رهن ایفای حکمی اولوب

بر کیمسه دیگر کمنه نك مالیه مال صاحبك امری اولقمسزین
کندی بورجی ایفا ایدمز .

ایمدی مستودع ودیعه یی بلا اذن کندی بورجی یا اجنبی
بر آدمك دینی ایچون رهن ایدمه چکی کبی مودعك بورجی
ایچون دخی بلا اذن رهن ایدمز . زیرا رهن عقد لازم
اولوب ودیعه ایسه عقد لازم دکلدر .

۵ بیع و تسلیم ، مستودع ودیعه یی بلا اذن آخره بیع
و تسلیم ایدمز . « ۹۶ » ماده یه باق . ایدر ایسه بیع فضولی
اولور . « ۳۶۸ » ماده یه باق .

۶ هبه و تسلیم ، مستودع ودیعه یی بلا اذن آخره هبه
و تسلیم ایدمز . « ۹۶ » ماده یه باق . زیرا ۸۵۷ ماده حکمنجه
واهبك مال موهوبه مالك اولسی شرطدر .

۷ تقاص و محسوب ، مستودع ودیعه یی کندوسنك مودعده
اولان الاجغه مقابل اخذیله تقاص و محسوبی اجرا ایدمز .
ولوکه ودیعه ایله الاجفی جنس واحدن بولنه . شویله که بر
کیمسه نك دیگر کمنه ذمتنده الی آلتون الاجفی وار ایکن
اول کمنه اوکیمسه یه الی آلتون ایداع ایلسه بلا تراض دینه
مذکورله تقاص واقع اولماز .

بلا اذن استعمال یا ایجار یا اعاره یا رهن و تسلیم یا بیع
و تسلیم یا هبه و تسلیم (ایدوبده ودیعه) حال استعمالنده
مستودع یدنده یاخود (مستأجر یا مستعیر یاخود مرتهن)

یا خود مشتری یا موهوب له (یدنده) ولو که بلا تعد ولا تقصیر
(تلف یا ضایع اولسه یا خود قیمته نقصان کلسه مستودعه
ضمان لازم کلور .) زیرا بونلر غیرک ملککنده بدون الاذن
تصرف اولمغله موجب ضماندر. «۹۶» ماده یه باق .

تفصیل الضمان

۱ استعمال، مستودع و دیعه یی بلا اذن اید و بده حال استعمالنده
تلف اولنجه ضمان حصرا مستودعه لازم کلور. بواسعمال مسئله-
سی ۷۸۷ ماده مثالنده صراحته کوسترلدیکی جهتله بوراده ذکر
اولنماش ایسه ده حسن مقابله ایچون شرحا ذکر اولندی .

۲ ایجار، مستودع و دیعه یی بلا اذن آخره ایجار و تسلیم
ایتدیک صورتده و دیعه ید مستأجرده تلف اولدقده مودع
مخیر اولوب دیلر سه غاصب حکمنده اولمق ملا بسه سیله مستودعه
تضمین ایتدیرر. بوصورتده مستودع مستأجره رجوع ایده مز.
اگر ید مستأجرده تلفی بلا تعد ولا تقصیر وقوعبولمش ایسه .
« ۶۰۰ و ۶۰۱ و ۸۳۱ » ماده لر باق. و دیلر سه غاصب الغاصب
حکمنده اولمق جهتله مستأجره تضمین ایتدیرر . و مستأجرک
موجری بولن ان مستودعه مراجعت ایلسی مسئله سی ایچون
۶۵۸ ماده شرحنه مراجعت اولته .

۳ اعاره، مستودع و دیعه یی بلا اذن اعاره اید و بده مستعیر

یدنده تلف اولدقده مودع مخیردر . دیلرسه مستودعه تضمین ایتدیرر که بو حالد مستودع ، مستعیره مراجعت ایده مز . اگر بلا تعد ولا تقصیر تلف اولمش ایسه . زیر مستودع ضمان سببیه مستعاره مالک اولوب مستعار ایسه ۸۱۳ ماده حکمنجه ید مستعیره امانتدر . و دیلرسه مستعیره تضمین ایتدیرر که بو حالد دخی مستعیر مستودعه مراجعت ایده مز . « ۶۵۸ » ماده شرحه باق .

۴ رهن ، مستودع ودیعه یی بلا اذن آخره رهن وتسلیم ایتدکده مودع مجیز اولمدیغی تقدیرده ودیعه موجود ایسه عیناً مرتهندن استرداد ایده بیله جکی کبی تلف اولمش ایسه مودع مخیر اولوب دیلرسه مستودعه تضمین ایتدیرر . بو صورتده مستودع ، مرتهنه بالغاً ماباغ قیمتی تضمین ایتدیره میوب ودیعه نك ید مرتهنده تانی بلا تعد اولمش ایسه آنجق ۷۴۱ ماده شرحنده کی لاحقده ذکر اولندیغی اوزره دین ساقط اولور . و دیلرسه مرتهنه تضمین ایتدیرر . مرتهنه تضمین ایتدیرر ایسه اوده مستودعه رجوع ایدر . « ۷۰۱ » ماده شرحه باق .

۵ بیع وتسلیم ، مستودع ودیعه یی بلا اذن آخره بیع ایدوبده بعد التسلیم ید مشتریده تلف اولنجه مودع مخیردر . دیلرسه مستودعه تضمین ایتدیرر و او حالد بیع نافذ اولور .

واسترایسه مشترییه تضمین ایتدیررده اوده مستودعه رجوع ایدر . « ۶۵۸ » مادهیه باق .

۶ هبه وتسلیم ، مستودع ودیعهیی بلا اذن آخره هبه وتسلیم ایدوبده موهوب له یدنده تلف اولدقده مودع مخیردر . دیلرسه مستودعه تضمین ایتدیرر . بوصورتده مستودع موهوب له رجوع ایده مز . ودیلرسه موهوب له تضمین ایتدیرر . بوتقدیرده موهوب له مستودعه رجوع ایده مز . « ۶۵۸ » ماده شرحه باق .

۷ تقاص ومحسوب ، مستودع ودیعهیی الاجفنه تقاص ایچون اخذ ایتدکده یدنده موجود اولنجه مودع استرداد ایدرایسده مستودع استهلاك ایتمش ومستهلك دین جنسندن بولنمش اولنجه آرتق مقدار دین ایله تقاص واقع اولوب تضمینه محل قالماز .

ماده ۷۹۳

(مستودع ، امانت آچیهیی) ویاخود مثلیاتدن بولسان امانت دیگر بر مالی (بلا اذن آخره اقراض وتسلیم ایدوبده صاحبی) یعنی مودع مذکور ودیعهیی ید مسنقرضده عیناً موجود اولدیغی حالده (مجیز) اولور ایسه اجازت جائز و (اولمسه مستودع اول آچیهیی) ویاخود اومالی (ضامن اولور) ده بوتقدیرده اول قرض ، مستودعک ملکی یعنی ضامنی سبیلله مستودع آکا مالک اولور .

ایضاح القيود

۱ آچه ، بوتعير احترازی اولیوب اقراضی صحیح اولان عموم مثلیاتده کی حکم منوال مشروح اوزره در . یعنی امانت آریه . بغدادی کی مکیلات ودقیق و صمان کی موزونات وجوز ویمورطه کی عددیات متقاربه ده دخی حکم بویله در .

۲ صاحبی مجیز اولسه ، زیرا صاحبی مجیز اولور ایسه قرض صحیح و مقرض رب المال یعنی مودع اولوب اول قرضك مستقرضدن استیفاسی مودعه عائد اولور . « ۱۴۶۰ » ماده یه باق . فقط بو اجازتك صحتنده اول ودیعه نك ید مستقرضده عینا موجود اولسی شرط اولوب مستقرض آنی استهلاك ایتدکدنصرکه مودع بو اقراضی مجیز اولسه اجازت صحیح اولدیغندن مودع ینه مستودعه تضمین ایتدیرر .

نته کیم مودعك ابتداء امریله مستودع آنی آخره اقراض ایتسه جائز اولدیغی کی . « ۱۴۵۹ » ماده یه باق .

۳ مستودع . ضامن اولور . بو تعیر قابضدن احتراز ایچون دکلدر . زیرا مودع اول آچه یی یا دیگر مالی قابضه دخی تضمین ایتدیره بیلوب بو حالده دافع یعنی مستودع بری اولور . « ۹۱۰ » ماده یه باق .

نته کیم مذکور آچه یا مال ید مستقرضده عینا موجود اولسه مودع آنی عیناً استرداد ایده بیلور .

فقط مذکور آچه قابض یدنده عینا موجود ایکن صاحبی

مستودعه تضمین ایتدیره بیلورمی؟ « ۱۶۳۵ » ماده یه باقی.
 (كذلك) مستودع (کندوسنده و دیعه اولان آچقه ایله
 صاحبك) یعنی مودعك (آخره اولان دینی ادا ایتدکده
 صاحبی) یعنی مودع (راضی اولسه ضامن اولور .) یعنی
 صاحبی مخیر اولوب دیلر سه ادا وقضایی مجیز اولور . بوصورته
 مودع مستودعدن بر شی طلب ایده مر . واستر ایسه مجیز
 اولماز . بو تقدیرده مستودعه و دیعه سنی تضمین ایتدیرر . بو
 حالد داینه ویریلان پاره آنک اولور . یعنی آلاجنی استیفا
 ایلمش اولورده مستودع بو مبلغ ایله بورجکی ایفا ایتدم دیه
 مودعه رجوع ایده میه جکی کی داینه دخی مراجعتله استرداد
 ایده مز . زیرا مستودع ادای دین ایله متبرع اولور ولو الجیه
 فی الفصل الخامس من ادب القاضي . « ۷۸۷ » ماده شرحه باقی.
 بو فقره ده ایکی مسئله یه اشارت واردر .

مسئله اولی، ادا ایتدکده عباره سی دلالت ایدر که مستودع
 رضاسیله ادا ایتشدیر . اما داینک الاجنی اگر اول و دیعه
 جنسندن ایسه داین مرقوم ظفر بولدقده الاجنه کافی مقداری
 مستودعدن جبراً اخذ ایده بیلور . هر تقدیر مستودعک ویرمی
 جائز دکاسه ده کفایه فی الودیعه . و بو حالد مستودعه ضمان
 لازم کلز .

مسئله ثانیه ، صاحبی راضی اولسه عباره سیله اشارت
 اولنیور که صاحبی یعنی مودع بر حیاتدر . اما صاحبی فوت

اولش ايسه مستودع اول وديعه يي متوفای مودعك داينی بولان
 شخصه دين مذکور معروف ايسه ادای دين ايجون ويره بيلور.
 زیرا مستودع بر فعلی یا پیشدر که آنی متوفانك وصیسی یا باجق
 ایدی ولوالجیه فی الفصل الخامس من ادب القاضی ۸۰۲
 ماده شرحنه دخی باق. لانه قضی الی من له الحق وهو غريم
 المیت و ليس للابن ميراث حتی يقضى الدين تکمله رد مختار.
 نته کیم متوفانك برکسنه ذمتنده اون آلتون آلهجنی وبر
 شخصه اون آلتون بورجی اولوبده اوکسسه متوفانك بنده
 اولان الاجنی ايجون و آنی ایضا مقصدیله شو اون آلتونی
 متوفانك داينی بولان شو شخصه ویرورم ديه ویرر ايسه
 جائز اولور. والامتبرع اولوب متوفانك ترکهسسه دخی بورجی
 ویرمسی لازم کلور من المحل المزبور.

ماده ۷۹۴

(وديعه يي صاحبي) يا وکيلي يا رسولی (طلب ايتدکده)
 رد و تسليمه مقتدر ايسه بعينها اول وديعه نك (کندوسنه)
 يا وکيلنه يا رسولنه (رد و تسليمی لازم کلور.) زیرا صاحب
 وديعه طرفدن وديعه سنك کندوسنه تسليمی طلب اولمسی عقد
 وديعه نك فسخی ديمك اولوب عقد وديعه ايسه عقود غير
 لازمه دن اولغله مودعك بوکا صلاحیتی درکاردر.

ایضاح القيود

۱ طلب ، بوراده صاحبك طلبی مطلق اوله رق ذکر اولمسنندن مستبان اولورکه کړک بالذات طلب ایتسون وکړک وکیل یا رسول کوندر ویده وکیل یا رسول مرقوم ایله طلب ایتسون رد ایتسی لازم کلور . نته کیم آتیده تفصیل اولنور تکمله رد مختار .

۲ کندوسنه ، وکیلنه یا رسولنه دخی رد اولنه بیلوب بناء علیه بو تعمیر وکیل یا رسولدن احتراز ایچون دکلدر . شویله که صاحب و دیعه ، و دیعه بی فلان کیمسه یه ویرمسی مستودعه امر ایتدکده آکا ویرمسی لازم کلور . و اول کیمسه یه ویردکده مستودع اول بری اولوب صاحبی آنی استرداد ایتک استبدکده مستودع اولی استرداد مذکوره مجبور ایده مز .

مودعک عیالنه یا منزله رد

فقط صاحب و دیعه نک اوغلی و زوجه سی کبی عیالنه و منزله بلا امر المودع و دیعه رد اولنوب اولنما مسنده ایکی قول واردرکه بر قوله کوره رد اولنه بیلوب بو وجهله عیال المالکه رد مالکه رد کبی اولوب بو رد ایداع اولماز . بخلاف الغاصب اذا رد العین الی من فی عیال المالك فانه لا یبرأ .

بو تقدیره و دیعه بونلرک یدنده تلف اولسه مستودعه ضمان لازم کلز. بوقوله کوره بو ماده ده کندوسنه دینلمسی عیالندن احتراز ایچون اولماز ایکنجی قوله کوره عیالنه یا منزلنه رد اولنه ماز. بو تقدیره رد اولنوبده بونلرک یدنده تلف اولسه مستودع ضامن اولور تکمله رد مختار. نته کیم ماده آتیه شرحنده تفصیل اولنور.

صورت رد و دیعه

رد و تسلیم و دیعه دخی مستودعک و دیعه بی تخلیه ایتسیله یعنی قبض ایده بیله جک حاله کتور و بده قبضه رخصت و یرمسیله حاصل اولور. اوکنه یعنی قبض ایده بیله جک بر محله قیوبده قبض ایت دیمک کبی.

۳ مجله ده رد دینلمسیله اشارت اولنیور که مودع و دیعه نک کندوسنه حملی یعنی مثلاً خانه سنه نقلی طلب ایتمکله مستودع نقل ایتسه یعنی نقلدن امتناع ایتسه ده بعده تلف اولسه ضمان لازم کلز. زیرا مؤنت رد مالک اوزرینه اولوب مستودع اوزرینه تخلیه دن بشقه نسنه لازم کلز تکمله رد مختار.

۴ مقتدر ایه دنیلدیکه بونک محترز عنهی آتیده مجله ده مذکوردر.

۵ شرحاً بعینیها دنیلدی. زیرا مثلاً مستودع یدنده بولنان

آچه کاسد اولسه عیناً اول آچه نك صاحبنه ردی لازم کلوب
یوخسه صاحبی مذکور آچه کاسد اولغله آلام بدلی استرم
دبه مز . حتی ودیعه مثلاً قوائم نقدیه اولوبده مودع غائب
اولدیغی بر زمانده قوائم مزبور نك تداولی منع ایدلسه مودع
رائج ایکن استبدال ایتدک دیه تضمینی طلب ایلیمه مز . نته کیم
مستودع ودیعه یی عیناً ویرمیوب مثلی ویررم دیسه التفات
اولنمیوب موجود اولیجه عیناً ویرمکه مجبوردر . مثلاً مستودع
یدنده کی ودیعه آتونلری بالتوقیف آنک امثالی مودعه ویره جک
اولدقده مودعک آلامغه و عین ودیعه یی طلب ایتمکه حتی
واردر . زیرا ۲۴۳ ماده شرحنده ذکر اولندیغی اوزره نقود
اماناتده تعیین ایله تعین ایدر .

مودعک طلبی و مستودعک انکاری

ودیعه یی مودع طلب ایتدکده مستودع کندوسنه اوילה بر
مال ایداع اولندیغی انکار ایتسه سوز مع الیمین مستودعک
اولور . « ۷۸ » ماده یه باق . بو حالده مستودع یمیندن نکول
ایتسه ضمان لازم کله جکی کبی مودع اقامه بنیه ایده جک اولسه
ینه ضمان لازم کلور . ۹۰۱ ماده یه باق .
ودیعه نك قیمتده و مقدارنده و وصفنده اختلاف اولدقده
سوزینه مستردعکدر . « ۷۸ » ماده یه باق . نته کیم بر کیسه

دیگر کمسنه به کلیدلی بر صندوق ایداع ایدوبده بعده قبض
ایتدیکنده مذکور صندوقده شو مقوله اشیا ناقصاندر دیه او
کمسنه دن دعوی و او کمسنه او مقوله اشیا مذکور صندوقده
بولندیغنی بیلیم دیسه او کمسنه به ضمان یا یمین لازم کلز . بلکه
اول کیمسه او مقوله اشیا ایداع ایتدیکنی یا خود او کمسنه نك
استهلاك و تضییع ایلدیکنی ادعا ایلمی لازم کاور .

کذا بر کیمسه دیگر کمسنه به کیسه ایچنده اوله رق و صا-
یلیمیه رق پاره ایداع ایدوبده مؤخر مودع پاره شوقدر زیاده
ایدی دیو ادعا ایتسه مستودعه برشی لازم کلز . مکرکه شوقدر
زیاده ایدی اول زیاده یی سن تضییع یا خود شو وجهله خیانت
ایلمشیدک دیو ادعا ایده . مستودع و دیعه یی قبض ایتدیکنی
اقراردنصکره شو اقرارنده کاذب ابدوکنی ادعا ایتسه مستودع
تحلیف اولنور « ۱۵۸۹ » مادهیه باق .

مستودعك رد ایتدیکنی یا تلف اولدیغنی ادعاسی

مستودع و دیعه یی رد ایلدیکنی یا خود یدنده بلا تعد
ولا تقصیر تلف اولدیغنی ادعا ایتسه یمینله تصدیق اولنور .
« ۱۷۷۴ » مادهیه باق . و یمین ایتدین فوت اولدقده وارثنه
یمین و یریه مز .

﴿ورد و تسلیم﴾ و دیعه ن ﴿ك مؤتی یعنی کلفتی و مصرفی﴾

مودعه عائد اولور . ﴿ ۷۹۷ ماده یه باق . زیرا قاعده در که بر مالک قبضی کیمک منفعتی ایچون ایسه اول مالک رد و اعاده سی آکا عائد اولور . چونکه ۸۸ ماده حکمنجه غرامت غنیمته کوژه در . ایشته و دیعه نك قبضی مودعك منفعتی ایچون اولدینی جهته شو قاعده یه بناء مؤنت ردی مودعه عائد اولدینی کبی مستعارك قبضی مستعیرك منفعتی ایچون اولدینی اجلدن قاعدۀ مذکوریه مبنی آنک مؤنت ردی ۸۳۰ ماده ده ذکر اولندیغی اوزره مستعیره عائد اولور .

۵۹۴ و ۵۹۵ و ۸۹۰ ماده لر شو قاعده اوزرینه متفرع اولدینی کبی ۷۲۳ ماده شرحنده ذکر اولندیغی اوزره رهنك مؤنت ردی مرتهنه عائد اولسی دخی بو قاعده اوزرینه تفرع ایدر .

بو جهته مودع مستودعه و یعه یی بو کون بکا کتوریویردیوب مستودع دخی پکی دیدیکی حالدۀ اول کون کتور میوب فرداسی کون بلاتعد ولا تقصیر تلف اولسه ضمان لازم کلز . زیرا مستودع اوزرینه لازم کلان تخلیه دن عبارت اولوب یوخسه بر مکاندن دیگر مکانه نقل اولدیغندن پکی دیعی تبرع اولغله انفاذینه اجبار ایدیله مز .

﴿ و مودع ﴾ یا وکیل یی و دیعه یی مستودعدن ﴿ طلب ایتدکده مستودع ﴾ بونلره ویرمکه مقتدر ایکن ﴿ ویرمیوبده و دیعه تلف یا ضایع اولسه ﴾ تعدی اولغله ﴿ ضامن اولور ﴾ بحر .

و بو تقدیره یعنی بعدالطلب ویرمیدیکی صورتده مستودع و دیعه یی صاحبنه سالما رد و اعاده ایتدیکجه ضماندن بری اولماز. نته کیم «۷۸۷» ماده شرحنه باق.

طلب و دیعه اوچ درلو اولور

خلاصه، طلب و دیعه اوچ درلو اوله بیلور.

۱ بالذات مودعك طلب ایتسیدر. بو تقدیره مستودعك رد ایلمسی لازم کلوب رد ایتیبوده تلف اولدینی صورتده ضامن اولور. بو جهتله مودع و دیعه یی طلب ایتدکده مستودع «شمدی احضار ایتمکه اقتدارم یوقدر» دیمسی اوزرینه مودع براغوب کتسه رضاسیله براغوب کتمش ایسه عقد و دیعه مجددا انشا ایدلمش اوله جغندن بوندنصکیره و دیعه تلف اولسه مستودعه ضمان لازم کلیوب امارضاسی اولیه رق براغوب کتسه مستودع ضامن اولور.

شوقدر که و دیعه یی طلب ایدن مودعك وکیلی اولنججه وکیل مرقومك انشای عقد و دیعه یه مأذونیتی اولماغله هر حالده ضمان لازم کلور بحر.

نته کیم ایکی کیمسه بیننده مشترک اولان برآت حصه داراندن بری یدنده بولنمغه دیگر کندی نوبتنده انتفاع ایتک اوزره استیبوده ویرمکه مقتدر ایکن ویرمیوب یدنده تلف اولسه حصه سنی تضمین ایتدیره بیلور.

۲ مودعك وکیلک طلب ایلمسیدر .

بو صورتده دخی مستودعك رد ایلمسی لازم کلور . رد
ایلمیوب یدنده تلف اولسه ضامن اولور .

مثلا مودع مستودعه ودیعه یی خدمتکاریه ویر دیدکن
صکره خدمتکار مستودعدن اول ودیعه یی طلب ایتدیکی
حالده ویرمیوبده تلف اولسه ضامن اولور .

فقط وکیلک وکالتی بنیه ایله ثابت اولمیدرکه تا آکا دفعه
مستودع مجبور اولسون . اما وکالتی بنیه ایله ثابت اولمیوبده
مستوعك تصدیقی ایله ثابت اولورسه مستودع آکا تسلیمه
مجبور اولمیدنی کی مستودع وکیل ادعاسنده بولنان کیمسه نك
وکالتی تصدیق یا تکذیب ایتمیوب سکوت یا تکذیب ایتسه
بالاولی رده مجبور اولماغله بو حالده ویرمیوبده تلف اولسه ضامن
اولماز تكملة رد مختار .

خلاصه بر کیمسه مستوعه کلوب مودع جانبندن قبض
ودیعه یه وکیل ایدوکنی بیان و مستودع دخی اول کیمسه نك
وکالت مذکورهنی تصدیق ایتسه بیله وکیل مرقومه رد ایله
امر اولنه ماز رد مختار .

نته کیم وکالتی تکذیب یا سکوت ایتسه دفع ایله جبر
اولنه میه جنی کی .

لکن بر کیمسه قبض دینه داین طرفندن وکیل اولدنی
بیانیله دخی مدیوندن طلب ایدوب مدیون دخی وکالتی تصدیق

ایتمه ایفای دین ایلمسی لازم کلور. یعنی مدیون بوکاجبر اولنور.
 فرق شودرکه مدیونک دینده کی شو وجهله اقراری کنندی
 ملکنده اقرار اولمغله صحیح اولوب اما ودیعه ده اقرار غیرک
 ملکنده بولمغله اقراری صحیح اولماز.

ولو اقربا لوکالة و انکر المال لایصیر خصما ولا تقبل البنية
 علی المال الا ان تقع البنية علی الوکالة ولو اقربا لمال و انکر
 الوکالة لایحلف الوکیل المطلوب علی العلم بوکالة اذ الحلف
 یترتب علی دعوی صحیحة ولم تصح اذ لم تثبت وکالته فلم یصر خصما
 الا اذا قامت البنية علی الوکالة و المال یقبل عند ابی خیضة
 بناء علی ان وکیل قبض الدین یملك الخصومة عنده تکملة
 رد مختار فی آخر الودیعة.

کذلک مودع معلوم اوچ وکیلمدن قنغیسنی کونددر ایسه
 و دیعه یی آکا ویر دیوبده وکیلردن بریسی و دیعه یی استدیکی حالده
 مستودع دیکرو کیله اعطا ایده جکم دیه طلب ایدن وکیل ویر مسده
 ضایع اولسه ضامن اولور. زیر امودع یاوکیلی و دیعه یی طلب ایتدکه
 آرتق آندنصرکه مستودعک و دیعه یی امساک ایتمسنه رضاسی بولنماز.
 و طلب مذکور مودع طرفدن فسخ عقد و دیعه عد اولنور مجمع الانهر.
 ۳ مودعک رسولنک طلب ایتمسیدر.

بوصورتده دخی رسولک رسالتی ثابت اولنجه مستودعک
 آکا رد ایلمسی لازم کلوب حتی مستودع بالذات مودعه

ویره جکمدیه رسول مرقومه ویر مسهده و دیعه ینده تلف اولسه
ضامن اولور تکمله رد مختار .

اما مستودع رسولم دیانک رسالتی انکار یا خود رسول
اولدیغنی بیلدیکنی بیان ایتسهده اوده رسالتی اثبات ایده مامکله
ویر مسه ضامن اولماز من المحل المزبور .

نته کیم مودع ، مستوعه « سکا شویله بر علامتی کیم خبر
ویر رسه آکا و دیعه یی ویر دیوبده بر شخص مستودعه او یله
بر علامتی خبر ویر مکله مستوع تصدیق ایتدیکی جهتله و دیعه یی
ویر مسه ضامن لازم کلمز . زیرا جائز که مودعک رسولندن
بشقه بر کمسنه او یله بر علامتی خبر ویره انقروی . مکر که
مذکور علامت مودعک ایدوکنی شخص مرقوم اثبات ایده
تکمله رد مختار و فیه تفصیل المسئلة .

مستودعک رسوله ویردم

دیمسی

مستودع مودعه « سنک رسولک کلدی و دیعه یی آکا
ویردم « دیوبده مودع آنک کندی رسولی ایدوکنی انکار
ایتدکه مستودع اثبات ایدرسه فیه . والا مودعه یمین ویرر .
یمیندن نکول ایدرسه رسالت ثابت اولوب اما یمین ایدرسه
مستودع و دیعه یی ضامن اولور . و مستوع رسولک رسالتی

تصدیق ایلمش ایسه ضامن اولدیی شییه رسولیه مراجعت
یعنی رسول مرقومه تضمن ایتدیره من . آنجق آتی الذکر
اوح صورتده تضمن ایتدیرر .

صورت اولی ، مستودع رسولی تکذیب یعنی رسول
اولدیغی بیانیله برابر ودیعه یی اول رسولیه ویررسه مستودع
دخی بعدالضمان اول رسولیه رجوع ایدر .

صورت ثانیه ، مستودع رسولی تکذیب و تصدیق اتمیه رک
ودیعه یی اول رسولیه ویررسه مستودع دخی اول رسولیه
رجوع ایدر .

صورت ثالثه ، مستودع اول رسولی تصدیق یعنی مودع
طرفندن کوندرلمش اولدیغی بیانیله برابر شاید مودع انکار
برله کندوسنه تضمن ایتدیرر ایسه کندوسیده اول رسولیه
تضمن ایتدیره جکنی شرط ایله ایسه ینه اول رسولیه رجوع
ایدر تکرمله رد مختار وفیه تفصیل و ایضاح .

مستودع رد ودیعه دن

ایکی مسئله ده امتناع

ایده بیلور

(فقط) مستودع رد ودیعه دن ایکی مسئله ده امتناع ایده بیلور .

مسئله اولی ، مستودع رد ودیعه دن عجز حسی یا معنوی

ایله عاجز اولور ایسه رددن امتناع ایده بیلور .

عجز حسی ، (حین طلبده ودیعه اوزاق محله بولمق)
وعجز معنوی وقت طلب وقت فته اولمغه مستودع نفسندن
یا ودیعه کندی مالیه مدفون اولمق مثللو مالندن قورقق
(کبی بر عذرندن ناشی ویره میوب) یعنی اعذار مذکورندن
طولانی ویرمکدن عاجز اولوبده ویرمیوب آندنصکره ودیعه
یدنده (تلف یا ضایع اولمش ایسه اولحاده ضمان لازم کلز)
تکمله رد مختار .

مسئله ثانیه ، صاحب ودیعه ودیعه سنی طلبده ظالم ایسه
مستودع رددن امتناع ایده بیلور .

بو جهته ودیعه مثلاً قلیچ اولوبده مودع برینه اورمق
اوزره قلیچی استسه مستودع اعطادن امتناع ایده بیلور، مودع
قلیچله برینه اورمق رأینی ترکله وجه مباحله انتفاع
ایده جکی معلوم اولنجیه دك مستودع رد ودیعه دن امتناعده
دوام ایده بیلور . حتی وجه مباحله انتفاع می ایده جك یاخود
رأی اولی وجهله برینه می اوره جك بونده مستودع شك ایسه ینه رد
ودیعه دن امتناع ایدر تکمله رد مختار .

ینه بو جهته بر قادین زوجندن الاجغنی آلدیغنه ویاخود
فلان مال زوجنك اولدیغنه دائر اقرارنی مین بر سند تنظیم
ایدوب خسته لندیکی صروده فوتسندن صکره زوجنه ویرمك
اوزره مذکور سندی بر شخصه ایداع ایدوبده بعده کسب
عافیت اتمکله مذکور سندی اول شخصدن آلمق ایستسه زوج

مرقومك حقى ضايع اولسون ايجون شخص مرقوم زوج
مزبورك اذنى اولقسزین مودعه اولان زوجه يه اعاده دن امتناع
ايدە بيلور .

مستودعك تناقضى

موجب ضماندر

مودع ، وديعه يي طلب ايتديكنده مستودع يارين ويره يه
يا يارين آل ديونده بعده مستودع وديعه نك بلا تعد ولا تقصير
تلف يا ضايع اولديغنى ادعا ايتدكده نوقت تلف يا ضايع اولديغنى
مستودعدن سو آل اولنور . اكر يارين آل يا يارين ويره يم
ديو اقرارندن صكره . ضايع اولديغنى سويلر ايسه ضمان لازم
كلز . زيرا تناقض يوقدر . اما آندن اول تلف اولديغنى بيان
ايلر ايسه ضمان لازم كلور . زيرا يارين آل ديمسى اولوقت
وديعه نك موجود اولديغنى اقرار اولوب مؤخر ا ضايع اولدى
ديمسى تناقضدر تكملة رد مختار .

و مودع ، وديعه يي طلب ايتديكنده مستودع انكار
ايتدكدنصكره بعدالانكار المذكور اعاده ايتديكنه اقامه بينه
ايتسه قبول اولنور . نتهكيم قبل الانكار اعاده ايتديكنه اقامه
بينه ايدوبده انكارمده خطا ايتدم يا اونوتدم ديو تاويل ايتسه
ينه قبول اولنور .

اما مودع ، وديعه يي طلب ايتديكنده مستودع سن بكا

اصلا بر شی ایداع ایتدک دیدکدنصکره اوت بکا ایداع ایتدک
ایدی لکن سکا ردایتدم یا یدمدہ بلاتعدولاتقصیرتلف اولدی دیو
ادعا ایتسه قبول اولماز. آنجق سنک بنده هیج برشیئک یوقدر
دیدکدنصکره بروجہ مذکور صاحبہ ردی یا تلفی ادعا ایتسه قبول
اولور. زیرا بعدالرد یاخود بعدالتلف ودیعه مستودع یدندہ
اولیہ جفندن مستودع مذکور سوزندہ صادقدر.

ومستوع، ودیعه یی انکار ایتمکله مودع اقامہ بینہ ایتدکدن
صکره مستودع ضایع اولندیغنی بالادعا اثبات ایتسه بیله ینہ
ضامن اولور. زیرا شہود ہلاکہ شہادت ایتش اولوب ہلاکہ
ایسہ مطلقدر شویله کہ قبل الجحود ہلاکہ محتملدرکہ بوصورتدہ
ضمان یوقدر وبعد الجحود ہلاکہ محتملدرکہ بو تقدیردہ
ضمان واردر. چونکہ مضمونک ہلاکی تقرر ضامنی ایجاب
ایدر یوخسہ سقوط ضامنی اقضاء ایلمز. بو حالده وقوع ضماندن
صکره سقوطندہ شک واقع اولمش دیمک اولوب شک ایله ایسہ
یقین زائل اولماز قطلوبغا فی الودیعة.

۷۹۵ ماده

(مستودع، ودیعه یی بالذات یاخود) ۱ حفظہ مقتدر
۲ (امینی ایله) ۳ کندوسنہ یعنی مودعه (رد وتسليم ایدر.)
زیرا مستودع ودیعه یی ۷۸۰ ماده حکمنجہ کندی امینیله

حفظی جائز اولدینی کبی آنک یدیله ردی دخی چاژدر.

ایضاح القيود

۱ حفظ مقتدر دینلدی. زیرا مستوع ودیعه بی حفظه مقتدر اولیان صغیر ایله رد ایدوبده صغیر مرقوم یدنده تلف اولسه مستودعه ضمان لازم کلور.

۲ امینی لفظی مطابق اوله رق ذکر اولنمسیله آکلاشیلورکه امین مرقومک مستودعک عیالنده اولسنی شرط دکلدر. نته کیم ۷۸۰ ماده شرحنده تفصیل اولندی.

مستودع شو وجهله رد ایتدکده مسؤولیتدن خلاص اولوب حتی بوندنصکره ودیعه بالاستحقاق ضبط اولندقدده مستودع مستحقه قارشو مسؤول و ضامن اولماز. فقط مستودع، مودعک امریله ودیعه بی رسوله ویروبده ید رسوله تلف اولندقدنصکره مستحق چقسه مستحق مرقوم مخیردر. دیلرسه مودعه ودیلرسه رسوله تضمین ایتدیرر. « ۹۱۰ » ماده یه باق.

امینی دینلمسنگ سببی شودر که مستودع ودیعه بی امینی اولیان بر کیمسه ایله رد ایدوبده قبل الوصول تلف اولسه ضامن اولوب بوتقدیرده مستودع امینم اولیان فلان ایله ارسال ایتدم وصولبولدی دیو ادعا و مودع وصولی اقرار ایدرسه فبها انکار ایتدکده سوز مودعک اولوب ضمان لازم کلور مکرکه مستودع وصولی اثبات ایده « ۷۸۹ » ماده شرحنه باق.

صورت رد ودیعه

مستودعك ردی ودیعه یی تخلیه دن عبارت اولوب یوخسه
مستودع ودیعه یی مودعك خانه سنه نقله مجبور اولدینی ماده
آنقه شرحنده ایضاح اولمشیدی .

۳ مودعه دینلدی . مجله ده ودیعه کیمه رد اولنه جنی یعنی
بالذات مودعه رد ایدلمك لازم اولدینی یا خود هم مودعه همده
عیالنده بولنانلره رد جائز ایدوکی بیان ایدلماشدر . بناء علیه
بونك ایضاحنه مبادرت اوانور . شویله که بو مسئله ده ایکی قول
واردر .

قول اول ، بالذات مودعه رد ایدلمك لازمدر . یعنی ودیعه
مستعاره یعنی ۸۲۹ ماده یه مقیس اولیوب بالذات مودعه رد
ایدلمك لازم کلورکه صاحب بحر دخی کتابك بر موضعنده
بونى ترجیح ایدرك دیمشدر که مودعك منزله یا عیالنه رد ده
عرف جاری اولماشدر . وبوصورته مودعك بورده رضاسی
یوقدر چونکه اگر بونلره رده رضاسی اولسه ایدی مودع
ودیعه یی بومستودعه ایداع ایتمز ایدی . جامع الفصولین صاحبی
«وبه یفتی» عبارده سیله بوقولی ترجیح ایلماشدر . جواهر الفقه
نام کتابده دخی بو قول قبول ایدلماشدر .

قول ثانی ، بالذات مودعه ومالکه رد ایدلیوبده آنك عیالنده
بولنانه دخی رد ایدلمك جائزدر که بحرك نقله کوره خلاصه

صاحبی دخی والفتوی علیه قولیه بو قولی ترجیح ایلمشدر .
نته کیم ۷۹۴ ماده شرحده دخی ذکر اولمشیدی .

(و) مستودع ودیعه یی (امینی ایله) صاحبنه (رد وارسال
ایتدیکی صورتده قبل الوصول) یعنی صاحبنه وارمدين (ودیعه
بلا تعد ولا تقصیر) امین نزدنده (تلف یا ضایع اولسه) مستودع
وامیندن برینه (ضمان لازم کلمز) ۹۱ ماده یه باق تکمله رد مختار .

مستودعك بالذات یا امینی ایله ردی

ادعاسی ومودعك انکاری

مستودع ودیعه یی کندم یا امینم فلان ایله سکا رد ایتدم
دیدیکی حالدده مودع انکار ایتسه ۱۷۷۴ ماده حکمنجه سوز
مع الیمین مستودعك اولوب یمین ابدانی اوزرینه ایکن بونده کی
یمین اثبات اوزرینه اولور . شویله که مستودع ودیعه یی صاحبنه
رد ایتدیکنه یا یدنده بلا تعد ولا تقصیر تلف اولدیغنه یمین ایدرسه
بری اولور .

فقط مستودع ودیعه یی مودعه رد ایلدیکنی یا خود بلا تعد
ولا تقصیر تلف اولدیغنی ادعا ایتدکدنضکره یمین ایتدین فوت
اولدقده وارثه یمین ایتدیرلمز . «۸۰۱» ماده یه و شرحه باق .
نته کیم مودع وفات ایتدکده وارثی ودیعه یی مستودع دن طلب
ایتدکده حیاتنده مودعه یا بعد وفاته وصی یه رد ایتدیکنی ادعا
ایتسه سوز مع الیمین مستودعك اولور .

ماده ۷۹۶

(ایکی) یا زیاده (کیمسه مشترک ماللرینی) دیگر (بر کیمسه یه ایداع ایتدگدنصکره اول شریکلردن بریسی کلوبده) یعنی حاضر اولوبده (آخرک غیابنده) بونده کی غیابدن مقصود مفقودیت دکلدر (حصه سنی مستودعدن طلب ایتدگده ودیعه اکر مثلیاتدن ایسه مستودع آنک حصه سنی کندوسنه ویرر). بو ، امامین مذهبی اولوب مجله بو قوی اختیار ایلمشدر. امام اعظمه کوره بونده کی حکم دخی فقره آتیه ده کی حکم کیدر که مستودع مال مشترکی تقسیمه مالک اولمامغله بو وجهله اعطا ملک غیره تعدیدر .

امامینک دلیلی شودر که حاضر بالخاصه کندوسنک مستودعه ویردیکی حصه سنی طلب ایتدگده اولمغله اوده آنک حصه سنی ویرمه مجبوردر . نته کیم ۱۱۱۷ ماده ده ذکر اولندیفی اوزره مثلیات مشترکده مشارک بولنالردن هربری دیگرینک غیابنده و آنک اذنی اولمقسزین کندی حصه سنی اخذ ایده بیلور. یعنی بو وجهله مثلیاتدن اولان برمال مشترک مودعک یدنده بولنسه مشارک دیگر آنک غیابنده حصه سنی آله بیله جکی کبی مستودع یدنده بولنور ایسه ینه آلمغه حق اولور. دین مشترکده کی حکم بروجه محرر ایدوکی ۱۱۰۰ ماده ده مذکور بولنمشدر .

مجله نك شو فقره سیله فقره آنفهدن آکلاشیلور که امام اعظم ایله امامین بیننده کی شو اختلاف مثلیاتده اولوب یوخسه قیمیاتده دکلدر . واقعا بعض مشایخ اختلاف مذکور قیمیاتده دخی جاری ایدوکنی ذکر ایلمش ایسه ده بو طوغری دکلدر . شر حا دخی اشارت اولندیغی وجهله بوماده ده کی ایکی قوی احترازی اولیوب اوچ یا درت کیمسه اولور ایسه حکم ینه بویله در . شویله که مثلامودع اوچ کیمسه اولوب بریسی یا ایکسی کلهرک دیکرک غیابنده مثلیاتدن اولان ودیعه دن حصه لرینی آله ییلورلر . وبو وجهله حصه سنی طلب ایدن شریک حاکمه مراجعت ایسه حاکم حصه سنی ویرمسیله مستودعه امر ایدر . حتی اوچ کیمسه بر آدمه مثلیاتدن بر ودیعه ویروبده اوچیز حاضر و مجتمع اولمدقچه ودیعه یی بریمزه ویرمه دیو تنبیه ایتدکن صکره یالکزبری کلوبده حصه سنی مستودعدن آله امام ابی یوسفه کوره مستودعه ضمان لازم گلز خانیه .

مثلیاتدن اولان ودیعه دن متعدد مودعلردن

بریسی حصه سنی آلدیغی

تقدیرده کی احکام

بوماده نك فقره مذکورده سی وجهله مستودع مودع حاضرک حصه سنی آکا تسلیم ایتدکن صکره مذکور حصه قابضک

ی‌دنده تلف اولسه خساری بالخاصه کندوسنه عا‌ند اولوب دیگر
مودع حاضر اولدیغنده مستودع ی‌دنده کی حصه یی تماماً کندوسی
اخذ ایدرک اولجه حصه سنی آلمش اولان مودع بوکا مشارکت ایده مز.
اما مستودع حصه سنی طلب ایدن مودعه دفع و تسلیم ایتدکن
صکره دیگر حصه مستودع ی‌دنده بالاتعد ولاتقصیر تلف اوله‌رق
بعده شریک غائب حاضر اولنجه امام ابی یوسفه کوره حکم آتی
جریان ایدر. شویله که شو دفع و تسلیم حکم حاکم ایله اولورایسه
آلدینی حصه قابضه قالب کیمسه یه ضمان لازم گلز. واکر
بلا حکم الحاکم ایسه غائب حاضر اولدقده مخیر اولوب دیلرسه
آلدینی حصه ده قابضه مشارکت یعنی آلدینی حصه نک نصفی
قابضدن اخذ ایلر. دیلرسه حصه سنی مستودعه تضمین ایتدیر.
بوده «۹۱» ماده نک مستثناسی اولمش اولور. بوتقدیرده مستودع
ضامن اولدینی مقدار ایله قابضه رجوع ایدر تکمله رد مختار.
حموی دیمشدرکه مودعک مثلاً ایکی کیمسه اولسی ایکسیده
ودیعه یی حامل اوله‌رق ایکسیده معا مستودعه ایداع ایتلریله
حاصل اولوب اما ایکی کیمسه دن یالکیز بریسی و دیعه یی مستودعه
ایداع ایتدکده او برینک حین ایداعده حاضر بولنسی آنکده
ودیعه ده شریک اولسنی اقتضا ایتمز. زیرا جائزکه او بریسی مثلاً
شاهد اوله اته ی.

مودعک ایکی کیمسه اولسی صورت مذکوره یه منحصر
دکدر. زیرا مثلاً و دیعه یی ایکی کشیدن یالکیز بریسی حامل

اولوب اول ایکی کشتی مستودعه «بو مال ایکیمزك اولوب سکا و دیعه اولمق اوزره اعطا ایدیورزه» دیه تسلیم ایتدکلری صورتده دخی مودع ایکی کشتی اولمش اولور .

(و) دیعه (اگر قیمیاتدن ایسه) مستودع آنک حصه سنی کندوسنه (ویره مز) ویرر ایسه تلف اولنجه ضامن اولور . حتی حاضر حاکمه بالمراجعه حصه سنی طلب ایتدکده حاکم ویرمسيله حکم ایده مز . وبلکه متعدد مودعلردن بری و دیعه نك کلیسی کندوسنك اولدیغنه یاخود آرقداشك وقت ایداعده مذکور و دیعه نك کلیسی کندوسنك ایدوکنی اقرار ایلدیکنه اقامه یینه ایده جك اولسه قبول اولماز .

و دیعه مثلی اولنجه حصه سنك احد مستودعینه ویرلسی جائز ایکن قیمی اولدقده ویرلسی جائز اولیور یینلرنده کی فرق نه در

مثلیله قیمتی بیننده فرق شودر که ۱۱۷ و ۱۱۸ ماده لرده ذکر اولنه جفی اوزره مثلیده افراز و قیمیده مبادله جهتی غالب اولوب مستودعك مبادله یه یعنی بدنده کی مال مشترکی بین المشارکین تقسیمه مأذونیتی اولمامغله قیمی یی ویره مز .

بو مثالده مشترک ماللرینی دینلدی . زیرا ایکی کیمسه دن هر بری کندی مالنی بشقه بشقه اوله رق بر شخصه ایداع

ایتدکدنصکره بریمی کلوب کندی مالی آلق استدکده مستودع رد و اعاده ایتمه مجبور اولوب ایکسی ده مجرد بر مجلسده ایداع ایتدکاری جهتله دیکری حاضر اولمدقچه ویرم دیه من فیضیه .

۷۹۷ ماده

﴿ودیعہ﴾ صاحبہ رد و ﴿تسلیمده مکان ایداع معتبردر﴾. ولوکه حمل و مؤتی بولمیه. و مستودع اوزرینه لازم کلان ۷۹۴ و ۷۹۵ ماده لر شرحلرنده ذکر اولندینی وجهله تخلیه اولوب یوخسه بر مکاندن دیکر مکانه نقل وایصال دکدر. یعنی تسلیم تخلیه ایله تحقق ایدر.

﴿مثلا استانبولده ایداع اولنان متاع استانبولده﴾ برای ﴿تسلیم﴾ تخلیه ﴿اولنور﴾ یوخسه ﴿ادرنه﴾ یه نقل ایله اورا ﴿ده تسلیم ایتمک اوزره مستودعه جبر اولنه ماز﴾ زیرا ادرنده تسلیمه جبر ایدلسه مؤنت رد مستودعه عائد اولوق لازم کلور. حالبوکه ۷۹۴ مادهده بیان اولندینی اوزره مؤنت رد مودعه عائددر.

خلاصه کلام، مودع و دیعه بی مکان ایداعده اخذ ایتمه مجبوردر. حتی برکیمسه دیکر کمسنه دن بنمسنده شویله برودیعه م واردر آتی ویر دیو دعوی ایتدکده ۱۶۲۱ ماده وجهله

مذکور و دیعه نی مجلس محاکمه یه کتور مک اوزره اول کیمسه یه ویر مسیله
او کمنه یه امر اولنور. یوخسه مذکور و دیعه نك مجلس محاکمه یه
احضار ایله او کمنه یه اجبار اولنه ماز.

و دیعه نك تسلیمنده مکان ایداعك معتبر اولسی مطلقدر .
یعنی و دیعه كرك حمل و مؤنته محتاج اولسون و كرك اولسون.
مثلا بر کیمسه دیگر کمنه یه استانبولده الای آلتون و دیعه
ویر و بده مؤخرا ایکیسیده ادر نه ده برلشدکلرنده مودع مبلغ
مزبوری استانبولدن کتور و ب بکا تسلیم ایله دیو مستودعه
جبر ایده مز . چونکه مودع ادر نه دن استانبوله کلوب آتی
ادر نه یه نقله یا خود مکتوبله استیوب پوسته پارد سنی ویر و ب
کتور شمکه مجبور اولوب بوحالده متضرر اولور . ضرر ایسه
۱۹ ماده حکمنجه ممنوعدر .

۷۹۸ ماده

(و دیعه نك منافعی) یعنی و دیعه دن متولد بولنان منافع
(صاحبنكدر) . زیرا منافع مذکوره صاحبنك یعنی مودعك
ملکنك نماسیدر . بوجهته امانت اولان حیوانك یا وریسی
و سودی و یوکی صاحبه عائد اولدینی کی و دیعه اولان حیوانك
سودندن یا و دیعه بولنان باغ و باغچه نك یمیشندن بر مقدار حاصل
و مجتمع اولوبده فسادندن یعنی بوزلمسندن خوف اولنمغه

صاحبك اذنى اولقسزین مستودع صاتسه غاصب اوله جنى جهته
ضامن اولور .

منافع وزوائد وديعهك فسادندن
خوف اولندقده حكم

وصاحبى غائب اولنجه مستودع حاكمه مراجعت ايدر .
وحاكمك امريله صاتدقده او حالده ضمان لازم كلز . « ۹۱ »
ماده يه باق . اما مستودع بلا امرالقاضى صاتدقده اكر شهرده
ياخود قبل الفساد حاكمه مراجعت ايتك ممكن اولور موضعه
ايسه ينه ضامن اولور . ۹۶ ماده يه باق . فقط مغازه ده بولنق
كبي قبل الفساد حاكمه مراجعت ايلمك ممكن اولماغله بيع ايتسه
جائز اولور . زيرا ۲۱ ماده حكمنجه ضرورتلر ممنوع اولان
شيلرى مباح قيلار .

مع ذلك مستودع مذكور زوائدى صاتميوبيده طور مغله
بوزلسه ۷۸۵ ماده ده مذكور اولدينى وجهله اصل وديعه ده
ضمان لازم كلديكى كبي بونده دخى ضمان لازم كلز . حاكمه
مراجعت ايتك كرك ممكن اولسون وكرك اولسون تكمله
رد مختار .

مودعه عائد اوليان منافع

شرح اشارت اولندينى اوزره منافعدن مقصود وديعه دن

مستودع اولان منافعدر. اما وديعه دن مستودع اوليان منافع مودعه
عائد اولماز. بدل ايجار کي. شويله که مستودع وديعه اولان مالي
بلا اذن المودع آخره بالايچار اجرتي آلدقه شو اجرت
مستودعک ملکی اولوب مودع مداخله ايدمهز. «۴۴۷» ماده
شرحنه باق. هر نقدر مستودعه دخی طيب اولماز ايسدهده.

نته کيم مستودع ينده وديعه اولان نقودی سرمايه اتخاذا
ايله بلا امر المودع اعمال وارباح ايدرك بر مقدار کارايتمه کاری
مستودعه عائد اولوب مودع آکا مداخله ايدمهز. و مستودع
بالکزر رأس مال بولنان وديعه يي مودعه ضامن اولور.

ماده ۷۹۹

(صاحب وديعه غائب اولوبده) آنک یعنی وديعه نك
صاحبنك (اوزرينه نفقه سی واجب اولان کيمسه نك حاکمه
مراجعتی) یعنی غائب مرقومك مثلاً وديعه اولان اچمه سندن
کندوسیچون نفقه تقدیر ایدلمسی طالب ایللمسی (اوزرينه)
مستودع غائب مرقومك کندی نزدنده وديعه سی بولنديغی
ومدعی ایچون غائب اولان مودع اوزرينه نفقه نی ايجاب ایدن
سببی اقرار ایدرسه (حاکم) دخی طالب نفقه یی اصول مشروعه سنه
توفيقاً تلخیص و آندن کفیل بالمال اخذ ایتدکن صکره (اول
غائبك وديعه اولان اچمه سندن) یاخود آرپه وبغداي والبسه لك

کبی نفقه‌یه صالح و ودیعه بولسان دیگر مالندن (اول کیمسه‌یه نفقه تقدیر) یاخود مودع کندوسی اوزرینه نفقه‌سی واجب اولان کسانه صرف ایتک اوزره مستودعه امروادن اعطا (ایتدکده مستودع کندو یدنده ودیعه اولان اچقهدن) یاخود آریه وبغدای والیسه لکدن (اول کیمسه‌نک نفقه‌سنه صرف) واعطا (ایتسه ضمان لازم کلز .)

سوال وجواب

سوال، مودعک غیبتنده مالندن آنک اوزرینه حاکم نفقه تقدیر ایتدکده غائب علیهنه حکم اولوب بویسه ۱۸۳۰ ماده حکمنجه جاژ دکلدر.

جواب، مودع اوزرینه مذکور نفقه قبل القضا دخی واجب اولوب حاکمک نفقه ایله قضایی وحکمی من له النفقه‌یه اعانه‌دن بشقه برشی دکلدر.

ایضاح القيود

۱ غائب، بوراده‌کی غائب‌دن مقصود مدت سفر مسافه اوزاق بولسان کیمسه‌در. اما مدت سفر مسافه‌دن آزاوزاق اولان مودعه مراجعت و آنک حضور حاکمه احضاری سهیل اوله جفی

جهتله بونك غیابنده و دیعه دن نفقه تقدیر اولنه ماز بحر و مجمع الانهر .

۲ و دیعه یی و نفقه یی ایجاب ایدن سببی اقرار ایدرسه دینلدی . زیرا بومثللو ید مستودعه یا ید مضاربده بولنان مال دن نفقه تقدیر اولنه بیللمسی مستودع مثلا و دیعه یی اقرار ایتسی شرطیله مشروط اولوب و دیعه یی اقرار ایتدیکی تقدیرده مستودعه یمین لازم کلیه جکی کبی طالب نفقه بولنان شخصک آتیده بیان اولنه حق اسباب نفقه دن قغیسندن طولانی نفقه یه مستحق اولمش ایسه آنی دخی مستودعک اقرار ایللمسی شرطدر .

۳ طالب نفقه نک تحلیفی ، طالب نفقه بولنان کشی مثلا غائب مودعک زوجه سی اولدقده نفقه تقدیر اولنق لازم کلدیکنده زوجی غائبک کندوسنه نفقه بر اقدیغنه و کندوسی ناشزه بولنمدیغنه یمین و یریله جکی کبی طالب نفقه مثلا غائبک اوغلی اولدیغی صورتده دخی بروجه مشروح غائب پدری کندوسنه نفقه بر اقدیغنه یمین و یریلرکه بو یمین بلا طلب ، حاکم طرفدن و یریلان بش یمیندن بری اولوب متباقی دردی مجله نک ۱۷۴۶ ماده سنده مذکوردر .

۴ کفیل بالمال ، طالبه نفقه مثلا زوجه اولوب نفقه نک تقدیری لازم کلدیکی حالده زوج غائب اولان مودع کلدیکنده لدی المحاکمه غائب مزبور اوزرینه نفقه لازم کلیه جکی آکلاشیلورسه

اخذ و صرف ايتديكى وديعه يي مستودعه اعاده و ضامن اوله جفنه
نقه بر كفيلي حاكمك آلسنى لازم كلور.

۵ ياخود مودعك امرى اولمق سزین دینلدى . زیرا
مودعك امرى اولنجه مستودع بالا تقدیر الحاکم دخى صرف
ایده بیلور که بومسئله قریبا ایضاح اولنور .

۶ وديعه ، بو حکم وديعه يه مخصوص اولیوب غائبك
مضاربى نزدنده یا مديونى ذمتنده بولنان مالی دخى بو حکمده
وديعه کي ايسه ده بوراده وديعه يه تخصیص ایدلسی بحث وديعه يه
متعلق اولدیغنه مینیدر .

۷ آچقه ، بوتعبیر شرحا ایضاح اولندیغی اوزره احترازی
اولیوب نفقه جنسندن بولنان طعام و کسوه کي نفقه يه صالح
شیلر دخى بویله اولوب اما نفقه يه صالح اولیان آت و کتاب
مثللو وديعه لردن نفقه تقدیر اولنه ماز . چونکه بونلر ایله
نفقه لئلك ایچون بونلری بیعه محتاج اولوب حالبوکه غائبك مالی اتفاق
ایچون بیع اولنه ماز .

تقدیر النفقه اوزرینه وديعه صرف اولندقده

بوکا مترتب احکام

ایشته مستودع نزدنده وديعه بولنان بش یوز غروشدن
اوچ یوز غروشی بروجه بالا تقدیر حاکم اوزرینه نفقه يه صرف

و متباقی ایکی یوز غروشی مودعه رد ایتدکن صکره و دیعه دن
هیچ بر مقداری یدنده حبس ایتدیکنه لدی الایجاب یمین ایتسه
قبول اولنه رق یمینده صادق اولور.

و مستودع حاکم بو وجهله تقدیر نفقه سنندن صکره
و دیعه بی « من له النفقه یه » و یردیکنی ادعا ایتسه سوزی قبول
اولور . « ۱۷۷۴ » ماده یه باق .

۸ حاکم نفقه الح دینلیور . فقط مستودع ابوین یا زوجه
یا ولدن بری اولنجه بلا تقدیر الحاکم مذکور و دیعه دن کندو
نفقه لرینه صرف ایتسه لر ضامن لازم کتز . زیرا بونلرک نفقه سی
مودع اوزرینه قبل القضاء دخی لازم اولمغله حقارینی استیفا
ایلمش اولور لر .

شوحالده مثلاً مستودع اب اولمغله ابنک و دیعه سنندن
نفسنی انفاق ایتدکده ابن ، پدرینه سن غنی ایکن و دیعه سی
صرف ایتدک ضامن اول دیو و پدری فقیر و معسر ایکن صرف
ایتدم دیو اختلاف ایتدکلرنده پدرک یوم خصوصتده کی حالسه
باقیلور . اب وقت مذکورده معسر ایسه سوز نفقه مثله
کندوسنکدر . اما موسر ایسه سوز ابنکدر . « ۱۰ و ۵ » ماده لره
باق . و ایکسیده اقامه ینه ایتدکلرنده ابنک ینه سی ترجیح
اولور .

لکن مستودع ابوین و اولاد ایله زوجه دن غیری اولنجه
بغیر قضاء و لارضاء صرفدن طولای ضامن اولور لر .

۹ نفقه تقدیر، تقدیر نفقه مجله ده مطلق اوله رق ذکرندن
آکلا شیلور که مستودع، مثلاً زوج غائب ودیعه دن زوجہ سی
شوطالبہ نفقه یہ برشی ویر مامسیله کندوسنا امر ایتدیکنی
درمیان ایتسه بیله حاکم بوسوزینه التفات ایتیب و دیعه
مذکورہ دن تقدیر نفقه ایدر. و مستودع بعد التقدیر نفقه
مذکورہ ایچون ویرسه ضامن اولماز.

﴿ فقط حاکم ﴾ امری آلتق ممکن ایکن ﴿ امری ﴾
و بروجہ مذکور نفقه تقدیری اولمدیغی کی مودعک دخی اذن
وامری ﴿ اولقسزین صرف ایدر ایسه ﴾ کرک مودعک ابوینہ
یا زوجہ سنہ یا اولادینہ صرف ایتسون و کرک بونلرک غیری
برینہ صرف ایتسون ﴿ ضامن اولور. ﴾ زیرا غیرک مالندہ
بلاولایة ولانیابہ عنہ تصرفدر. چونکہ مستودع مودع طرفدن
حفظده نائب اولوب یوخسه بشقه شیده نائب دکلدر. « ۹۶ »
مادہ یہ باق. « ۷۹۳ » مادہ یہ دخی مراجعت اولنہ.

بو تقدیرده یعنی مستودع بروجہ محرر ضامن اولدقدہ
اول آقہ یہ یعنی مودعک اوزرینہ نفقه سی واجب اولان کیمسہ یہ
صرف ایتدیکی پارہ یہ بطریق الاستناد مالک اوله جغندن کندو
مالی تبرعا دیکرینہ ویرمش اوله جغی جہتلہ صرفیات مذکورہ
سیله اول کیمسہ یہ دخی مراجعت ایدہ مز. مستودع کرک مذکور
آقہ دن کندوسی انفاق ایتسون و کرک آقہ یی آنلرہ تسلیم

ایدوب آنلر انفاق ایتسونه لزم ضمان ایله عدم رجوعده
حکم بر در .

امریله ضرفك ایضاحی

شو فقره اخیره شرحده ذکر اولندیغی وجهله مستودع
اول آچه یی مودعک امریله دخی صرف ایده بیلوب بو حالد
مستودع مودعک امرینه اول آچه یی صرف ایتدیکنی ادعا
ایتدیکی حالد مودع امری انکار ایدنجه اثبات ایدرسه فیها .
ایده من ایسه امر ایتدیکنه مودعه یمین ایتدیرر . نکول ایدر
ایسه امری ثابت اولور . یمین ایدرسه مستودعه ضمان لازم
کلور .

بالا امر صرفدن صکره اجازت

مستودع بالا امر بوجه محرر صرف ایتدکدنصکره مال
صاحبی یعنی مودع مجیز اولسه اجازت مذکوره ضماندن ابرا
معناسنی تضمن ایده جکی جهتله آرتق مستودع اوزرینه ضمان
لازم کلز .

مستودع ودیعه یی مودعک امریله فقرايه تصدق یاخود
فلانه هبه ایتدیکنی ادعا ایتدکده حکم منوال مشروح اوزره در .

حاکم امری استحصال ایدلک غیر ممکن
اولغله صرف ایتدکده کی حکم

مجاهده حاکم امری اولمقسزین صرف ایتدکده ضامن
اوله جنی مطابق اوله رق ذکر اولمش ایسه ده شر حا اشارت
اولندیغی اوزره حاکم امری استحصال اولنق ممکن ایکن
استحصال اولندیغی صورتده ضامن اولور.

اما حاکم رأی استحصال اولنق ممکن اولندیغی جهتله
استحصال اولمیه رق صرف ایتدیکی تقدیرده استحسانا ضمان
لازم کلمه جکی نوادر دن نقل اولمشدر بحر فی النفقة.

مودعک مثلاً زوجہ سی ودیعه آچہ دن نفقه طلب ایتدیکنده
مستودع ودیعه ی انکار ایسه ده بعده اقرار ایدوب ضایع اولدیغی
بیان ایلسه ضامن اولور.

نقچه ی ایجاب ایدن احوال ثلاثه

صاحب ودیعه اوزرینه کیملرک نفقه سی لازم کلور و حاکم
طرفدن نصورتله نفقه تقدیر اولنور بونک تفصیلاتی کتب
فقهیه ده باب النفقه عنوانی تحتیده مذکور اولوب بوراده بو
مسائل حقنده تفصیلات اعطاسی مقامه مناسب دکلدر. آنجق

معلومات مجملہ اولق اوزرہ شورادہ بو قدر دینلور کہ نفقہ بی
ایجاب ایدن احوال اوچدر .

برنجیسی، زوجیتدر. یعنی زوجہ نك نفقہ سی زوجی اوزرینہ
لازم کلور .

ایکنجیسی، قرابتدر. مثلاً فقیر بر چوجغک نفقہ سی
باباسی و فقیر بابانك نفقہ سی ولدی اوزرینہ لازم کلور .

اوچنجیسی ملکدر. مملوکك نفقہ سی مالکی اوزرینہ لازم
کلور. نته کیم ۱۳۲۰ ماده ده ذکر اولندیغی اوزرہ مشترک بر
حیوان صاحبارندن بری اول حیوانی بسلمکدن امتناع ایتدکده
دیگر شریکك حاکمه مراجعت ایلمسی اوزرینہ حاکم امتناع
ایدن حصہ داره یا حصہ کی آخره صات یا خود مشترک حیوانی
بسله دیو امر ایدر .

۸۰۰ ماده

(مستودعه جنون عارض اولوبده صحو وفاقتنیدن یأس
کلدکده) یأس نقدر مدت جنوندن صکره کلور ۹۴۴ ماده
شرحنده ایضاح اولته جننی اوزرہ جنون، مطابق درجه سنه
کلدکده صحو وفاقتنیدن یأس کمش اولورمی (قبل الجنه اخذایتمش
اولدیغی و دیعه) عینا موجود اولورسه موجود اولان مال
کندوسنك و دیعه سی اولدیغی صاحبی بولان مجنونك و ایسی یا وصیسی

مواجهه‌سنده بالبنیه اثبات ایتدکده صاحبه رد اولنوب و عینا موجود اولسه صاحبی و دیعه بی طلب ایتدکده مجنونک و لیس ی او ویسی وار ایسه آنک مواجهه‌سنده یوغیسه حاکم شو مجنون ایچون بروسی نصب ایدرک وودع بووسی مواجهه‌سنده بالخاصمه مدعی ایداعی وودیه قیمیاتدن ایسه قیمتی اثبات ایلیرک اولوجهله و دیعه نک تضمینی لازم کلنجه صاحبی «بر معتبر کفیل» یعنی مجنونک مالندن تضمین ایتدیرم جک شئیک فقره آیه وجهله لدی الایجاب تکرار مجنونه ضامن اولمق ایچون قوی بر کفیل کوستره رک مجنونک مالندن تضمینه صلاحیتی واردر» یعنی و دیعه مثلیاتدن ایسه مثالی و قیمیاتدن ایسه قیمتی مجنونک مالی وار ایسه آندن استیفا ایدر. اما مجنونک مالی یوغیسه ولی یاو سینک مالندن ضمان لازم کلیوب حال یسرینه انتظار اولنور. «۹۲۶» ماده یه باق .

«فقط» صاحب و دیعه اولوجهله تضمین ایتدیردکن «صکره کندویه» یعنی مستودعه «افاقت کلوبده» یعنی جنونی زائل اولدوقده «و دیعه بی صاحبه رد ایتمش یاخود بلا تعد ولا تقصیر و دیعه» یدنده «تلف یا ضایع اولمش ایدوکنی» و یاخود و دیعه نه اولدیغنی بیلمدیکنی «بیان ایدرسه» ۱۷۷۴ ماده یه مبنی یمیدله تصدیق اولنهرق «اخذ اولنمش اولان آچه‌سنی» یعنی بدل تضمینی صاحب و دیعه دن یاخود کفیلندن «استرداد» و طلب «ایلر» ۹۷ ماده یه باق .

۸۰۱ ماده

(مستودع فوت اولدقده وديعه) ده ايكي احتمال واردر .
 احتمال اول، اول وديعه (عينا ترکه سنده) موجود بولمقدرد .
 ايمدی وديعه عينا ترکه سنده موجود (بولنديغي صورتده) وديعه نك يد
 مستودعه ايكن حاكمي نه ايسه (وارثي) يا وصيسي (يكنده
 دخي) حاكمي اودر . بو جهتله صاحبنه رد ايدنجيه دكين يد
 وارنده (امانت اولمغله) وارث يا وصي مستودع كي محافظه يه دوام ايدر .
 و صاحبي طلب ايتدكده (صاحبنه رد) واعاده (اولنور) ده
 مستودعك دايئلري وديعه يه مداخله و تقسيم غرمایه ادخال
 ايدمهزلر . زيرا دين متوفانك ترکه سنه تعلق ايدوب بو ايسه
 ترکه دن معدود دكلدر . مال مضاربده دخي حكم بويله در .
 ايمدی وديعه عينا موجود اولنجه مستودع وديعه يي بيان ايتمه
 وورته دخي آتی بيلمسه بيله بونده تجهیل يوقدر . بناء عليه
 مودعك مستودعك ترکه سنه غرامته داخل اولسي لازم كلز .
 ينه بو جهتله مستودع حياتنده وديعه بلا تعد ولا تقصير
 يكنده تلف اولديغي ادعا ايتدكده « ۱۷۷۴ » ماده يه مبني سوزي
 قبول اولنه جنغي كي بعد وفاته وارثك يا وصيسنك دخي بروجه
 مذکور عينا موجود بولسان مذکور وديعه حقنده بو
 سوزي قبول اولنور . نته کيم آتی الذکر « وکذا وارث بز

وديعه يي بيلورز شويله ايدى الخ فقره سنده بيان اولنيور.
مثلا مستودع، وديعه يي زوجه سنه ويرد كدنصكره مزبوره
يدنده موجود ايكن مستودع وفات ايتمكله زوجه مزبوره دن
طلب اولندقدده وديعه ضايع اولدى يا سرقت اولندى. ديسه
۱۷۷۴ ماده يه مبنى سوز مع اليمين زوجه نك اولوب كمسنه يه
ضمان لازم كلز. آنجق زوجه، مذكور وديعه يي متوفى زوجه
برحيات ايكن رد ايتديكنى ادا ايتدكه سوز مع اليمين زوجه نك
اولوب متوفى طرفدن تجهيل بولندقدده آنك تركه سنده دين
اولور.

تركه ده موجود مالك وديعه

ايدوكنك لزوم ثبوتى

وديعه نك عينا وجودى يعنى موجود اولان مالك مدعى
طرفدن متوفايه ايداع اولنش مال ايدوكنك ثبوتى يا شهادت
عادلله ايله اولور يا خود متوفانك تركه سى مستغرق ديون دكلسه
كبار اولان ورثه نك اقرار ليله ثابت اولور. يوخسه مجرد
مودعك سوزيله نسنه ثابت اولماز. نته كيم وصي نك وصغار اولان
ورثه نك اقرار لرى دخی معتبر دكلدر. « ۱۵۷۳ » ماده يه باق.
وديعه يد مستودعه بولندقدده حكى نه ايسه مستودع نك
وفاتيله بوماده وجهله مستودعك ورثه سى يا وصيسى يدينه

انتقال ایتدکده حکمی ینه اور در دنیا میشیدی. آنجق شو حکمدن مسئله آتیه مستنادر . شویله که مستودع و دیعه یی سارقه اراه و دلالت ایتمکه سارق آتی سرقت ایسه حفظده تقصیر ایتش اوله جغندن مستودعه ضمان لازم کلدیکی حالده وارث و دیعه یی سارقه اراه و طریق سرقت دلالت ایتدیکی جهته سارق سرقت ایسه وارثه ضمان لازم کلز درختار . زیرا مباشر ایله متسبب اجتماع ایتدکده حکم مباشره مضاف قلنور .

(اما) احتمال ثانی ، و دیعه عینا ترکه سنده موجود بولنماقدر . ایتدی مذکور و دیعه (عینا) متوفانک (ترکه سنده) موجود (بولندی) و مودع دخی مستودعک مجبلا وفات ایتدیکی ادعاسیله آتی دردنجی فقره وجهله ترکه دن تضمینی طاب ایتدیکی (صورتده) بونده اوچ وجه واردر .

وجه اول ، (اگر مستودعک حال حیاننده اول و دیعه یی صاحبنه رد ایتدم یا خود بلا تعد (ولا تقصیر) ضایع اولدی دیمک کی (شرعا ضماندن برائی ایجاب ایدر) برصوتده و دیعه نک حالنی بیان و تقرر ایلدیکنی (مودع اقرار ایدر یا خود مودع انکار ایدوبده) وارثی اثبات ایدر ایسه (ترکه سندن ضمان لازم کلز .) بو فقره ده اقرار یا اثبات اولسان مستودعک « رد ایتدم یا ضایع اولدی » دیمش اولمسیدر . اما بو ماده نک صوک فقره سنده اثبات ایدیلاں تلف و ضیاع اولغله بو فقره ، فقره اخیره دن افتراق ایدر .

ایمدی بو فقره وجهله مستودعک بوسوزنی ورته سی
اثبات ایتدکده ضمان لازم کلز . چونکه مستودع بر حیات
اولوبده بوسوزی سویلسه ۱۷۷۴ ماده حکمنجه ضماندن
قورتلدیغی کبی بوسوزی بعد وفاته بنیه ایله ثابت اولدقده «۷۵»
ماده حکمنجه بنیه ایله ثابت اولان عیانا ثابت کبی اوله جغندن
ینه ضمان کلز .

ایضاح القيود

۱ دیمک ، ورته رد ایتدم کبی سوزی اثبات ایده میوب
فقط ودیعه یی حال حیاتنده مورثاری رد ایلدیکنی یاخود بلا
تعد ولانقصیر تلف اولدیغی ادعا ایلسه فقره آتیهدده ذکر
اولندیغی اوزره بلا بنیه تصدیق اولنماز . یعنی مستودعک بلا
تعد ولانقصیر تلف اولدی یا رد ایتدم دیمسی قبول اولندیغی
حالده مجهلا فوتندنصکره ورته سندن بوا دعا قبول اولنماز تکمله
رد مختار . لکن قال فی منیة المفتی مانصه وارث المودع بعد
موته اذا قال ضاعت فی ید مورثی فان کان هذا فی عیاله حین
کان مودعا یصدق وان لم یکن فی عیاله لاتکمله رد مختار .

۲ کبی ، کبی لفظی ذکر ایلدی . زیرا ضماندن براتی
ایجاب ایدر صورتده ودیعه نك حالی بیان وتقریر مجلهده محرر
ایکی صورتده منحصر اولمیوب مثلاً مستودعک ورته سی ، «مودع

وديعه نك آخره بيعنى مستودعه امر ايتش اولغيله شو امره
بناء مستودع وديعه يي ثمن مثيله فلان شخصه صاتوب ثمنى اول
شخص ذمتنده بولنديغنى « مستودع بيان واقرار ايتشيدى ديو
ادعا وامر ايله مذکور اقرارى اثبات ايتدکلرنده يينه برى
اولورلر. » ۷۵ « ماده يه باق على افندى .

۳ اثبات ايدر ايسه ، اثبات ايدر ايسه دنيلدى . زيرا
بلا اثبات وارثك مع اليمين اولان سوزى قبول اولنسه ماز
اشباه .

۴ رد ايتدم الخ يعنى مجله ده رد ايتدم الخ ديو مسئله
ضماندن برائى ايجاب ايدر صورتده تصوير اولندى . زيرا
مستودع بر حيات ايكن وديعه يي امينه بولنان زوجه سنه ويرديكنى
ادعا ايتدكدنصكره وفات ايتمكله زوجه سندن طلب اولندقدده
زوجنك كندوسنه وديعه يي ويرديكنى انكار ايتسه سوز مع
اليمين زوجه نك اولوب زوجه مزبوره يه ۷۸ ماده يه مبنى برشى
لازم كليوب ضمان تجهيل سبيله متوفانك تركه سندن لازم كلور .

متوفى مستودعك رد ايتدم الخ سوزينى

وارثى اثبات ايتدكده يمين

لازم كلورمى

مستودع بر حيات ايكن وديعه نك صاحبه ردى ويا بلاتعد

ولا تقصیر تافی ادعاسی مسموع اولوب ۱۸۷۴ ماده حکمنجه سوز یمینله کندوسنک یعنی مستودعك بولنش ایسه ده مستودع وفات ایتدکه مذکور ادعانک کندوسندن صدوری ممکن اولدیغی جهته آنک بوسوزینه بروجه بالا شاهد استماعی لازم کلوب آنجق شهادت مذکوره ایله متوفی مستودعك شو سوزی اثبات اولندقدن صکره مورث مستودع بر حیيات ایکن آکا لازم کلان و ۱۷۷۴ ماده ده ذکر اولنان یمین کی بر یمین لازم کلور می ؟

عمادیهنک ضمانات بخشنده نوادر دن نقلنه کوره ورثه اوزرینه « مورثلری متوفانک اوزینه ودیعهنک رد یا ضمانی لازم کلدیکنی بیلمدکلرینه » یمین لازم کلور . حالبوکه انقرویده مذکور اولدیغنه کوره یمین لازم کلز که عباره سی شودر « ادعی المودع رد الودیعه او هلاکها ومات قبل ان یحلف لایحلف وارثه نص علیه فی الجامع الکبیر » انتهى ..

وجه ثانی ، « كذلك » مستودع ودیعهنک حالتی وارثنک بیلدیکنه مطلع اولدیغی جهته حال حیاتنده ودیعهنک حالتی بر وجه بالا بیان ایتیموب بناء علیه « وارث » ی « بز ودیعه ی بیلورز شویله ایدی بویله ایدی دیو » ودیعهنک نفس الامرده کی اوصافنه موافق صورتده « توصیف وتفسیر ایدرك مستودعك وفاتندن صکره بلا تعد و لا تقصیر ضایع اولدیغی » یا خود کندوسی یعنی وارث صاحبنه رد وتسليم ایتدیکنی « بیان ایتسه »

مجاهده بیان ایدیلان صورتده «۱۷۷۴» ماده موجبجه (یمینیه
تصدیق اولنه رق ضمان لازم کلز) زیرا وارث مستودع کی
اوله رق بو وجهله تفسیر ایتدیکی صورتده و دیعه مذکوره
وارث مرقوم یدنده دخی امانت وهلاک و ضیاعنده دخی قوی
مقبول اولورده وجه اولده اولدینی کی شو وجه ثانیده دخی
تجهیل یوقدر . اما مستودع فقره آتیه وجهله مجهلا وفات
ایتدکدنصکره وارثی مستودعک حیاتنده و دیعه ضایع اولدینی
ادعا ایتسه سوزی قبول اولنه ماز . زیرا امینک سوزی قبول
اولنور ایتسه ده ضمینک سوزی قبول اولنمیوب ضمین اولان
کیمسه اقامه بیهیه محتاجدر .

بوفقره دن مستفاد اولورکه وارث، و دیعه نک حالی بیلوبده
مورث یعنی مستودع دخی وارثنک بومعلوماثنه واقف اولنجه
فقره ثانیه وجهله و دیعه نک حالی بیان و تقریر ایلمک مستودعه
لازم کلزیز ازیه . یعنی بوتقدیرده بیان و تقریردن سکوت ایدلمکله
تجهیل حاصل اولماز تکمله رد مختار .

بوفقره ده توصیف و تفسیر ایدرک دنیلدی . زیرا توصیف
و تفسیر ایتسه سوزی قبول اولنه میه جنی فقره اخیرده مذکوردر .
ایمدی فقره اخیره شو فقره نک متممی اولمغله بوراده « اما
وارثک و دیعه بی الخ » دیهرک بیان ایدلسه ایدی اولی اولوردی .

فائده

مستودع بالا جر اولمدينى صورتده بو مسائله تصديق اولانه جنى دركار ايسه ده مستودع بالا جر اولوبده ممكن التحرر اولان برسيله تلف ياضايع اولدينى حالده ده «۷۷۷» ماده نك فقره اخيره سنك حكى جارى اولمى لازم كلور .

وجه ثالث ، «واكر» اول وديعه عينا تركه سنده موجود اولمدينى كې «مستودع» حال حياننده اول ديعه نك حالى وارث يلدېكنى و بيلمديكى حالده اول «وديعه نك حالى بيان ايتماش ايسه مجهلا» ميمك ضمى و جيمك كسرى وهانك تشديدى ايله تجهيلدن مأخوذ اسم فاعلدر «فوت اولمش ديمك اولمسيلاه» متوفانك حال صحتنده ذمتنه ترتيب ايدن «ديون سائره» سى يعنى ديون صحتى «كې تركه سندن استيفا» يعنى وديعه قيمياتدن ايسه قيمتى و مثلياتدن ايسه مثلى اخذ «اولنور» يوخسه شو دين دين مرض قېيلندن دكلدر . ولو كه وديعه تازه اوزوم و قارپوز كې طول مدت طور ميوب چورى ييجى شى اوله . زيرا وقتا كه حالى معلوم دكلدر مستودع آنى اتلاف ايلمشدر دينلور انقروى و تكمله رد عتار .

ديون سائره كې دنيلمسيلاه اشارت اولنور كه تركه غريم اولدينى صورتده مودع دخى غريميه داخل اولوب يوخسه

مودعك سائر غرمادن برکونا امتیازی یوقدر تکمله رد مختار.
لان الید المجهولة عند الموت تنقلب یدملك ولانه لمسات ولم
یین صار بالتجهیل مستهلکالها تکمله رد مختار .

نته کیم مستودع و دیعه یی استهلاک ایتدکن صکره فوت اولدقده
مودع غرمایه داخل اوله جنی کی . شبهه یوقکه قیمت و دیعه نک
اثباتی مودع اوزرینه لازم اولوب مودع اثبات ابدیه مزایسه مقدار
قیمتده سوزمع الیین ورثه نکدر تکمله رد مختار . «۷۶» ماده یه باق .
مستودع ، دکامده شویله برکیسه دروننده قاج عدد
اولدیغنی بیلمم براز مجیدیه اولدیغنی حالده فلان کیمسه نک بنده
ودیعه سیدر دیو بیان ایلمش ایکن بعدالوفات دکانده او یله برشی
ظهور ایتسه بوده تجهیل اولغله ضمان لازم کلور .

سالف الذکر فقره ثالثه ایله فقره رابعه اوزرینه آتی الذکر
مسئله تفرع ایدر .

شویله که : ایکی کیمسه برشخصه بیک غروش ایداع
ایدوبده شخص مرقوم بر اوغلانی ترک ایدرک وفات ایتدکن
صکره اول ایکی کیمسه دن بریسی ابن مرقوم و دیعه یی استهلاک
ایتدیکنی ادعا و دیکری و دیعه نه اولدیغنی بیلمدیکنی ادعا
ایتدکده ابنک استهلاک کنی ادعا ایدن او شخصک حین وفاتنده
ودیعه نک عینا موجود بولندیغنی اقرار ایتدیکی جهته او چنجی
فقره وجهله ترکه دن برشی آله میوب ابن مرقومه تضمین ایتدیرر .
دیکری ایسه شوفقره وجهله حصه سنی ترکه دن آلور .

تجهیلده ایکی شی آرانور

ایضاحات مذکورده دن آکلاشدیکه تجهیل الودیعه ده ایکی شی آرانوب برنجیسی مستودع ودیعه نك حالنی بیان ایلمامسیدر. بناء علیه مستودع ودیعه نك حالنی حال حیاتنده بیان ایتسه ودیعه موجود اولنجه ضمان لازم کلیه جکی کبی بونده دخی ضمان لازم کلز. بالاده ایکنجی فقره ده بیان اولنان ایشته بودر.

ایکنجیسی، مستودعك وارثی ودیعه نك حالنی بیلمامسیدر. یعنی مستودع حیاتنده ودیعه نك حالنی بیان و تقریر ایتیوب فقط ودیعه وارثك معلومی اولوب مستودع دخی ودیعه وارثك معلومی اولدینی بیلنجه حال ودیعه بی بیان ایلمامسندن طولایی ینه ضمان لازم کلز. فقره ثالته ده بیان اولنان ایشته بودر. بوجهله وارث بن ودیعه بی بیلورم دیوبده مودع دخی بونی یعنی وارثك معلوماتی تصدیق ایتسه ودیعه عینا موجود اولسه بیله ترکه دن ضمان لازم کلز.

قسما تجهیل ودیعه

تجهیل ودیعه قسما دخی اولور. شویله که ودیعه نك بر قسمی عینا موجود اولدینی حالده دیگر قسمنده تجهیل بولندقدن یالکز تجهیل بولنان قسمك ضمانی وترکه غریم اولدینی صورتده

مودعك غرامة حصه سنه دوشنى اخذ ايلمسى لازم كلوب
ديكرى عينا رد اولنور.

مثلا وديعه يكرى آلتون اولوب اون بشى عينا موجود
اولدينى حالده بشى موجود بولمسه يالكلز بش آلتونك ضمانى لازم
كلوب متباقى بش آلتون عينا رد اولنور.

سائر اماناتده تجهيل

تجهيل وديعه بروجيه بالا موجب ضمان اولدينى كى مال
مضاربه ، مال شركت ، مال بضاعه ، مال مأجور ، مال مستعار ،
وكيل بالقبض ينده كى مال مثلو سائر اماناتك تجهيلي دخى
مستلزم ضماندر. وبونده قاعده شودر « هرامينكه امانتك حالى
مجهلا وفات ايده ضمان لازم كلور » تكملة رد مختار .

ووديعهده اولدينى كى بوجهله مجهلا وفاتندن صكره
ورثهسى بلا تعد ولا تقصير تلفى ياخود مال صاحبنه رد واطاده
اولنديغنى ادعا ايتسه بلا بينه تصديق اولنه ماز. مثلا احد شريكين
ينده مال شركت بولنوبده مذكور مالك حالى بيان ايتدين
مجهلا فوت اولسه صاحبنك نصيبى ضامن اولور. شركت كرك
مفاوضه اولسون وكرك عنان اولسون تكملة رد مختار.

نته كيم رهنك ديندن زيادهسى امانت اولدينى ۷۴۱ ماده
شرحنده ذكر وايضاح اولمش اولوب مرتهن بوزيادهنى مجهلا

وفات ایتدکده ضمان لازم کله جکنی حموی اشباه شرحنده بیان
وبعض ارباب فتوانک بروجه مذکور افتا ایلدکلرینی اتیان
ایلمشدر .

استثنا

بالاده تجهیل امانت حقنده ذکر اولسان قاعده دن بعض
مسائل مستثنا بولنمشدرکه بونلرک تفصیلاتی درمختار ایله
حواشیسینده مذکوردر . آنجق مقامه مناسب اولان بعضیلر
بروجه آتی بیان اولنور .

۱ ناظر وقفک غلاتی قبض ایتدکن صکره مجهلا وفات
ایتدکده بوغلات ایچون مستحق بولنیوبده مسجده مشروط
اولور ایسه ضمان لازم کلز . اما غلات مذکوره نک مستحققلری
بولنوبده مستحققلر آتی طلب ایلمشدر ایکن ویرمسهده بعده
مجهلا فوت اولسه ضمان لازم کلور .

فقط ناظر، عین وقفی یعنی مثلاً دراهم ودنانیر موقوفه یی
یاخود بر وقف عقار دراهم ودنانیر ایله استبدال اولندقدده
دراهم ودنانیر مذکوره یی مجهلا فوت اولسه ضمان لازم کلور .

۲ حاکم اموال ایتامی بریسنه ایداع ایدوبده کیمه ایداع
ایتدیکنی بیان ایتدین مجهلا فوت اولسه حاکمه ضمان لازم
کلز . اما حاکم اموال ایتامی کندی خانه سنه وضع ایتمشیکن
آتی مجهلا وفات ایتسه ضمان لازم کلور .

۳ امیرالجیش بعض غنایمی قبل القسمه بر غازی به ایداع
ایدوبده کیمه ایداع ایتدیکنی بیان ایتدین فوت اولسه ضمان
لازم کلز .

۴ روزکار برکیمسه نك خانه سنه بر مالی القا ایدوبده اول
کیمسه بونی مجهلا فوت اولسه ضمان لازم کلز .

۵ برکیمسه مالی صاحب خانه نك معلوماتی اولقسزین
اول خانه یه وضع ایتسه ده صاحب خانه بونی مجهلا فوت اولسه
ضمان لازم کلز .

۶ برکیمسه صبی محجوره بر مال ایداع ایدوبده صبی مرقوم
آنی مجهلا فوت اولسه حفظی التزامه اهل اولمدیغی جهته
ضمان لازم کلز . نته کیم صبی مرقوم بوندن صکره بالغ اولوبده
بعده فوت اولسه ینه ضمان لازم کلز . مکرکه بالغ اولدقدن
صکره ودیعه نك یدنده بولندیغی اثبات اولنه . اول حالده ضمان
لازم کلور .

خلاصه ، صبی بعد البلوغ فوت اولوبده ودیعه نه وقت
هلاک اولدیغی وحالی نه ایدوکی معلوم اوله مسه ترکه سندن ضمان
لازم کلز ایسه ده مدعی ، مذکور ودیعه نك بعد بلوغ الصبی
یدنده بولندیغی اثبات ایتسه بوصورتده ضمان لازم کلور .

جنون و دین وسفه و عته وغفلت یعنی ۹۴۶ ماده وجهله
ابله اولمق سببیه اولان محجورینك احکامی دخی صبی محجور
کیدر .

اما صبی یاخود معتوه تجارتہ یاخود قبول ودیعه یه مأذون اولوبده اولوجهله قبول ودیعه ایتدکن صکره قبل البلوغ والافاقه مجهلا فوت اولسه ضمان لازم کلور. « ۷۷۶ » ماده یه وشرحه باق.

۷ اب یا جد ابنک یا حفیدینک مالنی مجهلا فوت اولسه ضمان لازم کلیه جکی کبی وصی الاب ووصی الجد ووصی القاضی دخی مال صغیری مجهلا فوت اولسه ضمان لازم کلز. بومسائل حقنده ابیات آتیہ ذکر اولمشدر.

وکل امین مات والعین یحصر وما وجدت عینا فدینا تصیر سوی متول الوقف ثم مفاوض ومودع مال الغنم وهو المؤمر وصاحب دار القت الریح مثل ما لو القاه ملاک بها لیس یشعر وکذا والد جد وقاض وصیهم جمیعا ومحجور فوارث یسطر درمختار.

﴿ وکذلک وارثک وودیعه یی ﴾ وجه ثانی وجهله ﴿ توصیف و تفسیر ایتیه رک مجرد بز وودیعه یی بیلورز ﴾ مستودعک حیاتنده یا وفاتندن صکره بلا تعد ولا تقصیر تلف یا ﴿ ضایع اولدی ﴾ یاخود مستودع حیاتنده رد ایتدی بناءً علیه تجهیل یوقدر ﴿ دیمسی ﴾ مودعک انکارینه قارشو ﴿ معتبر اولیوب ﴾ سوز مودعک اولمغله ﴿ اولوجهله ضایع اولدیغنی اثبات ایده مدیکی صورتده ترکه دن ضمان لازم کلور. ﴾ بوصولته مودع تجهیلی دعوی ایتدیکی حالده وارث مستودعک وفاتنده ودیعه معروف

و موجود ایکن مؤخرًا تلف اولدیغنی ادعا ایتسه سوز طالبکدر .
 اما وارث بونلری یعنی مثلاً مورثنک حیاتنده ودیعه‌یی رد
 ایتدیکنی ویا ودیعه تلف اولدیغنی اثبات ایدرسه ضماندن بری
 اولور .

بوفقره یوقاروده وجه ثانی عنوانی تحتنده بیان اولنان
 فقره‌ده کی توصیف و تفسیر ایدرک عباره‌سنک مخترز غنهی بیان
 اولدیغنی جهته انسجام عباره‌نک حصولی ایچون آنک عقیبنده
 اتیان ایدلمک مناسب ایدی .

صورت اثبات

ورثه‌نک « مورثلرینک وفاقی زماننده ودیعه عینا موجود
 اولوب مورثلری بومال فلانکدر بنده ودیعه‌در یا خود بومالی
 فلان طرفندن بطریق الوکاله یا بطریق الرساله و آکا دفع و تسلیم
 ایتمک اوزره آلمشیدم آکا دفع ایدیکز دیدی لکن صکره بزم
 یانمزد ضایع اولدی » دیوواقع اولان دفعلری شهودک شهادت‌لریله
 ثابت اولدقده متوفانک ترکه‌سنندن ضمان لازم گمیه‌جکی کبی
 ورثه‌یه دخی ضمان لازم کلز تکمله ردر مختار .

مجله‌نک اوچنچی فقره‌سنده وارثک سوزی قبول اولندیغنی
 حالد شوفقره اخیرده قبول ایدلما‌مسنک سببی شودرکه فقره
 مذکورده یعنی فقره ثالثه‌ده مستودعک وفاتنده ودیعه معروف

اولمغله برابر وارث آنی تفسیر ایدوبده شو تفسیر نفس الامر ده کی معروفه مطابق اولنجه وارث تصدیق اولنوب اما بومسئله ده ودیعه معروف اولم دینی جهته وارثك معروف اولدینی و کندوسی بیلدیکنی ادعا ایلمسی مسموع اولم دی .

بیان ودیعه وقت موته مخصوص دکلدر

معلوم اولمیدر که ودیعه نك بیانی وقت موته مخصوص اولمیوب مستودع ودیعه نك حالی صحت و افاقته بیان ایتدکه تجھیلدن قورتلمش اولور .

بناءً علیه مودع « مستودع وقت وفاتنده ودیعه نك حالی بیان ایتمه رك فوت اولدی » دیو تجھیلی دعوی ایتسه وقت موتده عدم بیان آندن اول دخی نفی بیانی مستلزم اولمیه جغندن دعوی مذکوره صحیح اولماز . بلکه مجهلا و بلا بیان وفات ایتدی دیو دعوی ایتلیدر .

مقدار مجهولك ردینی بیان صورتیه

ودیعه نك حالی بیان و تقریر

مستودع، مودعه ودیعه نك بعضیسنی قبض ایتشیدك دیدکن صکره وفات ایدوب ودیعه دن تقدیر قالدینی بیلنه میوب مودع هیچ برشی آلمدم و مستودعك ورثه سی ودیعه اولان مثلاً بیک

غروشدن یوز غروش دها قالدی دیدکلرنده مودع ودیعه نك بعضیسنی قبض ایتمش اولمغله ندر قبض ایتدیکنی تعیینه مجبور اولوب ندر اقرار ایدر ایسه اوقدرک قبضی ثابت اولور . آنجق ورثه دهازیاده قبضی ادعا ایتدکلرنده آنی قبض ایتدیکنه مودعه یمین ویریلور . بو تقدیرده مودع یوز غروش آلام دیدیکی حالده مستودعک ورثه سی طقوز یوز غروش آلام دیدکلرنده سوز مع الیمین مودعکدر .

هندیه ده ذکر اولمشدرکه مودع بعض ودیعه یی قبض ایتدم دیو اقرار ایتدکده مقدارینک تعییننده سوز مع الیمین کندوسنکدر . مستودع کرک برحیات اولسون وکرک اولسون . هندیه نك شو مسئله سیله مجله نك ۱۷۷۴ ماده سی آره سننده فرق بولمق یا توفیق ایتک ایجاب ایدر .

خلاصه مسائل تجهیل الودیعه

تجهیل الودیعه مسائلنک خلاصه سی شودرکه :

۱ مستودع حیاتنده ودیعه نك حالی بیان ایدوب وفات ایتدکدنصکره ودیعه ترکه سننده بولمسه ضمان لازم کلز . ایکنجی فقره ده بیان اولنان بودر .

۲ بیان ایتینجه وارثی ودیعه یی بیلوب بیلدیکنی دخی

مودع تصدیق ایتدیکی حالدده ترکده بولنسه بيله ضمان لازم کلز .
اوچنجی فقرده بیان اولنان بودر .

۳ وارثی و دیعه یی بيلمديکی حالدده مستودع دخی بیان
ایتمسه ده فوت اولسه و دیعه اکر ترکده عینا موجود و موجود
اولان و دیعه اولدینی بینه یا خود مستودعک وارثنک اقراری ایله
ثابت اولور ایسه صاحبی آنی اخذ ایدر . برنجی فقرده بیان
اولنان بودر .

۴ وارثی و دیعه یی بيلمديکی حالدده مستودع دخی بیان
ایتمسه ده فوت اولسه و و دیعه ترکده عینا موجود اولسه مجهلا
فوت اولمش اولغله و دیعه ترکدنک دینی اولور . دردنچی فقرده
بیان اولنان بودر تکمله رد مختار .

۸۰۲ ماده

﴿ مودع ، فوت اولدقده و دیعه وارثنه ﴾ یا و صیسنه
﴿ ویریلور ﴾ و وارث و دیعه یی مستودعدن طلب و ادعا ایدیه ییلور .
زیرا وارث مورث مقامنه قائمدر .

بو حالدده مستودع و دیعه یی حال حیاتنده مودعه یا بعد وفاته
وصیه ویردیکنی ادعا ایتدکده « ۱۷۷۴ » ماده حکمنجه سوز
مع الیمین کندوسنکدر .

بو ماده ده وارثنه دینلمسیله اوچ مسئلهیه اشارت اولنیور .

مسئله اولی، وارث اولیان شخصه ویریه من . ولو که متوفی مورثک امری بولنه.

بناء علیه مودع ودیعه بی وارث اولیان بر شخصه ویریه من مسموده امر ایدوبده بعد وفاته مستودع، امر مذکورده بناء اول شخصه ویریه ضامن اولور . چونکه مودعک وفاتیه اول شخصک قبض و دیعه یه اولان وکالتی باطل و مودعک امری کان لم یکن اولور. «۱۵۲۷» ماده یه باقی.

وارثه تعبیری مودع متوفانک وصیسندن یا خود داینندن احتراز ایچون دکلدر. «۷۹۳» ماده شرحنه باقی تکمله رد مختار. مسئله ثانیه، وارث واحد اولدیغنه اشارت اولنیور اما وارث متعدد اولنجه و دیعه یالکیز بریسنه یعنی بعضیسنه تسلیم ایدیه میوب شاید تسلیم اولنوبده تلف اولسه دیگر ورثه تسلیم مذکوری مجیز اولیوب مستودعه تضمین ایتدیره بیلورلر.

بناء علیه و دیعه قابل قسمت اولوبده وارث مثلاً ایکی اوغلندن عبارت اولنجه نصفی بر اوغلنه و نصف دیگر بر اوغلنه ویرمک لازم کلور. و اگر قابل قسمت دکل ایسه ایکسنه معا تسلیم اولنقی ایجاب ایدر. «۷۹۶» ماده یه باقی .

حتی بر کیمسه دیگر کمنه یه بر مالی ایداع ایدوبده بن فوت اولور ایسم فلان اوغلنه ویر دیوب اول کیمسه وفات ایتمکه او کمنه و دیعه بی اول اوغلنه ویریه دیگر وارثی اولدینی صورتده او کمنه آنک حصه منی ضامن اولور. زیرا آنفا ذکر

اولدیغی اوزره مودعك فوتندنصكره وديعه جمله ورثه يه موروث اولوب بناءعليه بمض ورثه يه ويريله مز . ولو كه مورثك امری بولنه علی افندی .

مسئله نالته ، وديعه امين بيت المال و يريله مز . بناءعليه مودع فوت اولدقده ورثه سی آخردیاردده اولغله تركه سنی امين بيت المال قبض ايتدیكى جهته مستودع وديعه یی امين مرقومه ویرسه ورثه کلدکارنده مجیز اولمیوب مستودعه تضمین ایتدیره . بیلورلر .

مستثنا

وديعه نك وارثه ويرلسی لازم كله چكى مسئله سندن آتی الذکر بر مسئله سی مستثنا بولمشدر . شویله كه بر کیمسه دیگر کمنسه ذمتنده شوقدر غروش آله جنی اولدیغنه دائر اولان بر صکنی بر شخصه ایداع ایتدکدنصكره مودع فوت اولدقده مستودع مبلغ مذکورك بر مقدارینك اودنمش اولدیغنی بیلنجه مودعك وارثی مورثك قبض مذکورینی اقرار ایتدکجه مذکور صکی ایدا حبس ایده بیلور . زیرا مذکور صکی وارث مرقومه ویرسه مدیونی اضرار اتمش اولور . ضرر ایسه ۱۹ ماده حکمنجه ممنوعدر درمختار وتکمله رد مختار .

﴿فقط تركه مستغرق بالدين ایسه حاکمه مراجعت ایدیلور﴾ ده آنك امریله شرعا اعطاسی اقتضا ایدن طرفه اعطا اولنور .

(واکر حاکمه مراجعت ایتمکسزین مستودع آنی وارثه ویروب
اودخی استهلاک ایتسه مستودع) غرما ایچون (ضامن اولور.)
زیرا دین ارثدن مقدم اولدینی جهته و دیعه یه حق غرما تعلق
ایلمشدر هندیه .

مستثنا

شوقدر که وارث مرقوم امین اولدینی صورتده و دیعه یی
مستودعدن اخذیله ادای دین ایده بیلور .

استهلاک ایتسه دینلدی . زیرا مذکور و دیعه ید وارثده
عینا موجود اولسه غرما آنی عینا استرداد ایدرلر .

نته کیم داین متوفانک ترکه سی مستغرق بالدین اولنجه
مدیون دینی وارثه ویرسه بری اولماز تکمله رد مختار .

وارثه قیدی بعض داینلردن احتراز ایچون دکلدر . زیرا
ترکه مستغرق بالدین اولنجه مستودع و دیعه یی بعض داینلره
دخی ویره مز . ویرر ایسه دیکرلرک حصه سنی ضامن اولور .
چونکه غریم اولان ترکه ده بعض داینلرک بعض آخر اوزرینه
رجحانلری اولمیوب هر داینک الاجبی نسبتنده ترکه مدیوندن
حصه دار اولسی لازم کلور .

فقط وارثه قیدی وصیدن احتراز ایچوندر . شویله که
ترکه ده دین بولندینی تقدیرده مستودع و دیعه یی وصیه ویره .

بیلوب بناء علیه وصی به ویردیکنی ادعا ایتدکده « ۱۷۷۴ » ماده حکمنجه مع الیمین سوزی قبول اولنور.

نته کیم مودعک ظاهرده وارث معروفی اولماغله ترکه سنی امین بیت المال قبض ایتدیکی جهتهله مستودع حاکمک امریله ودیعه یی امین مرقومه ویرسه جائز اولور. بوندنصکره مودعک وارثی ظاهر اولسه وارث مرقوم و دیعه یی مستودعدن طلب ایده میوب امین بیت المالدن اخذ ایدر.

مجله ده بیان اولندیغی اوزره و دیعه نك اعاده سننده حاکمه لزوم مراجعت ترکه مستغرق بالدين اولدیغی صورته در. اما ترکه مستغرق بالدين دکل ایسه یعنی و دیعه داخل اولیه رق ترکه نك بشقه مالی بورجه کافی بولنور ایسه ضمان لازم کلز.

مستودع الغاصب حکمی

معلوم اولمیدرکه مستودع الغاصب و دیعه یی عینا غاصبه اعاده ایتدکده بری اولوب آرتق مال صاحبنه یا صاحبی فوت اولمش ایسه وارثنه قارشو مسؤل اولماز. یعنی ضمان لازم کلز درمختار و تکمله رد مختار.

۸۰۳ ماده

﴿ و دیعه نك تضمینی لازم کلدکده مثلیاتدن ایسه مثلی

و قيمياتدن ايسه ضمانى موجب اولان شيئك يوم وقوعنده كي
قيمتى ويرمك لازم كلور.)

بو ماده ايكي حكى مشتملدر .

حكم اول، وديعه مثلياتدن ايسه مثلى لازم كلور. شويلاه
مستودع، نزدنده وديعه اولان خطه يي زمن غملاده استهلاك
ايتمكه وقت رخاده مثلى ويره جك اولدقده مودع يوم استهلاكده كي
قيمتى طاب ايتسه حاكم مثيله حكم ايدر . يوخسه وقت
استهلاكده كي قيمته دكل.

مثلياتدن اولان وديعه نك مثلى لازم كلنسك سببي ۸۹۱
ماده شرحنده ايضاح اولنور .

حكم ثانى، وديعه قيمياتدن ايسه قيمتى لازم كلور . زيرا
ضمانى موجب اولان شيئك يوم وقوعى زمان غضب اولوب
۸۹۱ ماده نك فقره اخيره سنده بيان اولنديغى اوزره وقت
مذكورده كي قيمت لازم كلوركه بو ماده نك مسئله عموميه سي
مارالذكر ۸۹۱ ماده در .

نته كيم وديعه نك نقصان قيمت نك تضمينى لازم كلدكده ضمانى
موجب اولان شيئك يوم وقوعنده كي نقصان قيمت لازم كلور.
قيمياتدن اولان وديعه نك ضمانى موجب اولان شيئك يوم
وقوعنده كي قيمتى لازم كله جكي بوجه آتى مثالر ايله ايضاح
اولنور. شويلاه كه مستودع وديعه يي مجهلا وفات اتمسندن طولاي
ضمان لازم كلدكده يوم وفاتنده كي قيمتى ويرمك لازم كلور.

نته یم مستودع ودیعه یی بالا اذن بر آی استعمال ایدوبده
تلف اولسه ابتدای استعمالند کی قیمتی لازم کلور. استعمالنک
ایکنجی یا اونجی کونی قیمتی تناقص ایتدکنه ینه ابتدای
استعمالنده کی قیمتک تضمینی اقتضا ایدر .

کذا مستودع ودیعه یی انکار ایتدیکی حالده مودع ایداعی
و وقت انکارده کی قیمتی اثبات ایتدکنه مستودع مذکور
قیمت ایله محکوم ایدیلور . اما شاهدلر ودیعه نك قیمتی اصلا
بیلمدکلری حالده مستودع یوم انکارده ودیعه نك قیمتی نه قدر
ایدوکنی اقرار ایدر سه اولقدر ایله محکوم ایدیلر تعلیقات ابن
عابدین علی البحر .

اله حق سندینک وحساب

دفترینک قیمتلی

حساب دفتریله الاجق سندینک قیمتی اول کاغذ یازیلی
اولدینی حالده کی قیمت اولوب یوخسه دفتر یا سندک حاوی
اولدینی مبلغ بونلرک قیمتلی اولماز .

مثلا بر کیسه دیکر کمنه ذمتده اولان آلاجهنی شعر
معنون و مرسوم بر سندی دیکر شخصه ایداع ایدوبده اوشخص
دخی آنی استهلاک ایتسه اول سندک مکتوبا قیمتی هر نه ایسه
آنک ضمانی لازم کلوب یوخسه اول سندک حاوی اولدینی

مبالغه ضمانی لازم کلمه فیضیه. زیرا اتلاف و استهلاك کاغده
مصادف اولوب یوخسه حاوی اولدینی مبلغه مصادف اولماز.
ودین سندی ضایع اولسیله دینک سقوطی لازم کلمه. اما بو
صورته داین اثبات دین ایده مامکه مدیون دخی یمین ایدرک داینک
آلاجنی تلف اولسه بوتلف مدیونک انکار و یمین ایتسه
مضاف اولور.

خاتمه

ایکی مبحثی حاویدر

مبحث اول

ایکی کیمسه نك بر ودیعه ده نزاعلرینه

داثردر

۱ بر کمنه یدنده بولنان یوز آلتون ایچون ایکی کیمسه دن
هربری مستقلا کندوسنك اولوب کندوسی ایداع ایتدیکنی
ادعا ایتدکلری حالد او کمنه بولردن هربرسی ایچون انکار
ایتدیکی تقدیرده او کمنه ایکیسی ایچون دخی تحلیف اولنور.
بدأ یمینه حاکم مختار اولوب قنغیسندن استر ایه آنک یمینه
بدأ ایده بیلور. شوقدرکه اول کیمسه لر بوباده یعنی بدأ یمینه نزاع
ایتدکلری تقدیرده ابتداء کیمه یمین ویره جکنی قرعه ایله تعیین ایدر.

ایمدی او کمسنه ایکسک یمیندن دخی نکول ایدرسه مدعا به یوز آلتون ایکی مدعی بینده مشترک اولوب او کمسنه دیگر بر یوز آلتونی دخی بونلره ویرمسی واولوجهله هر برینه یوزر آلتون اعطا ایلمسی لازم کلور. زیرا یالکزر بریسی ایچون حکم ایتمکده الویت یوقدر. او کمسنه ایکسی ایچون دخی یمین ایدر ایسه اول کیمسه لر او کمسنه دن نسنه آله مازلر. زیرا حجت یوقدر. و او کمسنه بریسی ایچون یمین ایدوب دیگر ی ایچون نکول ایدر ایسه نکول ایتدیکی ایچون حکم اولوب دیگر ی ایچون برشی حکم اولنه ماز. زیرا حجت بریسی ایچون بولوب دیگر ی ایچون بولندی.

۲ مسئله آنفه وجهله ایکسی ایچون دخی یمین تکلیف اولنه جق اولدقده اولا بریسی ایچون یمین تکلیف اولنغله نکول ایتسه حکمده تعجیل اولنمیوب دیگر ی ایچون دخی تحلیفی لازم کلور. حتی اولا بریسی ایچون تکلیف اولنان یمیندن نکول ایتسه دیگر ی ایچون یمین تکلیف ایتمدن حکم ایتسه حکمی نافذ اولماز.

۳ مدعی علیه مبلغ مذکوری ایککز دن بری ایداع ایتدی اما هانکیکز اولدیغی بیلمیورم دیدکده مدعی لر مبلغ مذکوری آلمقده اتفاق ایدوب آله بیلور لر. و آرتق مدعی علیه اوزرینه مسئله اولی وجهله ضمان یوقدر. و مدعی لر بو وجهله اتفاق ایدوب آله جق اولدق لر ند، مدعی علیه آنلره تسلیمدن امتناع

ایده مزه. ومدعیار اتفاق ایده مدکاری تقدیرده هر بری مدعایه
کندوسنک بولمدیغنه دائر مدعی علیه یمین تکلیف ایده بیلورلر.
یمین ایدر ایسه مدعی علیه ایکسنک دعواسندن دخی بری
اولور. ونکول ایدر ایسه مسئله اولی وثانیه وجهله معامله
اولنور بخر.

مبحث ثانی

مودع ایله مستودع آره سنده کی بعض
اخلافاته دائردر

۵ مودع مستودعه بنم سنده شویله برمال ودیعه م واردر
دیدیکی حالده مستودع مذکور مال بنم ملکدر دیسه سوز
مستودعدر. «۷۶» ماده یه باق.

نته کیم بر کیسه دیگر کسنه یه بنم سنده بیک غروش
ودیعه م وار ایدی بکا ویردک دیدیکنده مقرله یعنی او کسنه
سنک بنده ودیعه ک یوق ایدی ویردیکم پاره بنمدر کیرو ویر
دیسه سوز مقر لهکدر.

کذا بر کیسه دیگر کسنه یه بنم سنده شویله بر عاریت
حیوانم وار ایدی بعدالاستعمال بکا اعاده ایتدک دیدیکی حالده
او کسنه مذکور حیوان بنم ملکدر دیسه امامینه کوره حکم

بویله در . یعنی بونده دخی سوز مقر لهک یعنی او کمسنه نک
اولور . اما امام اعظمه کوره بونده سوز مقر کدر .

۶ مستودع بکا ودیعه ویرمدک دیو انکاری اوزرینه
مودع ایداعی اثبات ایتدکدنصره مستودع ودیعه نک تلف
اولدیغنی اثبات ایده جک اولسه قبول ایدلیوب ضمان لازم کلور .
مستودعک شاهدلری ودیعه نک تلفی کرک بعدالجحود اولدیغنه
شهادت ایتسونلر وکرک قبلالجحود اولدیغنه شهادت ایتسونلر .
اما مستودع بنده سنک ودیعه ک یوقدر یا سنک ودیعه ک بنم
اوزریمه لازم دکلدر دیو انکار ایتدکدن صکره قبل الجحود
تلف اولدیغنه اقامه بینه ایتسه قبول اولنور ایتسه ده بعدالجحود
تلف اولدیغنه اقامه بینه ایتسه ینه ضمان لازم کلور . « ۷۹۴ »
ماده شرحنه باق تنویرالابصار والدر المختار وتکملته .

وقبل الجحود تلف اولدیغنه اقامه بینه ایده میوب مودعک
یمیننی طلب ایتدکده قبل الجحود تلف اولدیغنی بیلمدیکنه
تحلیف اولنور .

شوقدرکه مستودع بنده ودیعه ک یوقدر دیو انکارندنصره
تلف اولدیغنه اقامه ایتدیکی شاهدلر مطلقا تلفه شهادت
ایدوب قبلالجحود تلف اولدیغنه شهادت ایتسه لر ضمان لازم
کلور .

۷ مستودع ودیعه یی سکا ویردم دیدکدنصره ویرمدم
ضایع اولدی دیه جک اولسه ضمان لازکله جکی کبی ضایع اولدی

دیدکدنصکره رد ایتمشیدم لکن ضایع اولدی دیه سوبلیدیکم
سوزده خطا ایتدم دیسه ینه ضمان لازم کلور .

۸ مستودع سندن بیک غروش و دیعه آلمشیدم یدمده
بلا تعد ولا تقصیر تلف اولدی دیو ومودع و دیعه آلیوب
غصبا آلدک دیو اختلاف ایتدکلرنده مستودع ضامن اولور .

اما مستودع سن بکا بیک غروش و دیعه و یرمشیدک بروجه
مذکور ضایع اولدی دیو ومودع غصبا آلدک دیو اختلاف
ایتدکلرنده مستودعه ضمان لازم کلز . نته کیم مستودع و یردیکم
پاره و دیعه ایدی بلا تعد ولا تقصیر ضایع اولدی ضمان لازم
کلز دیو ومودع اودنج ایدی دیو اختلاف ایتدکلرنده ضمان
لازم کلز .

۹ بر کیسه دیگر کسنه یه بیک غروش اودنج و بشقه
بیک غروش و دیعه و یرمکه مستودع مودعه سکا و یردیکم بیک
غروش آلاجفکه مقابل ایدی و دیعه ضایع اولدی دیسه سوز
مع الیمین مستودعکدر .

والله سبحانه وتعالى اعلم

و استغفر الله العظيم

— ﴿﴾ باب ثالث ﴿﴾ —

یعنی کتاب سادسك مشتمل اولدیغی
اوج بابدن اوچنچی باب

﴿ عاریت حقنده اولوب ایکی فصلی شاملدر ﴾

عاریت ایله ودیعه برکتابده کتورلدی. زیرا ایکسینک امانت
اولمقده اشتراکلی وارددر.

وعاریت ودیعه دن تأخیر اولندی. زیرا عاریتده هم تملیک
یعنی تملیک نفع همده ایداع موجود ایکن ودیعه ده یالکزی ایداع بولنوب
تملیک بولنماغله ودیعه مفرد وعاریت مرکبدر. بو جهتله بو
معامله ده ادنادن اعلایه ترقی وارددر. یاغمورک اولی طامله ایکن
صکره بوشاتیر بحر وتکمله رد مختار.

عاریتک ادله مشروعیتی

عاریتک مشروعیتی کتاب وسنت واجماع امت ایله ثابت
اولمشدن طحطاوی.

کتاب ویمنعون الماعون آیت کریمه سی اولوب ویمنعون
مایه عارون دیو تفسیر اولنمشدر.

تعاور تناوب فی الانتفاع دیمک اولوب دیلدیکی وقت
بالاسترداد نوبت انتفاعی کندوسنه اعاده ایلمک اوزره ملکی
ایله انتفاعی غیری ایچون قلمق معناسنهدر .

ایمدی عاریت تناوب فی الانتفاع اولق جهتیه مکیلات
و موزونات مثللو استهلاك العین ایدلمکسزین انتفاع ممکن اولیان
شیلرده اعاره چاژ دکدر . واجب تعالی و تقدس منع ماعونی
یعنی عدم اعاره بی ذم بیورمسيله اعاره محموده اولدینی آکلاشلدی .
اعاره نك محاسنی ، اجابت مضطرده نیابت عن الله تعالیدر .
زیرا اعاره قرض کی آنجق محتاج ایچون اولور . بناء علیه
صدقه نك ثوابی بره اون ایکن « ای لقوله تعالی من جاء بالحسنة
فله عشر امثالها » قرضك ثوابی بره اون سکزددر . یعنی اعاره
مضطره اولوب معیر دوچار اضطرار اولان مستعیره اعانه
ایلدیکندن بو اعانهده کویا الله تبارک و تعالیدن نأبدر . اما
معيرك فعلى الله تعالیدن اولمغله حقیقته نیابت یوقدر بحر
و تکمله رد مختار .

سنت دخی فعل الرسولدن عبارتدرکه علیه الصلاة والسلام
حضر تلمی ابی طلحه رضی الله تعالی عنهدن بر فرسی استعاره
بیوروب آکا راکب اولمشلردر .

امت دخی اعاره نك جوازنده متفق اولوب فقط اکثر
علما مستحبه ایدوکنه قائل اولدقلری حالده دیکر بعض علما
ایسه واجبه بولندیغنه ذاهب اولمشلردر رد مختار .

عاریت مشددة الیاء اوله رق عاره یه منسوب دیمك اولوب
 عاره دخی اعاره دن اسمدر. یوخسه طلب عاریت عار اولمغله عاره
 نسبت ایدلمش دكلدر. زیراً بالاده بیان اولندیغی اوزره استعاره
 بنی عالمقام علیه الصلاة والسلامدن صادر اولوب حالبوکه
 موجب عار اولان فعلی ارتکاب بیورمازلر ایدی وعلوقدر
 ورفعت شانی باعث عار اولان افعالدن ابعدا ایدی .

عاریت ، لفظی مخفف اوله رق دخی قرائت اولنمی جائز
 ایدوکنی جوهری ذکر ایلمشدر درمختار و رد مختار .

— فصل اول —

(عقد و شرط اعاره یه متعلق مسائل)

(بیاننده در)

شروط اعاره نك انواع اربعه سی

شروط اعاره درت نوع اولوب برنجیسی مستعاره
 وایکنجیسی معیره و اوچنجیسی مستعیره و دردنجیسی قبضه
 عائد اولور. ایمدی برنجیسی ۸۰۸ و ۸۸۱ ماده لرده و اوچنجیسی
 ۸۰۹ ماده ده و دردنجیسی دخی ۸۱۰ ماده ده مذکوردر .
 ۸۰۶ و ۸۰۷ ماده لر شو عنوان تحتنده داخل مسائلدن

اولمديني جهته بونلر فصل ثانی عنوانی تحتندہ یازلق مناسب ایدی .

﴿ ۸۰۴ ماده ﴾

﴿ اعاره ، ایجاب و قبول ایله و تعاطی ایله منعقد اولور. ﴾
ایجاب و قبول لفظه مخصوص اولمديني ۱۰۱ و ۱۰۲ ماده لردن مستفاد بولمديني او ماده لر شرحنده ایضاح اولمشیدی .
بناءً علیه بو ماده ده ایجاب و قبول سوزیه و تعاطی تعبیری مستدرک اولماز. شو حالده رکن اعاره ایجاب و قبولدن و تعاطیدن عبارت اولمش اولور . « ۱۴۹ » ماده یه باق .

احکام مستفاده

بو ماده ده اعاره نك انعقادی ایجاب و قبول ایله اوله جنی ذکر اولنسیله اوچ حکم استفاد اولور .

حکم اول ، بلا ایجاب و لا قبول اعاره منعقد اولماز .

بو جهته بر کیمسه دیگر کمسنه دن بر مال استعاره ایتک ایچون بر شخصی رسولا کوندر و بده شخص مرقوم او کمسنه به وارد یغنده خانه سنده بوله مديني جهته او مالی خانه سندن آلوب اول کیمسه یه ویره رک بر شیده سویلمیوب مستعیر یدندن اومال تلف اولسه او کمسنه مخیردر . دیلر سه رسوله دیلر سه رسول

مرقومدن قبض ایدن اول کیمسه یه تضمین ایتدیررده قنغیسی
ضامن اولورسه دیکرینه رجوع ایده من . ۸۹۱ ماده ایله ۶۵۸
ماده شرحه باق .

حکم ثانی ، یالکز ایجاب ایله منعقد اولماز . ایجاب ایدن
ولوکه معیر اولسون . و بلکه مستعیرک مال کندوسنه اعاره
اولندیغنه علمی لاحق اولسی شرطدر .

بو جهتله بر کیمسه شو حیوانی یاخود شوروبه می فلان
کمنه یه اعاره ایتدم دیوبده او کمنه اوراده حاضر و معیرک
بو سوزلرینی ایشتمش دکل ایکن مذکور حیوانی یاروبه یی
آلوبده یدنده تلف اولسه ضامن اولور . زیرا ایجاب وقبولده
استماع شرط اولدینی ۱۶۷ ماده شرحنده بیان اولندی .

اما معیرک بو سوزینی کندوسی یعنی مستعیر یا رسولی
استماع ایلسه ویخود فضولی عدل استماع ایدوبده مستعیره یعنی
او کمنه یه اختیار ایتسه ده مستعیر بعده آلسه ضامن اولماز
تکمله رد مختار . زیرا بوندنصکره آلمق فعلا قبولدر .

حکم ثالث ، بلا ایجاب دخی عاریت منعقد اولماز .
بو جهتله من غیر سبق الاستعاره بر کیمسه دیکر کمنه یه
شو حیوانی آل استخدام و استعمال ایت دیسه ده اوده آلسه
عاریت اولیوب بلکه عقد ودیعه اوله رق مودع طرفندن
مستودعه انتفاع ایتک اوزره اذن ویرمش اوله جفندن اول
حیوانک نفقه سی صاحبی یعنی اول کیمسه اوزرینه اولور بحر

و تکمله رد مختار . یو خسه ۸۱۵ ماده قیلمدن اولماز .

۱ (مثلا بر کیمسه برینه شو مالی سکا اعاره ایتدم یاخود عاریت ویردم) یاخود شو مالک منفعتی بلا عوض سکا تملیک (ایتدم دیوب اودخی قبول ایلدم دیسه) ۲ (یاخود بر شی سویلمیه رک قبض ایتسه) ۳ (و یاخود بری دیگرینه شو مالی بکا عاریت ویر دیوب او دخی ویرسه) ده مستعیر دخی قبض ایتسه (اعاره منعقد اولور .)

احکام مستفاده

بو مثالدن آلتی مسئله مستفاد اولور .

مسئله اولی ، « مثلا » دینلمکله عقد عاریت بو الفاظه منحصر

اولدینی مستبان اولور .

بو جهتله بر کیمسه دیگر کمنه یه بو حیوانی استعمال ایتک اوزره سکا قرض ویردم دیوبده اوده قبول ایتسه بو معامله عاریت اولوب یو خسه قرض فاسد اولماز . زیرا قرض فاسد ، حیوانی اسهلاکله انتفاع و صکره مثلنی رد ایتک اوزره اخذ اولوب بو ایسه قیمتیله مضمون اولور بحر .

روبه می بر کون کیمک ایچون سکا اقراض ایتدم ویا شو خانه مده بر سنه ساکن اولق اوزره آنی سکا اقراض ایلدم دیوبده مستعیر دخی قبول ایتسه اعاره منعقد اوله جنی کی

معیر شو حیوانی قوللانمق و آکا یم ویرمک اوزره سکا ویردم دیسه عاریت اولور تکمله رد مختار .

لیکن اجاره لفظیله انعقاد اعاره ده ایکی قول بولنوب قول اوله کوره اجاره لفظیله اعاره منعقد اولور .

مثلا برکیمسه دیکر کمنه یه شو خانه می بر آی مدنله مجانا ایجار ایتدم یاخود بر آی لفظی سویلمیوبده شو خانه می مجانا ایجار ایتدم دیسه بو قولة کوره اعاره منعقد اولور . «۲» ماده ایله شرحنه باق .

قول ثانی یه کوره اجاره لفظیله اعاره منعقد اولمیوب بلکه لفظ مذکور ایله اجاره فاسده منعقد اولور که هندیه نك ظاهرندن بو ایکنجی قولة اعتماد ایتدیکی آکلاشیلور تکمله رد مختار . «۴۰۵» ماده شرحنه باق .

مسئله ثانیه ، ایجاب معیر و قبول مستعیر طرفندن اوله بیله جکی کی عکسیله یعنی ایجاب مستعیر و قبول معیر طرفندن دخی اوله بیله لور . نته کیم بیع واجاره ده دخی حکم بویله ایدوکی اورالرده بیان ایدلمشیدی .

مسئله ثالثه ، رکن عاریت اوچدر .

برنجیسی ، هم ایجاب و همده قبول لفظی و قولی و ایکنجیسی ایجاب و قبولدن بری لفظی و قولی و دیکری فعلی و اوچنجیسی ، هم ایجاب و همده قبول فعلی اولور که بونلردن یالکز اوچنجی

صورت تعاطی اولوب اما برنجی ایله ایکنجی صورت تعاطی اولماز.

ایمدی مستعیرک یا معیرک قبولی قولاً اوله بیله جکی کبی فعلاً دخی اوله بیلور. معیرک شو مالی سکا اعاره ایتدم دیسی اوزرینه مستعیرک مستعاری قبض یا مستعیرک بو مالی سندن استعاره ایتدم دیسی اوزرینه معیرک او مالی آکا تسلیم ایلمسی کبی. مجله ده کی مثلاًک برنجی فقره سی ایجاب و قبول لفظی و قولی یه و ایکنجی فقره سی ایجاب و قبول فعلی یه مثالدر. شو ماده ده تعاطی یه مثال وارمیدر.

تعاطی ، مفاعله بایندن یعنی معا طاتدن مأخوذ اولوب تناول دیمک اولور که بر طرفدن اعطا و دیگر جانبندن قبض ایله حاصل اولور. بنابرین بر طرفدن قولاً ایجاب و دیگر جانبندن فعلاً قبول یعنی قبض تعاطی صایلماز. نته کیم مجله ناک ۱۷۵ ماده سندن دخی آکلا شیلور. شو حالده «... یاخود برشی سویلمیه رک قبض ایتسه» فقره سی تعاطی یه مثال دکلدرد. فقط آندنصکره کلان «یاخود بری دیگرینه الح» فقره سنده تعاطی یه مثال واردرد دینیه بیلور. شویله که مجله مثالنده اودخی ویرسه عباره سی بر طرفدن اعطایه دلالت ایتدیکی کبی بو عباره دنصکره مستعیر قبض ایتسه لفظی مقدر اعتبار اولنوب شو حالده معیر طرفندن اعطا و مستعیر جانبندن دخی قبض بولنه رق تعاطی ایله اعاره منعقد اولور. بو صورتده مجله ده کی

شو مالی بکا عاریت ویر دیوبده عبارسی اعطانک علی سبیل
العاریه اولسنه قرینه اولمش اولور . زیرا اعطا علی سبیل
الهیه دخی اولور ایسهده هیه اعلا و اعاره ادنی اولمغله اعلایه
دلیل اولدقجه ادنایه مصروف اولور .

مسئلهٔ رابعه ، وعد ایله عاریت منعقد اولماز .
بناءً علیه برکیمسه دیگر کمسنه یارین ایچون شو حیوانی
بکا عاریت ویر دیوبده او کمسنه دخی یارین ویر یرم دیسهده
اول کیمسه او کون « یارین » واروب بلا اذن آلسه غاصب
اولور . زیرا بو مسئلهده عاریت منعقد اولیوب مجرد وعددن
عبارت قالدی .

فقط برکیمسه دیگر کمسنه یارین ایچون بر حیوانی
استعاره ایدوبده او کمسنه دخی اعاره ایتمکه مستعیر
اول کون واروب حیوانی آلسه اعاره تمام اولور . زیرا بو
مسئلهده یارین ایچون بو کون اعاره منعقد اولدی .

مسئلهٔ خامسه ، منافع مملکه نك جهالتی اعاره یی افساد
ایلمز . شو جهتله که اعارهده جهالت منافع باعث نزاع اولماز .
وهر جهالتکه باعث نزاع اولیه اوجهالت فساد عقدی ایجاب ایلمز .
بو جهالتک باعث نزاع اولماسی شوندرکه اعاره عقد لازم
اولمغله معیر « اکر مستعیرک استیفایه ابتدار ایتدیکی منفعتیه »
راضی دکل ایسه استدیکی ساعت و دقیقهده فسخ عقد ایله
معاری استرداد ایده بیلور . اما عقود معاوضه لازمه اولمغله

آنده کي جهالت باعث نزاع اولور . بيع و اجاره کي زياعی .
مسئله سادسه ، مثالده کي شومالي تعبيرندن مستفاد اولور که
عين مستعارک معلوميتي صحت اعارده شرطدر . « ۸۱۱ » ماده يه
باق بحر و تکمله رد مختار .

مسئله سابعه ، مالي لفظي دلالت ايدر که مستعار معيرک
ملکي اولسي شرطدر . زيرا اعاره تمليك منفعتدن عبارت
اولوب تمليك ايسه آنجق مالکدن اولور تکمله رد مختار .

بو جهتله ۸۲۲ مادهده ذکر اولنديني وجهله زوجہ ،
زوجنک آتی بلا اذن الزوج بر کمسنه يه اعاره ايدهميه چکی
کي مستعار مال مقصوب چيقسه مال صاحبي ديلرسه معيره
وديلرسه مستعيره تضمين ايتديرر . نته کيم ۸۱۳ ماده شرحنده
ايضاح اولنور .

شوقدر وار که معير مستعارک رقبهسنه مالک اولسي شرط
اوليوب منفعته مالک اولسي دخي صحت اعاردهده کافيدر .

يو جهتله مستعماينک اختلافيله مختلف اولميان مأجوري
مستاجر آخره اعاره ايدهميه چکی کي ۸۱۹ و ۸۲۰ مادهلرده
ذکر اولنديني وجهله مستعير دخي مستعاري آخره اعاره ايدهميلور .

ماده ۸۰۵

(معيرک سکوتی) مستعير طرفندن وقوعبولان ايجابي

﴿ قبول صایلماز ﴾ بحر. یعنی مستعیرك ایجابی اوزرینه معیر سکوت ایتسه اماره منعقد اولماز.

زیرا مادهٔ سابقه ده بیان اولندی اوزره اماره ایجاب و قبول یا تعاطی ایله منعقد اولوب سکوت ایسه بونلردن بری دکلدر .
و برده سا کته سوزاسناد اولنیمه جنی ۶۷ ماده ده بیان اولنمشیدی.
﴿ بناء علیه برکیمسه برندن ﴾ معلوم ﴿ رشی عاریت استیوبده
صاحبی سکوت ایلمش اولدیغی حالده ﴾ اول کیمسه اول شیئی
﴿ آله غاصب ﴾ و بنابرین اول شی او کیمسه یدنده تعدی
یا تقصیر ایله و یا خود تعدی و تقصیری اولمقسزین تلف اولدقده
ضامن ﴿ اولور ﴾ ۸۹۱ ماده یه باق.

ماده ۸۰۶

عاریت، عقد لازم دکلدر. بلکه تبرعانددر
بناء علیه احد طرفینك فسخ اماره یه حق واردر. « ۱۱۴ »
ماده شرحنه باق .

بو جهته ﴿ معیر استدیکی وقت ﴾ ولو که مستعیر عاریتی
هنوز قوللانماش اولسون ﴿ اماره دن رجوع ﴾ ایله معاری
استرداد ﴿ ایده بیلور ﴾

اماره كرك موقته یا مقیده اولسون كرك اولسون تکمله
رد مختار. و مستعار كرك بنایا زرع ایچون اماره اولمش عرصه

یا ارض اولسون وکړک بشقه شی اولسون. ومعیرک رجوعنده
مستعیره کړک ضرر بین بولنسون کړک بولنسون.

۸۳۲ ماده سی شو ماده نک مستثنای اولمدینی مذکور ماده
شرحنده ویریله جک ایضاحدن آکلاشیلور.

عاریتدن جواز رجوع ایکی درلو اثبات اولنشد.

برنجیسی، دلیل شرعیدرکه اوده «المنحة مردودة والعاریة
مؤداة» حدیث شریفدر عنایه.

ایکنجیسی، دلیل عقلیدر. شویله که منافع شیئا فشیئا
حادث اولوب منافع مذکورده ملک، منافع حدودیله ثابت
اوله جغندن «چونکه معدومده ثبوت ملک مستحیلدر» اعاره دن
رجوع، هنوز ثابت اولیان منافع تملیکندن امتناع اولوب
بوکا ایسه معیرک صلاحیتی واردر زیلعی. حتی اجاره ده دخی
رجوع وفسخ جائز اولمیدی دیو ۴۰۶ ماده شرحنده برسو آل
وجواب ذکر ایدلمشیدی.

اعاره دن رجوعک

کراهتی

اعاره دن رجوع جائز ایسه ده اعاره موقت اولنجه قبل
تمام الوقت رجوعده خلف وعد بولنغله مکروهدر تکمله
رد مختار.

اعاره دن رجوع اولندقدده عقداعاره باطل ومنفسخ اولور.

۸۲۵ ماده ایله ۸۳۱ ماده نك فقره نایه سی بوماده نك فرعیدر .
مستعیر ، خانه مستعارده بلا امرالمعیر بناء حائط کبی بعض
انشا آتده بولندقدنصکره معیر اعاره دن رجوع ایتدکده مستعیر
مصرفی معیردن طلب ایده مز . ولسله ان یهدم الحائط ان
كان البناء من تراب الارض بحر .

ینه بو جهتله بر کیمسه بر خانه بی استعاره ایدوبده معیر
اول کیمسه یه کندی یعنی مستعیر ایچون بعض ابنیه یامغه اذن
ویرسه ده صکره معیر خانه بی جمیع حقوقله صاتسه مستعیر بناسنی
هدم ایتسی لازم کلور . بعدالطلب رده مقتدر ایکن رده ده
تقریط ایتسه ضامن اولور .

ینه بو جهتله بر کیمسه خانه سی دیواری نی دیگر شخصه
کیریش قویق ایچون اعاره ایتدکدنصکره اول کیمسه خانه سی
بر آدمه صاتسه اول آدم او شخصه کیریشنی رفع ایتدیره بیلور .
مکرکه بایع حین بیعده اول کیریشك مذکور دیوارده بقا
وقراری نی شرط ایده . او حالده رفع ایتدیره مز تکمله رد مختار .
اما مستعیر ، حین بیعده مذکور کیریشك بقاسنی شرط ایتسه
بو شرط معتبر دکلدور .

ینه بو جهتله بر کیمسه خانه سی دیواری نی دیگر کیمسه یه
کیریش قویق ایچون اعاره ایدوب او کیمسه دخی کیریش وضع
ایتدکدنصکره معیر فوت اولسه وارثی کیریشی رفع ایتدیره بیلور .
ولو که کیریشی قوبدیغی وقت قراری شرط ایدیله . بناء علیه

بشرط القرار بیع ایله ارث بیننده فرق واردر در مختار
ورد مختار وتکمله رد مختار.

ینه بو جهتله بر کیمسه کندی عرصه سنده نفسیچون
بنا یا یق اوزره وارثنه اذن یعنی عرصه سنی اولوجهله آکا
اعاره ایدوبده وارث دخی بنا انشا ایتدکن صکره معیر وفات
ایتسه دیکر ورثه سی مذکور بنای رفع ایتدیره بیلور لر . مکرکه
ورثه ترکیبی اقسام ایدرک مذکور عرصه ابنیه یان وارثک
حصه سنه اصابت ایده .

ینه بو جهتله بر کیمسه بر داری استعاره ایتکله مستعیر
بلا اذن المالك یا خود کندی نفسیچون بنا یا یق اوزره اذن
آلسده آنده بنا یا یق دکن صکره مال صاحبی داری صاتسه
مستعیر بنای هدم ایله داری مشتری به رده مجبوردر .

ینه بو جهتله اراضی امیری هده بنا یا یق اوزره صاحب
ارضدن اذن آلوبده هنوز بنا یا یق دین صاحب ارض اذنندن
رجوع ایدرک آنی بنا یا یق دکن منع ایده بیلور .

ینه بو جهتله مستعیر دخی عقد اعاره بی فسخ ایده بیلور .
بناء علیه بو ماده ده معیر تعبیری احترازی دکلدر . مثلاً مستعیر
مستعار عرصه ده ابنیه یا یق دکن صکره دیلدیکی وقت ابنیه بی قلع
ایده بیلور . اعاره کرک موقته اولسون کرک اولسون . شو حالده
مستعیر دخی دیلدیکی وقت عقد اعاره بی فسخ ایده بیلور .

نته کیم معیر و مستعیر اتفاق ایدرک عاریتی فسخ ایتدکلرنده
عاریت منفسخ اوله جفی کبی .

عاریتک اوچ وجهله
انفساخ

خلاصه ، عاریت اوچ وجهله فسخ اولنه بیلور .
۱ یالکیز معیرک فسخیله ۲ یالکیز مستعیرک فسخیله ۳ معیر
و مستعیرک بالاتفاق فسخیله عاریت منفسخ اولور رد مختار .
بناءً علیه شو مسئلهده عاریت ودیعه کیدر . ۷۷۴ مادهیه باق .

عاریتک لازم اولدیغی
مسئله

استثنا

وصیتده عاریت لازم اولور .
شویله که برکیمسه عاریت ایله وصیت ایدوبده ثلث مالی
مساعده اولغله برابر موصی له بعد موت الموصی قبول ایدیجک
معیرک ورثه سی رجوع ایدمز . عاریت کرک مطلقه اولسون
و کرک مقیده اولسون تکمله رد مختار .

ماده ۸۰۷

(معیر و مستعیردن هر قفغیسی فوت اولسه عقد اعاره منفسخ اولور.) بیع و هبه و صدقه کی تصرفات احد عاقدینک و قاتیلله منفسخ اولمدیغی حالده اعاره نك انفساخنك سببی شودر که ماده آنه شرحنده بیان اولندیغی اوزره معدوم محل ملک اولمامغله مستعیرك کندوسنه تمليك اولنان منافعه ملکینک ثبوتی اول منافع موجود اولدقجه حاصل اولوب قبل الوجود ملک یوقدر. منافع آتیته نك وجودندن اول ، مستعیر فوت اوله رق مدکه اهلیتدن چقدقده منافع آتیته ده اعاره منفسخ اولور . نته کیم منافع آتیته نك وجودندن اول معیر فوت اوله رق مستعار ورته سنه انتقال ایتدکده ورته اعاره ایتمش اولمداقلرندن اعاره نك حکمی قالماز .

انفساخ اعاره اوزرینه

متفرع مسائل

وفات احد طرفین ایله انفساخ اعاره اوزرینه آتی الذکر ایکی مسئله تفرع ایدر .

مسئله اولی ، معیر وفات ایتدکده مستعیر آرتق اول عاریت ایله انتفاع ایدم میوب ایدر ایسه غاصب اولور «۹۶» ماده یه باقی .

مسئلهٔ ثانیه، مستعیر وفات ایتسه وارثی مستعارى استعمال ایلیمه مز. زیرا مستعیر مستعارى وارث مرقومه اعاره ایلماش اولمغله وارث مرقومك استعمالی بلا اذن اوله رق ۹۶ ماده موجبجه استعمالی غیر جائز و غصب حکمنده اولور. بوصورته استعمال ایدرده تلف اولورسه ضامن اولور تکمله رد مختار. معیر و مستعیر ایکسیده معایا متعاقبا فوت اولسه اعاره منفسخ اوله جفی بوماده دن مستفاد اولور .

تجهیل العاریه

مستعیرك وفاتی جهتیه عقد عاریت بروجه مشروح منفسخ اولدیغنه منی معارترکه سنده موجود اولسه یعنی مستعیر مجهلا وفات ایتسه و دیعه ده اولدیغی کبی ترکه سندن ضمان لازم کلور . « ۸۰۱ » ماده یه و شرحه باق .

مثلا برکیمسه بر قلیجی استعاره ایتدکدنصکره قلیجك حالنی بیان ایتدین مجهلا وفات ایدوب ورته دخی قیلنج نه اولدیغی بیلمدکارینی بیان ایتسه لر اونك قیمتی متوفانك ترکه سندن آلور .

ماده ۸۰۸

(مستعارك) ۱ عینی استهلاك ایدلمکسزین (انتفاعه

صالح اولمسی (۲ وعقد عاریتده عوض مشروط و ۳ مستعار تحت وصایتده بولنان صبی اولمامسی (شرطدر .

ایضاح القیود

۱ عینی استهلاك ایدلمکسزین الح دنیلدی .

(بناء علیه) دراهم و دنانیر و آرپه و بغدادی و عددیات متقاربه کی انتفاع، استهلاك عینه متوقف بولنان شیلرک اعاره واستعاره سی صحیح اولمدیغی مثللو (فراری حیوانك اعاره واستعاره سی صحیح دکلدر .) یعنی باطلدر . حتی مجرد بو اعاره اوزرینه مستعیر فراری حیوانی طوتوب بلا اذن استعمال ایتسه غاصب اوله جنی کی مستعیر معار بولنان فراری حیوانی طوتوب محافظه ایتدی ضایع اولدی دیومعیر آندن تضمینات طلب ایده من .

مثلیاتك اعاره سی

قرضدر

بو کی دراهم و دنانیر و جوز و بیض و مثلیات سائره نك اعاره واستعاره سی عند الاطلاق قرض معناسنده مستعملدر . مناسب دخی قرض ایله عاریتک ایکیسیده عقد تبرع اوله رق عاقدیندن ایکیسنگده حق رجوعی اولمیدر تکمله رد مختار . « ۶۱ » ماده یه باق .

بو جهته بر کیمسه دیگر کسسه یه شو قدر کله دن عبارت
بولنان شو آرپه می سکا اعاره ایتدم دیسه قرض اولور .
« ۲ » ماده یه باقی .

بونلرک اعاره سنک قرضه محمول اولسنک سبی شودر که
اعاره بونلرله انتفاعه اذن اولوب بونلرله انتفاع آنجق اعیانک
استهلاکله اولوب استهلاک ایسه ملکه توقف ایده جکندن
بالضرورة عینک نملیکنی اقتضا ایلدی . تملیک عین ایسه هبه
ایله اوله بیله جکی کبی قرض ایله دخی اولوب حالبوکه قرض
ضرر جهته بجه هبه دن ادنادر . چونکه قرض رد مثلی ایجاب
ایدرکه بو مثل اقراض اولنان عین مقامنه قائم اولور تکمله رد
مختار .

استثنا

مثلیاتک اعاره سی بوجه مشروح قرض ایسه ده بونلرک عینلری
باقی اولمق اوزره استعمال اولمق ایچون بر منفعت بیان ایدیلور ایسه
ینه عاریت اوله جغه شبهه یوقدر . زیرا بو حالده مع بقاء العین تملیک
نفع معناسنه اولان اعاره ایله عمل ممکن اولوب حقیقت ممکن
ایکن مجازه کیدلمز . « ۱۷ » ماده یه باقی .

مثلا بر کیمسه کندو آلتونی عیار ایتک اوزره دیگر
کسسه دن بر آلتونی یا دکانی تزین ایلک ایچون بعض اموالی
استعاره ایسه بو معامله حقیقه عاریت اوله جخی جهته مستعیر

بونلری استهلاك و تعین قلنان صورتدن بشقه درلو انتفاع ایدمه
تکمله رد مختار .

قیمیاتک استهلاكی اوزرینه وارد اولان اعاره

قرض فاسددر

و قیمتات، استهلاك ایدمک اوزره عاریت ویرلدکده قرض
اولور . شویله که برکیمسه بناسنه قویمق یعنی انشا ایتمکده
اولدینی ابنیه ده قوللانلمق و صرف ایتمک اوزره بر آج یا خود
کریبیج و یا خود البسه سنه اک یا ماق اوزره بر مقدار قوماش
استعاره ایتسه حقیقه استعاره اولیوب قرض ایدوکندن صکره
بدلی یعنی مستعیرک استهلاك ایتدیکی مالک قیمتی ضامن اولور .
لکن بعدینه کیرو اعاده ایتمک اوزره استعاره ایتسه یینه
عاریت اولور تکمله رد مختار .

نته کیم برکیمسه دیگر کمنه یه شوطباق طاتلی یی سکا اعاره
ایتدم دیسه ده اوده اخذ و استهلاك ایتسه قرض اوله رق اوکمنه
ضامن اولور . مکرکه بینلرنده شول درجه بسوطت و تکلیف سزلک
اوله که اباحه یه دلالت ایده . او حالده بومعامله اباحه اولور .

۲ عوضک عدم شرطی لازم ایدوکی ذکر اولندی . زیرا
۷۶۵ ماده شرحنده دخی ایضاح اولندیغی اوزره اعاره ده
عوض شرط ایدیلورسه اعاره اولیوب اجاره اولور . چونکه

اجاره اعاره لفظيله منعقد اولور بحر و تکمله رد مختار . « ۳ »
ماده يه باق .

۳ مستعار تحت وصايتده و ولايتده اولان صبي اولمامسی شرطدر
دینلدی . زیرا منافع صغیر ايله تبرع جائز دکدر تکمله رد مختار .
« ۵۸ » ماده يه باق . نته کیم ۵۹۹ ماده ايله شرحنده ایضاح
اولمشیدی .

بوجهتله اب ابن صغیر نی آخره اعاره ایده مز . شوقدر که
تعلیم صنعت ایچون استاده اعاره ايله آکا خدمت ایتدیره بیلور
تکمله رد مختار .

— ماده ۸۰۹ —

« معیر و مستعیرک عاقل اولملری » صحت اعاره ده « شرطدر »
بیع و اجاره و ایداع مثللو هر عقدده شرط اولدینی کبی .
اما معیر ايله مستعیرک « بالغ اولملری » صحت اعاره ده
« شرط دکدر . » نته کیم و دیعه ده دخی حکم بویله ایدی .
« ۷۷۶ » ماده يه باق .

« بناءً علیه مجنون ايله صبی غیر ممیزک اعاره و استعاره لری
جائز اولماز . » بوفقره شوماده نك فقره اولیسنه متفرعدر .

محجورينك اعاره واستعاره لرينك عدم جوازينه

متفرع مسائل

شوحالده يعنى بونلرك اعاره لرى جائز اولمينجه بر كيمسه
مجنوندن بر مال استعاره واخذ ايتسه غاصب اوله جنى كى
استعاره لرى جائز اولمينجه بر كيمسه مجنونه بر مال اعاره وتسليم
ايتسه ده حفظ ايتيوب ضايع اولسه مجنون مسؤل اولماز .

صينك صبي يه اعاره سى

و بر صبي بر مالى ديكر صبي يه اعاره ايدوبده مستعار ديكر
بر شخصك مالى اولوب صبي مستعير يندنه تلف اولنجه دافع
اولان صبي مأذون اولدينى تقديرده ضمان آنك اوزرينه لازم
اولوب مستعير اوزرينه برشى لازم كلز . ۹۱۶ ماده يه باق .
اما مستعير محجور اولدينى كى معير دخی محجور اولنجه
مال صاحبي اول ايكي صييدن قنغيسندن استر ايسه تضمين
ايتديرر .

۹۶۰ ماده شرحنده ايضاح اولنه جنى و حمله صبي محجور
بر مالى كيردن استعاره واستهلاك ايتسه ضمان لازم كليوب اما
بلا استعاره ديكر مالى اتلاف ايتسه ضمان اولور . نته كيم .

و دبعده دخی حکم بویه ایدوکی ۷۷۶ ماده شرحنده ایضاح اولندی .

بالولایه وبالوصایه اعاره

اب بالولایه و وصی بالوصایه صغیرک مالی آخره اعاره ایده مز. زیرا بواعاره تجارتدن یا تجارت توابعدن اولمیوب بدلسنز اوله رق تبرعدر بحر و در مختار. ایدوبده تلف اولسه ضامن اولور .

﴿ اما صبی مأذونک اعاره واستعاره سی جائز اولور. ﴾ زیرا بواعاره واستعاره تجارت عاداتنددر تکمله رد مختار. شو فقره بو ماده نک فقره اخیره سنه مثالدر .

شو حالده بو اعاره واستعاره اوزرینه بو بابده ذکر و بیان اولسان احکام عاریت ترتب ایدر . « ۹۵۷ و ۹۶۶ و ۹۶۷ » ماده لره باق .

مثلا برصبی دیگر صیددن بر مال استعاره ایتدکده معیر مأذون و او مال دخی کندوسنک ایسه مستعیره ضمان لازم کلیوب اما اول مال صبی مأذون معیرک دکل ایسه معیر ضامن اولوب لیکن مستعیر صبی محجور اولیجه مستعیرک یدنده تلف اولمی معیرک تسلیطندن حاصل اولغله مستعیر ضامن اولماز . وصبی محجور ایسه مال صاحبی دیلرسه غاصب اولمق جهتیله معیره

واستر ایسه غاصب الغاصب اولمق اعتباریله مستعیره تضمین
ایتدیرر تکمله رد مختار .

تفصیلات آنفهدن آکلاشلدیکه اب صغیرک مالی اعاره
ایده مدیکی حالدیه صبی مأذون اولنجه کندو مالی اعاره ایده بیلور .
زیرا صبی مرقومک اعاره سی تجارتک توابعدن اولوب اما ابک
اعاره سی توابع تجارتدن دکدر بلکه تبرع محضدر .

مستعار ، مستعیرک صغیر ولدی
طرفدن دیکره اعطا ایدلمک

ید مستعیرده بولنان مستعار ی مستعیرک صغیر محجور ولدی
آخره ویروبده ضایع اولسه ضمان ولد مرقوم ایله مدفوع ایله
یعنی آخر اوزرینه در . یعنی معیر ایکسندن قنغیسندن استر
ایسه آکا تضمین ایتدیرر . « ۹۱۰ » ماده یه باق .

❧ ۸۱۰ ماده ❧

(عاریتده) مستعیرک مستعار ی معیرک صراحة یا دلالة
اذیتله (قبض) ایتسی (شرط اولوب قبل القبض) عاریتک
(حکمی یوقدر .) چونکه مستعیر مستعار ی قبض ایمدین
آندن انتفاع ایده مز . وعاریت دخی تبرعاندن اولوب ۵۷ ماده
حکمنجه تمامیتی قبضیله در .

صراحة اذن بو مالمی سکا اعاره ایتدم قبض ایت دیسیله
حاصل اوله جنی کبی دلالة اذن دخی ایجاب عاریتدن عبارت
اولوب معیرک ایجابی قبضه دلالة اذندر .

صراحة و دلالة اذنک

احکامی

صراحة اذن ویرلده هم مجلس عقدده و همده مجلسدن
بعد التفرق قبض جائز اولدینی درکار ايسه ده دلالة اذن مجلس
عقد ايله تقید ایدرمی ؟ هبه ده تقید ایتدیکی کبی . « ۸۴۴ »
ماده یه باق . یوخسه ایتزمی ؟ برکیسه دیگر کمسنه یارین ایچون
سنک فلان ثورکی استعاره ایتدم دیوب اوده بنده اعاره ایتدم
دیدکنصکره یوم آتیده مستعیر واروب ثوری قبض ایتسه
اعاره صحیح اوله جنی رد محتارده مذکور اولغله شو مسئله
کوره اعاره ده قبضه دلالة اذن مجلس عقد ايله تقید ایلمز .
« ۸۰۴ » ماده شرحه باق . بو حالده هبه ايله اعاره ییننده بو
مسئله ده فرق بولمق لازمدر . واقعا هبه ده هم ملک و همده منفعت
مالکدن بالکلیه زائل ایکن عاریتده یالکزر منفعت موقه زائل
اولمق صورتيله فرق واردر .

۸۱۱ ماده

(مستعارک تعینی) یا معیرک مستعیری تحیری (لازمدر)

زیرا عین مستعارك جهالتی تحت اعاره یی منع ایدر . اما منافع مستعارك جهالتی تحت اعاره یی اخلال ایلمز .

بناء علیه زمان و مکان و منفعت و منتفع تعیین اولنمقسزین اعاره صحیحدر . نته کیم ۸۱۶ ماده دن مستفاد اولور .

(مثلاً تعیین یا) خود (تخییر اولنمقسزین ایکی بار کیردن بری اعاره اولنسه صحیح اولیوب معیر هر قنغیسنی اعاره ایده جك ایسه تعیین ایتمسی لازمدر .) حتی بو وجهله بلا تعیین ولا تخییر واقع اولان اعاره اوزرینه مستعیر بر بار کیری اخذ ایته یغنی مثلاً معیر « آخوردده ایکی بار کیرم بولنوب وارده برینی آل » دیسه ده مستعیر دخی واروب برینی آلسه غاصب اولور .

(فقط) معیر ایکی بار کیردن (هر قنغیسنی آلور ایسه ك آل دیو مستعیری تخییر ایته اعاره صحیح) و بو تخییر اوزرینه مستعیر مذکور ایکی بار کیردن برینی عاریت اولوق اوزره اخذ ایته جائز (اولور .) ده شو اخذ غصب حکمنده اولیه جفی جهتله مأخوذ مذکور ید مستعیرده تلف اولسه ضمان لازم کلز .

شو « فقط الخ » فقره سی ایله مشالده « وتخییر الخ » فقره سنك محترز عنهی بیان اولنیور .

اعاره مشاعك

جوازی

اما مستعارك مشاع اولمامسی لازم دكلدر .

بناء عليه مشاعك اعاره سی صحیحدر ، كرك شریكه اعاره
ایدلسون كرك اجنبی به اعاره قلنسون . نته كیم برشیك ایکی
كشی به اعاره سی دخی جائزدر . كرك مناصفته اعاره اولنسون
وكرك ثلاثا اعاره اولنسون . وایکی كیمسه به اعاره كرك اجمالا
اولسون . بو مالی ایکیكزه اعاره ایتدم دیو اعاره ایتك كبی .
وكرك تفصیلا اولسون . سكا شو مالك نصفی اعاره ایتدم
وبوكا بو مالك دیگر نصفی اعاره ایتدم دیو اعاره كبی تكمله
رد مختار .

مشاعك اجاره سی جائز دكل ایكن اعاره سی
جائز اولمغله فرق نه در ؟

مشاركك غیر یسنه مشارعك اجاره سی جائز اولمدیغی
۴۲۹ ماده ده مذکور اولمغله اجاره ایله اعاره بیننده فرق بولمق
اقتضا ایدر . اجاره عقود لازمه دن اوله رق موجر تسلیمدن
امتناع ایتدیکی تقدیرده تسلیمه جبر ایدلك ایجاب ایدوب مأجور
مشاع اولنجه غیر مأمور حصه ایله برابر تسلیم اولمغه جبر
اولمق لازم كلوب بو ایسه صحیح دكلدر . اما اعاره عقود غیر
غیر لازمه دن اولدیغی جهتله معیر رضاسیله غیر مأجور حصه یی
دخی تسلیم ایدرسه اعاره تمام اولوب اما تسلیم ایلمز ایسه
اعاره نك حكمی اولیه جفندن معارك تسلیمنه جبر لازم كلز .

— فصل ثانی —

(عاریتک احکام و ضماناتی بیانده .)

احکام، حکمک جمعی اولوب حکم دخی اثر مرتب معناسنده
اولمغله شو حالده بو عنوانک معناسی عاریت اوزرینه مرتب
آثار دیمکدر. ضمانات دخی احکام جمله سندندر .

— ماده ۸۱۲ —

(مستعیر) مجانا یعنی (بلا بدل عاریتک منفعتیه) و معیر
دخی همجنسینه ایولک ایتدیکی جهتله نیت خالصه سیله ثوابه
(مالک اولور .) و شرط اعاره مجانا اولمق ایدوکی ۷۶۵ ماده
شرحنده ایضاح اولندی. بناء علیه اعارده بدل شرط ایدیلورسه
اجاره یه منقلب اولور . « ۴۳۴ » ماده شرحنه باق .
خلاصه ، مستعیر عاریت ایله انتفاع ایتدکده بو منفعت
کندوسنه مجانا قالور .

(بناء علیه معیر بعد الاستعمال) یعنی مستعاری بر مدت
قوللانقدن صکره اعاره سنه نادم اولمغله اول مدت ایچون

(مستعیردن اجرت طلب ایده مزه) طلب و دعوی ایدر ایسه
دعوائی رد اولنور.

اعاره ده و اجاره ده اختلاف

بو ماده طرفین عقدك اعاره اولدیغنی متفق اولدقلری
تقدیرده در. اما مال صاحبی اجاره دیگریده اعاره ایدی دیو یعنی
مثلا بر کیمسه، حیوان ایله بر محله کیدوب کلدکدنصره
حیوان صاحبی اول حیوانی سکا ایجار ایتشیدم بناء علیه اجرتی
استرم دیو ورا کب اعاره ایتشیدك اجرت آله مازسین دیو
اختلاف ایتدکارنده سوز را کبکدر. زیرا را کب اجرتی انکار
ایدیور. ۷۶ و ۸۰ ماده لره باق.

۸۱۳ ماده

(عاریت، مستعیر یدنده امانتدر) یعنی عاریت مستعیر یدنده
کرك بر معتاد و بروجیه مشروط استعمالندن یعنی مأذون فیه
اولان عملندن طولانی و حال استعمالنده تلف اولسون و کرك
بلا استعمال تلف اولسون (بلا تعد ولا تقصیر تلف یا ضایع
اولسه یا خود قیمته نقصان کلسه ضمان لازم کلز.)
بو مسئله ایکی وجهله اثبات اولنمشدر.

وجه اول، ليس على المستعير غير المغل ضمان حديث شريفى
وارد اولمصدر .

وجه ثانى، مستعار صاحبك اذنيه لا على وجه الاستيفاء
« احترز به عن الرهن » ولا على سبيل المبادله « احتريه عن
سوم الشراء على طريق تسمية الثمن » اخذ ايدلمش اولمغله
ضمان لازم كلز . چونكه اذنيه تعدى تصور اولنه ماز . « ۷۷۱ »
مادهيه باق . كورلمزيمكه بر كيمسه كندى مالك اتلافه ديكر
كمنهيه اذن ويرسده اوده اتلاف ايتسه متلفه ضمان لازم كلز .

بو ماده دن ايكي مسئله

مستفاد اوله جفى

بو ماده نك اطلاق دن ايكي مسئله مستفاد اولور .

مسئله اولى ، عاريتك تافى كرك ظاهر اولسون وكرك
خفى اولسون على كلا تقديرين ضمان لازم كلز . حتى مستعير
حال صحت يا مرضنده مستعار بلا تعد ولا تقصير ينده تلف
اولديغنى ادعا ايتسه سوز مع اليمين كندوسنكدر . « ۱۷۷۴ »
مادهيه باق .

مسئله ثانیه ، ضمان شرط ايدلسه بيله ضمان لازم كلز .
شويله كه مال مستعار بلا تعد ولا تقصير يد مستعيرده تلف اولديغنى
تقديرده مستعير ضامن اولمق شرطيله عقد عاريت ايدلسه بيله

بو شرطك حكمی اولیوب بروجہ مذکور تلفی تقدیرندہ مستعیرہ
ضمان لازم كلز . رهنده بلا تعد ولا تقصیر تلفی حالندہ ضمان
شرطی کی . «۸۲» ماده شرحہ باق بحر .

عاریتدہ شرط ضمانلہ مضمونیتدہ

اختلاف فقہا

ابن نجیم اشباہندہ العادة محكمة قاعدة سنك فروعاتی ذكر
ایتدیکی صرہدہ « عاریتک بلا تعد تلفی تقدیرندہ ضمان شرط
اولندقدہ علی روایۃ شرط مذکور صحیح اولہ جنی زیلعی ایلہ
جوہرہ دن نقلا ذکر ایلمش ایسہدہ صحیح ومفتابہ اولان شرط
مذکورک حکمی اولمامسی ایدوکی قاضیخاندن نقلا حموی بیان
ایلدیکی کی آنفا ذکر اولندیفی اوزرہ مجلدہ عدم ضمان مطلق
اولہ رق ذکر اولندیغنه نظراً ۶۴ ماده موجبنجہ شرطك حکمی
اولیہ جنی حقندہ کی قول اختیار قلندیغنه دلالت ایتکدہ اولمغله
شو ماده بروجہ مشروح شرح وایضاح اولندی .

عاریتک مضمون اولندیغنه

متفرع مسائل

بو جهتله ﴿مثلاً عاریت آینه قضارا مستعیر الندن دوشمکه
یاخود آیانی قایوبده کندوسی آینه یه چارپمغله قیرلسه﴾ وعاریت

استر بر معتاد استعمالندن طولای طوبالالانسه (ضمان لازم کلز).
ینه بو جهته مستعیر، مستعار استری بر معتاد ایپ ایله
باغلامغله بوغولسه ضمان لازم کلز. زیرا شو معامله معتاددر.
ینه بو جهته قصاع الحمام یعنی حمامه کیرن کیمسه نک
قورنه باشنده صو دوکمک ایچون انه آلدینی طاس وچناق
قضارا یدندن دوشوب ازلسه وقرلسه ضمان لازم کلز.

ینه بو جهته شربتچینک یارداغی شربت ایچنک النبدن
قضارا دوشوب قرلسه بارداغک ضمانی لازم کلز. اما شربتک
پارهنی ویرمسی لازم کلور قهستانی. « ۲۹۴ » ماده یه باق.

ینه بو جهته بر کیمسه انای محاربه ده دوشمنله مقاتله
ومحاربه ایتمک اوزره بر سلاح استعاره ایدوبده مقاتله ایدرکن
یعنی مثلاً مستعار سیف ایله دشمنه اوررکن سیف منکسر
اولسه ضمان لازم کلز شبلی.

ینه بو جهته بر کیمسه عاریت البسه یی لابس اولدینی
حاله سورچوب دوشمکه البسه یرتلسه ضمان لازم کلز.

ینه بو جهته (کذلک عاریت کچه اوزرینه قضارا برشی
دوشمکه لکه لنوبده قیمته نقصان کلسه ضمان لازم کلز.)

ینه بو جهته عاریت حیوان ایله بر معتاد محل مسایه
واریلوب کلنمکه حیوان زبون اولسه یاخود حیوان کبه اولمغله
حمانی اسقاط ایتسه مستعیره ضمان لازم کلز.

ینه بو جهته مستعیر مستعاری معیره کتوردیکنده معیر،

مستعيره «شورايه قویور» دیمکله مستعیر دخی قویارکن من غیر
تقصیر الذدن دوشوب قیرلسه ضمان لازم کلز .

خلاصه ، بر معتاد استعمالندن طولای عین مستعار تلف
یا قیمتته نقصان طاری اولسه ضمان لازم کلز .

بو مادهده مذکور اولان بلاتعد ولا تقصیر قیدینک محترز
عنهی ماده آتیله بیان اولنیورکه تعدی یا تقصیر ایله تلف
اولدقده ضمان لازم کلور .

عاریت مضمون اولماسندن ایکی مسئله نك استثناسی لازم کلور

۱ مسئله، عاریت موقتده بعد مضي الوقت مستعیر مستعاری
رد ایتیموبده امساك ایتدکده كرك استعمال ایتسون و كرك
ایتمسون یندنه بلاتعد ولا تقصیر تلف اولسه ضمان لازم کلور .
« ۸۲۶ » مادهیه باق . بومسئله یی محشی البرر عبد الحلیم بروجه
محزر مستثنا عد ایللمشدر .

فقط بعد مضي الوقت امساك تعدی عد اولنق دخی ممکن
اولوب بو اعتباریله بو مسئله مستثنا عد اولنماز تکمله رد مختار .

۲ مسئله، عاریتده شو حکم یعنی عدم ضمان مستعار نفس
الامرده معیرك ملكی اولدینی تقدیرده اولوب اما عاریت دیگر
بر شخصك ملكی بولمادینی تبیین یعنی مستحق ظهور

ایتدکده مستعیره ضمان لازم کلور. زیرا استحقاق مذکور ایله تبین ایلدیکه اول مال عاریت دکلدر. چونکه عاریت تملیک منفعتدن عبارت اولوب تملیک ایسه آنجق مالیکدن اولور نته کیم ودیعه ده دخی حکم بوبله ایدوکی ۷۷۷ ماده شرحده ذکر اولندی.

یعنی شخص مستحقه نسبتله معیر غاصب اوله جفی کبی مستعیر دخی غاصب الغاصب اوله جفندن ۹۱۰ ماده ده محرر اولدینی اوزره مستحق دیلرسه معیره ودیلرسه مستعیره تضمین ایتدیروب قنغیسنه تضمین ایتدیورر ایسه ضامن اولان دیکرینه رجوع ایده مز. معیره تضمین ایتدیورر ایسه آنک مستعیره رجوع ایده مامسنک سبی شودر که معیر ضمان ایله مستعاره وقت اعاره یه مستندا مالک اولغله کندی مالی اعاره ایتمش اولدی. عاریت ایسه بو ماده حکمنجه مضمون دکلدر. مکرکه ید مستعیره تلفی آنک تعدیسی یا تقصیری ایله اوله.

مستعیره تضمین ایتدیورر ایسه معیره رجوع ایده مامسنک سبی شودر که عاریت، نفعی قابض بولنان مستعیره عائد بر عقددر. «۶۵۸» ماده شرحه باق. اما مستودع ضامن اولدینی شیله مودعه رجوع ایدر ایدی. «۷۷۷» ماده شرحه باق بحر.

نته کیم ایکی کیمسه بیننده مشترک اولان مالی بری دیکرینک اذنی اولقسزین بر شخصه اعاره ایدوبده بالاعد ولا تقصیر تلف اولسه کرک مستعیره و کرک معیره دیکرک حصه سنک ضامنی لازم کلور.

ایشته مستحق ، مستعار کندوسنك ملكي اولديغنى اثبات
ایتدکده بشقه سنه صاتمديغنه ياهبه ایتدیکنه بینه طلب اولنه ماز.
فقط معیر مذکور مالی کندوسنه بیع ياهبه وتسليم ایتدیکنی
یاخود آخره اعاره یه اذن ویردیکنی ادعا ایتدکده معیر اثبات
ایده مدیکی تقدیرده مستحق تحلیف اولنورده نکول ایدرسه مستحقه
قیمتی تضمین ایتدیره من تکمله رد مختار.

لاحقه

بر مالدہ اعاره یا غضب حقننده اختلاف

مستعیر، حیوانکی بکا اعاره ایتمشیدک بلاتعد ولا تقصیر
تلف اولدی دیو و معیرین اعاره ایتدم سن غضبا آلدک دیو
اختلاف ایتدکلرنده مستعیر حیوانه راکب اولمامش ایسه
ضامن اولماز.

۸۱۴ ماده

هر امینکه امانته بر کره تعدی و مخالفت ایده آندنصرکه
وفاقه عودت ایتسه بیلہ امین اولمق صفی عودت ایتمش اولمیوب
بناء علیه آندنصرکه یعنی وفاقه بعدالمعاوده دخی امانت تلف اولدقده

ضامن اولور . ولو که بالاتعد ولا تقصیر تلف اوله . بو قاعده اوزرینه ابواب فقهدن متفرع بعض مسائل بوجه آتی بیان اولنور .

مسئله اولی ، مستأجر در که ۵۴۵ ماده شرحنده تفصیل اولندی .

مسئله ثانیه ، رهنك غیری بر ایش ایچون مستعیر در .

شویله که ۱ ﴿ مستعیرك بر کونه ﴾ ۲ ﴿ تعدیسی یا تقصیری واقع اولدقه ﴾ بو حالده مستعیر غاصب حکمنده اوله رق یداماتی ید ضمانه تحویل ایده جکندن ۳ ﴿ آرتق هر نه سبیل اولور ایسه اولسون ﴾ یعنی کرک اول تعدی ویا تقصیردن طولای و کرک دیگر بر سبیدن طولای و کرک خف انفه ﴿ عاریت ﴾ ۴ ﴿ تلف ﴾ یا ضایع ﴿ اولسه یا خود قیمتته نقصان کسه ﴾ ۵ وقت تعدی یا تقصیرده کی تمام یا نقصان ۶ قیمتك ﴿ ضمان ﴾ ی ﴿ لازم کلور ﴾ . یعنی تلف اولدینی تقدیرده مثلیاتدن ایسه مثلی و قیمیاتدن ایسه تمام قیمتی و نقصان تقدیرنده نقصان قیمتی ضامن اولور .

ایضاح القيود

۱ مستعیرك تعدیسی دینلدی . زیرا تعدی مستعیر طرفندن واقع اولیوبده شخص آخر جانبندن واقع اولورسه ضمان بالخاصه او شخصه لازم کلور . « ۸۹ » مادهیه باق . شویله که

مثلا مستعارى مستعيرك صغير ولد محجورى آخره اعاده طريقيه
ویرسده ضایع اولسه ضمان صبی دافع ایله مدفوع ایله اوزرینه در.
« ۹۱۰ » ماده یه باق.

۲ تعدیسی یا تقصیری دینلدی. بوقیدایله اشارت اولنیورکه
مجرد یعنی بلا فعل، تعدی یه نیت موجب ضمان دکلدر. « ۲ »
شرحنه باق.

مثلا بر کیمسه بر آتی استعاره ایدوبده اعاده ایتماکی نیت
ایتسهده بعده بو نیتی ترك ایتدکده عندالیه حیوان اوزرینه
راکب و سائر ایسه بعدالیه تلف اولنجه ضمان لازم کلور.
زیرا نیت فعله مقارن اولدی. اما عندالیه واقف اولوبده نیتی
ترك ایتدکدنصرکه سائر اولسهده صکره حیوان تلف اولسه
ضامن اولماز تکمله رد مختار. زیرا نیت فعله مقارن اولمدی.
تعدی یا تقصیر بوجه آتی ایضاح اولنور.

مستعار حیوانی لجام ایله کبسح یعنی حیوانی لجام ایله کندویه
جذب ایتک ایله تلف ایتک یا خود بالضرر کوزینی چیقارمق
ویا خود برای رکوب استعاره ایلدیکی حیوانی خانه سنده حبس
ایلمک و یا خود جهت معینه کیتمک ایچون استعاره ایتدیکی
حیوانی برای سقی جهت اخرایه کوتورمک یا خود حیوانه
یوکلنیه چکی معلوم اولان مقدار یوکی یوکلتمک یا خود کیجه لی
و کوندزلی قوللانلمیه حق حیوانی کیجه لی و کوندزلی استعمال
ایتک و یا خود بر ارضی نطس ایتک اوزره استعاره ایتدیکی

حيوان ايله دها قاتی دیکر بر ارضی نطس ایلمک کی افعال
تعدی اولدینی کی مستعار حیوانی زقاقده ترك ایدوبده مسجده
یا خانه یه کیرسه ده کوزندن غائب اولدقدنصره ضایع اولسه
حفظده تقصیر ایتیش اولور . کرك قویه باغلامسون و کرك
باغلامسون . زیرا مستعیر حیوانی کوزندن غیب ایتدکه آتی
تضییع ایتیش اولور اما کوزندن غیب اولماش ایسه ضمان
لازم کلز .

کذلک مستعیر عاریت حیوانی اوتلاغه صالیوروبده تلف
اولسه عاریت حیوانک اوتلاغه یعنی مرعایه صالیورلمسی عادت
اولنجه ضمان لازم کلز ایسه ده عادت اولدینی یا عادت مشترک
اولدینی حالد ضمان لازم کلور بحر . « ۴۱ » ماده یه باق .

ایمدی موجب ضمان اولان تعدی بالاده ایضاح اولنش
و آتی الذکر مجله نك اوچ مثالنده مذکور بولنش اولدینی کی
آتی الیایان ۸۱۵ و ۸۱۶ و ۸۱۷ و ۸۱۸ و ۸۲۰ و ۸۲۱ و ۸۲۳ و
۸۲۵ و ۸۲۶ و ۸۲۷ و ۸۲۸ و ۸۲۹ ماده لرده دخی محرر
بولنشد بحر .

۴ آرتق هر نه سبيله اولور ایسه اولسون دینلدی . یعنی
مستعیر مستعاره بر کره تعدی یا حفظده تقصیر ایتدکن صکره
مستعار کرك تعدی یا تقصیردن طولایي تلف یا قیمته نقصان
طاری اولسون و کرك شو تعدی یا تقصیردن طولایي تلف یا قیمته
نقصان طاری اولمدين مستعیر تعدی یی ترکله وفاقه عودت ایدوبده

بعده بلا تعد ولا تقصیر یدنده تلف یا قیمتته نقصان طاری
اولسون مستعیر ضامن اولور .

مثلا مستعیر فلان محله کتمک اوزره استعاره ایلدیکی
بارکیر ایله اول محله واروب آتی تجاوز ایتدکن صکره ینه
محل مذکوره عودت ایتسه ضماندن بری اولیوب صاحبنه
سالما اعاده ایدنجیه قدر ید ضماننده اوله رق تجاوز مذکوردن
صکره یدنده تلف اولسه ضامن اولور .

نته کیم برکیمسه آخره رهن ایتک اوزره استعاره ایلدیکی
برمالی استعمال ایدوب صکره استعمالی ترک ایتسه ده قبل الرهن
والتسلیم یدنده تلف اولسه ضامن اولور تکمله رد مختار .

اعارده موجب ضمان اولان حال حقنده کی قاعده

مستعیرک ضمانتی ایچون شوقاعده کلیه ذکر اولمشدر
« عاریت اجاره کیدر هر شیکه اجاره ده ضمانتی ایجاب ایده اعارده
دخی ضمانتی اقتضا ایلر » ضمانات فضیلیه فی اجارة الدواب .

ع تلف دینلدی . زیرا مستعیر تعدی یا تقصیر ایتدیکی
حالده مستعاره برکونا ضرر ترتب ایتدین سالما صاحبنه اعاده
ایدیلنجیه مستعیر بری اولوب حتی آندن صکره صاحبی یدنده
تلف اولسه ضمان لازم کیز .

۵ وقت تعدی و تقصیرده کی الح دینلدی . شونی برمثال ایله ایضاح ایدهلل: مستعیر درت کون قوللالمق اوزره استعاره ایتدیکی حیوانی درت کون تمامنده اعاده ایتسه ۸۲۶ ماده موجبنه تعدی اولمغله آندن صکره اون بش کون امساك ایدوب بعده تلف اولسه وقت اعاره دن بدأ ایله بشنجی کونك قیمتك ضمانی لازم کلور . زیرا دردنجی کونك ختامنه قدر مستعیرك برکونا تعدی و تقصیری اولمامغله صرف امانت اولوب تعدی و تقصیری دردنجی کونك ختامنده اعاده ایتماسیله باشلار . شومسئله ودیعه ده یعنی ۸۰۳ ماده ده ذکر اولندیغی حالده عاریته ذکر اولنامسی کتاب غاصبدن منفهم اوله جغنه مبنیدر .

۶ قیمتك دینلدی . معیر ایله مستعیر مقدار قیمتده اختلاف ایتدکارنده سوز مع الیمین مستعیرك اولوب اما بینه معیر کدر . « ۸ و ۷۶ » ماده لره باق .

﴿ مثلا مستعیر ایکی کونده واريله جق محله عاریت حیوان ایله برکونده کیدوبده ﴾ یاخود تحملندن زیاده یوک تحمیل ایتمکله یاخود غنف و شدت اوزره سورمکله ﴿ اول حیوان تلف اولسه یاخود زبون ﴾ یاخود طوپال ﴿ اوله رق قیمتنه نقصان کلسه ضمان لازم کلور . ﴾

کذا ، مستعیر عاریت چفت اوکوزله تارلا سورددکن صکره ایپ ایله صالیور و بده بوغولسه ضمان لازم کله جکی کبی بینمک ایچون بر حیوانی استعاره ایدوبده مستعیر کندوسی بینمکله برابر

دیگر بر شخصی ارداف ایتسه یعنی ترکنه آلسه ده حیوان تلف اولسه اول حیوانك ایکی آدمی قالدیرمغه تحملی وارایسه مستعیر، نصف قیمتی ضامن اولور. زیرا تلف مأذون و غیر مأذون فعل ایله اولمغله قیمت بویکی فعله انقسام ایدوب مأذون فعله اصابت ایدن هدر اولور. اما حیوانك ایکی آدمی قالدیرمغه تحملی یوغیسه مستعیر کل قیمتی ضامن اولور.

(کذلک بر محله قدر) کتمک اوزره (استعاره ایتدیکی حیوان ایله اول محله واروبده دها ایلویه تجاوز ایتدکن صکره) محل مذکوره عودت ایلمشیکن یا هنوز عودت ایتدین (حتف انفه) یعنی آفت سماویه ایله (تلف اولسه ضمان لازم کلور) زیرا تجاوز مذکور تعدی اولمغله اولوجهله مستعاره تعدی واقع اولدیغنی آنده غصب اوله جغندن آندن صکره تلف نصورتله اولورایسه اولسون موجب ضماندر. بوحالده تلف حتف انفه اولنجه مستعیرك نه قصوری وار دینلمز.

بعد التعدی رد یا تلفده واقع اولان اختلاف

مستعیر تجاوز مذکوردن صکره حیوانی سالما معیره رد ایتدیکنی ادعا ایتدیکی حالده معیر تجاوز مذکور وقوعبولدیغنی محله تلف اولدیغنی ادعا وایکیسیده اقامه بینه ایتدکرنده معیرك بینه سی ترجیح اولنور.

مستعاره واقع اولان دیگر بعض تعدیلر

کذلک ، مستعیر، النده حیوانی یولاریله طومتقده اولدینی حالده او یویوبده برکیمسه یولاری قطع ایله حیوانی اخذ ایتدکده بوحال کرک حال سفرده اولسون و کرک حال حضرتده بولسون مستعیر ترک حفظ ایتدیکی جهته ضامن اولماز ایسه ده یولارینی سارق الندن آلب سرقت ایتسه اکر حضرتده مضطجعاً او یومش ایسه ضامن اولور. زیرا یولار الندن الندینی حالده کندوسی بوکا واقف اوله میه جق مرتبه او یومسیله عاریتی ترضیع ایلمش اولور .

والا یعنی حضرتده جالساً او یومش ایسه ضامن اولماز . زیرا جالسا او یویوب مقود یعنی یولار النده بولنیوب فقط حیوان اوکنده بولندیقی تقدیرده ضمان لازم کلز ایکن بوراده ضمان لازم کلامسی بطریق الاولیدر تکمله رد مختار .

نته کیم برکیمسه استعاره ایتدیکی بقری آندن ایکی قات قوتلی بقره عملده اش ایتمکه تلف اولسه بوحال معتاد اولنجه ۴۳ ماده یه مبنی ضمان لازم کلز ایسه ده معتادک خلاقی اولدینی حالده ضمان لازم کلور تعلیقات ابن عابدین علی البحر .

وکذلک برمحله قدر استعاره ایتدیکی حیوان ایله بشقه محله کتسه ده حیوان تلف یا قیمته نقصان طاری اولسه کتدیکی

محل، مسلمانان اقصر اولسه بيله ضمان لازم كله چكى كېي مذكور حيوان ايله بريره كتميو بده خانه سنده امساك ايتسه ده تلف اولسه ضامن اولور. زيرا ذهاب ايچون اعاره ايدلمشيدى يوخسه امساك ايچون دكل بجر. و حيوانك آخوردده بلاعمل امساكي مضر در. نته كيم اجاره ده دخى حكم بويله ايدوكى ۵۴۶ ماده شرحنده ايضاح اولنمشيدى. ۸۱۷» ماده شرحنده بومسئله تفصيل اولنور.

﴿ كذلك بر كيمسيه بر كردانلق استعاره ايله بر صينيك بوينه طاقوب و ﴾ صينيك ﴿ ياننده كوزه ديجيسى اولمدينى حالدده براغوبده سرقت اولندقدده اكر صبي، اوزرنده كى اشيايى حفظه قادر ايسه ضمان لازم كلز. ﴾ زيرا بومستعيرك عارىتى آخره اعاره ايتمى حائر ايدوكى ۸۱۹ ماده ده مذكور اولوب جواز شرعى ايسه ضمانه منافي بولمشدرد.

بورايه قدر بوماده نك مثالى اوليوب بومثالك شو ماده يه مثال اولمى فقره آتیه اعتباريله در.

﴿ اما ﴾ صبي اوزرنده كى اشيايى حفظه ﴿ قادر دكل ايسه ﴾ مستعير اوزرينه اول كردانلغك ﴿ ضمان ﴾ ي ﴿ لازم كالور. ﴾ زيرا حفظه قادر اولميان صبي به طاقمسيله عارىتى تضبيع يعنى حفظده تقصير ايتمش اولور. شبهه يوف كه سارق دخى ضماندن قور تلماز. بناء عليه معير مخير در. ديلرسه تضبيع ايلمسندن طولايى مستعيره تضمين ايتديرر. ايشته مجله ده بيان اولنسان

بودر . بوحالده مستعیر دخی سارقه تضمین ایتدیرر . ودیلرسه سارقه تضمین ایتدیرر . بوحالده سارق مستعیره رجوع ایده مز . « ۹۱۰ » ماده یه باق .

نته کیم معیر ، مستعار اولان یوک حیواننک یولارسز طوتلمیه جنی جهتله یولاریله چکلمسنی ویولارسز براغلامسنی تنبیه ایتدیکی حالده مستعیر یولارسز سورمکه زیاده یوریوب دوشهرک آیاغی قیراسه ضامن اولور . زیرا مستعیر شرط مفیده مخالفت ایتش اولور .

کذلک مستعیر ، مجهلا وفات ایتدکده عاریت ترکه سندن تضمین ایتدیریلور . « ۸۰۱ » ماده یه وشرحنه باق .

وکذلک مستعیر عاریتی اوکنه قویوبده جالسا اویوسه ده سرقت اولنسه بوحال کړک سفر وکړک حضرده وقوعبولسون مستعیره ضمان لازم کلمز ایسه ده مضطجعاً اویوسه ده سرقت اولنسه بوحال ، حضرده وقوعبولور ایسه ضمان لازم کلوب اما سفرده وقوعبولدینی صورتده ضمان لازم کلمز . مستعار کړک باشی آلتنده ویا اوکنده بولنسون وکړک حافظ عد اولنور صورتده حوالیسنده بولنسون .

ضمانی ایجاب ایدن تصرفی باذن المعیر
واقع اولدینی ادعاسی

هر تصرفکه اوتصرف ضمانی ایجاب ایدر مستعیر ، اوتصرفی

ایقاع ایتدکده تصرف مذکور معیرک اذنیله اولدیغنی و ببناء علیه ضمان لازم کلیه جکنی ادعا ایتدیکی حالمده معیر، بونی اقرار ایدرسه فیهما. «۱۵۸۷» ماده یه باق. انکار ایدرسه مستعیردن پینه طلب اولور. اثبات ایدرسه فیهما. ایده مزایسه معیر تحلیف اولنه رقیمین ایدر ایه مستعیره ضمان لازم کلور. «۱۶۳۲» ماده یه باق تکمله رد مختار.

مستثنیات

بوماده نك ایتداسنده شرحا بیان اولن ان قاعده دن بعض مسائل مستنادر که بونلرده امین تعدی و مخالفتدن صکره وفاقه عودت ایتدکده بری اولور.

۱ مستودعدرکه تفصیل احکامی ۷۸۷ ماده شرحنده کچدی.

۲ مستعیر الرهن در. شویله که برکیمسه رهن ایتک اوزره برمالی استعاره ایدوبده قبل الرهن آنی استعمال ایتسه تعدی ایتش اولوب فقط صکره استعمالی بالترك بوجه مشروط رهن وتسليم ایتسه کماکان امین اولور. حتی راهن مستعیر، رهن مستعارک مقابلی اولان بورجی تأدیه ایتدکدن یا قبل التأدیه ید مرتهنده تلف اولسه راهن مستعیر اوزرینه ضمان غصب لازم کلز بحر و تکمله رد مختار.

۳ مضاربدر. «۱۴۲۱» ماده ده ذکر اولنسدیغنی اوزره

مضارب مأذونیتک خارجنه چیققدقه و شرطه مخالفت ایتدکه
 غاصب اولورایسهده صکره وفاقه عودت ایتسه ضماندن بری
 وکاکان مضارب اولور . شویله که مثلاً رب المال مضاربه
 استانبولده آتش ویرش ایت دیمشیکن مضارب آتش ویرش ایتمک
 اوزره بروسهیه کتسه غاصب وحتی سرمایه اوراده ولو بالاتعد
 تلف اولسه ضامن اولور . فقط اوراده آتش ویرش ایتمدین
 استانبوله سرمایه ایله عودت ایلسهده صکره بالاتعد ولا تقصیر
 استانبولده تلف اولسه ضامن اولماز بحر .

۴ مستبضعدر . مبضع ، مستبضعه فلان بلده خارجنه
 چیقمه دیمشیکن مستبضع دیگر بلدهیه مال بضاعهیه کوتورسه
 غاصب اولوب بناء علیه اوراده تلف اولسه ضامن اولور .
 فقط سرمایه تلف اولمدین عینا مشروط اولان بلدهیه نقل
 ایتدکه ضماندن بری اولوب آندن صکره بالاتعد ولا تقصیر
 تلف اولنجه ضامن اولماز .

۵ وکیل بیعدر . برمالی بیعه وکیل اولان کیمسه آنی
 استعمال ایتسه غاصب اولوب فقط تعدی بولنان استعمالی ترکله
 وفاقه عودت ایتسه امین اولمق صفقی عودت ایدر . حتی آندن
 صکره ضایع اولسه ضامن اولماز .

۶ وکیل حفظدر .

۷ وکیل اجارهدر ، برکیمسه شو آتتی فلان کیمسهیه ایجار
 ایتمک اوزره بر آدمه ویروبده اول آدم دخی آنی بالذات استعمال

ایتد کدنصکره ترك ایتسه ده صکره تلف اولسه ضامن اولماز
تکمله رد مختار .

۸ وکیل استیجار در . بر کیمسه دیگر کمنه یه کندوسی ایچون
بر خانه استیجار ایتک اوزره بش آلتون ویروده او کمنه
خلاف مأذونیت اول کیمسه ایچون بر دکان استیجار ایدرک
اول آلتونلری آکا ویرد کمنصکره مذکور آلتونلری عینا
استرداد ایدوب یئنده تلف اولسه ضامن اولماز من الحل المزبور .

۹ شریک عناندر . بو شریک تعدی ایتد کدنصکره یعنی
مثلا فلان بلده ده اخذ واعطا ایتک اوزره شرکت مقید ایکن
شریک بلا اذن المشارک بلده اخرایه سرماییه بی کوتوروب
بعده اوراده صرف ایتدین بلده اولایه عودت ایتسه امین اولمق
صفقی عودت ایدر .

۱۰ شریک مفاوضه در . بودخی بعدالتعدی وفاقه عودت
ایتسه شریک مرقومک امین اولمق صفقی عودت ایدر .

فرق

مستأجر ایله مستعیر بعدال مخالفه وفاقه عودب ایتسیله بری
اولمقلری مستودع کبی دیگر بعض امینلر بعدال مخالفه وفاقه
عودت ایتملریله بری اولورلر . بینلرنده کی فرق ۷۸۷ ماده
مراجعتله معلوم اولور .

﴿ ۸۱۵ ماده ﴾

﴿ مستعارك نفقه سی مستعیر اوزرینه در . ﴾ عاریت كرك
 آتی ۸۱۶ ماده وجهله مطلقه اولسون و كرك ۸۱۷ ماده وجهله
 موقته اولسون . زیرا مستعیر عاریتك منافعه مجانا مالك اولغله
 غرامت غنیمته كوره در قاعده سنه یعنی ۸۸ ماده سنه مبنی نفقه سی دخی
 آنك اوزرینه اولور . و برده عرف و عادتده مستعارك نفقه سی مستعیر
 اوزرینه در . « ۳۶ » ماده یه باق .

بو جهتله بر کیمسه دیگر کمنه یه شو حیوانی استعمال
 ایلیمك و آکایم ویرمك اوزره سكا ویردم دیسه عاریت اولوب
 یوخسه یم ویرمك خصوصی بدل اجاره عدیله بو عقد، اجاره
 اولماز .

مستعیر انفاقه اجبارمی

اولنور

بو ماده نك معناسی مستعیر، مستعارى انفاقه اجبار اولنور
 دیمك دكلدر . زیرا ۸۰۶ ماده یه ایضاح اولندیغی اوزره مستعیر
 دیلدیكى وقت عقد عاریتی فسخ ایده بیله چكى جهتله شو اجباره
 محل یوقدر . بلكه بونك معناسی شودر كه مستعیره دینیلور كه

دیلر ایسهك مستعاره اتفاق ایتده منفعتی استحصال ایله دیلر ایسهك عاریتی تركله معیره رد و اعاده ایدوب انفاقدن وارسته قال. ﴿بناءً علیه مستعیر عاریت﴾ حیوانی یدنده امساك ایله برابر مذکور ﴿حیوانه علف و یرمیوبده تلف اولسه ضامن اولور.﴾ شو مثالده امساك ایله برابر قیدینك فائده سی آنفا شرحا و یریلان ایضاحاتدن آكلاشیلور.

❧ ماده ۸۱۶ ❧

﴿اعارهٔ مطلقه ده یعنی معیرك اعاره بی زمان و مكان و بر نوع انتفاع﴾ و ۸۱۹ ماده وجهله شخص منتفع و شرط مفید ﴿ایله تفیید ایتدیكى صورتده عاریتی مستعیر دیلدیكى زمان و مكانده دیلدیكى وجهله استعمال ایده بیلور.﴾ و بشقه سنه دخی بالا عاره استعمال ایتدیره بیلور. زیرا مستعیر، ملك غیرده یعنی معیرك ملكنده تصرف ایتمكده اولوب بناءً علیه اول غیرك و یردیكى اذن اوزره یعنی على الاطلاق استعمال و تصرف ایده بیلور. «۹۶» ماده یه باق.

سوال، بوماده وجهله واقع اولان اعاره ده تمليك ایدیلان منافع، مجهول اولوب تمليك اولنان شیئك جهالتی بیع و اجاره کبی عقودده فسادى ایجاب ایدردی. «۲۱۳ و ۴۵۱ و ۴۶۰» ماده لره باق.

جواب ، « ۸۰۴ » ماده شرحنده ایضاح اولندیغی اوزره
 اعاره عقود لازمه دن اولیوب معیرک استدیکی زمان حق رجوعی
 اولق اعتباریله منافع مملکه نك جهالتی باعث نزاع اولماغله
 فساد اعاره یی ایجاب ایتمز . یعنی مستعیرک استیفایه تصدی ایلدیکی
 منافعك استیفاسنه معیر راضی اولماز ایسه همان اعاره دن
 رجوع ایله معاری استرداد ایده بیلور . فقط بیع واجاره کبی
 معاوضات عقود لازمه دن اولماغله آنلرده جهالت باعث نزاع
 اولور زیلی .

بوراده « نوع انتفاع ایله تقید ایتدیکی صورتده » دیمک
 مستعار حیوانه را کب اول یا خود یوک یوکت و مستعار خانه ده
 ساکن اول ویا آنده اشیا کی وضع ایت دیمک کبی بر صورته
 تقید ایتدیکی صورتده دیمکدر . تعیر دیکرله بوراده انتفاعجه
 اطلاق نفس منفعت اعتباریله دیمکدر . اما ۸۱۹ ماده ده کی
 اطلاق منتفعه نظرله در . بناءً علیه شو ایکی ماده تداخل ایتمز .
 دیلدیکی زمان و مکانه دیلدیکی وجهله دیمک بوکی اعاره ده
 مستعیر ، معیرک انتفاعی کبی انتفاع ایده بیلور .

شوقدر وارکه مستعیر مستعاری آخره ایجار یارهن ایده مز .
 نته کیم ۸۲۳ ماده ده بیان اولنیور جواهر الفقه .

اعاره نك اون آلتی

قسم اولسی

ایمدی بوماده ایله ۸۱۹ و ۸۲۰ ماده لردن مستفاد اولور که اعاره باشلوجه اون آلتی قسمدر . زیرا اطلاق و تقیددن عبارت بولنان ایکی شی زمان و مکان و انتفاع و منتفع و شرط مفیددن عبارت بولنان بش شی بیننده دوران ایدیور که ایکی نك بشه ضربنددن اون قسم حاصل اوله جغی کبی طرفینک مرکبا اخذندن ده درت قسم و جمله سنده اطلاق و یا جمله سنده تقیددن دخی ایکی قسم حاصل اولور . شویله که :

۱ زمانده اطلاق، مکان و انتفاع و منتفع و شرط مفیده تقیددر .

۲ مکانده اطلاق ، زمان و انتفاع و منتفع و شرط مفیده تقیددر .

۳ انتفاعده اطلاق ، زمان و مکان و منتفع و شرط مفیده تقیددر .

۴ منتفعده اطلاق ، زمان و مکان و انتفاع و شرط مفیده تقیددر .

۵ شرط مفیده اطلاق، زمان و مکان و انتفاع و منتفعده تقیددر .

۶ زمانده تقید ، مکان و انتفاع و منتفع و شرط مفیده

اطلاقدر . « ۸۱۷ » ماده‌نك برنجی مثالیه بو قسمه اشارت اولنیور .

۷ مكانده تقییده ، زمان و انتفاع و منتفع و شرط مفیده اطلاقدر . مجله‌نك ۸۱۷ ماده‌سنده « و بر محله كتمك اوزره استعاره ایتدیكى حیوان ایله الخ » دینلمسی بو قسمه اشارت ایچوندر بحر .

۸ انتفاعده تقیید ، زمان و مكان و منتفع و شرط مفیده اطلاقدر . « ۸۱۸ » ماده‌سنده موضوع بحث اولان عاریت بو قسم ثامندر . زیرا مذکور مادهده انتفاعده تقیید مذکور اولغله زمان و مكانده دخی تقیید قصد اولنسه ۸۱۷ ماده‌نك عینی و مستدرک اولسی لازم كله جکندن زمان و مكانده اطلاق قصد اولنسی لازم كلوركه احوالد ، بو قسم ثامن حاصل اولور . ۹ منتفعده تقیید ، زمان و مكان و انتفاع و شرط مفیده اطلاقدر . « ۸۲۰ » ماده‌یه باق .

۱۰ شرط مفیده تقیید ، زمان و مكان و انتفاع و منتفعده اطلاقدر . ائمدی معیر استعمالی شرط مفید ایله تقیید ایتدكه شرط مذکور دخی معتبر اولوب مستعیر آكا مخالفت ایده‌مز . شویله كه معیر حیوانی اعاره ایتدیکنده مستعیره « یولارینی اخذ ایت صالیورمه زیرا آنجق بویله طوتیلور » دیوبده اوده بکی دیدکدن برمدت صکره یولاری صالیورمكه یعنی کوشتمكه

حيوان سرعتله يوريمكه باشلاديني جهتله دوشوب تلف اولسه
ضامن اولور. تكملة رد مختار .

۱۱ زمان و مكانده اطلاق ، انتفاع و منتفع و شرط
مفيدده تقيددر .

۱۲ زمان و مكان و انتفاعده اطلاق ، منتفع و شرط
مفيدده تقيددر. اما زمان و مكان و انتفاع و منتفعده اطلاق،
شرط مفيدده تقيد قسمي اوچنچي قسمدن عبارتدر .

۱۳ زمان و مكانده تقيد ، انتفاع و منتفع و شرط
مفيدده اطلاقدر. مجله نك ۸۱۷ ماده سنده موضوع بحث اولان
عاريت بوقسم ثالث عشر عاريتدر. زيرا مذكور ماده ده زمان
و مكانده تقيد مذكور اولغله انتفاعده دخی تقيد قصد
اولسه ۸۱۸ ماده نك عيني و مستدرك اولسي لازم كله جكنندن
انتفاعده اطلاق قصد اولنسي لازم كلور . نته كيم شرحنده
تفصيل اولور .

۱۴ زمان و مكان و انتفاعده تقيد ، منتفع و شرط
مفيدده اطلاقدر. بونك حكمي ۸۱۹ و ۸۲۰ ماده لرده موضوع
بحث اولمشدر . اما زمان و مكان و انتفاع و منتفعده تقيد
و شرط مفيدده اطلاق قسمي بشنچي قسمدن عبارتدر .

۱۵ جمله سنده اطلاقدر. مجله نك بوماده سيله ۸۱۹ ماده سنك
مجموعندن بوقسم ميدانه كلور .

۱۶ جمله سنده تقيددر كفاهيه شرح الهدايه مع الايضاح .

مجاهده شو اون آلتنجی قسم ذکر اولنماش ایسهده ۸۱۷ و ۸۱۸ و ۸۲۰ مادهلرک مجموعندن بو قسم استنباط اولنور شویله که اعاره ۸۱۷ ماده وجهله زمان و مکان ایله و ۸۱۸ ماده موجبنجه بر نوع انتفاع ایله و ۸۲۰ ماده موجبنجه منتفع ایله تقييد اولندقدده مستعير آکا مخالفت ایدهمن یعنی زمان و مکان ایله تقييده اصلا مخالفت ایدهمن و منتفع ایله تقييده مستعملینک اختلافيله مختلف اولان شیلرده مخالفت ایدهمن نته کیم بروجه آتی ایضاح اولنور .

تقييدات خمسیه موافقت

لازم اولوب اولدیغی

ایمدی بو بش شیدن زمان و مکان و شرط مفیدله معیر طرفندن تقييد اولندقدده مستعيرک هر حالده آکا موافقتی لازم اولوب مخالفت ایدهمن .

من حیث الانتفاع تقييده کلنجه: مافوقه تجاوز صورتيله مخالفت ایدهمن . اما مافوقه تجاوز ایتیموبده خیره مخالفت ایدرسه جائز اولور . « ۸۱۸ » مادهیه باق .

ومن حیث المنتفع تقييده کلنجه بونک حکمی ۸۲۰ ماده سنده ذکر اولندیغی اوزره مستعملینک اختلافيله مختلف اولان شیلرده معتبر اولوب مختلف اولمیان شیلرده معتبر دکلدور .

بو ماده ده « ديلديكي زمان و مكانده » تعييري زمان و مكانده كي اطلاقه ناظر اولديغي كي ديلديكي وجهله تعييري انتفاعده كي اطلاقه ناظر اولغله لف ونشري مرتبدر .

(فقط) اعاره مطلقه ده اطلاقك معتبر اولسي صراحة ياخود دلالة تقيد دايلى بولنديغي تقديرده اولوب اما صراحة تقيد اولسه بيله اعاره مذكوره دلالة يعنى (عرف و عادت ايله تقيد ايدر .) ۴۵ ماده يه باق . بناءً عليه مستعير عاريتي عرف و عادت بلديه مخالف صورتده استعمال ايدوبده تلف اولسه ۸۱۴ ماده يه مبني ضامن اولور .

شو قدركه مجرد بو وجهله عرف و عادت بلده ايله تقيد ايتسييله اعاره ، اعاره مطلقه قسمندن چقمش اولماز .

(مثلا بر كيمسه بار كيريني اولوجهله) يعنى زمان و مكان و انتفاع و كذلك منقطع جهتنجه (مطلق اوله رق اعاره ايتدكه آكا) ۱ (ديلديكي وقت بنر) زمانده كي اطلاقه شاملدر ۲ (و ديلديكي محله كيدر) مكانده كي اطلاقه مثالدر . و ديلرسه كنديسي بنر و استر ايسه بشقه سني اركاب ايدر .

بو محل كرك داخل شهر اولسون و كرك خارج شهر اولسون چكمنده مساويدر جواهر الفقه .

كیده ييلور تعييري كلكدن احتراز ايچون اوليوب كتديكي محلدن راكب اولوب كلك ياخود يوك يوككتوب كتورمك دخي جائزدر . حتى بر كيمسه چكمنجه يه قدر بر حيوان استعاره

ایتدکده اورایه کیدوب کله بیلور . و برکیمسه بووجهله مطلق اوله رق استعاره ایتدیکی بارکیر ایله بر محله کیدوبده اوراده بر آی امساك ایتدکن صکره بارکیره بر معتاد یوک یوکلتهسه ده تلف اولسه ضامن اولماز . اما اجاره ده یالکز کیده بیلوب لکن کله مز .

فرق ایکی وجهله در . وجه اول ، ۸۲۸ ماده ده بیان اولندیغی اوزره عاریتده رد واعاده مستعیر اوزرینه اولوب مستعیر ایسه آنجق کله رد ایده بیلور . اما اجاره ده رد مأجور موجر اوزرینه در . « ۵۹۴ » ماده یه باق .

وجه ثانی ، اعاره تبرع اولغله آنده تسامح جاری ایکن اجاره معاوضه بولنمغله آنده مضایقه مرعیدر تکمله رد مختار .
 ﴿ فقط عرف وعادت اوزره ایکی ساعتده کیدیله جک محله ﴾ عاریت بارکیر ایله خلاف معتاد اوله رق ﴿ بر ساعتده کیده مز . ﴾ نته کیم یوک ایچون حیوان استعاره اولنوبده یوک تعیین اولنماش ایسه مستعیر دیلدیکی شیئی یوکلته بیلوب فقط حیوانک طاقتدن زیاده یوکلته مز . زیرا مطلق اذن متعارفه مصروف اولوب فوق الطاقه یوک متعارف دکدر . و برکیمسه فوق الطاقه یوکی کندی حیواننه بیله یوکلته مز تکمله رد مختار .
 ﴿ كذلك ﴾ اولوجهله ﴿ مطلق اوله رق اعاره اولنان بر خان اوطنه سنده مستعیر دیلرسه ﴾ کندوسی ﴿ ساکن اولور . و دیلرسه امتعه وضع ایدر . ﴾ شومثال انتفاعده اطلاقه مثالدر .

(فقط عرف وعادتک خلاقی اوله رق ایچنده) بنایه وهن
وضرر کتوره جک مثلاً (تیمور جیلک ایده مز .)

۸۱۷ ماده

(اعاره) انتفاعده و منتفعده اطلاق اولندیغی حالده
(زمان و مکان) یاخود شرط مفید (ایله تقیید اولندقدده
قید) و شرط (معتبر اولوب مستعیر آکا) یعنی زمان و مکان
یاخود شرط مفید ایله اولان قیده (مخالف ایده مز) ایدرایسه
غاصب حکمنده اوله جغندن ضامن اولوره . زیرا مستعیر ، غیرک
ملکنده تصرف ایتکده اولغله اول غیر آکا نه وجهله اذن و یرمش
ایسه آنجق اولوجهله استعمال ایده بیلور . یعنی اعاره زمان
و مکان یاخود شرط مفید ایله مقید اولدیغی حالده انتفاعده
و منتفعده مطلق اولنجه مستعیر تعیین قلان زمان و مکانده
و ذکر اولنان شرط دائره سننده اولق اوزره دیلدیکی کبی
انتفاع ایده بیلور . تعبیر دیکرله مستعار ایله آنجق اول وقت و مکان
معینده اول شرط دائره سننده انتفاع یا آنی بشقه سنه اعاره ایده بیلور .
خلاصه ، یالکیز زمان و مکان ایله مقید اعاره من حیث
الانتفاع و من حیث المنتفع علی اطلاقها باقی اولغله مستعیر آتی
علی الاطلاق استعمال و انتفاع ایده بیلور . یعنی دیلر سه بالذات
انتفاع ایدر و دیلر سه بشقه سنه انتفاع ایتدیرر . مستعار ، کرک

مستعملینک اختلافیه مختلف اولان شیلردن اولسون و کرک اولسون .

شرح اشارت اولندیغی اوزره مجلهده زمان و مکان ایله تقید تعیری احترازی دکلدر . چونکه معیر استعمالی شرط مفیدایله تقید ایتدکده شرط مذکور دخی معتبر اولوب مستعیر آکا مخالفت ایده من . نته کیم ۸۱۶ ماده شرحنده مثالی ذکر اولندی :

عمداده سهواده مخالفت ایده من

مجلهده مخالف ایده من دیه مسئله نک علی الاطلاق ذکرندن اکلشیلور که عمدا مخالفت ایده میه جکی کبی سهوا دخی مخالفت ایده من .

عمدا مخالفته مثال : (مثلا اوچ ساعت بینمک اوزره استعاره اولنان حیوانه) اوچ ساعت بینیلهرک مراد اولنان محله کیدیله بیلور . و دیلر سه کندوسی بینر واستر ایسه بشقه سنی بیندیرر . اما (درت ساعت بینیله من .) مستعیر درت ساعت بینوبده حیوان تلف یا قیمته نقصان طاری اولسه ضامن اولور . اما هیچ بر ضرر کلیوبده سالما صاحبنه تسلیم ایدر ایسه ضمان لازم کلز .

و ۸۲۶ مادهده بیان اولندیغی اوزره بو زماندنصکره

حيوان امساك دخی ايديله مز. امساك ايديلوبده حيوان تلف اولسه
ضامن اولور. نته کيم اجاره ده دخی حکم بويله ايدوکی ۵۴۸ ماده ده
مصر حدر. یعنی شوقدر مدت استعمال ايدلمک اوزره استيجار
ايدیلان حيوان اول مدتدن زیاده استعمال ايديله مز. بوجهته
اجاره ايله عاره متحد ايسه ده ديگر جهته ده فرق واردر .

شويله که عاره ده «۸۲۶» ماده ده ذکر اولنديغی اوزره
بوزماندنصکره امساك ايديله ميوب صاحبي کلوب استمسه بيله
ردی لازم کلدیکی و بناء عليه رد ايتسه ده تلف اولسه ضمان
ايجاب ايتدیکی حالده اجاره ده بوزماندنصکره استعمال
ايديله ميوب اما صاحبي کلوب آلمديغی جهته يندنه امساك ايسه ده
تلف اولسه ضمان لازم کلز . سبب فرق شودر که ۵۹۴ ماده
حکمنجه اجاره ده رد موجره عاندايکن عاره ده رد و اعاده «۸۳۰»
ماده موجبنجه مستعيره راجعدر .

محله نك شو مثالی زمانده تقيدك مثاليدر.

﴿ و بر محله کتمک اوزره استعاره اولنان حيوان ايله ﴾
اول محله کيدوب کله بيلور و اول محله کيدوب کلک اوزره
بشقه سنه عاره ايد بيلور واقعات. اما ﴿ بشقه محله کيديله مز. ﴾
حتی حیوانی صوarmق اوزره دره يه کوتور و بده تلف اولسه
ضامن اولور . نته کيم ۸۱۴ ماده شرحنده بیان اولمشیدی .
اما حیوانه هيچ بر ضرر کلدین صاحبنه رد و اعاده اولسه
نسنه لازم کلز .

شو مثال، مكانده تقییدك مثالیدر .

مكان ايله تقیید صورتنده مكان مساوی یه

یا مكان اقصره کیتمك ویا خانهده

امساك ایتمك

معلوم اولمایدركه بو ماده وجهله اعاره مكان ايله تقیید اولندقدن مستعیر، مكان و محل مسمان اقصر بر محله کیده جك اولسه ضمان لازم کله جکی کبی بر محله کیتمیوبده خانه سنده امساك ایده جك اولسه ینه ضمان لازم کله جکی بعض کتب فقهیه ده ذکر اولنمش و حیوانك آخوردن امساکی حیوانه مضر ایدوکی بیان ایدلمشدر. نته کیم بر محله کیدمك اوزره استعاره ایدی لان حیوان ايله مسافه جه اول محله مساوی دیگر بر موضعه کیدیلوبده حیوان تلف اولسه ضمان لازم کله جکی خانه ده ذکر اولنمشدر رد مختار و تکملته. «۸۱۴» ماده شر حنده بو مسئله اجمالا ذکر اولنمشیدی .

حالبوکه دیگر بعض کتب فقهیه ده آتی البیان ۸۱۸ ماده سنك فقره اخیره سنده محرر مسئله فقهیه ینه تمسکله شوایکی صورتده یعنی مكان مسمان اقصر بر محله کیدیله جك اولنجه یا هیچ بر محله کیدلیوبده حیوان آخوردن امساك ایدیلنجه ضمان لازم کیه جکی بیان اولنمشدر .

سنگ ایچون ۶۴ ماده یه تمسکه مجله ده یعنی وبر محله کیتمک اوزره استعاره اولنان الخ فقره سنده اولکی قول اختیار اولمشدر دیمک واردر. اجاره ده دخی حکم بو وجهله ایدوکی ۵۴۶ ماده ایله شرحنده بیان اولمشدر.

سها مخالفته مثال: برکیمسه فلان محله قدر کیتمک ایچون برندن بر حیوان استعاره ایتمک اوزره معیره بر شخصی رسول کوندر ویده اوشخص خطا ایدرک دیگر بر موضعه کیتمک اوزره استعاره ایتمشیکن رسول، مرسلنه بونی بیان ایتماکله مرسل اول موضعه کیتدکده ضمان لازم کلز ایسه ده اول محله کیدوبده حیوان تلف یا قیمتته نقصان طاری اولسه ضامن اولور. ومرسل ضامن اولدینی شيله رسولنه رجوع ایده مز.

❧ ماده ۸۱۸ ❧

﴿اعاره﴾ زمان و مکانده اطلاق اولندینی حالده ﴿بر نوع انتفاع ایله تقیید اولندقدده مستعیر مأذون اولدینی انتفاعک مافوقه تجاوز ایده مز﴾ زیرا مافوقه تجاوزله اول مستعاردن انتفاع ایتمک غیرک مالنده بلا اذن تصرف اولوب بو ایسه ۹۶ ماده حکمنجه جائز دکدر. تجاوز ایدرده مستعار تلف یا قیمتته نقصان طاری اولور ایسه ضامن اولور.

﴿اما﴾ بعینه اول منفعتی استحصال ایده بیله چکی کی

﴿آكامساوی یا اھون صورتہ استعمال ایلہ مخالفت ایدہ بیلور﴾
یعنی اعارہ ، زمان و مکانہ مطلق اولدینی حالہ انتفاعہ
مقید اولنجه اطلاق قسمنی بروجه محرر مطلق اولہرق استعمالہ
صلاحیتی واریسہ دە قسم مقیدہ مافوقہ تجاوز طریقہ و تعبیر دیگرلہ
شرہ عدول ایلہ مخالفت ایدہ مز . فقط آنک مثالہ تجاوزلہ مخالفت
ایدہ بیلہ چکی کی خیرہ عدول ایلہ دخی مخالفت ایدہ بیلور .
زیرا معیرک تقیدی آنجق مفید اولورسہ معیر اولور تکملہ
رد محتار .

مکانہ مطلق اولہرق حیوان استعارہ اولسہ یعنی مثلاً
برکیمسہ دیگر کمنسہ یه شوآمی بر آی قولانمق اوزرہ اعارہ
ایتدم دیسہ بو اعارہ مصرہ محمول اولہرق مستعیر اول
حیوان ایلہ ایلہ خارج شہرہ چیقامن . چیقوبده تلف اولسہ
کړک استعمال ایلہ چقسون کړک بلا استعمال چقسون ضامن
اولور . نتہ کیم بووجه اوزرہ البسہ استعارہ ایتسہ شہرہ محمول
اولغلہ اول البسہ یی بالاستعمال شہرک خارجہ چقسہ ضامن
اولور . فقط استعمال ایتہرک شہرک خارجہ چیقارر ایسہ
ضامن اولماز . زیرا بوتقدیرده مستعیر خارج مصرده دخی مصرده
اولدینی کی البسہ یی حافظ عد اولنور واقعات .

خلاصہ ، اعارہ انتفاع ایلہ تقید اولندقدہ بو تقید یا
منفعہ کورہ در یعنی انتفاعک نوعہ نظرادر . ایشتہ بومادہ دە
بیان اولنان بودر .

و بتقید معتبر در . مستعار كرك مستعملینك اختلافیله
مختلف اولان شیردن اولسون آت والبسه کی و كرك اولسون
اوطه کی .

مثلا برکیمسه اوطور مق اوزره استعاره ایتدیکی اوطه ده
تیمور چیلک ایده مز . نته کیم اچاره ده دخی حکم بویله ایدوکی
۴۲۶ ماده ده بیان اولمشیدی .

یا خود بتقید منتفعه کوره در . ایشته ۸۱۹ ماده ده بیان
اولنان شودر . منتفع ایله تقیدك معتبر اولسی مستعملینك
احتمالیله مختلف اولیان شیده در . ایشته منفعت ایله تقید ایله
منتفع ایله تقید بیننده فرق واردر . نته کیم اچاره ده دخی حکم
بویله ایدوکی ۴۲۷ و ۴۲۸ ماده لرده مذکوردر .

فقره اولایه برنجی مثال ، (مثلا بغدادی یوکلتمك ایچون
استعاره اولان حیوانه) وزنده بغدایه مساوی اولسه بیله (تیمور
یا خود طاش) یا کرپیج یا پموق یا صمان یا اودون یا خود خورمه
(یوکلدیله مز .) زیرا هر نقدر وزنده مساوات اولسه بیله مثلا
تیمور حیوانك ظهرنده محل واحده اجتماع ایدر و پموق ایسه
حیوانك ظهرنده چوق یری اخذ و محل حملی تجاوز ایلر .

فقره ثانییه برنجی مثال ، (اما) بغدادی یوکلدیله جکی کی
(بغدایه مساوی یا خود آندن دهـ اخف بر یوك تحمیل ایدهـ
بیلور .) بو اخفت وزنده اولمدیغی آنفا و یریلان ایضا حاددن
آکلاشلدی . « ۵۵۹ » ماده یه و شرحه باق .

فقرهٔ ثانیه‌یه ایکنجی مثال ، فلان تارلای نطاس ایتک
اوزره استعاره ایتدیکی اوکوز. او تارلای یاخود دها یموشاق
دیگر تارلای نطاس ایده بیلور .

فقرهٔ اولایه ایکنجی مثال ، اما اول نارلادن دها قاتی
ونطاسی آغیر دیگر تارلای نطاس ایدمز . ایدوبده تلف اولسه
ضامن اولور .

فقرهٔ اولایه اوچنجی مثال ، مستعیر بالذات انتفاع ایتک
یاخود فلانه ایتدیرمک اوزره دیه تقیید اولندقدہ رکوب حیوان
کبی مستعملینک اختلافله مختلف اولان شیرده بوتقیده مخالفت
جائز دکلدر .

فقرهٔ ثانیه‌یه اوچنجی مثال ، اماسکنی و حمل کبی مستعملینک
اختلافله مختلف اولیان شیرده بووجهله تقیید معتبر اولمامغله
مستعیر بنفسه وبغیره دیلیدیکی وجهله انتفاع ایده بیلور .

فقرهٔ اولایه دردنجی مثال ، ﴿ وکذاک بینمک ایچون
استعاره اولنان حیوانه یوک یوکدیلهمز . ﴾

فقرهٔ ثانیه‌یه دردنجی مثال ، ﴿ اما یوک ایچون استعاره
اولنان حیوانه بینله بیلور . ﴾ نته کیم اجاره ده دخی حکم بویله
ایدوکی ۵۵۰ و ۵۵۸ ماده لرده بیان اولنمشدر .

معیر طرفدن تعیین اولنان انتفاعه

مخالفت اوچ قسمدر

شو مادهنك ایضاخه بروجه آتی مبادرت اولنور .
شویله که : مسمايه یعنی معیر طرفدن تعیین قننان انتفاعه
مخالفت بروجه آتی اوچ قسمه تقسیم اولنور .
قسم اول ، مخالفت مثله اولمقدر که بو مخالفت جائزدر .
شو یغین بغدادین بش کیله یوکتتمک اوزره استعاره اولنان
حیوانه بویغین بغدادین بش کیله یاخود فلان آدمک بش کیله
بغدائی یوکتتمک اوزره استعاره اولنان حیوانه بشقه بر آدمک
بشقه بغدائی یوکتتمک کی .

الحاصل ، بونده تعیین معتبر اولما مغله بوکا مخالفت جائز
اولدینی جهتله بوندنطولایی حیوانه بر ضرر ترتب ایتسه ۹۱
مادهیه مبنی مستعیره ضمان لازم کلز . زیرا معیرک تقيیدینک
معتبر اولسی مفید اولمغله مشروطدر بحر .

قسم ثانی ، مخالفت جنسندمه اولمسیدر . بو تقدیرده نظر
اولنور . مخالفت خیره ایسه یعنی یوکلدیلان یوک ضررجه
تسمیه قننان یوکردن اکر خفیف ایسه شو مخالفت جائزدر .
بش کیله بغدای یوکتتمک اوزره استعاره اولنان حیوانه بش
کیله آرپه یوکتتمک کی . بوصورتده حیوان تلف اولسه مستعیره

ضمان لازم کلز . « ۹۱ » ماده یه باق . و مخالفت مذکوره شره
یعنی آندن شدید ایسه بو مخالفت جائز دکلدر . ایدر ایسه
ضمان لازم کلور . مجله نك مثاللرنده اولدینی کبی . نته کیم الی
قیه بغدای یوکلتمک اوزره استعاره ایتدیکی حیوانه الی قیه
صمان یوکلته مز . زیرا صمان قبا اولمغله حیوانك ظهرندن محل
حملدن زیاده محل اخذ ایتك صورتیله حیوانه مضر در تکمله
رد مختار .

لکن بش کیله بغدای یوکلتمک اوزره استعاره ایدیلا
حیوانه بش بچق کیله آرپه یوکلتوبده فقط بو بش بچق کیله
آرپه وزنا بش کیله یه مساوی اولنجه ضمان خصوصنده اختلاف
فقهها واقع اولمشدر . تنفیحه عدم ضمان مصرح اولدینی کبی
ولوالجی دخی عدم ضمانك صحیح ایدوکنی ذکر ایلمشدر .
هدایه و نهاده ایسه بو مخالفت شره مخالفت عدم اولنهرق
ضمان لازم کله چکی بیان وشعیر دایه نك ظهرندن حظه دن زیاده
محل اخذ ایده چکی جهته حیوانه مضر ایدوکی اتیان اولمشدر بحر .
قسم ثالث ، مخالفت قدرده یعنی زیاده ده اولمقدر .

زیادده دینلدی . زیرا نقصانه مخالفت ، مخالفتدن صایلمیوب
موافقت اولدینی مجله نك ۱۷۸ ماده سندن مستفاد اولور . الی
کیله بغدای یوکلتمک اوزره استعاره اولنان حیوانه قرق کیله
بغدای یوکلتمک کبی .

شو مخالفت جائز دکلدر . بناء علیه بو وجهله مخالفت

وقوع بولدقده نظر اولنور . يوكتيلان يوكه حيوانك تحملى وار ايسه تسميه قلنان يوكدن زياده مقدارى نسبتنده مستعير ضامن اولور . شويلاه كه : مثلاً بش كيله بگداي يوكتمك اوزره استعاره اولان حيوانه آلتى كيله بگداي يوكتيلوبده حيوان تلف اولسه حيوانك آلتى كيله بگدايى قالديرمغه تحملى اولنجه مستعير اول حيوانك يالكز سدس قيمتى ضامن اولور . زيرا ضمان ، مأذون فيـه اولان مقدار ايله غير مأذون فيـه اولان مقداره توزيع اولنوب مأذون فيـه اولان مقداره ضمان ساقط اولور . واكر تحملى يوغيسه مستعير ، حيوانك كل قيمتى ضامن اولور . زيرا بو تقديرده مستعير ، اول حيوانى استهلاك ايتمش اولور .

بو مسئلهـنك نظيرى اجارهـده يعنى ۵۵۹ ماده و شرحـنده تفصيلات لازمهـسيلاه ضرور ايتمشدر .

مخالفتده ديكر اقسام

مخالفت هم مثلهـده همده قدرده و كذا هم جنس وهمده قدرده اولمق صورتلى اولهـبيلهـجكنه كوره مخالفت بش قسم اولمى لازم كلورسهـده بوايكي صورتك برنجيسى اوچنجيسنده داخل اولدينى كېي ايكنجيسى دخی ايكنجى ايله اوچنجى قسمده داخل اولمقلايروجه قسم عد ايدلمكه شايان دكلدر .

اون کيله طحن ايچون حيوان
استعاره اولنوب اون برکيله
طحن ايدلسه

معلو اولمليدركه بر کيمسه اون کيله بغداديك طحنی ايچون
حيوان استعاره ايدوبده اون برکيله طحن ايتسه ده حيوان تلف
اولسه جميع قيمتی ضامن اولور. زيرا وقتا که اون کيله بي طحن
ايلدی اذن تمام اولوب آندنصكره اون برکيله نك طحنده
استعمال، بلا اذن المالك وبناء عليه غاصب اولور. فقط حمل
بويله دكلدر چونكه حمل دفعه واحده ده وقوعبولور. بوجهته
حملده بعضا يالكز زياده مقدارك ضمانی لازم كلديكي حالده طحنده
جميع قيمتك ضمانی اقتضا ايديور.

❧ ۸۱۹ ❧ ماده

﴿معير، اكر منتفعی تعين ايتمكسزين مطلق اوله رق اعاره
ايتمش ايسه مستعيرك آنى اطلاق اوزره استعماله صلاحیتی
واردر.﴾ اطلاقك معناسی بروجه آتی تفسیر اولنور تکمله رد مختار.
مطلق اوله رق عباره سی منتفعی تعين ايتمكسزين عباره سیله
تفسیر اولندی. زيرا ۸۱۶ ماده ده دخی بر اطلاق وارايدیسه ده
آنده کی اطلاق بشقه معناده ایدی تکمله رد مختار.

معلوم اولماید که بو عبارتده ایکی اطلاق واردر.
 رنجیسی مطلق اوله رق عبارتده کی اطلاقدر. بو اطلاقک
 معناسی بوجه آتی ایضاح اولنور.

معار ایکی نوعدر. نوع اول، مستعملینک اختلافیه مختلف
 اولیان معاردر. خانه کی نوع ثانی مستعملینک اختلافیه مختلف
 اولان معاردر. البسه ورکوب ایچون آت کی .

اطلاقده یعنی مجله نك مطلق اوله رق عبارتده کی اطلاقده
 آندن اولکی عبارتدن قطع النظر ایکی احتمال واردر . احتمال
 اول ، نص علی الاطلاقدر . یعنی معیر ، مثلاً شو حیوانمی
 دیلیدیکی ارکاب ایتک اوزره سکا اعاره ایتدم دیمکدر. معیر ،
 بو وجهله اطلاق اوزره نص ایتدیکی تقدیرده مستعیرك آتی
 اطلاق اوزره استعماله صلاحیتی واردر. معار كرك مستعملینك
 اختلافیه مختلف اولان شیلردن اولسون و كرك اولیان شیلردن
 اولسون .

اجارده اطلاق بو معناده یعنی نص علی الاطلاق معناسنده
 ایدی. «۵۵۲» مادهیه باق.

احتمال ثانی ، سکوته شامل اولان اطلاقدر . یعنی معیر ،
 شو حیوانمی سکا اعاره ایتدم دیمکدر . كرك دیلیدیکی ارکاب
 ایتک اوزره دیسون كرك دیسون یعنی بو تعبیری علاوه
 ایلمسون .

بو احتمال ثانی ایله اولان اطلاق ایله نوع اول مستعار

آخره اعاره اولنه بیله جکینه اشتباه یوغیسه ده نوع ثانی اولان مستعار آخره اعاره اولنه بیلمسندده اختلاف فقها واقع اولمشدر. شویله که زیلی اعاره اولنه میه جغنه دائر اداره کلام ایتمش و دیمشکه « ینبی ان یحمل هذا الاطلاق الذی ذکره هنا فیما یختلف باختلاف المستعمل کاللبس والزراعة علی ما اذا قال علی ان اربک علیها من اشاء کما حمل الاطلاق الذی ذکره فی الاجارة علی هذا » و هدایه صاحبی دخی اعاره اولنه بیله جکینی بیان ایتمش و دیمشدر که « لو استعار دابة ولم یسم شیأه ان یحمل ویعیر غیره الخ ». ایمدی مجله ده مذکور مثالدن مستفاد اوله جغی اوزره مجله زیلعینک بیاننه التفات ایامیوب صاحب هدایه نک تصریحی قبول ایلمشدر. شو حالده اعاره ایله اجاره بیننده فرق بولمق ایجاب ایدر که اجاره ده نص علی الاطلاق لازم ونص علی الاطلاق ایدلدیکی کی راکب دخی تعیین ایدلمسه اجاره فاسد اولوردی. « ۵۵۲ » ماده یه باق. اعاره ده ایسه سکوت کافی اولیور. فرق ، ۸۰۴ ماده شرحنده کی مسئله خامسه یه مراجعتله سکا ظاهر اولور .

ایکنجیسی ، اطلاق اوزره استعماله صلاحیتی واردر جمله سنده کی اطلاقدر که بو اطلاق مجله ده بوجه آتی تفسیر اولنیور .

(یعنی) مستعیر (دیلمسه آتی) بشقه سنه استعمال ایتدیرمدین (کندوسی استعمال ایدر. و دیلمسه) کندوسی استعمال ایتدین

یالکز ﴿ بشقه سنه اعاره ایله استعمال ایتدیرر ﴾ زیرا اعاره
 « ۷۵۶ » ماده ده ذکر اولندیغی اوزره تملیک منافعدن عبارت
 اولمغله مستعیرک آنی اعاره سی جائزدر. چونکه مالکک، مالک
 اولدیغی شیئی آخره تملیکه اقتداری واردر. مستأجرک ایجاره
 مالک اولمی کی. « ۵۸۷ » ماده یه باق بحر.

مجله ده « دیلر سه و دیلر سه » دنیا یور. یعنی مستعیرک بو ایکی
 منفعندن یالکز بریسی اختیاره صلاحیتی اولدیغی اشعار اولنیور.
 زیرا مستعملینک اختلافیه مختلف اولان عاریتده مستعیر
 ایکسینک بینتی جمع ایده مز. نته کیم شرحا یالکز قیدیه بوکا
 اشارت اولندی.

بناء علیه برکیمسه رکوب ایچون بر حیوان استعاره ایدوبده
 هم کندوسی را کب اولسه همدی دیکرینی ارکاب ایتسه یعنی
 ترکنه آلسده حیوان تلف اولسه ایکسینی قالدیرمغه حیوانک
 تحمیلی واریسه نصف قیمتی ضامن اولور. زیرا تلف ایکسینک
 رکوبندن حاصل اولوب بریسی مأذون فیه اولمغله آکا اصابت
 ایدن مقدار هدردر تکمله رد مختار.

اما حیوانک ایکسینی دخی قالدیرمغه تحمیلی یوغیسه کل قیمتی
 ضامن اولور. « ۵۵۱ » ماده شرحی لاحقه سنه باق. امامستعملینک
 اختلافیه مختلف اولیان شیلرده ایکسینک بینتی جمع ایده بیلور می؟
 ۴۲۸ ماده شرحنده ایضاح اولندیغی اوزره اجاره ده جمع
 ایده بیلور دی.

﴿ عاریت ، کرک اوڤه کی مستعملینک اخلاقیه مختلف اولیان شیلردن اولسون و کرک بینک آتی کی مستعملینک اختلافیه مختلف اولان شیلردن اولسون. ﴾ یعنی اشبو ایکی صورتده دخی مستعیر، مستعاری آخره اعاره ایده بیلور. بوقروده بینک آتی دینلدیکه بو آت مستعملینک اختلافیه مختلف اولان شیلردن ایدوکی ۴۲۷ ماده شرحنده بیان اولندی. اما یوک آتی مستعملینک اختلافیه مختلف اولیان نوعدندر. «۵۵۱» ماده شرحنه باق.

﴿ مثلاً بر کیمسه اوڤه می سکا اعاره ایتدم دیدیکی ﴾ و مستعیر دخی اعاره یی قبول ایلدیکی ﴿ صورتده مستعیر آنده دیلرسه کندو اقامت ایدر. و دیلرسه بشقه سنی اسکان ایدر. ﴾ اما هم کندوسی ساکن اولسه و همده بشقه سنی اسکان ایتسه جائز اولور می؟ آجاردده جائز ایدی «۴۲۸» ماده شرحنه باق. بو مثال، مستعملینک اختلافیه مختلف اولیان مستعاره مثالدر. ﴿ و کذا ﴾ بر کیمسه ﴿ شو ﴾ بینک ﴿ آتی سکا اعاره ایتدم دیدیکی ﴾ و مستعیر دخی قبول ایتدیکی ﴿ صورتده مستعیر دیلرسه اول آته کندو بینر و دیلرسه بشقه سنی بیندیرر. ﴾ زیرا معیر مستعیره مطلقاً انتفاع ایله امر ایدوب مطلق ایسه دیلدیکی انتفاعه استدیکی وقته عام و شامل اولور «۶۴» ماده یه باق. و تعیین جهتی کندوسنه یعنی مستعیره عائددر که بوده یعنی تعیین دخی مستعیرک فعلیه اولور.

بو مثال ، مستعملینک اختلافیه مختلف اولان مستعاره
مثالدر .

اما هم کندوسی را کب اولوب همده دیلیدی کنی ارکاب
ایده من .

مستعار آتہ یوک یوکتتمک

مسئله سی

شو مثالده کی آتہ مستعیر کنیدی یوکنی یوکتتمک یاخود
یوک یوکتتمک اوزره آخره اعاره ایلمک صلاحیتی وارمیدر ؟
باقیلور . اول آت عرب قصر اقلری کبی یالکز بینمک اوزره
معد ایسه بو مثال وجهله علی الاطلاق اعاره ایدلسه بیله یوک
یوکتتمک جائز دکلدر . زیراعاده بونلره یوک یوکتتیه میوب عرفا
معروف اولان شی ایسه مشروط کییدر . « ۴۳ » ماده یه باق .
بو جهتله مستعیر آکا یوک یوکتدکده ولو که حیوانک
طاقی قدر یوکتته ضمان لازم کلور تکمله رد مختار .

نته کیم بر کیمسه شو البسه بی سکا اعاره ایتدم دیدیکی
صورتده مستعیر دیلرسه اول البسه یی کندو کیر و دیلرسه
بشقه سنه کیديرر جواهر الفقه .

مطلق اعارذه فعل معیر ايله
تعیندن صکره دیگره انتفاع
ایتدیر مکده اختلاف فقها

معلوم اولمیدر که بو ماده وجهله مطلق اوله رق اعاره
ایدلمش و مستعملینک اختلافیله مختلف بولنش اولان برمالده کی
انتفاع، مستعیرک فعلیله تعین ایتدکن صکره آرتق بشقه سنه
انتفاع ایتدیرمک یعنی مثلاً مجله مثالنده مذکور آته اول
مستعیر، راکب اولدقن صکره بشقه سنی ارکاب ایتمک یا خود
اولا مستعیر بشقه سنی ارکاب ایتدکن صکره کندوسی راکب
اولمق حق و صلاحیتی حائر بولندیغنی بعض فقها بیان ایلمش
و کافیده و زیلعیده بو قول صحیح ایدوکی ذکر اولنمشدر که قول
مذکور مجله نک ۵۵۲ ماده سنک فقره اخیره سنه موافق بولنمشدر.
ایمدی بو قوله کوره مستعیر مثلاً اولا کندوسی راکب اولدقن
صکره دیگرینی ارکاب ایتسه ده حیوان تلف اولسه ضمان لازم
کله چکی کی اولا دیگرینی ارکاب ایتدکن صکره کندوسی
راکب اولسه ده حیوان تلف اولسه ینه ضمان لازم کلور.
زیرا فعلاً راکب تعین ایتدیکی جهتله آندن صکره آکا مخالفت
تعدی اولور.

چالبوکه دیگر بعض فقها مستعیر، مذکور حق و صلاحیتی

حائز اولدیغیدن متلا مجله مثالنده مذکور بولنان آته اولا مستعیر را کب اولدقدن صکره بشقه سنی ارکاب ایتسه ده حیوان تلف اولسه ۹۱ ماده یه مبنی ضمان لازم کلیه جکنه قائل اولمشلردر. زیرا برکیمسه مستعیردن مذکور آتی عاریت آلهرق آکا را کب اولوبده حیوان تلف اولسه اول کیمسه اول آتی مستعیرک اذن وتملیکی ایله استعمال ایتمش اولغله ضمان لازم کلیه جکی کبی مستعیر اولا اول آته بشقه سنی ارکاب ایتدکدن صکره کندوسی را کب اولوبده حیوان تلف اولنجه ضمان لازم کلامسی بطریق الاولوبه در. چونکه مستعیر، منافعه مالک اولمق جهتیه استعمال ایلمشدر مالک اولسه ایدی بشقه سنه تملیک ایده من ایدی تکمله رد مختار وقاضیخان.

ایمدی مجله ده شواییکی قولدن قنغیسی اختیار ایدلدیکنه دائر اشارت یوغیسه ده ملتی کبی متون فقهیه ده وهدایه ده قول اول اختیار اولنش وبالاده ذکر اولندیغی اوزره کافی وزیلعی قول مذکوری صحیح عد ایلمش اولغله قول مذکورله عمل اولمق اقتضا ایدر. حالبوکه اجاره ده مسئله قول ثانیه موافق صورنده قبول ایدلمشدر. «۵۵۲» ماده یه باق. بناء علیه بومسئله ده اجاره ایله اعاره آرهنده فرق بولمق ایجاب ایدرکه فرق دخی اجاره معاوضاتدن اولغله مما کسه اوزرینه مبنی واعاره ایسه تبرعاندن بولنغله مسامحه اوزرینه مبتنی بولنمشدر. بوماده ده منتفی تعیین ایدلکسزین دینلیدی. زیرا منتفی

تعیین ایدرایسه مستعیر بشقه سنه انتفاع ایتدیره مز . نته کیم
ماده آتیده مذکوردر .

مثلا معیر ، مستعیره بالذات کنده استعمال ایتک یاخود
سنک اجیرک فلان استعمال ایلک اوزره دیو منتفعی تعیین
ایتسه معتبر اولوب مستعیر خلافتنه کیده مز .

❦ ماده ۸۲۰ ❦

(منتفعک تعیینی) اجارهده یعنی ۴۲۷ مادهده اولدینی کبی
(مستعملینک اختلافیه مختلف اولان شیلرده معتبردر .) زیرا
معیر ، تعیین ایتدیکی شخص معینک استعمالنه راضی اولوب
یوخسه بشقه سنک استعمالنه دکل تکمله رد مختار .
رکوب دابه ولبس ثوب کبی .

بناء علیه مستعیر تعیین مذکوره مخالفت ایده مز . بوصورته
تعیینک معتبر اولسنک سببی شودرکه فعل ثانی یعنی مستعیردن
مستعیرک فعلی مستعیر اولک فعلندن زیاده ضررلی اولمق احتمالی
ومعیر مستعیرک استعمالنه راضی اولوب دیکرینک استعمالنه
غیر راضی اولمغله معیردن زیاده ضررک دفعی ایچون تعیینک معتبر
اولسی لازم کلدی کفایه وهدایه .

(و) اجارهده یعنی ۴۲۸ مادهده مذکور اولدینی کبی
(مستعملینک اختلافیه مختلف اولیان شیلرده معتبر دکدر .)

چونکه بو شيلرده تقيد فائده سزدر . حمل دابه وسكنى الدار
كې .

بناء عليه مستعير بوكا مخالفت ايده بيلور . ولو كه مالك يعنى
معير بنفسه انتفاع ايتمى شرط ايتمش بولنه مجمع الانهر .
(فقط) بوتفصيل معير مستعارى بشقه سنه ويرمه ديو
نهي ايتديكى صورته اولوب اما (معير آنى) يعنى مستعارى
(بشقه سنه ويرمه ديو) مستعيرى (نهى ايتمش ايسه) نهى
معتبر اولوب تصریح مقابله سنده دلالة اعتبار اولئيه جفنه يعنى
۱۳ ماده يه مبنى (مستعير بهر حال) يعنى مستعار كرك خانه كې
مستعملينك اختلافيله مختلف اوليان شيلردن اولسون وكرك
بينك آتى كې مستعملينك اختلافيله مختلف اولان شيلردن اولسون
(بشقه سنه استعمال ايتديره مز) ايتديروبدنه تلف اولسه
ضامن اولور بحر .

(مثلا) معير (سنك ركوبك ايچون بو آتى سكا اعاره
ايتدم) ومستعير دخی قبول ايتدم (ديديكى صورته مستعير
اول آته اوشاغنى) يا شخص اجنبى يى (بينديره مز) بينديروبدنه
اول آت خسته لئه رق هلاك اولسه ضامن اولور . زيرا عسكرينك
بينمى سوقينك بينمى كې دكلدر .

نته كيم هم كندوسى راكب اولوب همده غيريسنى اركاب ايده مز .
يعنى معا راكب اوله مازلر . معا راكب اولوبده حيوان تلف
اولدقده باقيلور . حيوانك اكر ايكيسنى قالديرمغه تحملى وار ايسه

نصف قیمتی ضامن اولور . زیرا سبب تلف ایکی-نک رکوبی اولوب بریسنک رکوبی مأذون فیہ اولمغله آندن طولای ضمان لازم کلیوب دیگرک رکوبندن طولای نصف قیمت لازم کلور بحر . فقط صبی ارداف ایتمه ثقتک مقدارینک ضمانی لازم کلوب یوخسه تام نصفک ضمانی لازم کلز . « ۵۵۱ » ماده شرحنده کی لاحقیه باق تکمله رد مختار .

کذا برکیمسه بالذات سنک . کیمک ایچون شو البسه می سکا اعاره ایتدم دیو دیگر کیمسه البسه اعاره ایتدیکی حالده مستعیر اول البسه یی بشقه سنه کیدیره مز . زیرا البسه یی بر تاجرک کیمه سیله قصابک یا لغمجینک کیمسی بینده فرق واردر . مجله نک شو مثالی ایله شرحا ذکر ایدیلاں مثال بوماده نک فقره اولیسنک مثالیدر .

آخره اعاره سی جائز اولمیان مال اعاره اولنوبده تلف اولسه
نه حکم ثابت اولور

بویله آخره اعاره سی جائز اولمیان عاریتی مستعیر بلا اذن آخره اعاره ایدوبده مستعیر ثانی یدنده تلف اولسه ضمان لازم کلور . ومعیر مخیر اولوب دیلر سه مستعیر اوله تضمین ایتدیرر . وبوحالده مستعیر اول ثانی یه رجوع ایده مز . مکرکه مستعیر ثانی یدنده تلفی آنک تعدیسی یا تقصیرندن ناشی اوله .

و دیلر سه مستعیر ثانی به تضمین ایتدیرر . و بوحالده مستعیر ثانی
اوله رجوع ایده مز . ولو که یدنده تانی بلا تعد ولا تقصیر اوله .
« ۶۵۸ » ماده شرحه باق .

نته کیم بر کیمسه مستعیره کلوبده « سنده عاریت اولان
حیوانی صاحبی فلانندن استعاره ایتدم سندن قبض ایتمکلکمی
امرایتدی » دیوب اوده آنی بالتصدیق ویردکن صکره یدنده
تلف اولسه ده معیر یعنی حیوان صاحبی امری انکار ایدوب
امر اثبات اولنه مامقله یمین ایتسه مستعیره تضمین ایتدیرر .

بوصورتده مستعیر ، قابضه یعنی اول کیمسه به رجوع
ایده مز . زیرا مستعیر ، ضمان ایله مستعاره مالک اوله رق کندی
مالی اعاره ایتدیکی آکلاشیلور که عاریت امانت اولغله بلا تعد
ولا تقصیر تلفی حالنده ضمان یوقدر . « ۸۱۳ » ماده به باق .

اما مستعیر آنی یعنی اول کیمسه بی تصدیق ایتیه رک یا تکذیب
ایدرک یا خود تصدیق ایله برابر ضمان شرط ایدرک ویرسه و صکره مستعیر
ثانی یعنی اول کیمسه یدنده تلف اولسه مستعیر اول دخی ضامن اولد یعنی
شیله اول کیمسه به رجوع ایدر « ۸۲۵ » ماده شرحه دخی باق .
(اما سنک اقامتک ایچون بو اوطه) یا خانه (بی سکا اعاره
ایتدم دیدیکی صورتده مستعیر) کندوسی اقامت ایده بیله جکی کبی
کندوسی اقامت ایتیموبده بطریق الاعاره (بشقه سنی دخی اسکان
ایده بیلور) اما بطریق الاجاره بشقه سنی اسکان ایده میه جکی
۸۲۳ ماده ده مذکور بولمشدیر .

شومثال ، بوماده نك فقره ثانیه سنك مثالیدر .
 (فقط) معیر ، مستعیر (بشقه سنی اسكان ایتمه دیمش
 ایسه) مستعیر بشقه سنی بطریق الاعاره دخی اسكان (ایدمز) .
 شومثال ، بوماده نك فقره ثالثه سنك مثالیدر .

لاحقه

معیر ایله مستعیرك زمان یا مكان یا نوع انتفاعده تقید
 یا اطلاقده کی اختلافلرینه دأردر

معیر ایله مستعیر زمان یا مكان ومسافه یاخود نوع انتفاع
 ایله تقید واطلاقده اختلاف ایتدکلرنده سوز مع الیمین معیر کدر
 جواهر الفقه . زیرا معیر مال صاحبی اولغله مالنك منفعتی آخره
 نه یولده تمليك ایتدیکنی دها ایو بیلور . و برده اصل اعاره ده
 سوز آنك اولدینی کی صفتنده دخی آنك اولور .

مثلا معیر ، فعل مخصوص ایله مقید انتفاع ایله اذن ویردیکنی
 ادعا و مستعیر اطلاق در میان ایتدکده تقییدده سوز معیر کدر .
 شویله که معیر ، بش کیله آرپه یوکلتمك اوزره اعاره ایتمشیدم
 دیو و مستعیر بش کیله بغدادی یوکلتمك اوزره اعاره ایتمشیدك
 دیو اختلاف ایتدکلرنده سوز مع الیمین معیرك اولدینی کی معیر
 استانبولدن چکمه جهیه قدر ینمك اوزره اعاره ایتمشیدم دیو

و مستعیر چنانچه به قدر بینمک اوزره اعاره ایتمشیدک دیو
اختلاف ایتدکلرنده سوز مع الین معیر کدر.

❧ ماده ۸۲۱ ❧

(بر محل معینه) کتمک اوزره (دیو حیوان استعاره
اولدقدده) اورایه کیدن (یوللر متعدد اولسه) و معیر کیده جک
یولی تعیین ایتسه (مستعیر عادت اوزره ناسک سلوک ایتدیکی
یوللاردن هر قنغیسیله دیلرسه) اول محله (کیده بیلور .) زیرا
۳۶ ماده وجهله عادت محکمدر و ۳۷ ماده موجنبجه ناسک
استعمالی بر حجتدر که آنکه عمل واجب اولور . و عرف ایله
تعیین نص ایله تعیین کیدر .

بوتقدیرده یولده حیوان تلف اولسه مستعیر اوزرینه ضمان
لازم کلز . « ۹۱ » مادهیه باق .

(اما معتاد اولیان یولدن) کیتمک جائز اولما مغله
(کیدوبده حیوان تلف) یا ضایع (اولسه ضامن اولور .)
زیرا ۸۱۶ مادهده ذکر اولندیغی اوزره مطلق اذن، متعارفه
مصروف اولور . و ۴۵ ماده حکمنجسه عرف ایله تعیین نص
ایله تعیین کیدر تکمله رد مختار و واقعات .

(کذلک معیرک تعیین ایتدیکی یولک غیری بر یولدن)
اول محله (کیدوبده حیوان تلف اولدقدده) اگر مستعیرک سلوک

ایتدیکی یول (ابعده یعنی) دها اوزاق ویا) اخوف یعنی
(غیر مأمون ویا خود) غیر مسلوک یعنی (خلاف معتاد ایسه
مستعیره ضمان لازم کلور .) چونکه شره مخالفتدر . و برشیئه
اذن آنک مافوقه اذنی تضمن ایلمز .

مجله ده کی « دها » تعیرندن آکلاشیله جفی اوزره مستعیرک
کتدیکی یول ، معیرک تعینن ایلدیکی یوله مساوی یعنی طول
وسهولت کی خصوصانده ایکی یول آره سنده فرق یوق ایسه
ویا مستعیرک کتدیکی یول دها اسهل ایسه مستعیره ضمان لازم
کلز . زیرا خیره یا مثله مخالفت موجب ضمان دکلدر . چونکه
برشیئه اذن آنک مساویسنه یا دها خیرلوسنه اذندر .

بومسئله اعاره ایله اجاره بیننده مشترکدر که اجاره ده یعنی
۵۴۷ ماده ده عینیه مرور ایتدی .

۸۲۲ ماده

معیرک اعاره ایتدیکی مالک منفعتنه مالک اولسی شرطدر .
« ۸۱۵ » ماده شرحنه باق .

یعنی مالک اولورسه اعاره صحیح اولور .
بوجهته (برکیمسه بر قادیندن زوجنک ملکی اولان
برشیئی عاریت استیوب و او) قادین (دخی بالاذن) الزوج اول شیئی
عاریت (ویروبده اول شی) یدمستعیرده بالاتعد ولا تقصیر تلف

یا (ضایع) یا خود قیمتنه نقصان طاری (اولدینی صورتده اکر درون خانه ده علی جری العاده زوجه نك یدنده بولنان اشیادن ایسه) شو اعاره جائز اولور. زیرا زوجه اول شیئی مستعیره اولوب مستعیر ایسه مستعاری آخره اعاره ایده بیله جکی ۸۲۰ ماده ده مرور ایتدی. و بوحالده (کرك اول قادینه و کرك مستعیره ضمان لازم کلز.) ۹۱ و ۸۱۳ ماده لره باق.

اما معیر معارک منفعتنه مالک دکل ایسه اعاره صحیح اولماز.

« ۹۶ » ماده یه باق.

بو جهتله علی جری العاده زوجه نك یدنده بولنان اشیادن (دکل ایسه مثلاً آت) و اوکوز (کبی) قادینلر یدنده بولنمیان (برشی ایسه) شو اعاره جائز اولمیوب زوجه غاصبه اوله جنی کبی مستعیر دخی غاصب الغاصب اوله جنی جهتله ۹۱۰ ماده یه منی (زوج دیلر سه زوجه سه نه و دیلر سه مستعیره تضمین ایتدیرر.) بحر و تکمله رد مختار.

و ۸۱۲ ماده شرحنده یعنی عاریته مستحق چبقدینی صورتده بیان اولندیغی اوزره قنغیسه تضمین ایتدیرر سه ضامن اولان دیکرینه رجوع ایده مز. زیرا زوجه یه تضمین ایتدیرد کده بطریق الاستناد او مال مالک اوله جغندن کندی مالی اعازه ایتمش اولوب عاریت ایسه مستعیر یدنده امانتدر. و مستعیره تضمین ایتدیرد کده عقد عاریت نفعی مدفوع الیه عائد بر عقد اولغله ۶۵۸ ماده شرحنده ذکر اولندیغی اوزره مستعیر دخی معیره رجوع ایده مز.

۸۲۳ ماده

﴿ معيرك اذنى اولمقسزين مستعير عاريتى آخره ايجار
ياخود رهن ايدمهز. ﴾ چونكه اعاره عقود غير لازمه دن اوله رق رهن
وايجارك مادونى وبونلر عقود لازمه دن اولوب اعاره نك مافوقى
اولمغله بر شى مافوقى تضمن ايدمهز تكملة رد مختار. ايمدى ۴۰۶
ماده ده ذكر اولنديغى اوزره عقد اجاره لازم اولديغى ومعير ايسه
۸۰۶ ماده حكمنجه عاريت عقد غير لازم اوله رق ديلديكى وقت
اعاره دن رجوع ايدمه بيله چكى جهته اجاره تجويز اولنسه مستعير
ايله مستاجر بيننده كى عقد اجاره تمام اولمدين معيرك حق
رجوعى اولماق و بناء عليه معير متضرر اولمق اقتضا ايدر.
وياخود مقام اثبانده ديرزكه عاريتك اجاره سى جائز اولسه
يا لزوم مالايلزم لازم كلور كه اوده عاريت در. زيرا اجاره
جائز اولسه مدت اجاره ده استردادك عدم امكانه مبنى عاريتك
دخلى لزومى لازم كلور بو ايسه عاريتك موضوعاتنه مخالفدر.
ياخود عدم لزوم مالايلزم لازم كلور كه اوده اجاره در. اجاره نك
عدم لزومى موضوعاتنه مخالفدر. بحر وتكملة رد مختار.
عاريتك رهنك عدم جوازى دخلى بروجيه مذكور

اثبات اولنور . شویله که رهن بعدالقبض جهت راهدن لازم بر عقد اولغله بوده اجاره کییدر که رهن جائز اولسه یالزوم مالایلزم لازم کلور . اوده عاریتدر . یاخود عدم لزوم مالیزم لازم کلور . اوده رهندر .

و دیگر صورته دخی اثبات اولنمشدر . شویله که رهن ایفا اولوب غیرک مالیه آنک اذنی اولقسزین مستعیرک کنبدی بورجنی ایفایه حتی اوله ماز .

بو ماده نك اطلاقدن مستفاد اولور که عاریت مستعملینك اختلافیه مختلف اولان شیردن اولسه ایجار و رهن جائز اولمدیغنی کبی مختلف اولیان شیردن اولدقده ینه ایجار و رهن جائز دکلدر . ایمدی مستعملینك اختلافیه استعمالی مختلف اولیان عاریتی مستعیر آخره اعاره ایده بیلدیکی حالده ایجار ایده مامستك سبی بالاده ایضاح اولندی .

باذن المعیر ایجار و رهن

مستعار

بومادهده اذنی اولقسزین تعبیرندن دخی مستفاد اوله جغنی اوزره معیرک اذنیله مستعیر ، عاریتی آخره ایجار و رهن ایده بیلور . نته کیم ایجار مسئله سی ۷۶۵ ماده شرحنده ذکر اولندیغنی کبی رهن دخی یعنی معیرک اذنیله مستعارک آخره

رهن اولمسی مسئله سی کتاب رهنك باب ثالثك ايكنجی فصلنده متن و شرحده بوجه تفصيل مرور ايتمكله اورايه مراجعت اولنه .

﴿ و بر بلده معينه ده کی بورجنه رهن ايتمك اوزره استعاره ايتديکی مالی آخر بلده ده کی بورجنه رهن ايده مز . ﴾

بو فقره « ۷۲۸ » ماده ده « مال صاحبي فلان بلده ده رهن ايدمك اوزره ديو مقيدا اذن ويردكده مستعير دخی آنجق آنك قيد و شرطنه موافق اوله رق رهن ايده بيلور » ديو مذکور اولان حکمدن فضله برشی افاده ايلمز ايسه ده فقره آتیه يه توطئه و تمهيد ايجون بوراده تکرار ايدلمشدر .

﴿ ايدوبده ﴾ يعنی معيرك اذنی اولمقسرين مستعير عاريتی آخره ايجار يا خود رهن و يا خود بر بلده ده کی بورجنه رهن ايدمك اوزره استعاره ايتديکی مالی ديگر بلده ده کی بورجنه رهن ايدوبده ﴿ عاريت تلف يا ضایع اولسه ﴾ مستعير اول ايله مستعير ثانی يا مرتبه اوزرينه وقت تسليمده يعنی بونلرك زمان تسليملرنده کی قيمتلىرىنك ﴿ ضمان ﴾ ی ﴿ لازم کلور . ﴾ زیرا تسليم مذکور ايله مستعير متعدی اوله جفندن بو ايجار ورهن و تسليم غضب قيلندن اولور . اما تلف اولماز ايسه معيرك استرداد حقی واردر .

ايجارك ايضاحی : معيرك اذنی اولمقسرين مستعير بو وجهله مستعاری آخره ايجار ايتسه بو اجاره فضولی اولوب مجله نك ۴۶۷ ماده سی حکمی جاری اولور . بو صورتده قبل الاجازه

مدت اجاره مرور ایتدکده اجرت آجر بولنان مستعیرک
اولور . فقط بو اجرت سبب خبیث اولان استعمال مال
غیردن حاصل اولمش اولغله آکا حلال اولمیوب تصدق ایلمسی
لازم کلور شبلی .

ضمانك ایضاحی

بروجه محرر مستعار آخره بالایجار مستأجر یدنده ولوکه
بلا تعد ولا تقصیر تلف اولدقده معیر مخیردر . دیلرسه موجر
بولنان مستعیره وقت تسلیمده یعنی مستعیرک مستأجره تسلیمی
زماننده کی قیمتی تضمین ایتدیرر . زیرا آنفا ذکر اولندیغی
وجهله مستعیر ایجار و تسلیم ایله متعدی و غاصب اولور . بو
تقدیرده مستعیر ضامن اولدیغی شیله مستأجره مراجعت ایدمهز .
اگر ید مستأجرده تلفی بلا تعد ولا تقصیر ایسه . چونکه مستعیر
ضمان ایله مستعاره مالک اوله جنی جهتله کندی مالی ایجار
ایتدیگی تبین ایدر . مأجور ایسه ۶۰۰ ماده حکمنجه ید
مستأجرده امانتدر . فقط مأجور ید مستأجرده مستأجرک
تعذیبی یا تقصیرندن ناشی تلف اولدقده بروجه محرر معیر
مستعیره تضمین ایتدیردیگی تقدیرده مستعیر دخی مستأجره
رجوع ایدر . ۶۰۲ ماده یه باق . و دیلرسه مستأجره تضمین
ایتدیرر . زیرا مستأجر معیرک مالی آنک اذنی اولمقسزین

اخذ و قبض ایلدیکی جهتله غاصبدن مستأجر حکمنده اولور .
 بو صورتده مستأجر ، عین مأجور ید موجرده امانت
 اولدیغنی بیلمز ایسه کندی نفسندن ضرر غروری دفع ایچون
 ضامن اولدیغنی شیله مستعیر بولنان موجرینه مراجعت ایدر .
 «۶۵۸» مادهیه باقی تکمله رد مختار .

اما مستأجر ، عین مأجور ، ید موجرده امانت اولدیغنی
 بیلور ایسه رجوع ایده مز . زیرا بو صورتده مستعیر ،
 مستأجری آلتامش اولماز . بناءً علیه بو مستأجر غاصب یدنده
 بولنان مالی مغضوب اولدیغنی بیله رك استیجار ایدن کیمسه
 کیدر بحر وجواهر الفقه .

مستعارك بلا اذن رهن و تسليمك ایضاحی : مستعیر
 مستعاری بلا اذن المعیر آخره رهن و تسلیم ایتدکده
 مستعیر غاصب و مرتهن غاصب الغاصب حکمنده در .
 زیرا مرتهن غيرك مالی اذنی اولمقسزین اخذ ایلدی . بناءً علیه
 مرتهن یدنده مستعار تلف اولدقده معیر مخیر اولوب دیلرسه
 راهنه یعنی مستعیره تضمین ایتدیرر . بو صورتده راهن
 مستعیر آکا مالك اوله جغندن ۷۴۱ ماده شرحی لاحقه سی
 وجهله دین ساقط اولور . و دیلرسه مرتهنه تضمین ایتدیرر .
 و مرتهن ضامن اولدقده مرهون مرتهنك ملککی اولمق اوزره
 تلف اولمش اولوب بناءً علیه مرتهن الاجغنی راهندن استر .
 زیرا تبیین ایتدیکه بو الاجغه مقابل رهن یوقدر . اما مرتهن
 ضامن اولدیغنی شیله راهنه رجوع ایده مز . مرتهن راهنك

مستعیر اولدیغنه كرك واقف اولسون كرك اولسون . زیرا
 رهن بر عقد تبرع در كه نفعی مدفوع الیه اولان مرتبه عائددر.
 «۶۵۸» ماده شرحه باق تکمله رد مختار .

فقط بر مرتبه یندگی رهنی بلاذن الراهن دیگر مرتبه
 رهن و تسلیم ایدوب آنک یدنده تلف اولدقده رهن اول
 بولنان مال صاحبی بخیردر . دیلر سه مرتبه اول بولنان رهن
 ثانی به تضمین ایتدیرر . و دیلر سه مرتبه ثانی به تضمین
 ایتدیرر . و مرتبه ثانی به تضمین ایتدیردکده اوده مرتبه
 اوله رجوع ایدر ابوالسعود المصری . نته کیم ۷۴۳ ماده
 شرحده تفصیل اولمشیدی .

۸۲۴ ماده

(مستعیر،) آخره اعاره سی جائز اولان (عاریتی آخره)
 یعنی امینی اولان کیمسه (ایداع ایده بیلور .) زیرا ۸۲۰
 ماده شرحده بیان اولندیقی اوزره مستعیر، آتی آخره اعاره
 ایده بیلوب مستعار مستعیر ثانی یدنده امانت اولور و بوجهته
 مستعیرك آتی ایداع ایلمسی اعاره دن دون اوله رق - چونکه
 اعاره ده هم تملیک منفعت همده ایداع واردر . اعلایه مالک
 اولانك ادنایه مالک اولسی بطریق الاولیدر .

ودیعه آخره ایداع اولنه میسه جنی ۷۹۱ ماده ده مذکور

اخذ و قبض ایلدیکی جهتله غاصبدن مستأجر حکمنده اولور .
 بو صورتده مستأجر ، عین مأجور ید موجرده امانت
 اولدیغنی بیلمز ایسه کندی نفسدن ضرر غروری دفع ایچون
 ضامن اولدیغنی شیله مستعیر بولنان موجرینه مراجعت ایدر .
 «۶۵۸» مادهیه باق تکمله رد مختار .

اما مستأجر ، عین مأجور ، ید موجرده امانت اولدیغنی
 بیلور ایسه رجوع ایده مز . زیرا بو صورتده مستعیر ،
 مستأجری آلامش اولماز . بناءً علیه بو مستأجر غاصب یدنده
 بولنان مالی مغضوب اولدیغنی بیلهرک استیجار ایدن کیمسه
 کیدر بحر وجواهر الفقه .

مستعارك بلا اذن رهن و تسليمك ایضاحی : مستعیر
 مستعاری بلا اذن المعیر آخره رهن و تسلیم ایتدکده
 مستعیر غاصب و مرتهن غاصب الغاصب حکمنده در .
 زیرا مرتهن غيرك مالنی اذنی اولقسزین اخذ ایلدی . بناءً علیه
 مرتهن یدنده مستعار تلف اولدقده معیر مخیر اولوب دیلرسه
 راهنه یعنی مستعیره تضمین ایتدیرر . بو صورتده راهن
 مستعیر آکا مالك اوله جغندن ۷۴۱ ماده شرحی لاحقه سی
 وجهله دین ساقط اولور . و دیلرسه مرتهنه تضمین ایتدیرر .
 و مرتهن ضامن اولدقده مرهون مرتهنك مالکی اولق اوزره
 تلف اولمش اولوب بناءً علیه مرتهن الاجغنی راهندن استر .
 زیرا تبین ایتدیکه بو الاجغه مقابل رهن یوقدر . اما مرتهن
 ضامن اولدیغنی شیله راهنه رجوع ایده مز . مرتهن راهنك

مستعیر اولدیغنه كرك واقف اولسون كرك اولسون . زیرا
رهن بر عقد تبرعدر که نفی مدفوع الیه اولان مرتهنه عائددر.
«۶۵۸» ماده شرحنه باق تکمله رد مختار .

فقط بر مرتهن یدنده کی رهنی بلا اذن الی رهن دیکر مرتهنه
رهن و تسلیم ایدوب آنک یدنده تلف اولدقده رهن اول
بولنان مال صاحبی مخیردر . دیلر سه مرتهن اول بولنان رهن
ثانی به تضمین ایتدیرر . و دیلر سه مرتهن ثانی به تضمین
ایتدیرر . و مرتهن ثانی به تضمین ایتدیرد کده اوده مرتهن
اوله رجوع ایدر ابوالسعود المصری . نته کیم ۷۴۳ ماده
شرحنده تفصیل اولمشیدی .

۸۲۴ ماده

(مستعیر ،) آخره اعاره سی جائز اولان (عاریتی آخره)
یعنی امینی اولان کیمسه (ایداع ایده بیلور .) زیرا ۸۲۰
ماده شرحنده بیان اولندیغی اوزره مستعیر ، آنی آخره اعاره
ایده بیلوب مستعار مستعیر ثانی یدنده امانت اولور و بوجهته
مستعیرك آنی ایداع ایلمسی اعاره دن دون اوله رق - چونکه
اعاره ده هم تملیک منفعت همده ایداع وارددر .. اعلایه مالک
اولانك ادنایه مالک اولسی بطریق الاولیدر .

ودیعہ آخره ایداع اولنه میسه جنی ۷۹۱ ماده ده مذکور

ایکن عاریت بو ماده وجهله آخره ایداع اولنیور . بو جهته ایکی عقد آره سنده فرق واردر تکمله رد مختار .

(و) بناءً علیه (ید مستودعه) عاریت (بلا تعد و لاتقصیر تلف) یا قیمته نقصان طاری (اولسه) نه معیره نه ده مستودعه (ضمان لازم کلز) مستعیره ضمان لازم کلامسی ۹۱ ماده وجهله جواز شرعی ضمانه منافی اولمسنه مبنی اولدینی کبی مستودعه دخی ضمان لازم کلامسی ۷۷۷ ماده ده ذکر اولدینی اوزره مستودع اوزرینه بلا تعد و لاتقصیر تلفده ضمان اولماسنه مبنیدر .

بو ماده ده بلا تعد و لاتقصیر قیدی مستعیره نسبتله قید احترازی اولیوب اما مستودعه نسبتله قید احترازیدر . شویله که اول عاریت ید مستودعه مستودعک تعدیسی یا تقصیری ایله تلف یا قیمته نقصان طاری اولسه بیله ۹۱ ماده موجبجه مستعیره ضمان لازم کلز . نته کیم ۸۲۸ ماده شرحده الحاصل مستعیر عاریتی الح دیه ایضاح اولنه جقدر . اما بو وجهله مستودعک تعدیسی یا تقصیری ایله عاریت یدنده تلف اولسه ۷۸۷ ماده یه مبنی مستودعه ضمان لازم کلور .

عاریتک ایداعنده

اختلاف فقها

۱

عاریتک آخره ایداع ایدلمسند ایکی قول بولنوب بر قوله

کوره ایداع مذکور جائز دکل ایسه ده دیگر قوله کوره جائز
اولورکه شو قول ثانی مفتابه اولمغله مجلهده دخی اشبو قول
ثانی قبول اولمشدر .

اختلاف مذکور اوزرینه شومسئله تفرع ایدر . شویله که
مستعیر عاریتی اجبی بولنان امینی ایله معیره رد ایدوبده یدنده
تلف اولسه قول اوله کوره ضامن لازم کلوب اما قول ثانی یه
کوره ضامن لازم کلز بحر .

عاریتک آخره ایداع ایدلمسندن ایکی مسئله نك استثناسی لازمدر

فقط ایکی مسئلهده عاریت آخره ایداع اولنه ماز .
مسئله اولی ، شول عاریتکه آنک آخره اعاره سی جائز
دکلدر بو عاریتک آخره ایداعی بالاتفاق جائز دکلدر . نته کیم
بوماده نك اثباتی ایچون ذکر اولنان دلیلدن دخی مستفاد
اولور . « ۸۲۰ » ماده یه و شرحه باق .

بناء علیه مستعیر بالذات کندوسی بینمک اوزره استعاره
ایتدیکی بارکییر ایله بر محله کیدوبده آتیده کی مثاله مذکور
اولدینی اوزره اوراده برینه ایداع ایتمکه مستودع یدنده تلف اولسه
ضامن اولور .

مسئله ثانیه ، معیر مستعاری بشقه سنه ویرمه دیه نهی

ایتدکدنصکره مستعیر آنی آخره ایداع ایتسهده تلف اولسه
 ضامن اولور . « ۸۲۰ » ماده یه باق .

اما تلف یاخود قیمتنه تقصان طاری اولمدين حییجا و سلماً
 صاحبنه اعاده ایدسهده صکره تلف اولسه ضمان لازم کلز .
 (مثلاً) بر کیسه (بر محله کیدوب کلک اوزره) علی
 الاطلاق یعنی کندوسی بینمک قیدیه مقید اولیه رق (استعاره
 ایتدیکی بارگیر ایله اورایه واردقده بارگیر یوریلوب قالمغله اوراده
 برینه ایداع ایتدکدنصکره بارگیر حنف انفه) یعنی کندولکنندن
 مستودع یلنده (تلف اولسه) مستعیر یا مستودعدن بری
 اورزینه (ضمان لازم کلز .)

بو مثالده یوریلوب قالمغله قیدی احرازی دکدر . زیرا بو
 ماده نك اثنای شرحنده ذکر اولندینی وجهله مستعیرك عاریتی
 ایداعه علی الاطلاق صلاحیتی بولنمغله ایداعك جوازی ایچون
 اسباب مجبره نك تحریرینه احتیاج یوقدر .

ماده ۸۲۵

(معیر ، عاریتی) بالذات ویا وکیلی یارسولی واسطه سیله
 (طاب ایتدکده مستعیرك همان) یعنی در حال (رد و تسلیمی
 لازم کلور .) زیرا منافع شیئا فشیئا حادث اوله جنغندن منافع
 مذکورده مالک ، منافع حادث اولدجه ثابت اولوب ۸۰۶ ماده

حکمنجه عاریتدن رجوع ایله کیر و طلب ایتمک حادث اولیان منافی
تملیکدن امتناع اولغله معیرک بوکا حق و صلاحیتی درکاردر.

ایضاح القیود

۱ طلب بو تعیر مطلق اوله رق ذکر اولمنسندن آکار.
شیلورکه معیر بالذات طلب ایتدکده ردایدلمک لازم کلدیکی کبی وکیلی
یا رسولی ایله طلب ایتدکده ینه ردی لازم کلور. « ۱۴۵۹ »
مادهیه باق.

شو حالده بر شخص مستعیره بالمراجعه، معیر مستعاری
بکا اعاره ایدوب سنندن قبض ایتمککمی امر ایتدی دیمسی
اوزرینه مستعیر شخص مر قومی تصدیق ایدرک مستعاری آکا
اعطا ایتدکدنصکره معیر او شخصه اولوجهله امر ایتدیکنی
انکار ایتدکده مستعیر امری اثبات ایدرسه فبها. ایده من ایسه
سوز مع الیمین معیرک اولغله معیر یمین ایتدکده مستعیر مال
مستعاری ضامن اولور. « ۸۱۴ » ماده شرحنه باق. و مستعیر
ضامن اولدینی شیله اول شخصه رجوع ایده من. زیرا مستعیرک
زعمنده اول شخص معیر طرفندن اخذه مأذون بولندیغی حالده
معیر شو اذنی انکار ایتمسیله کندوسنه حقسنزلق ایتش اولوب
مظلوم ایسه آخره ظلم ایده من. « ۹۲۱ » مادهیه باق. فقط
مستعیر، او شخصهی مذکور افاده سنده تکذیب یاخود نه تصدیق

نهاده تکذیب یا خودنصديق ايله برابر ضمانی شرط ایتسه ده مستعاری او شخصه ویرسه آکا تضمین ایتدیرر. «۸۲۰» ماده شرخه باق. مستعار، ید مستعیرده ضایع اولوب صاحبی طلب ایتدیکنده مستعیر ضیاعنی خبر ویرمه رک رد ایده جکنی وعد ایتد کدنسکره بلا تعد ولا تقصیر ضیاعنی خبر ویرسه ظاهر روایتده تناقض اولمغله ضیاع ادعاسی قبول ایدلیوب ضمان لازم کلور تکمله رد مختار.

لکن معیر یا وکیلی یا رسولی طلب ایتیبوده مستعیر، دخی رد واعداده ایتماکله تلف اولسه عاریت، مطلقه اولنجه ضمان لازم کلز ایتسه ده مقیده اولدینی صورتده ضمان لازم کله جکی ماده آتیسه ذکر اولنیور تکمله رد مختار.

۲ رد وتسلیم، مستعیر، مستعاری اولجه رد وتسلیم ایتدیکنی ادعا ایتدیکی حالد «۱۷۷۴» ماده حکمنجه سوز مع الیمین مستعیرک اولوب بو ادعاسنی اثباته مجبور دکادر. اما مستعیر، مستعاری رد ایتدیکنی ادعا واثبات و معیر دخی مستعیرک تعدیسيله مستعار ید مستعیرده تلف اولدینی دعوی واثبات ایتدکده معیرک بینه سی ترجیح اولنور وجیز. «۷۶» ماده یه باق.

۳ همان، بو قیدی بوجه آتی مجله ایضاح ایدیور «و» بو جهتله طلب مذکور دنسکره مستعیر عاریتی «بلا عذر» یعنی معیره رد وتسلیمدن عجزی یوغیکن یدنده «توقیف و» معیره یا وکیلنه یا رسولنه ردی «تأخیر ایدوبده» یعنی درحال

رد ایتیموبده اولوجهله معیرك رضاسی اولقسزین آلیقویمغله
 عاریت تلف یا ضایع اولسه یاخود قیمتته نقصان کلسه تلف
 یا ضیاعی حالنده جمیع قیمتتی ونقصان قیمت کلدیکی حالده یالکیز
 نقصان مذکوری «ضامن اولور.» نته کیم ۷۹۴ مادهده ذکر
 اولدینی اوزره ودیعهده دخی حکم بویله ایدی .

ینه بو وجهله معیر عاریتی طلب ایتدکده مستعیر، پکی
 ویرهیم دیدکدنصکره برای کچوب یدنده تلف اولسه وقت طلبده
 مستعیر رددن عاجز ایسه ضمان لازم کلز ایسهده عاجز دکل
 ایسه، عاریتک یدمستعیرده بقاسنه معیر صراحه رضا کوسترمش
 ایسه «بأس یوقدر دیمک کبی» ینه ضمان لازم کلیوب فقط
 رضا کوسترمامش یعنی معیر مستعیرك تأخیر ردینه رضا
 کوسترمیوب ترك رده کراحت و سیخلی ارأه یاسکوت ایلمش
 اولدینی تقدیرده ضامن اولور تکمله رد مختار .

بو فقرده بلاعذر دینلدی. زیرا تأخیر بعذر اولور ایسه
 زوال عذره قدر رد ایتیمی لازم کلیوب آندنصکره ینه رد
 لازم کلور . شویله که مثلا اعاره مطلقه ایله اعاره ایتدیکی
 بر حیوانی مستعیر آخورنده باغلا یوب چارشویه کیتمکه معیره
 اوراده تسادف ایتدیکنده معیر حیواننك اعاده سنی طلب
 ایتدیکی تقدیرده اورادن خانه یه عودت ایدنجه قدر مدت ظرفده
 تأخیر معفو اولور. حتی بومدنده حیوان تلف اولسه مستعیره

ضمان لازم کلز. نه کیم نصایا دلالة موقت اولان عاریتده حکم بویله ایدوکی ماده آتیهده مذکوردر.

کذا معیرک طلبی اوزرینه مستعیر درحال ثوب مستعاری معیره کوتورووبده نه معیری نهده « ۸۲۹ » مادهده محرر کسانی بوله مامقله رده مقتدر اوله مدینی جهته او کیجه یدنده امساک ایدوبده بلا تعد ولا تقصیر تلف اولسه ضمان لازم کلز. اما او یله بر کسنه نی بولشیکن تسلیم ایتسه ضامن اولور.

۸۲۶ ماده

« نصایا دلالة موقت اولان » عاریت اول وقتک ختامنده یدمستعیرده ودیعه کی اولوب آرتق استعمالی غیر جائز اولمغله برابر اول « عاریتک ختام مدت » اعارده « معیره ردی لازمدر. » ومکث معنادرین زیاده توقیف ایده مز.

نصایا موقت ، وقت معین ایله توقیتی حاوی اولان ودلالة موقت عمل مخصوص ایله توقیتی مشتمل بولنان عاریتدرکه بونک تعبیر عام وشاملی ۸۲۷ مادهدر .

بو جهتهله مستعیر، ختام مدتده مستعاری معیره رد و اعاده ایتیبوده یدنده ولو بلا تعد ولا تقصیر تلف اولسه مستعیره ضمان لازم کلور . مستعیر ختام مدتدن صکره کړک استعمال ایتمش اولسون وکړک اولسون . زیرا مدت ختام بولدقندن صکره

مستعیر، عاریتی امساک ایتیمسله غاصب اولور. چونکه معیرک اذنی موقت اولمغله مستعیر ختام مدته رد ایتیمدیکی حالده غیرک مالنی بلاذن نفسی ایچون امساک ایتمش اولور. « ۸۹۱ » مادهیه باق.

عاریت موقتهده لزوم ضمانده

اختلاف فقها

بعض فقها، عاریت موقتهده لزوم ضمان بعد مضی الوقت مستعیر مستعارى قوللاندینی صورتده اولوب اما استعمال ایتیموب محافظه ایتیمکده ایکن تلف اولدقده ضمان لازم کلمه جکنه قائل اولمشلردر.

و دیگر بعض فقها مطلقا ضمان لازم کله جکنه ذاهب اولمشلردر که مجله دخی بوقولی قبول ایتمش اولدینی کورینیور. وقتاواى فیضیهده مذکور اولدینی اوزره مشایخ اسلامیه دخی بر وجه مشروح افتا ایلمشلردر.

واقعا مجلهده بومادهده رد ایتیموبده تلف اولسه ضمان لازم کله جکی ذکر اولمیشور ایسهده ردی لازم کلور دیسانلر رد ایتیمدیکی تقدیرده لزوم ضمانه قائل اولیورلر. مع ذلك ۸۲۷ مادهده لزوم ضمان مصر حدر. و لزوم ضمانه قائل اولمیانلر ایسه عاریت موقتهده ختام مدته اعاده لازم کلموب بعدا طلب ردی لازم کلور دیورلر تکمله رد مختار.

ینه بوجهتله بوکبی عاریت موقته ده ختام مدته مستعیر ،
مستعار ی آخره اعاره ایتسه ضامن اولور . مستعار ولوکه
مستعملینک اختلافله مختلف اولیان شیلردن اوله یعنی معیر ،
بو صورتده بخیر اولوب دیلرسه مستعیر اوله و دیلرسه مستعیر
بانی یه تضمین ایتدیرر .

نته کیم بوکبی عاریت موقته یی ختام مدتد نصکره معیره اعاده
ایتمک اوزره مستعیر اجنبی بر کیمسه یه و یروبد آک ی دنده
تلف اولسه مستعیره ضمان لازم کلور . زیرا مستعیر ، بعدوضی
الوقت ی دنده امساک ایتدکده ضامن اوله جنبی کبی اجنبی ی دنده
ترك ایتدکده ینه ضامن اولور تکمله رد مختار .

(فقط) عاریت موقته ده ختام مدته (مکث معتاد
معفودر .) زیرا ۳۶ ماده حکمنجه عادت محکمدر . بناء علیه
مکث معتاد مدتده مستعار یه مستعیر ده تلف اولسه ضمان لازم کلر . زیرا
جواز شرعی ضمانه منافیدر . « ۹۱ » ماده یه باق .

(مثلا فلان کون وقت عصره قدر استعمال اولنق اوزره
استعاره اولنان حلیاتی اول وقتک حلوننده رد واعاده اولنق
لازمدر .) بو مثال ، نصا موقت اولان عاریتک مثالیدر
نته کیم فلان محله واروب کلنجیه قدر ینمک اوزره استعاره
اولنان حیوان ایله اول محله واریلوب کلندکده صاحبنه رد
ایدلک لازم کلور . رد اولنق ممکن ایکن اولنیوبده برقچ کون
دها آلیقونمغله سرقت اولنسه ضمان لازم کلور .

﴿ كذلك فلائك دوكوننده قولالانق اوزره استعاره
اولنان حلیاتی اول دوكونك ختامنده رد واعاده لازمدر . ﴾
شو مثال، دلالة موقت اولان عاریته مثالدر .

دیگر مثال دهـا : فلان درسی احضار ایتک اوزره بر
کتاب استعاره ایدوبده اودرسی ایتام ایلسه یاخود درسی ترك
ایلسه کتابك ردی لازم کلور زیرا بوعاریت، مستعیرك کتابی
قرائت ایلمك مدتی قیدیه معنی مقیدر تکمله رد مختار .

﴿ فقط بونی ﴾ یعنی نصا یا دلالة موقت عاریتی ﴿ رد
واعاده ایچون معتاد اولان وقتك مروری لازمدر . ﴾ بوجهته
بووقت ظرفنده مستعار ید مستعیرده بلا تعد ولا تقصیر تلف
اولسه ضامن اولماز .

ودیعهـنك ردی آنجق بعد الطلب لازم کله جکی ۷۹۴ مادهـده
مصرح ایکن عاریت موقتهـنك بدون الطلب ردی لازم کلدی
فرق شودرکه و دیعهـده مستودعك امساکی قبض سابقه مبنی
اولوب قبض سابق مذکور ایسه مالک ایچوندر . و عاریتـده
دخی مستعیرك امساکی قبض سابقه مبنی ایسهـده فقط قبض
سابق مذکور مستعیرك نفسی ایچون ووقت معینده عدم ضمان
اذنه مبنی ایکن بعد الوقت اذن بولنماغله نفسی ایچون امساك
سببیه ضمان لازم اولور تکمله رد مختار .

۸۲۷ ماده

(بر ایش ایچون بر شی استعاره اولندقدده اول ایشک ختامنده عاریت مستعیر یدنده ودیعه کبی اولور .) بناء علیه مستودع بلاذن ودیعه یی استعمال و آخره اعاره ایدهمیه جکی کبی بو شیئی مستعیر اولان دخی (آرتق) اول ایش حتام بولدقدنصره آنی (استعمال) یا آخره اعاره و ایداع (ایدهمز .) ۹۶ ماده یه باق .

(ومکث معتاددن زیاده توقیف ایدهمز . ایدوبده) یعنی استعمال یا اعاره یا ایداع یا مکث معتاددن زیاده توقیف (ایدوبده) عاریت (تلف اولسه) مستعیر عاریتی (ضامن اولور .) مثلاً بر کیمسه بر آغاج کسمک ایچون استعاره ایتدیکی بالطه یی اول آغاجی کسدکده معیره رد ایتسی لازم کلور . نته کیم جامه شوی ایچون استعاره ایتدیکی قزغان ولکنی اول جامه یی ییقادینغنده معیره رد ایتسی لازم کله جکی کبی . رد ایتوبده آخره اعاره یا ایداع یا خود استعمال ایدوبده تلف اولسه ضامن اوله جخی کبی مکث معتاددن زیاده یدنده بلااستعمال بیله توقیف ایدوبده احواله تلف اولسه ینه ضامن اولور تکمله رد مختار .

شوماده ده کی عاریت دخی دلالة موقت و بناء علیه ماده

آنفهده داخل اولوب ماده مذکورهده «کذلک فلانک دوکوننده قولانمق اوزره الخ» مثالی امثالندن بولمشدرد . بوصورتده شو ماده ماده آنفهده دن فضله بر حکم افاده ایلمز . اوت ماده آنفهده یاخود دلالة عبارته سی کتولامش اولسه ایدی بوماده نك بوراده لزوم حقیقیسی بولنوردی .

❦ ماده ۸۲۸ ❦

(عاریتی مستعیر نیفسه یاخود) کندی (امینی ایله معیره) یاخود خدمتکارینه یاخود عرف وعادته تسلیم عد اولنان محله (رد) واعاده (ایدرد) . نته کیم ماده آتیته ده بیان اولنیور . مستعیر ، بو وجهله عاریتی رد ایتدکه بری اولور . زیرا مستعیر متعارف اولدینی و جهله رد واعاده ایلمشدرد ۳۶ ماده یه باق .

امینی ایله رد آکا یعنی امینه ایداع دیمکدر . شو حالده بو ماده ۸۲۴ ماده حکمنده اولمش اولور . بناء علیه بوراده کی امین مستعیرک عیالنده بولنان امین ایله اجنبی بولنان یعنی مستعیرک عیالنده بولنمیان امیندن اعمدرکه ۸۲۴ ماده شرحنده ذکر اولدینی اوزره آخره ایداعک جوازنده اول آخرك امین اولسی شرط ایدی . خلاصه ، مستعیر عاریتی ایداع ایده بیله چکی کیمسه ایله معیره رد ایده بیلوب شو حالده امین مرقوم عاریتی اتلاف

واستهلاك ايتسه ۹۱ ماده يه مبنی مستعيره مسؤوليت ترتيب ايتيوب
ضمان حصرا امين مرقوم اوزرينه لازم كلور .

اما مستعير ، عاريتي ﴿ اميني اولميان كمسنة ايله رد ايدوبده
قبل الوصول ﴾ يعنى معيره رد وتسليم اولمدين ﴿ تلف يا ضايع ﴾
يا قيمته نقصان طاري يا او كمسنة استهلاك ايتمش ﴿ اولسه ﴾ مستعير
﴿ ضامن اولور ﴾ عاريت كرك مطلقه اولسون و كرك مقيد
ويا موقتة اولسون حكمده مساويدر .

مثلا مستعير عاريت موقتة يي ختام مدتدن صكره اميني
اولميان بر كمسنة ايله كوندرسه ده آنك يندده بلا تعد ولا تقصير
تلف اولسه ضامن اولور تكمله رد مختار وتنوير ودرر .

۸۲۹ ماده

﴿ مجوهرات كبي ﴾ خدمتچيلر يندده بولندير لميان ﴿ اشياي
نقيسه دن اولان عاريتي معيرك كندوسنه تسليم ايتك لازمدر . ﴾
بناء عليه بو كبي اشياي نقيسه معيرك خدمتكارينه اعطا يا خود
خانه سنه يا آخورينه وضع ايديلوبده معيرك يدينه واصل اولمدين
تلف اولسه مستعير ضامن اولور . زيرا بونلرك و امثاللك خدمه يه
تسليمي حقنده عرف و عادت جاري اولما مشدر « ۳۶ » ماده يه
باق بحر .

فقط بو كبي اشياي نقيسه نك بعض خصوصي خدمتكارلره

ویرمک عرف اولنجه احوالده آکا ویرمک دخی جائذر .
 شویله که آکا بر نذرلرنده بوکی مجوهراتک اخذ وحفظه مأمور
 و بونکه مکلف قلفه بولنور ایسه بوکا دخی تسلیم جائذر . نته کیم
 معیرک عیالنده قبض و صرفه و سائر مصالحی رؤیته مأمور مدیر
 اموری بولنوبده اشیای نفیسه دن اولان عاریتک بوکا تسلیم
 ایدلسی عرف و عادت اولنجه اول اشیانک بوکا تسلیم اولنسی
 جائز اولور تکمله رد مختار .

(اما) خدمتجیلار یدنده بولنان (سائر عاریتی عرف
 و عاتده تسلیم عد اولنان محله کوتورمک ویا معیرک خدمتکارینه
 ویزمک تسلیمدر .) ۳۶ ماده یه باق .

(مثلاً عاریت حیوانی معیرک آخورینه کوتورمک) تسلیم
 عد اولنان محله کوتورمکه مثالدر (یا خود سائسنه) خدمتکاره
 ویرمکه مثالدر (ویرمک تسلیمدر .) زیرا بو وجهله تسلیم
 متعارف اولمغله تعویل و اعتماد آکا در . چونکه آخور مالکک
 یدنده بولنمغله اورایه رد صاحبنه رد دیمکدر . فقط بعض فقها
 آخور معیرک خانه سنک خارجنده اولور ایسه اورایه کوتورمک
 تسلیم دکدر . زیرا ظاهر اولان اوراده حیوان بلا حافظ
 قالور دیمشدر زیلعی و تکمله رد مختار .

آخورینه دینادی . زیرا اراضیسنه کوتورمک تسلیم
 دکدر بحر .

سائسنه تسلیم جائز اولدی . زیرا معیر حیوانی سائسیله

حفظ ایدہ کلکدہ اولغلہ سائسنہ تسلیم عاده صاحبہ تسلیم اولور.
چونکہ بالذات صاحبہ تسلیم ایدلسہ اودہ سائسنہ ویرر .

« سائسنہ » قیدی احترازمیدر ؟ بعض فقہا بوکبی حیوان
معیرک خدمتکارینہ ویریلہ بیلور . اول خدمتکار کرک حیوانہ
باققلہ مکلف یعنی سائس اولسون کرک بشقہ اوشاق اولسون
چونکہ سائس صورت دائمہ ده حیوانی یدندہ بواندیرمیوب
بعضا قپو یولداشنہ ویرر و بناء علیہ آکا ویرہ کہ دخی مال
صاحبنک رضاسی بوانور دیمشاردرکہ شیخ الاسلام علی الپزدوی
دخی صحیح اولان بو قول ایدوکنی ذکر ایلمشدر زیلعی .
شو قوله کورہ بورادہ کی سائسنہ قید احترازی دکلدیر .

بو جهتله عاریت حیوانی مستعیردن قبض ایتک اوزره
معیرک خدمتکاری مثلا سائسی معیر طرفندن کلوب مستعیردن
قبض ایتدکن صکره ضایع اولسه و معیر اول خدمتکارینک
کندو طرفندن قبض عاریتہ مأمور اولدیغی انکار ایتسه
مستعیره ضمان لازم گیز . حالبوکہ ۸۲۵ ماده شرحندہ ذکر
اولندیغی اوزره عاریت شخص آخره ویرلدکده مستعیره ضمان لازم
کلور .

ودیعہ مک دخی بو ماده وجهتله ردی صحیح اولوب
اولمديغنده اختلاف اولندیغی ۷۹۵ ماده شرحندہ بیان اولمشیدی .

مغصوبك ردی عاریت کې دکلدر .

بوراده عاریت تعبیری مغصوبدن احتراز ایچوندر . زیرا
غاصب مغصوبی مالکنه رد ایتدکجه بری اولماز . چونکه غاصب
اوزرینه واجب اولان فعلنی فسخ ایتک اولوب بوایسه مالکه
رد ایله اولور یوخسه غیریسنه رد ایله اولماز بحر . ۸۹۰ ماده
شرحنده بوکا دائر ایضاحات ویريله جکلدر .

۸۳۰ ماده

بر عینک قبضی کیمک منفعتی ایچون ایسه مؤنت ردی
دخی آکا عاڭددر . «۸۷» مادهیه باق .
بو قاعده اوزرینه ابواب متفرقه دن مسائل تفرع ایدر .

اعاره

﴿ مستعیر ، یدنده بولسان عاریتی رد ایده جک اولدقده
مؤنتی یعنی ﴾ ردك ﴿ کلفتی و مصارف نقلیه سی کندو
اوزرینه در . ﴾ زیرا عاریتدن حصوله کلان منفعت کندوسنه
عاڭددر . مستعیر عاریتی نفسنک منفعتی ایچون قبض ایلمشدر .
رد مستعارک مؤنتی مستعیر اوزرینه اولمسنه شوایکی مسئله
تفرع ایدر .

۱ مسئله ، معیر عاریتی طلب ایلدیکی و مستعیر دخی رده
مقتدر اولدینی حالدہ مستعیر معیرہ « کلدہ سن آل یاخود حمالی
کتورده آلوب کوتور » دیو اعاده دن امتناع ایتسهده تلف
اولسه ضامن اولور .

۲ مسئله ، عاریت موقتهده ختام مدتهده مستعیر کلوب
آلسون دیو مستعیر ، مستعاری یدنده ولو بالاستعمال توقیف
ایتسهده تلف اولسه ضامن اولور بحر .

ودیعہ

رد و تسلیم ودیعہ نك مؤتی یعنی کلفتی و مصرفی مودعه
عائد اولور . « ۷۹۴ » ماده یه باق .

اجاره

۵۹۵ مادهده بیان اولدینی اوزره مأجورك رد واعاده سی
حمل و مؤننه محتاج ایسه اجرت نقلیه سی آجر اوزرینه در
چونکه مأجورك قبضی آجرك منفعی ایچوندر . زیرا آجر
بدل اجاره یه مستحق اولور بحر .

سوآل ، مستأجر دخی مأجورك منفته مالک اولمغله مأجورك
قبضی مستأجرك منفعتی ایچون اولمش اولدینی جهته رد مؤتی

مستأجره عائد اولملی یا خود هیچ اولماز ایسه بو قاعده به منبی
بالاشتراك تسویه ایدملی ایدی .

جواب ، مستأجر ایچون حاصل اولان منفعت عرض فانی
ایکن موجر ایچون تحدث ایدن منفعت عین باقی اولدینی
وعین منفعته مرجح بولندینی جهتله مؤنت رد موجر اوزرینه
قلندی .

رهن

رهن ، فك اولندقدتصكره راهنه اعاده ایديله جك اولدقده
مؤنت رد واعاده سی مرتهن اوزرینه در بحر . زیرا کتاب رهن
شرحنده یعنی «کتاب خامس رهن حقننده در» عنوانی شرحنده
ایضاح اولندینی اوزره مرهونك قبضی مرتهنك تامین دینی ایچوندره .

غصب

۸۹۰ ماده ده ذکر اولندینی اوزره مغصوبك مؤنت ردی
و مصارف نقلیه سی غاصب اوزرینه در . زیرا غاصب اوزرینه
مغصوبی مالکنه رد و اعاده و اولوجهله غصبیدن ناشی مال
صاحبنه ایتدیکی ضرری ازاله ایلرسی واجبدر بحر .

استثنا

بو ماده حکمندن آتی الذکر مسئله مستثنا بولمیشدر .
 شویله که بر کیمسه کند ی بورجی مقابلنده رهن ایتک
 اوزره دیکرینک مالنی استعاره ایتسه ده صکره مرهونیتدن فک
 ایدلسه بومالک مؤنت ردی معیر اوزرینه در . بو عاریتک دیکر
 عاریتدن فرقی شودر که بو کبی برای رهن عاریتده منفعت
 و فائده معیره عائددر . شو جهتله که رهن مستعار ید مرتهنده
 تلف اولدقده مستعیرک بورجی ساقط اوله جغندن معیر دخی
 مستعیره ساقط اولان بورجی مقداری ایله مراجعت ایده بیلور .
 بناء علیه بو عاریت اجاره منزلنده در بحر .

شو ملاحظه اعتباریله رهن مستعارک مؤنت ردی معیر
 اوزرینه اولسی دخی صدر ماده ده بیان ایتدیکمز قاعده نک
 فروعاتندن اولور .

۸۳۱ ماده

« ابنیه یایمق و آغاج دیکمک ایچون یر استعاره ایتک
 صحیحدر . » زیرا بو وجهله شراء واستیجارا انتفاع جائز
 اولدینی کبی اعارة دخی انتفاع جائزدر .
 شو ماده دن مقصود بالذات فقره آتیله اولوب یوخسه

کندوسی چون استعاره جائز اولان منافعک بوکا حصری دکلدر.
کورولمز میکه اراضی یی مراح و نصب خیم و ایقاف و اقامه
دواب و زراعت و حیوانی بینمک و یوک یوکلتمک و چفت
سورمک و آخره ایجار ایلیمک ورهن ایتمک و حلیاتی طاقنمق
و خانه یی تزین ایتمک و البسه یی کیمک و خانه یی آنده ساکن
اولمق و اوراده امتعه سنی وضع ایتمک و آغاجی دخی بناسنه
قویمق کی اقسام مستعارک انواع منافعی ایچون استعاره سی صحیح
اولور .

(لکن) مستعیر ابنیه یابدقدن و آغاج غرس ایتدکن
صکره بیله (دیلدیکی وقت اعاره دن رجوع ایله یونلری قلع
ایتدیره بیلور .) یعنی مستعیر ، بونلری قلعه مجبوردر . مکرکه
قلعی ارضه مضر اوله . نته کیم قریبا ایضاح اولنور .

اعاره دن رجوع جائز اولدی . زیرا اعاره عقد لازم دکلدر .
« ۸۰۶ » ماده یه باق .

قلع ایتدیره بیلیدی . زیرا مستعیر کندی ملکله معیرک
ملکنی شاغل اولدیکه ۹۰۹ ماده ده ذکر اولندیغی اوزره بر
کمنه سوپرندی یا دیگر نسنه وضعیله برینک عرصه سنی اشغال
ایتسه قویدیغی شیئی رفع ایله عرصه یی تخلیه ایتمک اوزره جبر
اولنور بحر .

عاریت غیر موقتہ دہ

معیرہ عدم ضمان

و اعارہ غیر موقت اولدینی صورندہ معیر اوزرینہ فقرہ
آتیہ دہ محرر اولدینی اوزرہ ضمان دخی لازم کلیہ جکی کبی
قلع سبیلہ بنایہ یا آخاجہ طاری اولان نقصانی دخی مستعیر معیرہ
تضمین ایتدیرد مزہ نہ کیم فقرہ مذکور دہ موقت ایسہ تعبیرندن
دخی آکلا شیلورہ زیر عاریت عقد لازم اولدینی جہتله بروجه
محرر وقوعبولان اعارہ مطلقہ دہ معیر مستعیری آلداتمش
اولیوب بلیکہ مستعیر کندی کندینی آلداتمش اولور .
تفصیلات آنفہ دن بو فقرہ دہ ضمان لازم کلیشنک سبی
ظاهر و بینلرنده کی فرق آشکار اولدی .

معیرک بنا و آخاجی

تملك ایدہ بیلمسی

معیرک دیگر بر حق دخی واردر . شویله کہ بنا یا غرسک
قلعی ارضہ مضر ایسہ مستعیر راضی اولسه بیله معیر بونلری
مقلوعا قیمتیله تملیک ایدہ بیلور . یعنی ابنیه و اشجارک درحال
و وقت رجوع دہ کی مقلوعا قیمتیله معیر آتلی استملاک

ایده بیلور . زیرا معیرك ارضه نقصان طاری اولوب متضرر اولسون ایچون بو تملکده معیر مستقل اولدی .

اما قلع سببيله بنا یا غرسه نقصان طاری اوله جق اولسه بيله مستعیرك ارضی تملکده صلاحیتی یوقدر . زیرا مستعیر بولنان بنا صاحبی صاحب و صفدر . و معیر ایسه صاحب اصلدر بناء علیه صاحب اصلك طرفك ترجیحی لازم کلور .

فقط بونلرك قلعی ارضه مضر اولمیتجه معیر ، بونلری جبرا یعنی مستعیرك رضاسی اولقسزین تملک ایده مز . اما معیر تملک واشترایه و مستعیر دخی تملیک و بیعه راضی اولنجه مستعیرك تملکی و شراسی صحیح اولور . « ۵۳۱ » مادهیه و شرحه دخی باق .

خلاصه ، بنا و آغاجك قلعی ارضه مضر اولدیغی تقدیرده جبراً تملک ایتمک معیره عائد بر صلاحیت اولوب یوخسه مستعیر تملک مذکوره معیری اجبار ایده میوب معیر قلعه راضی اولنجه قلعی ارضه مضر اولسه بيله مستعیر قلعه مجبوردر .

شوققرده رجوعك معیره اسنادی حصر ایچون دکلدر . زیرا مستعیر دخی دیلیدیکی وقت عقد اعاره یی فسخ ایله بونلری قلع ایده بیلور . اعاره كرك موقت اولسون كرك اولسون .

خلاصه ، عاریت اوچ وجهله فسخ اولنه بیلور که وجوه مذکوره « ۸۰۶ » ماده شرحنده ایضاح اولنمیشیدی .

بنا و آغا جده معیر ایله مستعیر آره سنده اختلافك وقوعی

ایمدی مستعیر بونلری قلع ایتك استیهرك شو بنایی بن
یایدم ویا شو آغاجی بن دیکدم دیدیکی حالده معیر بو بنا یا آغاج
ذانا موجود ایدی دیو اختلاف ایتدکارنده سوز معیرك اولدیغی
کبی طرفین بینه اقامه ایتدکاری تقدیرده معیرك بینه سی ترجیح
اولنور تکمله رد مختار .

(شوقدرکه اعاره) ۸۲۶ ماده وجهله (موقت ایسه) ختام
مدتن اول رجوع ایتدیکی حالده رجوع مذکور خاف و عدی
متضمن اولدیغندن مکروه بولمغله برابر (ابنیه واشجارك قلع)
واراضی استرداد (اولندیغی زمانده کی مقلوعا قیمتی ایله انتقاضی
مدته قدر طور مق اوزره قیمتی بیننده تفاوت نه ایسه معیر
آنی ضامن اولور.) یوخسه معیر ابنیه واشجارك قیمتی ضامن
اوله رق تملك ایتمکه مجبور دکلدر. زیرا معیر، وقت معین نهایتنه
قدر ترکه راضی اولدیغی تصریح ایتدیکی جهتله مستعیری
آلداشمش اولور. چونکه انسانك ظاهر حالی وعدی اوزرینه
قالمق ایکن وعد مذکورنده معیر قالمینجه مستعیرك نفسندن
ضرری دفع ایچون بروجه مذکور حق تضمینی واردر .

وبرده معیر بروجه مذکور ایکی قیمت بیننده کی تفاوتی
ضامن اولوب یوخسه ابنیه واشجارك جمیع قیمتی ضامن

اولماز. هر نقدر محیطك ظاهری بوجه مشروح جمیع قیمتی
ضامن اولق ایسه ده مجله محیطك شو قولی قبول ایتماشددر.
بجر. و بویله اعاره موقته ده معیر ختام مدتدن اول رجوع
ایدوبده ابنیه واشجارك قلعی ضرر فاحشه ارضه مضر اولمغه
معیر بوجه بالا بونلری تملك ایتمك استدکده ابنیه واشجارك
ختام مدتنه قدر طورمق اوزره قیمتیله تملك ایدر. زیرا
قبل الوقت قلع مستحق علیه دکلدر. یوخسه درحال اولان
مقلوعا قیمتیله تملك ایده مز.

عاریت موقته ده ختام مدتدن صکره رجوعده

تضمینات یوقدر

عاریت موقته ده ختام مدتدن اول رجوعده بوجه مشروح
تضمینات وار ایسه ده ختام مدتدن صکره معیر مال مستعارى آلق
استدکده بوکبی ضمان ایله معیر مجبور ایدیله میوب بلکه بوتقدیرده
دخی بونلر قلعی ارضه مضر اولنجه معیر بونلری مقلوعا قیمتیله تملك
ایدر.

سوآل وجواب

فقط بو ماده اوزرینه بوجه آتی سوآل ایراد اولنور.
شویله که ضمان غرور عقد معاوضه ده اولوب غیریسنده یوقدر.

مثلاً بر کیمسه دیگر کسنهیه شو یولدن کیت دیوبده اوده
کتدیکی حالده آنی خرسزلر صویسه لر بوسوزی سویایان کیمسه
اوزرینه ضمان لازم کلز. ایمدی عاریت عقد معاوضه دکل
ایکن نصل ضمان لازم کلور. نته کیم موهوب لهه استحقاقدن
طولای ضمان لاحق اولسه واهب ضامن اولماز. «۶۵۸» ماده
شرحنه باق.

جواب، بو صورت التزام بابندندر. زیرا تقدیر کلام «بو
عرصه ده نفسك ایچون بنایاب آنی یدکده فلان وقته قدر ترک
ایتم اوزره اکر ترک ایتمز ایسه م سکا بنایی ضامنم» دیمکدر.

عاریت موقتده قبل تمام المده ارض مستعار ضبط

ایدیلهرک مستعیر قلعه مجبور اولسه

ضمان وارمی

عاریت موقتده قبل تمام الوقت معیر رجوع ایدنجه بروجه
محرر ضمان لازم کلورسه ده بو مثللو عاریت موقتده قبل تمام
المده ارض مستعار بالاستحقاق ضبط ایدیلهرک مستعیر بنا
واشجاری قلعه مجبور اولسه معیر اوزرینه بروجه بالا ضمان
لازم کلیه جکی وعاریت مطلقه اولسون موقت اولسون حکم بر
ایدوکی هندیه ده ذکر اولندقدنصکره خصافک بیانه نظرا امام
محمد رحمه الله تعالینک مذهبه کوره معیر اوزرینه مذکور
ضمان لازم کلز که ۶۵۸ ماده شرحنده نفی قابضه عائد اولان

بر عقدده بر کیمسه برنی آلداتسه ضمان لازم کلمه جکی ذکر
ایدلشیدی. فقط امام اعظم ایله امام ابی یوسف رحمهما الله
تعالی یه کوره ضمان لازم کله جکی بیان اولمشدر.

﴿مثلا ابنیه واشجار درحال قلع اولدینی تقدیرده مقلوعا
قیمتی اون ایکی آلتون و انقضای مدته قدر طور مق اوزره
قیمتی یکر می آلتون اولدینی حالدہ معیر درحال قلع ایتدیره جک
اولور ایسه﴾ بونلرک بینده تفاوت بولنان ﴿سکز آلتون﴾ ی
معیرک مستعیره ﴿ویرمی لازم کلور﴾ و وقت استردادده کی
قیمت یعنی معیرک ارضی استرداد ایده جکی زمانده کی بدل
معتبردر بحر. زیرا وقت استردادده کی قیمت اسهلدر. و بعضیلر
وقت مرور مدته کی قیمت لازم کلور دیشلرایسه ده معتبر اولان
قول اولدر تکمله رد مختار.

دیگر بر مثال: بر کیمسه ارضی بنا یا غرس ایچون ایکی
سنه مدته اعاره ایدوب مستعیر دخی بنا یا غرس ایتدکدن
صکره آلتی آی ختامنده عاریتدن رجوع ایله قلع ایله امر ایتسه
اهل خبره دن لدی السوآل ابنیه یا اشجارک تام ایکی سنه طور مق
اوزره قیمتی بیک غروش وفی الحال مقلوعا قیمتی یوز غروش
اولدینی تحققی ایتسه معیر، مستعیره طقوز یوز غروشی ضامن
اولور تکمله رد مختار.

۸۳۲ ماده

﴿ كرك موقت وكرك غير موقت اوله رق زرع ایچون اعاره اولنان اراضی بی معیر وقت حصا ددن مقدم رجوع ایدوبده مستعیردن استرداد ایده مز. ﴾ بوماده استیسانا تجویز ایدلمشدر. عدم استرداد سبب شودر که مستعیر، ارض مستعاره بی زراعتده مبطل اولمیوب بلکه معیر طرفندن کندوسنه زراعتده اذن ویرلمسیله مستعیر مرقوم مغرور اولمش اولور. بناءً علیه ارضك بطریق الاجاره ترکی لازم کلوب رجوع معیردنصکره اعاره اولوجهله اجارهیه منقلب اولور. « ۱۹ » مادهیه باق تکمله رد مختار.

ابنیه واشجارده رجوع واسترداد جائز ایکن
زرعه جائز دکلدر بینلرنده کی
فرق نه در

اولکی یعنی ۸۳۱ مادهده رجوع ایدر ایدی. زیرا ابنیه وآخاچك معلوم بر نهایی اولمدیغندن والی غیر النهایه مستعیر یدنده ولوکه اجر مثل ایله ارضك ابقاسی معیره ضرر بولادیغندن مالکك یعنی معیرك ضررینی رفع وازاله ایچون قلع اولندی. اما اشبو مادهده زرعك معلوم بر نهایی بولنوب بناءً علیه ارض مستعار

اجر مثلیله نهایت معلومه بولسان وقت حصاده قدر مستعیر
 یدنده ابقا اولنور. یعنی مستعیر اعاره دن رجوعندن صکره کی
 مدتک اجر مثلی معیره بالاعطا وقت حصاده قدر اراضی ید
 مستعیرده ابقا ایدیلور. نته کیم برای زراعت اراضی استیجار
 اولنوبده هنوز زرع ادراک ایتدین مدت اجاره منقضی اولنجه
 مزروعات ادراک ایدنجه قدر ارض مأجور یدمستأجرده اجر
 مثلیله ابقا ایدیله جکی کی. «۵۲۶» ماده یه و شرحنه باق بحر.

زرعک اجر مثلیله ابقاسی ایکی سببه

مبنی بولمشدر

بوماده وجهله اجر مثلیله مزروعاتک وقت حصاده قدر
 قدر ابقاسنک سبب و علتی ایکیدر. برنجیسی زرعک قلمی
 مستعیره مضر اولدینی کی بلا بدل ابقاسی دخی معیره مضر
 اولدینندن ایکی طرفک ضرری بو وجهله بقدر الامکان دفع
 اولنور. «۳۱» ماده یه باق. و بوجه مشروح ایکی طرفک
 حقنه مراعات اولنور. صاحب ارضک حقنه مراعات اولندی.
 زیرا حق رجوعی واردر. صاحب زرعک حقنه مراعات
 اولندی. زیرا معیر طرفدن مغرور اولمشدر تکمله رد مختار.
 ایکنجیسی، قلعهده مستعیرک ملککنک ابطالی بولدینی حاله
 ترکده حق معیرک یعنی تصرفک تأخیری بولنوب اولکیسی

ضرر جهت نتیجه اشد اولمغله ایکنجیسنه کیدلمک ایجاب ایتدی.
« ۲۹ » ماده یه باق .

اجرتک لزومنده

اختلاف فقها

اجرتک لزومنده بعض علمایه کوره عقد ایجار لازمدر .
یعنی معیر بعد الرجوع ارضی مستعیره ایجار ایلملیدر . فقط
طرفین عقدا جاره ده اتفاق ایده مزلرایسه حاکم ایجار واجرتی
تقدیر ایدر . اما بو وجهله معیر یا حاکم ایجاری اولمقسزین
معیر اجرت آلهماز . « ۵۹۶ » ماده یه باق .

ودیکر بعض فقهایه کوره عقد اجاره ایدلمسه دخی بعد
الرجوع اولان مدت ایچون اجر مثل لازم کلور تکمله
رد مختار .

عدم استردادک معناسی

ایضاحات آنفهدن آکلاشلدیکه مجله دهکی « ایده مز » نفی
استرداد متعلق ومرتبط اولوب حصراً نفی استرداد ایچوندر .
یوخسه هم رجوع همده استردادک نفی ایچون دکلدر . زیرا
۸۰۶ ماده شرحنده ذکر اولندیغی و جهله معیر دیلدیکی
وقت اعاره دن رجوع ایده بیلور . ولوکه مستعیره ضرر بین

بولنه. بناء عليه بوماده ده دخى رجوع ايله اعاره باطل اوله رق
مستعير يندده اجر مثل ايله ابقا اولنوب بالرجوع بطلان اعاره
ايله مستعارك يد مستعيرده اجر مثل ايله ابقاسى بيننده كى فرق
ظاهر در .

شو ماده ده معير، اكينك يعنى تخمك مثلى ومستعيرك مصرفى
اعطا ايدرك تملك ايدرم بناء عليه مستعير ارضى بكا تسليم ايتسون
ديد كدها كر تخم نابت اولماش ايسه مستعير راضى اولسه بيله جائز
دكلدر. زيرا زرعك قبل النبات بيعى صحيح اولماز. «۲۰۵» ماده يه
باق. وا كر نابت اولوبده مستعير دخى بوكا راضى اولورسه بومعامله
جائزدر. اما مستعير راضى اولماز ايسه معيرك بوكا جبره صلاحيتى
يوقدر تكملة رد مختار .

معيرك مستعارى استرداد ايدة مديكى ديكر مسئله

معير، آتى البيان مسئله ده دخى اعاره دن بالرجوع مستعارى
استرداد ايدة مز. شويله كه معير، ياغ قويمق ايچون ديكر كمسنه يه
بر طولى اعاره ايدوبده معير، شول موضعه ده اعاره دن رجوع ايتسه كه
اوراده ديكر طولى تدارك ايله ياغى بوشالتمق ممكن اولميه ديكر
طولم بولمىسى ممكن اولان محله قدر مذكور طولم اجر مثل ايله
يد مستعيرده ابقا اولنور .

خامه

تمليك واعاره ده اختلاف

حقنده در

۱ مسئله :

برکیمسه، قزینه بر معتاد یعنی اول قزك مثلنه او یله جهاز ویریلور صورتده جهاز ویردکدنصره بو اشیایی سکا اعاره ایلمشیدم دیسه نظر اولنور. ابك اول جهازی ملك اولوب یوخسه عاریت قیلندن اولماق اوزره ویرمك معتاد و عرف مستمر اولنجه ابك قولى قبول اولماز. زیرا ظاهر حال ابی تکذیب ایدر. و اگر عرف بویله دکل ایسه یاخود عرف مطرد اولیوب بعضا او یله و بعضاً بویله اولور ایسه سوز ابکدر. نته کیم اول قزك مثلنه ویریله جك جهازدن اکثر مال ویرسده صکره عاریت اوله رق اعطا ایلدیکنی ادعا ایتسه سوز ابکدر. فقط بونده سوز ابك اولسی جمعیسنده میدر یوخسه جهاز مثلندن زیاده سنده میدر ظاهر اولان اولکیسیدر. ام ایله صغیره نك سائر وایسی احکام مذکورده اب کیدر.

۲ مسئله :

اب قزینه جهاز ویردکدنصره فوت اولغله بقیه ورته آنك تقسیمنی استدلکرنده نظر اولنور. اب حال تحتمنده ایکن قزك زمان صغرنده قز ایچون صاتون آلمش یاخود قزك حال کبرنده آلوب آکا تسلیم ایلمش ایسه بقیه ورته مداخله ایده من الحمد لله لاحول ولا قوه الا بالله

فهرست کتاب الامانات

تصحیفه

۲	کتاب سادس امانات حقه در
۲	امانتك اقسام ثلاثه سی
۵	امانتك لغت و شرع معنای و تعریف امانت اوزرینه
	ایراد اولنان سوآل و جواب
۷	امانت ایله و دیعه آره سنده فرقلر
۹	ودیعه نك تعریفی و بو تعریفه ایراد اولنان سوآل و جواب
۱۲	ایدا عك تعریفی و صراحة و دلالة اولسی و بو تعریفه
	ایراد اولنان سوآل و جواب
۱۵	عاریتک تعریفی و تعریف عاریتده اختلاف فقها
۱۸	تقسیم التملیکات
۱۹	عاریتک مجانا اولسنه متفرع مسائل
۲۱	تعریف عاریت اوزرینه سوآل و جوابلر
۲۲	اعاره نك مجله یه و فقهایه کوره تعریفلری
۲۴	اماناته دأثر اصطلاحات فقهیه و امانتده ایکی قاعده و بو

- قاعده لره متفرع مسائل عذیده
- ۳۱ بر کیمسه غیرک مالنی کندوسیچون عن علم ویا عن جهل
آلسه بونده کی حکملر
- ۳۷ اخذ لقطه ده اختلاف فقها و لقطه نك امانت اولمق
ایچون لازم کلان قید و شرط و امانت اولسنه متفرع
مسائل
- ۳۸ تعریف و تفصیل اللقطه و قیود لقطه نك ایضاحی
- ۴۱ ملتقط نه وقت غاصب و ضمین و نه زمان امین اولور
و اعلان ایله اشهاد یکدیگردن مفتی اولور می؟
- ۴۳ محل الاشهاد علی اللقطه و بلا سبب ترك اشهاد ایکی
صورته موجب ضمان دکدر
- ۴۵ لقطه نك بولندیغی محله اعاده سی حقنده کی احکام
- ۴۶ لقطه یی آلماق اولادر
- ۴۷ شروط ملتقط حقنده ایضاحات
- ۴۸ لقطه نك اعلانی و اعلانك غزته لره اولسی و زمان و مدتی
و مقداری
- ۵۰ لقطه بئدر دیانه تسلیم و عدم تسلیم حقنده ایضاحات

- ولقطه نك صاحبی ظهور ایتینجه اولنه جق معامله
۵۶ تضدقده و بیع حاکمه و بیع ملتطده حق تضمین
ولقطه نك جعل ونفقہ سی
۶۰ انفاقله صورت امر ولقطه نك مصرفه مقابل لقطه نك
مرهونی و لقطه نفقه سنك صورت تدارکی
۶۲ غلبه لكده آياق قابك دكشمی
۶۳ بر كیمسه تزدنده ديكرك مالی قضارا تلف اولدینی
صورتده کی حکم
۶۵ صاحبك اذنیله آلتان مالك امانت اولمسنه متفرع
مسائل متفرقه
۶۸ صاحبك اذنیله آلتدینی حالده ضمان لازم كلان درت
مسئله
۷۲ دلالة اذن صراحة اذن كبی اولمسنه متفرع اون ایکی
مسئله
۷۷ باب ثانی ودیعه حقنده در
۷۹ عقد و شرط ایداعه متعلق مسائل و ایداعده بعدالایجاب
قبول لازم اولوب اولیان مسائل

ضخیفه

- ۸۰ ایداعك انعقادی بش وجهله در
- ۸۹ ایداعك عقد لازم اولمدینی وایداع لازم اولان مسئله
- ۹۰ ویدیعه ده بالفعل وضع یدی یاخود وضع یده قابلیت می
شرطدر
- ۹۱ مودع ایله مستودعك عاقل ومیز اولملری واولدقارئی
حالده کی حکملر
- ۹۵ ویدیعه نك احکام ثلاثه سی
- ۹۵ ویدیعه نك امانت اولمی و امانت اولسنه متفرغ اون
یدی مسئله
- ۹۹ مستودعه ضمان لازم گلز دینلمسندن اوچ حکم مستفاد
اولور
- ۱۰۰ مستودع بالاجرده بعضا زمانك وقوعی واجیر مشترك
ایله بونك بیننده کی فرق
- ۱۰۴ ویدیعه ساعت قضارا دوشوب قیرلسه ضمان لازم گلز
ایکن اول ساعتی مستودع قضارا چکنسه ضمان لازم
کلیور فرق نه در
- ۱۰۵ ویدیعه بی قضارا چکنسه ضمان لازم کلورکن عاریتی

- قضارا چکنسه ضمان لازم کلیور فرق نه در
- ۱۰۶ و دیعه غیرک مالی اولدینی ظاہر اولدقده مستودعه
لزوج ضمان
- ۱۰۸ و دیعه ده تعدینک تعریفی
- ۱۱۰ تعدی یا تقصیردن معدود اولان و اولمیان اون سکر
مسئله
- ۱۱۹ مستودع و دیعه بی کیمله محافظه ایدر و حفظ و دیعه
مقابلنده اجرت آله بیلورمی
- ۱۲۰ مستودعک محافظه ایتدیره جکی امین عیالنده اولسی
شرطی دگلی
- ۱۲۳ امین اولمیانہ حفظ ایتدیرملک و امینده احوال ثلاثہ
- ۱۲۵ امین اولانہ حفظ ایتدیرملک ایله ایداع آره سنده
فرق
- ۱۲۵ مکان حفظ و و دیعه بی سفره کتورملک
- ۱۳۰ و دیعه ده کی حرز ایله سرقتده کی حرز بیننده فرق
- ۱۳۲ و دیعه نک بردن زیاده کسانہ ایداعده کی حکم
- ۱۳۶ عقد ایداعده ایراد اولنان شرطلر

صیغه

۱۴۱ و دیعه نك كندوسنه اعطادن نهی ایدیلان کیمسه ده کی

ایکی احتمال

۱۴۳ و دیعه یی غیره و یرمکده مجبوریت اولماق ایکی وجهله

اولور

۱۴۶ مستودعك مفقودی و وفاتنك صورت تحقیق

۱۴۹ مستودع غائب اولنجه و دیعه یه صورت انفاق و انفاقه

اذن ایچون لزوم بینه

۱۵۳ امانات ایکی قسم اولوب بعضیسنده بعدالتعدی ازاله

تعدی حالنده ضماندن برائت حاصل ایکن بعضیسنده

حاصل اولماز

۱۵۶ ازاله تعدیده اختلاف و ازاله تعدی ایله برائت لازم

کلیان ایکی مسئله

۱۶۱ بعض و دیعه یی استهلاکده و بعده یرینه وضع و خلطده

موجود احکام

۱۶۳ مستودع ، تعدیسی مودعك امریله اولدینی ادعا

ایتسه

- ۱۶۵ وديعه بي بعد الاستهلاك يرينه قويسه ضماندن خلاص
اوله ماز
- ۱۷۵ وديعه نك خلطى وخالطك انتفاعى وخالطك وجوه
اربعة سيله احكامى
- ۱۷۷ وديعه ده تعدى مودعك امريله اولنجيه اولبابده كى
حكمر وبلاذن خلطده اختلاف الاثمه
- ۱۸۰ مستودع وديعه بي آخره بلا اذن ايداعى وبونده كى
قيود ساثره
- ۱۸۱ طقوز شى واردركه انسان مالك ايكن بشقه سنه تمليك
ايدمه من
- ۱۸۹ مستودع الغاصبه كى حكم وبعد الضمان غاصبه مراجعت
ايدمه بيلمسى
- ۱۹۲ مستودعك وديعه بي استعمال ايدمه بيلمسى صورتلى
- ۲۰۲ وديعه نك مودعه يا عياله ردى و مودعك طلبى
ومستودعك انكارى
- ۲۰۶ مستودعك رد يا تلف ادعاسى و طلب وديعه نك صور
ثلاثه سى

- ۲۱۲ رد و دیعه دن مستودع ایکی سبیلہ امتناع ایدہ ییلور.
- ۲۱۹ مشترک و دیعه یی مودع لر دن بری طلب ایتدکده
اولیابده کی احکام
- ۲۲۴ و دیعه نك منافعی کیمه عائددر و بوزواندك تلفندن خوف
اولنسه نه یاییلور و مودعه عائد اولیان منافع
- ۲۲۶ صاحب و دیعه غائب اولنجه اولنه حق معامله و تقدیر
نفقه و نفقه یی ایجاب ایدن احوال
- ۲۳۴ مستودعه جنوب عارض اولورسه
- ۲۳۶ مستودع فوت اولدقده کی حکم
- ۲۴۵ تجهیلده ایکی شی آرانور
- ۲۴۶ سایر اماناتده تجهیل
- ۲۵۷ و دیعه نك صورت تضمینی و سندك و دفترک قیمتلی
- ۲۶۰ خاتمہ ایکی کیمسه نك بر و دیعه ده نزاعلری و مودع ایله
مستودع آره سنده کی اختلاف حقنده در
- ۲۶۵ باب ثالث عاریت حقنده در و عاریتک ادله مشروعی
- ۲۶۷ شروط اعاره نك انواع عیدیه سی

- ۲۷۵ عاریتدن رجوعك جوازی و كراهتی وعاریتك انفساخی
اوپ و جهله اولسی
- ۲۷۹ عاریتك لازم اولدیغی مسئله
- ۲۸۱ تهجیل العاریه و مثلیاتك اعاره سی و قیمیاتك استمالاکی
اوزرینه اعاره
- ۲۸۶ محجورینك اعاره و استعاره لری
- ۲۹۰ اعاره مشاعك جوازی و اجاره دن فرقی
- ۲۹۲ عاریتك احکامی و عاریتده ضمان شرط ایدلده
حکمی
- ۲۹۷ عاریتك مضمون اولماسندن مستثنی مسائل
- ۳۰۳ اعاره ده موجب ضمان اولان حال حقنده قاعده
- ۳۰۸ ضمانی ایجاب ایدن تصرفك باذن المعیر وقوعك
ادعایی
- ۳۱۵ اعارهك اون آلتی قسم اولسی
- ۳۲۱ اعاره مقیده ده عمده ده سهوده مخالفه جائز دکلدر
- ۳۲۴ مکان یله تقید سورتنده مساوی یا اقصر مکانه کتمك

یا هیچ بریره کتاما

۳۲۹ معیر طرفندن تعین اولسان انتفاعه مخالفت اوچ
قسمدر

۳۳۷ مستعار آته یوک یوکلتمک جائز می

۳۳۸ مطلق اعاره فعل معیر ایله تعینندن صکره دیگره انتفاع
جائز می

۳۴۲ آخره اعاره سی جائز اولیان اعاره اولوبده تلف
اولسه نه حکم ترتب ایدر

۳۴۴ معیر ایله مستعیرک اطلاق و تقییدده اختلاف لری

۳۴۹ باذن المعیر معارک ایجاری و رهن مستعار

۳۵۴ عاریتک ایداعنده اختلاف فقها

۳۵۵ عاریتک ایداع ایدلمسندن ایکی مسئله مستنادر

۳۶۱ عاریت موقتده لزوم ضمانده اختلاف فقها

۳۶۹ مغضوبک ردیله عاریتک ردی آره سنده فرق

۳۶۹ رد مقبوضک مصارفی حقنده قاعده

صحیفه

۳۷۴ عاریت موقتہ و غیر موقتہ رجوع اولندقدہ ضمان

وعدم ضمان

۳۸۴ خاتمہ تملیک و اعارہ اختلاف












﴿ الجزء السابع ﴾

من

درر الحکم شرح مجلد الحکم

شرح

کتاب الهمية




اثر

خواجه امین افندی زاده


علی حیدر

محکمة تمیز اعضاسندن و مکتب حقوق و ملکیه شاهانه

مجله معلمی



مؤلفک مهری بولنمیان نسخه ساخته و متجاسری مسؤولدر



استانبول

شرکت مرتبیه مطبعه سی — باب عالی جاده سنده نومرو ۵۲

۱۳۱۹

بِسْمِ اللَّهِ الرَّحْمَنِ الرَّحِيمِ

الحمد لله واهب العطايا معطي النعم خالق البرايا والصلاة
والسلام على سيدنا محمد مبالغ الهدى وعلى آله واصحابه وخلفائه
ائمة الدين المجتبي .

❦ كتاب سابع ❦

يعنى مجله احكام عدليه نك منقسم اولدينى
اون آلى كتابدن يدنجى كتاب

(هبه حقنده اولوب بر مقدمه ايله ايكي بابى مشتملدر)
مناسبة الهبة للعارية هو الترقى من الادنى الى الاعلى ولان العارية
كالمفرد والهبة كالمركب لان فيها تمليك العين مع المنفعة طحطاوى .
هبة، فانك كسريله وعينك سكونيله اولان فعله وزنده در .
زيرا اصلى وهب دن مأخوذ وهبه در . كعدة اصلها وعدة من
وعد فكانت من المصادر التى تحذف اوائلها ويعوض فى آخرها
التاء فتح وعينى .

هبة نك مشروعتى ادله اربعه دن كتاب وسنت و اجماع
امت ايله ثابت اولمشدر . كتاب ، واذا حييتم تحية فحيوا باحسن
منها اوردوها آيت جليله نى اولوب تحيه دن مقصود بعزيل
سلامدر ديمشدر ايسه ده اظهر اولان عطيه در كفايه .
سنت دنخى تهادوا تحابوا حديث شريفيدر تهادوا دالك

فتیحی و واوک سکونی ایله تعالوا کبی اولوب جماعته خطاب صیغه سی اولدینی مثللو تحابوا دخی باء مشدده مضمومه ایله اولوب جماعته خطاب صیغه سیدر که اصلی تحابون ایکن امره جواب واقع اولمغله نون ساقط اولمشدر هدایه وعینی.

اجماع امته کذجه هبه نك مشروعیته اجماع امت واقع اولمشدر هدایه .

هه نك محاسنی : محاسن هبه چوقدر . مؤمن اوزرینه ولدینه تعالیم توحید و ایمان واجب اولدینی کبی تعالیم جود واحسان دخی واجبدر . زیرا حب دنیا هر خطیئه و فغالک باشیدر بحر . واجب تعالی ذات اقدس لرینی وهاب وصفیله توصیف ایدوب «العزيز الوهاب» بیورمشدر که بو، هه نك محاسنی ایچون کفایت ایدر فتح . بشر، هبه یه مباشرت ایتدکه اشرف صفاتی اکتساب ایتمش و کرمی استعمال و نفسندن شی ازاله و قلب موهوب له سروری ادخال و موهوب له ایله آرمسند مودت و محبتی ایراث و حسدی ازاله ایلمش و بوکا مباشرت ایدن «ومن یوق شح نفسه فا ولئک هم المفلحون» آیت جلیله سی حکم منیفی وجهله مفلحیندن اولمش اولور طحطاوی .

❦ مقدمه ❦

(هبه یه دائر اولان اصطلاحات فقهیه بیاننده در .)

❦ ماده ۸۳۳ ❦

(هبه) لغت عربده موهوب لهک یعنی معطی لهک انتفاع

ایده چکی شیئی تفضل واحساندر. اولشی کرک مال اولسون،
 فلان بو شخصه بر بارگیری هبه ایتدی سوزنده اولدینی کبی
 کرک مال اولسون، خدا اوغلنی سکا هبه ایتسون کلامنده
 اولدینی کبی که اوغلی یعنی حر اولان بنی آدم مال دکادر.
 نته کیم آیت جلیله ده «فهب لی من لدنک ولیاء و ههب لمن یشاء
 انا انا و یهب لمن یشاء الذکور» وارد اولمشدر ابو السعود
 المصری. شو حالده هبه نك آتیده کی معنای اصطلاحی به نقلی
 نقل اسم العام الی الخاص اولور. چونکه معنای اصطلاحیجه
 هبه بالخاصه ماله بولنور. هبه نك جمعی هبات و مواهب کلور فتح.
 هبه، اصطلاح فقها ده «بلا عوض بر مالی آخره» حالا
 «تملیک ایتمکدر که» تملیک «ایدن کیمسه یه واهب و اول ماله»
 یعنی تملیک ایدیلان شیئه «موهوب و آنی» یعنی شو تملیکی
 «قبول ایدنه موهوب له دینیلور.» همزه نك کسری و تانك
 تشدید ایله اولان «اتهاب دخی هبه یی قبول دیمکدر.» اما
 استیهاب هبه یی طلب ایتمکدر کفایه و فتح. شو تعریفدن
 آکلاشیلور که هبه تملیکدن عبارت اولوب فقط موهوبه دخی
 بعضاً هبه اطلاق اولدینی و باب ثانینک فصل اولی عنواننده کی
 هبه موهوب معناسنده بولدینی کبی موهبه دخی اطلاق
 اولنور فتح.

هبه نك شو تعریفده هدییه و صدقه دخی داخل اولوب

آتیده بونلرک آبروجه تعریف اولنسی هبه دن خروجنی
اقتضا ایلمز.

ایضاح القیود

۱ تملیک، بلا عوض قیدی تملیکه مربوط ومعناجه آندن
وؤخردر. چونکه بونک تعریف عربیسی تملیک المال بلاعوض دن
عبارتدر. شو حالده تملیک لفظی تعریفک معنا جزء اولی
وجنسی مشابه سنده ومن وجه قید مدخل اولوب بیع واجاره
واعاره کبی کافه تملیکات داخل اولور. اما من وجه آخر قید
مخرج اولوب بو لفظ ایله درت نوع شی تعریفدن خارج قالور.
شویله که:

اولاً، مستغلات وقفیه نک وارضی امیزیه نک مجاناً فراغی
— فراغ حق عادی مجرددن نزولدر دیسانلره کوره —
خارج قالور.

ثانیاً، آتیده ایضاح اولنه جنی اوزره تملیکدن حالا تملیک
مستفاد اوله جغندن بو قید ایله وصیت خارج قالور.

ثالثاً، تملیک لفظیله ۸۷۳ ماده ده موضوع بحث اولان هبه
یعنی دینی من علیه الدینه تملیک خارج قالورکه بونک خروجی
دخی لازمدر. زیرا مذکور هبه هر نقدر هبه لفظیله واقع
ایسه ده حقیقتده اسقاط اولوب یوخسه تملیک دکلدر. بونک
هبه اولمادیغنه دلیل دخی هبه بعدالایجاب موهوب لیه قبولنه

توقف ايتديكى حالده دينى مديونه هبه نك قبوله توقف ايلما مسيدر.
بو مسئله ٨٧٣ ماده شرحنده بيان اولور.

رابعاً ، تملك لفظيله نفى ملك صورتيله اولان اقرار
خارج قالور. زيرا اقرار مذكور فى الحال تملك اولمىوب بلهكه
او مال مقر لهك ذاتاً ملكى بولنديغنى اخباردن عبارتدر .

ونفى ملك صورتيله اولان اقرارك تعريفدن خروجى
لازمدر . چونكه بو اقرار هبه اولمىوب حتى تماميت هبهده
قبض لازم اولديغنى حالده نفى ملكده قبض لازم دكلدر .

مثلاً بر كيمسه ديكر كمسنه يه اين تراست ديسه وقت تكلمده
مذكور مال او كمسنه نك ايدوكنى اقرار ايتمش اولغله مذكور
مالك تسليمى شرط دكلدر. اما اين ترا ديسه اول مال مستقبليه
او كمسنه ايجون قلنمش اولوب بو ايسه هبه ايله اوله جغندن
تسليمى لازم كلور هنديه فى الباب الاول .

نته كيم مالك اولديغى اموالك جيمعيسى فلانكدر ديسه هبه
اولوب تسليمى لازم ايكن بكا نسبت اولنان اموالك جملهسى
فلانكدر ديسه اقرار اولوب تسليمى شرط دكلدر . « ١٥٩١ »
ماده يه باق . ٨٤٨ ماده شرحنه دخى مراجعت اوانه .

تملك لفظندن مستفاد اولان احكام

تملك لفظى مملكتك يعنى واهبك اول ماله مالك و تملكه
اهل اولسنى اقتضا ايدىجكى جهته بو لفظ ايله ٨٥٧ و ٨٥٩
ماده لره اشارت حاصل اولديغى كى مباح اولان شيك هبه سنك

عدم جوازینہ اشارت حاصل اولور . زیرا مثلاً جبال
مباحہ بولنان اودون کیمسہنک ملک اوملدیغی جہتلہ و اہبک
آنی برینہ ہبہ و تملیک ایتسی مملوک اولمیان شیء تملیک اولدیغندن
محالدر بحر .

۲ بر، بوتعبیر موہوب ایکی یازیاہدم اولمسندن احتراز ایچون اولیوب
بلکہ تنکیر و تعمیم ایچون اولمغلہ موہوب برمال اولسی صورتہ
شامل اولدیغی کبی ایکی یازیاہدم مال اولسی صورتہ دخی
عام اولور .

۳ مالی، مالی تملیک دنیلیمسیلہ اباحہ ایلہ تملیک المنافعدن
عبارت بولنان عاریت و اجارہ و من حیث الزمان و من حیث المكان
مہائیہ و مسقفات و مستغلات و وقفیہ نک و اراضی امیریہ نک فراغی
— بو فراغ ایجاردر دیان قوئلہ کورہ — خارج قالور .

اباحہ ایلہ ہبہ آرمسندہ کی فرق

اباحہ تعریف ہبہ دن اخراج اولمشدر . زیرا اباحہ ایلہ
ہبہ بینندہ اوچ درلو فرق واردر .

برنجیسی، من حیث الماہیہ فرقدرکہ ہبہ برمالی بلاعوض
تملیکدن و اباحہ ایسہ ۸۳۶ مادہ حکمنجہ برمالی اکلہ رخصت
ویرمکدن عبارت و بناء علیہ ہبہ ایلہ اباحہ ماہیہ بشقہ بشقہ
شیلدر .

ایکنجیسی، من حیث الحکم فرقدر . شویلہ کہ ہبہ
بعدالایجاب و القبول و القبض و اہبک موہوبدن ملک زائل

ایکن اباحه ده مباح له اباحه اولنان شیئی اکل و تناول ایتدیکجه آندن
میبخک ملیکی زائل اولماز.

اوچنجیسی، هباده موهوب لهک و موهوبک معلوم اولمسی
شرط ایکن اباحه ده مباح لهک و مباحک معلوم اولمسی شرط
دکدر. یعنی اباحه نک صحتنده اول شیئک معلوم اولمسی شرط
اولدینی کبی اول آخرك دخی معلوم اولمسی امر لازم دکدر.
حتی بر کیمسه هر کیمکه بنم مالیدن اکل و تناول ایدرسه حلال
اولسون دیسه اباحه اولور. نته کیم ۸۷۵ ماده ده ایضاح اولنور
خانیه فی فصل فی برائة الغاصب و المديون و هندیه فی الباب
الثامن من الغصب.

اما بر کیمسه دیگر کمسنهیه بنم مالیدن هر نه اخذ ایدر
ایسهک سکا حلال اولسون دیمسیله او کمسنه اول کیمسه نک
مالی اخذاید مز. زیرا بوقول هبه اولوب ۸۵۸ ماده ده مصرح
اولدینی اوزره مجهولک هبه سی جائز دکدر. رجل قال لا آخر
انت فی حل مما اكلت من مالی او اخذت او اعطيت حل له
الاكل ولا يحل له الاخذ والاعطاء لان اباحة الطعام المجهول
جائز فان من قدم مائدة بين قوم حل لهم الاكل منها وتمليك
المجهول باطل خانیه فیما ذکر.

۴ بلا عوض، بوقید ایله بیع و قسمت خارج قالور. زیرا
بیعه عوض مشروط اولدینی کبی قسمتده دخی ۱۱۱۶ ماده ده
مذکور اولدینی اوزره مبادله موجوددر.

سوآل و جوابلر

بو تعریف اوزرینه درت صورتله اعتراض وارد اولمغله
جوابه محتاجدر .

۱ سوآل ، تعریفده مال لفظی مذکور اولوب مالک ۱۲۶
مادهده کی تعریفنه کوره لفظ مذکور دینه شامل اولمیه جغندن
بو تعریفدن دینک مدیوندن بشقه — نه هبه یعنی ۸۴۸ مادهده
مذکور اولان تملیک خارج قالوب بناء علیه تعریف افرادینی
جامع اولماز .

جواب ، بومادهده کی مال مجله نك ۶۳۱ مادهسنده کی مال
کبی حالا مال ایله مالا مالدن اعم معناده مستعملدر . بناء علیه
مازالد کر ۸۴۸ مادهده کی تملیک صحتی موهوب له اول دینی
قبض ایله واهب امر ایتدیکی تقدیرده درکه بواجره بناء مذکور
دین قبض ایدلده قابض ، بحکم النیابه اولا واهب طرفندن
قابض اولدقدن صکره بحکم الهبه نفسی ایچون قابض ووقت
قبضده اول دین عین اوله جغندن حالا اولان عینله مالا اولان
عینه تعمیم ایدلده تعریف مذکور ینه تام یعنی مذکور تملیک
الدین تعریفده داخل اولور درر وشرحه . خلاصه بوتقدیرده
هبه نك تمامیتی قبضدن صکره درکه اول زمان موهوب مال
وعین اولور .

۲ سوآل ، مال تعبیریه طاعاتک هبه سی خارج قالور .

حالبوکه طاعاتک هبه سی عند اهل السنه صحیحدر قهستانی .
رجل تصدق علی المیت اودعاله فانه یصل الثواب الی المیت اذا
جعل ثواب عمله لغيره من المؤمنین جاز هندیه فی الباب الثانی
عشر فی الصدقة .

جواب ، معروف اولان هبه دن مقصود معاملاتدن اولان
وتعبیر دیکرله موهوب لهک آ کا مالک و واهب ایچون حق
رجوع ثابت اولمسی کبی احکام دنیویه تعلق ایدن هبه اولوب
هبة الطاعات بوقیلدن هبه اولمامغله تعریفدن خارج اولدینی کبی
معرفدن دخی خارجدر .

۳ سوآل ، بلا عوض دینلمکله « ۸۵۵ » ماده ده موضوع
بحث اولان هبه بشرط العوض تعریف مذکوردن خارج قالدینی
جهتله تعریف مذکور افرادینی جامع اولماز . بناءً علیه هبه
بشرط العوض ایله عکسا تعریف منتقض اولور فتح . زیرا بلا
عوض قولی عوضک عدم اشتراطنده نص اولوب هبه بشرط
العوض ایسه بونک نقیضیدر .

جواب ، بلا عوض دیمک بلا شرط عوض دیمک اولوب
اولوجهله بونده حذف مضاف واردر . یوخسه بشرط عدم
العوض تملیک دیمک دکلدر . کرچه معنای ثانی یعنی بشرط
عدم العوض هبه بشرط العوضه منافی ایسه ده معنای اول یعنی
بلا شرط العوض شوکا منافی دکلدر درر . بونک تفصیلی شودرکه
علوم عقلیه ده تقرر ایتدیکی اوزره ماهیت اوچ نوع اولوب

برنجیدی ماهیت بشرط شی که بوراده بشرط العوض دیو تفسیر
اولور. بیع بونوع ماهیتنددر. ایکنجیسی، ماهیت لا بشرط
شی که بوراده عدم شرط العوض دیو تفسیر اولور. آتیده
ایضاح اوله جفی اوزره هبه بونوع ماهیتنددر. اوچنجیسی،
ماهیت بشرط لا شی که بوراده بشرط عدم العوض دیو تفسیر
اولور. عاریت بونوع، ماهیتنددر. ایمدی بوراده کی بلاعوض
ایکنجی معناده یعنی ماهیت لا بشرط شی معناسنه اولوب یوخسه
ماهیت بشرط لا شی معناسنه اولماغله هبه بشرط العوض دخی
شوتعرفده داخل اولور. خلاصه، ماهیت بشرط لا شی هبه
بشرط العوضه منافی ایسه ده ماهیت لا بشرط شی هبه بشرط
العوضه مباین اولیوب بلکه اعم مطلقدر. چونکه علوم عقلیه ده
تقرر ایتشدر که بلا شرط شی ماهیتی بشرط شی ایله بشرط
لا شی ماهیتلرندن اعمدر فتح القدر.

هر نه قدر حموی کی بعض فقها: بلاعوض قولی عدم اشتراط
عوضده نص اولدینی جهته بونک نقیضی بولن ان هبه بشرط
العوض بلاعوض ماهیتی ایله اجتماع ایده من دیرک بوجوابه
اعتراض ایلمشدر ایسه ده اعتراض مذکور مسئله نک لایقیده عدم
تدقیقندن نشئت ایتشدر. ویدیکی کی بلاعوض عدم اشتراط
عوضده نص اولیوب اشتراط العوضه دخی عام بولمشدر.
چونکه المشروط بالشی ایله اللا مشروط بالشی آره سنده هر نقدر
بحسب المفهوم تنافی وار ایسه ده بحسب الصدق تباین اولماغله

بوايكي لفظك ماحد قلى واحد اوله بيلور . الانسان المشروط
بالنطق ايله الحيوان الغير المشروط بالنطق كي . اوت المشروط
بالشى ايله المشروط بعدم ذلك الشى آره سنده تنافى واردر فتح
و ابوالسعود المصرى .

لكن تعريف هبه ده واقع بلاعوض قيدى بوجهله ماهيت
لا بشرط شى معناسنه اولنجه تعريف الهبه بيعه صادق اولور .
وبو حالده تعريف مذكور اغيارنى مانع اولماق جهتيله منتقض
اوله جغندن محذور مندفع اوليوب بلكه مشدد وبو حالده تعريف
الهبه طردا منتقض اولمش اولور فتح القدير .

مشار اليهك مذكور اعتراضى صاحب دررك جوابنه وارد
دكلدر . چونكه جواب مذكور خلاصه سى شودر كه هبه ده
عوض بولنقى امر لازم اوليوب عوض بولنسه ده جائزدر . هبه
بشرط العوضده اولدينى كي . بولنسه ده جائزدر . بلاعوض
هبه ده اولدينى كي . اما بيعه عوض بولنقى امر لازم اولوب
بلاعوض يعنى نفى عوض ايله بيع اصلا صحيح اولماز . ابن الهمام
بروجه بالا اعتراض ايتدكدن صكره اصل سوآله شو وجهله
جواب وير مشددركه : تعريف الهبه ده كي بلاعوض قيدندن
مقصود بلا اكتساب عوض ديمك اولوب بو حالده هبه نك تعريفى
شويله اولور « بشرط عدم اكتساب العوض برمالى آخره
تمليك ايتكدرك » ايمدى هبه بشرط العوضده هره قدر عوض
موجود ايسه ده اوله هبه بشرط الاكتساب دكلدر . كورلزميكه

فقهایی بیعی، مالی مال ایله بطریق الا کتساب مبادله در دیو تعریف ایدرک «بطریق الا کتساب» قیدیله هبه بشرط العوض تعریفدن اخراج ایدلیدیکنی بیان ایللمشدردر انتهی .

فقط اکتساب، کسب ایتک و قزانمق دیمک اولدیغنه و هبه بشرط العوضده واهب عوضی و موهوب له مال موهوبی قزانمش بولندیغنه کوره بوجوابک دفعه اعتراضده نه فائده سی اولور ؟

جواب ثانی، مجمله نک بو تعریفی مذهب متقدمینه مبنی اولوب بونلر تعریف بالا عمی و تعریف بالا خصی تجویز ایدرلر طحطاوی .

دیگر جوابلر : منلا مسکین و شرنبلالی شو سوآل نالته بشقه بشقه جوابلر ویرمشلر ایسه ده هیج بریسی دفع سوآله کافی و ظاهر دکلدرد. جوابلرک اک مقبولى صاحب درر طرفندن ویریلان جوابدر .

۴ سوآل، وصیت شو تعریفده داخل اولور . شویله که برکیمسه بن فوت اولدیغمده شو ساعت زیده ویرلسون دیدکده اول کیمسه فوت اولدقده ثلث مالی مساعد اولنجه زید اول ساعتیه مجاناً مالک اولور . بناءً علیه ابن کمال تعریف هبه یه فی الحال قیدیخی علاوه ایدرک هبه ، بلا عوض برمالی فی الحال تملیک ایتمکدر دیو تعریف ایدوب فی الحال قیدیله مابعد موته مضافاً تملیک اولان مذکور وصیتی تعریفدن اخراج ایللمشدر .

ایمدی مجله نك تعریفده مذکور قید مذکور اولمامغله تعریف
هبده وصیت مذکور داخل اولمش و تعریف اغیارینی مانع
اولمامش اولور .

جواب ، تعریفده واقع تمليك لفظندن فی الحال تمليك
تبادر ایدر قهستانی . وصیت ایسه فی الحال تمليك اولمیوب
مابعد الموت مضاف اوله رق تمليكدر فتح .

۸۳۴ ماده

(هدیه) هابك فتحی و دالك كسری و بابك تشیدی ایله
(برکیمسه یه اکراما کتوریلان یا کوندریلان) یعنی هبه ایدیلان
(مالدر) جمعی هدایا کلور .

اکراما قیدیله رشوت خارج قالور . زیرا رشوت اکراما
کوندرلیوب بشرط الاعانه اعطا اولنور . ایشته بو، من حیث
الماهیة فرقدردر . برده رشوت ایله هدیه آرمه سنده من حیث الحکم
دخی فرق واردر . شوپله که مهدی له قبضیله هدیه یه مالک
اولدینی حالد مرثشی رشوته مالک اوله ماز . بوصورته هدیه
ایله رشوت بیننده ایکی درلو فرق حاصل اولور .

مثلاً مهدی له هدیه یی استهلاك ایتسه ضامن اولماز . اما
مرثشی رشوتی استهلاك ایتسه ضامن اولور . و موجود ایسه
عیناً رد ایتسی لازم کلور . شوپله که برکیمسه برایشدن طولانی
بر شخصدن رشوت آلوب اول ایشی کوردکن صکره دخی

شخص مرقوم مذکور رشوتی مرتشیدن اخذ واسترداد
ایده بیلوب حتی رشوته مقابل عوض اعطا ایدمک دخی حق
استردادی اسقاط ایده من .

نته کیم برکیمسه فلان مصلحتی کورمک اوزره برینی آینده کی
آلاجغندن ابرا ایتسه ابراء مذکور رشوت اولمغله صحیح
اولدینی کی متعاشقان یکدیگرینه بعض اشیا اعطا ایتسه لر
رشوت اوله رق ملک ثابت اولیه جغندن دافعک حق استردادی
واردد قیه .

ظاهر و سیاقه انساب اولان هدیه نک بروجه آتی تعریفیدر
« برکیمسه یه اکراماً هبه اولنان مالدر » قهستانی .

۸۳۵ ماده

(صدقه ثواب) و رضای باری (ایچون هبه اولنان
مالدر) که فقیره و یریلور . شو تعریفدن آکلاشیلور که صدقه
هبه دن اخص مطلقدر .

بو جهته یعنی صدقه ثواب ایچون اولمغله غنی یه هبه ،
صدقه لفظیه وقوعبولسده هبه اولدینی کی فقیره صدقه ،
هبه لفظیه اعطا قلنسه دخی صدقه بولنمشدر خانیه و قهستانی
وانقروی .

انسانلر ، ثروته نظرا اوچه منقسم اولوب غنی و فقیر
و مسکیندر . غنی ، شرعا حوائج اصلیه سندن فضله اوله رق

مقدار نصابه یعنی لا اقل ایکوز درہم کموشہ یا بوقیمتہ دیگر مالہ مالک اولان کیمسہ درکہ بوکا زکات ویریلہ من . غنا ، بر حد تحتندہ بولنمیوب حوائج اصلیه سندن فضلہ ایکوز درہم کموشہ یا بدانہ مالک اولان غنی اولدیغی کبی ملیونلر ایله دراهم و دنانیرہ مالک اولانلر دخی غنیدرلر . فقیر دخی حوائج اصلیه سندن فضلہ ایکوز درہم کموشہ یا بومقدار قیمتہ دیگر مالہ مالک اولمیان کیمسہ درہم ایکوز درہمدن اقلہ مالک اولسہ دخی ینہ فقیر عد اولنور . مسکین دخی هیچ برنسنہ سی بولنمیان کیمسہ درکہ جملہ سندن حالا اسؤ اولور .

۷۳۶ ماده

(اباحہ) لغتہ تخیردن عبارتدر فلان کیمسہ فلان آدمہ مالنی مباح قیلدی دنیلیور کہ اخذ و ترکہ اذن ویردی واخذ و ترک جہتلرنده مختار قیلدی دیمکدر شرعا مطعوماتدن یعنی مأکولات یا مشروباتدن (بر شئی بلا عوض اکل و تناول ایتمک اوزره آخرہ اذن و رخصت ویرمکدر .)

اکل مأکولاتہ مخصوص بر تعبیر ایکن تناول مأکولات و مشروباتہ عام اولمغله تناولک اکلہ عطفی عامی خاصہ عطف قیلندندرکہ جائزدر .

۱۲۲۶ مادهدن مستفاد اولندیغنه کوره اباحہ مأکولاتہ مخصوص دکلددر .

﴿ باب اول ﴾

﴿ عقد هبه به متعلق مسائل بیانده اولوب

ایکی فصلی شاملدر ﴾

هبه ده درت شی آرانور . برنجیسی ، هبه نك سبیدرکه
اوده واهبك خیری قصد ایتسیدر . بوخیر یا ثواب دینوی [۱]
اولور . عوض و ثنا و وهوب لهك شیرینك دفعی کبی طحطاوی .
یا خود ثواب اخروی اولور . نعیم مخلد کبی قهستانی . اگر نیتی
حسن ایسه . ایددی هبه مندوبه اولوب فقط قبولی سنتدر . مکرکه
هبه ایدلدیکی مال حرام ایدوکی یا خود ایتدیکی هبه سبیلله صکره
منت ایده چکی معلوم اوله طحطاوی . ایکنجیسی ، هبه نك
شرطیدرکه بو بابك فصل ثانینده بیان اولنور . اوچنجیسی ،
هبه نك حکمیدرکه اوده غیر لازم اوله رق موهوب لهه ملکك
ثبوتیدر . ایددی موهوب لهه ثبوت ملک غیر لازم اولمغاله
رجوع عن الهبه و فسخ هبه صحیح اولوب آنده خیار شرط
جائز وهبه شروط فاسده ایله باطل اولماز . دردنجیسی ، هبه نك
رکنیدرکه آتی الذکر فصل اولده بیان اولنور ابوالسعود .

[۱] دینوی دالك ضمیله ده کسر یله ده اوقونور دنیا ضمیله

و کسر یله اوقوندینی کبی طحطاوی .

﴿ فصل اول ﴾

﴿ رکن و قبض هبیه دائر مسائل بیاننده در ﴾

بوفصلاک مطالعه سندن آکلا شیله جنی اوزره فصل مذکورده
رکن هبه دن بشقه شیلردن ادخی بحث اولندیجی جهته عنوان
معنوندن اخصدر .

﴿ ۸۳۷ ماده ﴾

(هبه) و هدییه و صدقه (ایجاب و قبول ایله منعقد و)
موهوبی و هدییه یی و صدقه یی (قبض) کامل یعنی موهوب لیهک
یا نائینک قبض اتمسی (ایله تمام) یعنی ملکیتی مفید (اولور .)
شو حالده هبه و صدقه و هدییه نک رکنی ایجاب و قبولدن
عبارتدر . بیع و اجاره مثللو عقود سائر نه نک رکنی ایجاب و قبولدن
عبارت اولدینی کی . « ۱۴۹ » و « ۴۳۳ » ماده لره باق .

هبه نک رکنی ایجاب و قبول اولدی . زیرا هبه عقد اولوب
قیام عقد ایسه ایجاب و قبول ایله در . چونکه انسانک ملک
آنک طرفندن ایجاب و تملیک اولمقسزین غیره انتقال ایلمیه جکی
کبی ایجاب هبه غیر اوزرینه ملک الزام اولوب بدون القبول
ایسه الزام اوله ماز کفایه و قهستانی . و ملزم بهک صرف فائده لی
شی اولمسیله قبول شرط دکادر دینیه مز . و ۱۶۷ ماده شرحنده

ایضاح اولندیغی اوزره هیچ بر کیمسه دیگرک رضاسی اولمده
اول دیگره ملک اثبات ایده من .

رکن هبه ده اختلاف فقها

و طرفینک دلیملری

هبنک رکنی صاحب الحیط کبی بعض فقهایه کوره حق
واهبده یالکز ایجابدن عبارتدر . قبول رکن هبه دکلدر . هر
نقدر حق موهوب لهده رکن هبه ایجاب و قبولدن عبارت ایهده .
بوجهتله بر کیمسه فلان کمنسه هبه ایتیم دیومین ایتدکنصکره
اول کیمسه او کمنسه بر مائی هبه یعنی ایجاب ایدوبده موهوب له
قبول ایتسه بیلله اول کیمسه حاث اولور نهاییه . وفلان هبه
ایدهم دیو یمین ایدوبده هبه یی آکا ایجاب ایتدیکی حالد
او فلان قبول ایتسه حاث اولماز عنایه . ایتدی مجرد ایجاب
رکن اولیوبده قبول دخی رکن اولسه ایدی اولکی صورتده
موهوب له ایجابی قبول ایتدیکی جهتله هبه منعقد اولماق
وبناء علیه واهب حاث بولنماق لازم کلور ایدی . نته کیم
بیعه حاث اولیه جفی کبی . شویله که بر کیمسه بن فلان
کمنسه مال صاتم دیو یمین ایتدیکی حالد برمانی او کمنسه
ایجاب ایدوب فقط او کمنسه قبول ایتسه اول کیمسه حاث
اولماز نهاییه . بوسورتده هبه اقرار و وصیت منزلنده اولور
عنایه حتی قهستانی لعل حق اولان قبولک رکن اولماسی

قولى ايدوكنى بيان ايله برکيمسه، الالك ملكى اولمقاوزره
يولده بر مالى وضع ايتسه جائز اولديغنى سويلمشدر.
ابن الهمام دخى هبهده قبول، قياسا ركن ايسهده استحسانا
رکن دکلدر ديمشدر.

تسييب الدابه

ينه بو جهته برکيمسه نك حيوانى سقطالانديغى جهته
صاحبى آنى تسييب يعنى باشى بوش صاليويره رك کيم استرسه
آلسون ديسه ديكر بر شخص آنى آلوب اصلاح ايتدکن
صكره صاحبى آنى طلب ايتسه نظر اولنور. صاحبى آنى
تسييب ايدرکن کيم استرسه آلسون ديمش ايسه اول حيوان
شخص مرقومك اولور. لان الموهوب له وان كان مجهولا فعند القبض
يصير معلوما خانيه فى اول الهبة. حيوان صاحبى آنى
سويلرکن شخص مرقوم كرك غائب اولوب بو كلامك
سويلنديكنى بر آدم شخص مرقومه خير ویرسون وكرک
حاضر اولوب مذکور كلامى بالذات استماع ايتسون.
اما بويله ديمامش ايسه « بن آرتق بونى استمم » ديمش
اولسه بيله اول حيوان صاحبکدر. رجل رمى ثوبه
لايجوز لاحدان يأخذه حتى يقول حين رماه من اراد
ان يأخذه فليأخذه خانيه فى اول الهبة.
« کيم استر ايسه آلسون » سوزينك سويلنديكنى

صاحبنك اقرارى ياخود آلوب اصلاح ايدن شخصك اقامه
 بينه ايمسى ايله ثابت اوله جنى كى لدى الاستحلاف صاحب
 حيوانك يميندن نكوليله دخى تحقق ايدر هندية فى الباب الثالث.
 صاحب الكافى والكفايه كى ديكر بعض فقهاءيه كوره
 هبهنك ركنى بيع و اجاره نك ركنى كى ايجاب و قبولك
 مجموعى اولوب يوخسه ركن يالكز ايجاب دكلدر. لان الهبة عقد
 و قيام العقد بالايجاب و القبول لان ملك الانسان لا ينتقل
 الى الغير بدون تمليك و الزام الملك على الغير لا يكون بدون
 قبوله فتح. اما هبه ايم ديو يمين ايتد كد نصكره يالكز هبه ي
 ايجاب ايله حاث اولمسنك سببى شودر كه يمين ايدن كيمسه كندى
 نفسنى و سمنده اولان شيدن يعى ايجابدن منع ايتديكنه
 مبنى اولوب يوخسه قبول آنك و سمنده دكلدر كفايه .
 سوال ، صاتم ديه يميند نصكره ايجاب ايله حاث اولمازدى
 بو مطالعه يه كوره اوراده دخى حاث اولمسى لازم كلور .
 لان المقدورله فى كل عقد هو الايجاب لا القبول مع انه
 لا يحنث فى صورة البيع كما صرحوا به فتح . بناء عليه بومسئله ده
 ايجاب هبه ايله ايجاب بيع آرمسند فرقى بولمليدر .

مجله ده قبول اولنان قول

ايمدى مجله ده ايجاب و قبول ايله منعقد اولور دينلمسندن
 مستفاد اولور كه مجله هم ايجاب همده قبولك ركن هبه اولمسنى

قبول ایلمشدر. هبه‌نك انقادى ايجاب و قبول ايله اولمسه
بعض مسائل تفريع اولنور.

۱ مسئله، وعد هبه ايله هبه منعقد اولماز. شوبله‌كه
بر کیمسه دیکر کیمسهنیه ذمتکده آلاچم اولان شوقدر
آچیهی سکا هبه ایدیم دیو وعد ایلیوب لیکن هبه ایلمسه
اول کیمسه وعدینه بناء هبهیه اجبار ایدیه میوب وعد
مذکورک اصلا حکمی یوقدر بهیجه وعلی افندی.

۲ مسئله، واهب بومالی دون سکا هبه ایتدیکم حالده
قبول ایتامشیدک دیوب موهوبله قبول ایتدیکی اثبات
ایده‌مدیکی حالده سوز واهبکدر هندیه. زیرا واهب هبه‌یی
منکر وموهوبله هبه‌یی مدعیدر « ۷۶ » ماده‌یه باق.

هبه‌ده کی قبض حقننده ایضاحات

هبه‌نك حکمی بولنان موهوبده ملک موهوب لهک
ثبوتی یعنی هبه اوزرینه حکمک ترتب ایلمسی قبض موهوبه
توقف ایده‌جکی جهتله قبل القبض هبه‌نك حکمی اولیوب
مال موهوب کماکان واهبک ملکى اوله‌رق قالور. تعبیردیکرله
صحت هبه‌ده قبض شرط دکل ايسه‌ده ثبوت ملکده قبض
شرطدر هدايه وجواهر الفقه و ابو‌السعود المصرى. هبه‌ده
قبض رکن عقد اولیوب بلکه رکندن خارج وثبوت ملکک
شرطیدر فتح.

قبل القبض هبه نك حكى اولماسى مطلقدر . يعنى
 موهوبله كرك اجنبى اولسون كرك ذى رحم محرم اولسون .
 هبه نك تماميتى قبض كامله موقوف اولنجيه مجرد هبه
 اقرار ايدلمسيله قبض اقرار ايدلمش اولماز . شويله كه
 بر كيمسه ، شو مالى فلان كيمسنيه هبه ايتشيدم ديدكده
 بو اقرار ايله قول اصحه كوره واهب ، مال موهوبى
 موهوب اهلك قبض ايلمش اولديغنى اقرار ايلمش عد اولماز
 انقروى وهنديه فى الباب الحادى عشر . اما هبه ايله برابر قبض
 دخى اقرار ايدلكده قبض اولنديغى ثابت اولور .

بو جهته بر كيمسه ديكر كيمسنيه يندهكى مال ايچون
 او مالى سن بكا هبه و تسليم ايلدك حتى هبه وتساييم وقبضى
 اقرار دخى ايتدك ديو دعوى و او كيمسنيه انكار ايتمكه اقامه
 ايتديكى شاهدلر واهبك هبه وقبضى اقرار ايلديكنه شهادت
 ايتسلر قبول اولنور كه رهن و صدقه ده دخى حكم بويله در
 تاتار خانیه .

قبضه موقوف اولان عقود

تماميتى قبضه موقوف اولان عقود اونا وچدر . ۱ هبه ۲ صدقه
 ۳ رهن ۴ وقف على قول ۵ عمرى ۶ نخله ۷ صاح (بعض
 اقسامى) ۸ رأس مال سلم ۹ رأس مال سلمك بعضيسى زيوف
 چقدقه بدلنك اول مجلسده قبضى ۱۰ صرف ۱۱ كېلى خلاف
 جنس كېلى ايله بيع ايدلكده بدلنك اول مجلسده قبضى

۱۲ وزنی خلاف جنس وزنی ايله بيع ايدلده بده بدلنك بروجه
محرر قبضى طحطاوى ۱۳ بيع فاسد ۳۷۱ ماده يه باق.

هبه ده لزوم قبضك ادله سى

بيع قبل القبض ملكى افاده ايدر كى هبه نك قبل القبض
محكمى اولماسى ايكي وجهله اثبات اولور .

وجه اول ، لاتجاوز الهبة الا مقبوضة حديث شريفيدر كه
بوندن مقصود نفي ملكدر ابوالسعود . اى لا يثبت حكم الهبة
وهو الملك اذ الجواز ثابت قبل القبض بالاتفاق هدايه .

وجه ثانى ، هبه تبرع اولوب ۵۷ ماده ده ذكر اولنديكى
اوزره تبرع ايسه آنجق قبض ايله تمام اولور . چونكه هبه ده
قبل القبض ملكى اثبات ايتك متبرعك تبرع ايتماش اولديكى
شيئه يعنى تسليمه متبرعى اجبار ايتك ايجاب ايدر كه بوده
صحيح دكلدر . يعنى متبرعك تبرع ايتديكى شيئي متبرع اوزرينه
ايجاب ايتك موضوع تبرعانه مخالفدر فتح . خلاصه ، مجرد
عقد هبه ايله ملك ثابت اولسه ايدى واهب تسليم موهوب ايله
مطالب اولور و بوندن ايسه متبرع اوزرينه تبرع ايلمديكى
تسليمك وجوبى لازم كلور ايدى بو ايكنيجي دليل اوزرينه
اوچ صورته ايراد سوآل ايدلمشدر .

۱ سوآل ، واهب وقتا كه هبه ايتدى تسليمى دخى التزام
ايلديكى جهته واقع اولان التزامنه مبنى تسليم ايلمسى لازم

کلی. نته کیم بر کیمسه نفله شروع ایلسه ا کال ایلمسی لازم
کله جکی کبی .

جواب ، مالکک عینده ایکی ملکی واردر . بری ملک
مال و دیکری ملک ید اولوب ملک ید دخی مال کبی مقصود
اوله رق غصب ایله مال مضمون اولدینی کبی کذلک غصب ایله
ید دخی مضمون اولور . مجله نك ۱۶۳۷ ماده سنده و دیسه
یا مستعار یا مأجور الخ مسئله سی بوکا یعنی ملک یدک مضمون
اولدینه دلالت ایدر که ملک یدک ضامنی رد و اعاده ایله اولور .
ایمدی وقتا که بو ایکی ملکک ایکسیده مقصود بنفسه اولدی
واهبک بولردن بریسی التزام ایلمسندن دیکرینی دخی التزام
ایلمسی لازم کلز کفایه و هدایه .

۲ سوال ، هبه ده ایجاب و قبول واهب اوزرینه تسلیم
الموهوبی ایجاب ایتیه جک صورتده قبل القبض ملکی افاده
ایتدکده تسلیمه اجبار لازم کلز .

جواب ، بو وجهله ثابت اولان ملکک هیچ بر فائده سی
اوله ماز . زیرا ملکک فائده سی مالکک آنده « ۱۱۹۲ »
ماده وجهله کیف مایشاء تصرف ایده بیلمسی اولوب بوتصرف
ایسه آنجق قبضه حق بولندینی صورتده اولور کفایه .

۳ سوال ، وصیت دخی تبرع و هبه بعد الموت ایکن
قبل القبض تمام و بعد موت الموصی وارثک تسلیمنه غیر موقوف
اولغله بوکا قیاساً هبه دخی قبل القبض تمام اولق لازم

کلور. وبلکه وصیت موته معلق هبه ایکن مبحثمز اولان
 هبه، هبه مرسله اولوب هبه مرسله هبه معلقه دن اقوی
 اولمغله هبه معاقه بلاقبض تمام اولنجه هبه مرسله نك دخی
 بلاقبض تمام اولمی بطریق الاولویه اولمیدر.

جواب، وصیت مابعد موته مضاف اوله رقی تمليك اولوب
 موصینك وفاتنده موصایهده اولان ملکی زائل اولمغله
 هبهده اولدینی کی بونده متبرع اوزرینه تبرع ایتدیکی شیئی
 الزام لازم کلز وحتی متبرعه اهلیت لزوم قالمامشدر. حق
 وارث ایسه وصیتدن متأخردر. بناءً علیه وارث موصی به
 مالک دکلدرکه حتی تسلیم ایتسنه توقف ایده هدایه وکفایه
 وغنایه. «۵۷» ماده شرحنه باق.

قبل القبض هبه نك حکمی اولماسنه

متفرع مسائل

قبل القبض هبه نك حکمی اولماسنه آتی الذکر مسائل
 تفرع ایدر.

۱ مسئله، بر کیمسه شو قدر اشیاسنی دیگر کمنه یه
 هبه ایدوب فقط تسلیم ایتدین اول کیمسه اشیای مزبوریه
 بر شخصه ایداع و تسلیم ایتدکنصکره شخص مرقوم
 بلا اذن الواهب اول اشیایی هبه مذکوریه بناءً او کمنه یه
 تسلیم و او کمنه دخی آتی استهلاك ایلمسه اول کیمسه

اشياء مذکوره بی ديلرسه او شخصه و ديلرسه او کمسنه به تضمين ايتديرر . « ۹۱۰ » ماده به باق نتیجه .

۲ مسئله ، برکيمسه اوغلنه فلان مالی ویرمسنی شریکنه امر ایتدیکی حالدہ شریکی اعطادن امتناع ایتدکده شوامر علی طریق الهبه اعطایه دائر اولیوب بلکه بطریق الوکاله یعنی اول کیمسه مذکور مالی شریکندن اخذ و قبض ایلمسی ایچون اوغلنی توکیل طریقله و شریک مرقوم مال ووکاتی مقر اولنجه ابن مرقوم اول شریک ایله بالمخاصمه مذکور مالک کندوسنه تسلیمنی طلب و دعوی ایده بیلور ایسه ده امر مذکور علی طریق الهبه اعطاسنه دائر اولنجه قبض بولنامغله هبه مذکوره تام بولمیدنی جهتله مذکور مالک کندوسنه تسلیمنی ابن مرقوم طلب و دعوی ایده مز بحر وهندیه فی الباب الحادی عشر .

۳ مسئله ، برکیمسه فقیر ایچون برشی آیروب کوتورمکله فقیری مسکننده بوله مسه اول کیمسه اول شیئی ديلرسه بشقه فقیره اعطا و ديلرسه امورینه صرفله استهلاك ایدر وجیز .

۴ مسئله ، ۸۴۹ ماده حکمنجه قبل القبض واهب یاخود موهوب له فوت اولسه هبه باطل اولور .

۵ مسئله ، هبه به توکیل تسلیم موهوبه دخی توکیلی مستلزم اولور . زیرا قبل القبض هبه تمام دکلدر هندیه . بناء علیه وکیل بالهبه هبه بی ایجاب ایده چکی کبی بعد الايجاب و القبول تسلیم

الموهوبه دخی حق واردر . موکل یالکیز هبه یه وکیل ایتدم
لکن تسلیم موهوبه وکیل ایتامشیدم دیمکه حق یوقدر .

تقسیم القبض

شرحاً قبض کامل دینلدی . معلوم اولمیدرکه قبض ایکی
قسمدر . قسم اول قبض کاملدرکه قبض کامل هر موهوبی کندینه
مناسب صورتده قبضیه حاصل اولور . شویله که موهوب ملک
خانه ایسه آناختارینی قبض مذکور خانه یی قبضدر . قسم ثانی ،
قبض ناقصدر . شویله که قابل قسمت بولنان بر ملک بعضیسی هبه
وبدون التقسیم مشاعاً قبض کی . قبض ناقص تمامیت هبه ده کافی
دکدر . بناءً علیه قابل قسمت بولنان بر ملک بعضیسی هبه
اولندقدده حصه موهوبی بالافراز والتقسیم حصه مذکور دنک
اصالة تسلیم وقبض لازم اولوب یوخسه تبعاً یعنی حصه موهوب
افراز ایدلمکسزین غیر موهوب حصه ایله برلکده اوله رق تسلیم
وقبض ایله هبه تمام اولماز . نته کیم ۸۵۸ ماده شرحنده تفصیل
اولنور . شو قبضک انواعیله شرائطی ۸۴۱ و ۸۴۲ و ۸۴۳
ماده لرده بیان اولنمشدر .

اما قابل قسمت اولیان بر ملک بعضیسی هبه اولندقدده بالتبع
قبض ایله یعنی اومالک کلیدیسی قبض ضمننده حاصل اولان قبض
موهوب ایله هبه تمام اولور درر وطحطاوی .

قبض کاملک تقسیمى

قبض کامل دخى ايکى نوعدر. نوع اول ، قبض حقيقيدر. موهوب له مال موهوبى انه آلق کي . والقبض حقيقه عنده بالنقل من ذلك المكان طحطاوى . نوع ثانى ، قبض حکميدر. قبض بطريق التخليه کي . شوبله که مثلاً برکيمسه مجلس هبهده حاضر ووجود واوراده قبض ايدلمکه صالح برمالى ديکر کمسنه يه هبه ايدوبده اوده قبض ايتدم يعنى مال موهوبى مجلس هبهده قبض ايتديکى حالده قبض ايلدم ديمک کي .

قبض بطريق التخليهده بروجه مشروح موهوبک مجلس هبهده حضورى لازمدر . بوجهتله برکيمسه برمالى غائب ايتدکدن صکره برشخصه هبه وآنى تحرى ايدوب بولديغنده قبضه تسليط ايتدکده امام ابى يوسف رحمه الله تعالى هبهنک فسادينه قائل اولمشدر . فقط امام زفر رحمه الله تعالى جوازينه ذاهب اولمشدر درر وشرحه .

بونوع ثانى قبض ايله دخى امام اعظم ومحمد کوره هبه صحیحه تمام اولوب مختار اولانده بودر . اما امام ابى يوسف کوره هبه تمام اولماز انقروى ودرر وجامع الفقه وطحطاوى . لکن شو اختلاف هبه صحیحهده اولوب اما هبه فاسدهده تخليه ، قبض اولمديغنه اتفاق واردر انقروى .

تخلیه و آکا متفرع مسائل

تخلیه ، واهب مل موهو بی موهوب له آله بیلدجک حاله
کتور مسیله قبضه رخصت ویرمکن عبارتدر درر وانقروی .
بوجهتله برکیمسه بر صندوق دروننده بولنان اشیایی مذکور
صندوق مقفل بولندیغی حالده هبه ایدوبده صندوقله برلکده
تسلیم و موهوب له دخی اولوجهله قبض ایتسه موهوبک قبضی
حاصل اولماز . زیرا قبض ، موهوب ایله انتفاع ممکن اولدیغی
حالده حاصل اولوب حالبوکه اشیاء مذکوره صندوقده کلیدی
ایکن آنلر ایله انتفاع حاصل اولماز . اما صندوق مفتوح ایتسه
قبض حاصل اولور .

اقرار بالقبض حکمی

اقرار بالقبضه کنتجه واهب شومالی هبه و تسلیم و موهوب له
دخی قبض و قبول ایتدیکنی اقرار ایتدکن صکره موهوب له
قبض ایتدیکنی و اقرار مذکورنده کاذب ایدوکنی واهب ادعا ایتسه
امام ابی یوسفه کوره موهوب له ۱۵۸۹ ماده سنه توفیقا تحلیف
اولنور . اما امام اعظم و محمد کوره تحلیف اولنماز انقروی .

﴿ ۸۳۸ 》 ماده ﴿ ۸۳۸ 》

﴿ هبه ده ایجاب ﴾ بومالی سکا ﴿ باغشلا دم و هبه ایتدم و اهدا ﴾

ایلدم) و ویردم و سکا تملیک ایتدم و بومال سکا هبه در و این ترا
 (کبی مجانا بر مالی تملیک) و قبول اتهاب ایلدم و قبول ایتدم
 کبی قبول (معناسنده مستعمل اولان) و مزاح طریقله اولیان
 (سوزلردر.) تملیک لفظنده هبه یه قرینه بولنورسه صحیح
 اولور والا اولماز. زیرا بیع واجاره و وصیته دخی عامدر.
 یوخسه عقد هبه مجرد لفظ هبه یه یعنی هبه لفظنک سویلنمسنه
 مخصوص و منحصر دکلدر.

بوجنس مسائله قاعده شودر که مملک تملیک رقبه یی انبا
 ایدن لفظی سویلرایسه هبه و تملیک منفعتی اشعار ایدن کلامی
 تکلم ایدرسه عاریت اوله جنی کبی ایکیسنده محتمل کلامی
 اتیان ایدرسه متکلمک نیتنه باقیلور. نیتی هبه ایسه هبه اوله جنی
 مثللو عاریت ایسه عاریت منعقد اولور. «۲» ماده یه باق. هبه
 کندوسیه منعقد اولان الفاظ اوچ نوعدر. نوع اول، هبه
 کندوسیه وضعاً واقع اولان الفاظدر. شوشینی سکا هبه ایتدم
 یاخود سکا مجانا تملیک ایلدم یاخود سنک ایچون قیلدم یاخود
 سکا اعطا ایتدم یاخود سکا نخل ایتدم یاخود بوشی سنک
 ایچوندیر یاخود این چیز ترا یاخود این مال ترا کردم یاخود
 بنام تو کردم یاخود آن تو کردم دیمک کبی. نوع ثانی کندوسیه
 هبه کنایه و عرفاً منعقد اولان الفاظدر. شو ثوبی سکا اکسا
 ایتدم یاخود شو داری سکا عمری ایتدم دیمک کبی. نوع ثالث
 هم هبه همده عاریته محتمل اولان الفاظدر. شو دار سکا

رقبادر یاخود سنک ایچون حبسدر دیهرک تسایم ایتسی کی .
بولفظ عند الطرفین عاریت و عند ابی یوسف هبه در . هندیه
بیع واجاره ورهن کی عقودده ایجاب و قبول بیان اولندی
حاله بوراده ایجاب بیان اولندقدن صکره قبولک بیانندن
سکوت ایدلسی مقایسه معلوم اوله جفته مبنیدر .

بوجهتله هبه لفظیله هبه منعقد اولدینی کی نخل واعطا
لفظیله دخی هبه منعقد اولور هدایه . نخل بالضم شول عطایه
وهبه یه دیرلرکه آنده عوض اولیه و یقسال النخل مصدر نخله
نخله بفتح الحاء نخلای اعطاه .

ینه بوجهتله ترکی لساننده جبه ایتدم دیمک هبه ایتدم
معناسنده مستعمل اولغله برکیمسه مدیوننه ذمتکده اولان دینی
سکا جبه ایتدم دیسه اول دینی هبه ایتمش اولور .

ینه بوجهتله برکیمسه صغیر اوغلنه این مال ترا کردم
یاخود بنام تو کردم یاخود از آن تو کردم دیسه هبه ایتمش اولور
وجیز و بهجه ودر و شرحه .

ینه بوجهتله برکیمسه دیگر کمنه یه شومال سنک اولسون
ایستر ایسهک دیوبده تسلیم ایتسه اوده استرم دیسه هبه اولور
هندیه فی الباب الثامن .

ینه بوجهتله برکیمسه معین برقومه خطابا «شومالی بر بکزه
باغشلادم استیان آسون» دیسه ده ایچلرندن بریسی او مجلسده
آنی آله هبه منعقد اولور ابوالسعود .

(و) ینه بوجهتله (زوجك زوجه سینه برچفت کوبه
یاخود حلیاتدن دیگر برنسنه ویروبده آل طاقن) «هبه ایتدم
آل طاقن معناسه در» یاخود بعض اثواب ویروبده آل کین کی
یاخود بر مقدار پاره ویروبده یا نمده کیمک اوزره البسه لك آل
(دیمسی کی مجانا تملیکه) قطعی یعنی بشقه بر عقدده محتمل
اولیه جق صورتده (دلالت ایدن تعبیر لر دخی هبه بی ایجاب
در) ۶۸ ماده یه باق . بناء علیه زوجه دخی حلیات یا البسه
یا پاره بی قبض ایتسه هبه تمام اولوب زوج یاننده کیمک اوزره
البسه لك آلتی ایچون ویردیکی پاره بی زوجه البسه لك آلیوبده
کاره ویرسه زوج مداخله ایده من قینه . ۱۱۹۲ ماده یه باق .
وینه بوجهتله زوجه زوجه بومالی سکا ویردم دیوبده
اوده قبول و قبض ایلسه هبه اولور .

ایضاح القیود

۱ کی، بوعبارده دلالت ایدر که عقد هبه یا لکیز هبه لفظنه
منحصر دکلدرد . نته کیم ایضاح اولندی .
کذا برکیمسه، شوباغی فلان صغیر اوغلمک اسمنه غرس
ایدیورم یاخود شوباغی فلان صغیر اوغلم ایچون قیلدم دیسه
هبه اولور . لکن شو باغی فلان صغیر اوغلمک اسمنه قیلدم
دیسه بونده امر متردد اولغله برابر وجه اوله اقریدر ولواجیه .
قال فی الهندیة ابوالصغیر غرس کرما اوشجرا ثم قال جعلته لابی

فهو هبة وان قال جعلته باسم ابني فكذلك هو الاظهر وعليه اكثر
مشايخنا وان لم يرد الهبة يصدق ولو قال اغرسه باسم ابني
لا يكون هبة فعليه الاعتماد طحطاوى.

۲ مجانا تملك ، بوعباردهن مستفاد اولوركه مجانا تملك
معناسنده مستعمل اولميان سوزلر ايله هبه منعقد اولماز.

بوجهته برکيمسه ديگر کمنه يه شو مالکي بکا هبه ايت
ديمسى اوزرينه اوده « فداى توباد » ياخود « از تو دريغ
نيست » ديسه هبه منعقد اولماز . نته کيم ايکي کيمسه بيتنده
بردايه مشترک اولوبده مشترک کردن برى ديگرينه من حصه خود
را بتو ارزاني داشتم ديسه هبه اولماز هندية فى لباب الاول.

ينه بوجهته برکيمسه ديگر کمنه يه شو مالکي بکا باغشلا
ديمسيله اوده اولسون ديسه هبه منعقد اولماز قهستانى وانقروى.
۳ « معناسنده » و « مجانا تملیکه دلالت ايدن » بوعباردهلر
دلالت ايدرکه برکيمسه ديگر کمنه يه برشى ويرمکه همان هبه
ايتمش اولاسى لازم کلز . قال لولده الصغیر تصرف فى هذه الارض
فاخذ يتصرف فيها لا تصیر ملکاً له هندية فى الباب السادس .

رجل دفع الى ابنه فى صحته مالا يتصرف فيه ففعل وکثر ذلك
فمات الاب از اعطاء هبة فالکل له وان دفع اليه لان يعمل فيه للاب
فهو ميراث هندية . نته کيم برکيمسه صبى اوغلنى سکزاون سنه
دوشکنده ياتيرمش اولسه مذکور دوشكى اکا تملك ايتمش اولمدجه
او دوشک ينه کندوسنک اولور من المحل المزبور .

بوجهتله زوج زوجهسنه ایدی ویردوکی اثوابی بعد الطلاق
مهرینه طونه ایدی ویردم دیوب زوجه مزبوره آتی بکا هبه
ایلدک دیسه شرعا زوج تصدیق اولنور ابوالسعود العمادی.

ینه بوجهتله برکیمسنه نک اشترا ایلدیکی مجوهراتی زوجهسنه
دفع و تسلیم ایتدکن صکره زوجه مزبوره فوت اولمغله زوج
عاریت اوله رق ویردم بنمدر وورثة الزوجه هبه اوله رق ویردک
میراندر دیو اختلاف ایتدکارنده سوز مع الیمین زوجکدر .
یعنی هبه اولقی اوزره ویردیوب عاریت ویردیکنه یمین ایتدکده
زوج اول مجوهراتی اخذ ایدر . زیرا زوج هبه یی منکردر .
سوزایسه مع الیمین منکرکدر . « ۷۶ » ماده یه باق هندیه فی الباب
الناسع . ماده آتیه شرحنه دخی مراجعت اولنه .

کذا برکیمسنه نک نزدنده دیگر کیمسنه نک دراهم یا دنانیری
بولوبده او کیمسنه اول کیمسه یه مذکور دراهم یا دنانیری
حوایجکه صرف ایت دیمکله اوده صرف ایتسه قرض اولور .
فقط حنطه اولوبده اکل ایت دیسه هبه اولور خانیسه
فی اول الهبة .

۴ سوزلردر، بوعبارہ « ایجاب » لفظنه کوره در . زیرا
مجله نک ۱۰۱ ماده سی شرحنده ایضاح اولندیفی اوزره ایجاب
سوز ایله اولانه مخصوصدر . یوخسه عقد هبه سوزه منحصر
اولیبوب تعاطی ایله دخی منعقد اوله جنی ماده آتیه ده مذکوردر .
نته کیم قبول دخی فعلا اوله بیله جکی ۸۴۱ ماده ده مذکوردر .

کذا - سوزلردر عبارت سی ناطقه کوره اولوب یوخسه دلسره
کوره اشارت معهوده ایله دخی هبه منعقد اولور. «۷۰» ماده یه
باق. - شویله که دلسر شوقدر اشیانی اشارت معهوده سیله
زوجه سنه هبه وتسلیم ایتدکن صکره نادم اولسه فائده ویرمز.
اما دلسر اولمایک یعنی ناطقک اشارتی ایله هبه منعقد اولماز
بهجه و ابوالسعود العمادی.

۵ قطعی صورتده یعنی بشقه عقدہ الخ دینلدی. زیرا قرض
هبه دن ادنی اولغله بر لفظ که هم قرض هم ده هبه یه محتمل اوله
لفظ مذکور ایله وقوع و لان تملیک قرضه مصرف اولور.
زیرا قرض اقلدر. لانه يتضمن الزوال صورة لامعنی لانه زوال
ببدل بخلاف الهبة انقروی.

بوجهتله بر کیمسه دیگر کمنه یه لوازمکه خرجن دیو بر
مقدار پاره ویرسه هبه اولیوب قرضدر اما کین دیو البسه
ویرسه — البسه نک قرضی غیر صحیح اولدینی جهتله —
تصحیحاً لانصرف شو لفظ هبه اوله جنی کی بر کیمسه اکل
ایت دیو دیگر کمنه یه حظه ویرسه قرض اولیوب هبه در
انقروی. شو حالده واهب مال مدفوع قرض ایدی و موهوب له
هبه ایدی دیو اختلاف ایتدکنرنده سوز مع الیمین دافعک یعنی
ویرن کیمسه نکدر تنقیح.

ینه بوجهتله بر قادین زوجنه مصارف بیته صرف ایله دیو
آچقه و یروب زوج دخی مبلغ مزبوری مصارف بیته صرف
ایتدکن صکره قادین فوت اولوب زوجی ایله ورثه سائره سی

ترك ايلسه سائر ورثه مبلغ مزبور دن حصه لرینی زوجه تضمین
ایتدیره بیلور لر علی افندی (۱) .

ینه بوجهته زوج قبل الزفاف زوجه سنه برطاقم ماللری
ارسال ایتدکن صکره مفارقت ایتدکننده زوج آنلر عاریت
ایدوکنی بالادعا استرداد ایتک ایستسه سوز تملیکی انکار ایدن
زوجکدر. «۷۶» مادهیه باق . وایکسیده اقامه ینه ایتدکننده
یعنی بر مسئله ده هبه ایله عاریت ینه سی جمع اولسه هبه ینه سی
ترجیح اوانور . بونق دیرده زوجه دخی مذکور هدیهره
عوض ویرمش ایسه زوجک هدیهری هبه اولمینجه زوجنک
عوضی دخی نفس الامرده عوض اولمیه جغندن زوجه دخی
وبردیکی عوضی استرداد ایده بیلور . فقط زوجنک بووجهله
حق استردادی اولسی وقت اعطاده عوض اولدیغی تصریح
ایتدیکی تقدیرده در. «۸۶۸» مادهیه وشرحنه باق . اما اولوجهله
تصریح ایتوبده یالکز عوض اولسنی نیت ایدرایسه ایکنجی
ماده شرحنده ایضاح اولندیغی اوزره مجرد نیت اوزرینه
معاملاتدن اولان احکام شرعیه ترتب ایتیه جکندن عوض
اولیوب هبه مستقله اوله جغنی جهته ۸۶۷ مادهیه مبنی زوجه
آنی استرداد ایده مز تنقیح .

(۱) وفي الاقروى ما يخالفه حيث قال كانت تدفع لزوجها ورقا
عند الحاجة الى النفقة او الى شئ آخر وهو ينفقه على عياله ليس لها
ان ترجع بذلك عليه انتهى ومثله في الطحطاوى .

۶ مزاح طریقله اولیان دینلدی . زیرا بر کیمسه مزاح
 طریقله دیگر کمنهیه دشومالی بکا هبه ایتدکی، دیمسی اوزرینه
 اوکمنهده هبه ایتدم دیوب اول کیمسه دخی قبول ایدرک تسایم
 وقبض بولنسه هبه جائز اوله جنی بعض کتب فقهیهده بیان
 اولمش و بوندن استدلالا بمض فقها ایجاب هبه علی وجه المزاح
 اولسه دخی جائز اوله جنی بیان ایلمشله ایهده دیگر بعض فقها
 بطریق المزاح وقوعبولان ایجاب وقبول ایه هبه منعقد اولیه جنی
 ومسئله مذکوره مزاح طلب هبهده اولوب یوخسه هبه
 وتسلیمده بولمدیغی جهتله بومسئله ایه مزاحا هبه نك انعقادینه
 استدلاله محل اولمادیغی بیان ایتمشله رد حموی و ابوالسعود
 المصری وطحطاوی . بیعهده دخی جدیت شرط اولوب هزل
 ایه بیع منعقد اولیه جنی ۱۶۹ ماده شرحنده بیان ایدلمشیدی.

❦ ماده ۸۳۹ ❦

(تعاطی ایه دخی) یعنی ایجاب وقبول ایه هبه منعقد
 اولدیغی کبی بالتعاطی یعنی واهبک اعطاسی وموهوب لهک
 قبضی ایه دخی (هبه) هم (منعقد) وهمده تمام (اولور .)
 یعنی مجانا تملیکه دلالت ایده جک قرینه ایه وقوعبولان تعاطی
 ایه دخی هبه هم منعقد وهمده تمام اولور . بوصولده قولا
 اولان ایجاب وقبول ایه تعاطی آره سنده حکما دخی فرق
 حاصل اولور . شوبله که قولا ایجاب وقبول ایه هبه یالکنز منعقد

ایکن تعاطی ایله هبه هم منعقد همده تمام اولیور. ایشته مجله
بو حکمی افاده ایچون ۸۴۱ ماده یی ذکر ایدیور. بونقصدیرده
مجله بورزاده « منعقد و تمام اولور » دیسه ایدی ۸۴۱ ماده یه
حاجت قالمز ایدی .

مثلا برکیمسه فقیره پاره ویروبدده اوده آلوب طرفین هیچ
برشی سویلمسه هبه خصوصیه یعنی صدقه منعقد اولور
قهستانی .

ماده آنفه شرحنده دخی ایضاح اولندیغی اوزره تعاطی
ایله انعقاد هبه تملیک دالت ایدم جک قرینه بولنسیله
مشروطدر .

بوجهتله برکیمسه اوغلنه برمال ویروبدده اوغلی او مالده
تصرف ایتسه بومال ینه اول کیمسه نکدر . مکرکه اول کیمسه
اومالی اوغلنه تملیک ایتدیکنه دالت ایدم جک قرینه ودلیل
بولنه .

مثلا ماده آنفه شرحنده ذکر اولندیغی اوزره برکیمسه
اوغلنه شوملک ارضده تصرف ایت دیملکه اوده بر مدت آنده
تصرف ایتسه ابن مرقوم آکا مالک اولماز . نته کیم برکیمسه
کندو مالکی بولنسان دوشکنده اوغلنی یاتیرسه اول دوشک
اوغلنک اولماز . مکرکه اول کیمسه آنی اوغلنه تملیک ایدم
هندیه .

ماده ۸۴۰

(هبه ده و صدقه ده) و هدیه ده بر طرفدن (ارسال و) دیگر جانبندن (قبض لفظا ایجاب و قبول) مع القبض (مقامنه قائم) و بناءً علیه بونیکله دخی هبه هم منعقد و همده تمام (اولور) که شو قبض، آتی الذکر ۸۴۱ ماده ده مصرح اولدینی اوزره بیعه کی قبول کی اولغله هبه تمام یعنی ملکیتی مفید اولور. بوماده ایله ده تعاطی ایله هبه نك انعقادی بیان اولنیور که بونده کی تعاطی و اهب طرفندن اعطا و موهوب له جابندن قبضدن عبارتدر یوخسه اعطا من الجانیین معناسنه دکلدر .

ارسال، بر مجلسده و قبض دیگر مجلسده اوله جغندن مجلس واحدده وقوعبولان تعاطیدن افتراق ایده چکی جهتله بوماده ماده آنفه ایله مستدرک اولماز. یعنی بوماده و جهله اولان هبه دخی تعاطی ایله منعقد ایسه ده ماده سالفه دن فرقی شودر که ماده مذکوره مجلس واحدده کی تعاطی حقنده اولوب اما بوماده ده ارسال بر مجلسده و قبض دیگر مجلسده اولیور. شو حالده هبه ده تعاطی ایکی نوعدر. نوع اول، مجلس واحدده تسلیم و قبضدر. نوع ثانی، بر مجلسده ارسال و دیگر مجلسده قبضدر. هر نه قدر شو ارسالده رسولک تسلیمی و موهوب لیه قبضینه بر مجلسده ایسه ده. مجله ده و قبض دینلمسنک سببی شودر که ۸۳۷ ماده دن مستفاد اولدینی اوزره قبل القبض هبه و هدیه

و صدقه تمام اولماز . حتی بر کیمسه دیگر کیمسه به بر هدیه کوندر و بده قبل الوصول او کیمسه فوت اولنجه هدیه مرقومه اول کیمسه نك ملكی اولق اوزره قاله جنی کبی اول کیمسه فوت اولدقه آرتق اول هدیه او کیمسه به ویرله مز . ٨٤٩٠ . ماده به باق مجموع الفتاوی .

— ٨٤١ — ماده

(هبه) و هدیه و صدقه (ده قبض) موهوب (بیعه) کی (قبول) ایجاب (کبدر .) یعنی بیعه بر طرفدن ایجاب وقوعندن صکره دیگر طرفدن اول ایجاب قبول اولدقه بیع هم منعقد و همده تمام اولدنی کبی هبه و هدیه و صدقه ده دخی و اهیک لفظا ایجابی اوزرینه موهوب له لقردی سوبلمکسزین یعنی مثلا اتهاب ایتدم دیمکسزین مجلس هبه ده موهوبی قبض ایدیورسه هبه هم منعقد و همده تمام اولور . زیرا موهوب لهک مجلس هبه ده قبضی قبول هبه به دلیلدر درر . ائمدی بو دقیقه به یعنی شو قبض ايله هبه هم منعقد و همده تمام اولدیغنه اشارت ایچون مجله ده هبه ده قبض قبولدر دینلمیوب بیعه تشبیه ايله بیعه قبول کبدر دینلمشدر . وجه شبهه دخی قبض ايله هبه نك تمامیتدر . شبهه هر حکمه شبهه به مثللو اولسی لازم کلز . بناء علیه هبه ده بعد الايجاب قبض بعضا مجلس هبه نك غیریسنده دخی واقع اولسه جائز اولوب حالبوکه بیعه مجلس ایجابک

خارجنده قبول واقع اولمسیله بیع صحیح اولماز دیو سوآل
وارد اولماز .

بوماده نك حكمی یعنی هبه ده قبض بیعه قبول کی اولمی
ایجاب قولى به مخصوص اولیوب تعاطیده دخی حکم بویه در .
هر نقدر آتی الذکر مثالنده ایجاب قولى ایله تصویر ایدیور
ایسه ده مثال صورتنده ذکر ایدلدیکی جهتله آکا اختصاصی
آکلاشلماز . بناءً علیه ۸۳۹ ماده وجهله برکیمسه سائله
قرق پاره تسام ایدوب اوده قبض ایتسه شو قبض بیعه کی
قبول کی اوله جفی کی برکیمسه ۸۴۰ ماده موجبنجه بانچه سنك
محصولدن برطابق یمشی خادمی بدیله قومشوسنه ارسال ایدوبده
اوده قبض ایتسه بو قبض دخی بیعه کی قبول کی اولور .

(بناءً علیه واهبك ایجابی مثلاً شو مالی سکا هبه ایتدم)
یا اهدا ایلدم (دیسی اوزرینه موهوبله قبول ایتدم یاخود
اتهاب ایلدم دیمکسزین مجلس هبه ده اول مالی قبض ایتسه)
شو قبض فعلاً قبول اوله رق بونیکله (هبه) هم منعقد وهمده
(تمام) وموهوبله آکا مالک (اولور) زیرا قبض تحقق
ایلدی زیلی . لان القبول كما يكون بالصریح يكون بالدلالة فيكون
اخذة قبولاً رد مختار .

قبول هبه ایکی درلودر

بوندن آکلاشیلور که قبول هبه ۸۳۹ ماده ده ذکر اولندیغی

اوزره بعضاً قول ایله اولدینی کی بعضاً دخی فعل ایله اولور.
و فعل ایله قبول قولاً قبولدن اقوادر. شو جهتله که قبول قولیه
هیه منعقد و غیرتام ایکن قبول فعلی ایله هم منعقد و همده نام اولور.
دیگر مثال: بر کیمسه بر جماعته شو مالی بریکزه هیه
ایتدم ایستیان آلسون دیسهده ایچلرندن بریسی آنی آلسه
آکا مالک اولوب موهوب لهک شو قبضی بو ماده وجهله فعلاً
قبول اولور بحر.

بو مثالده مجلس هیهده قبض ایتسه تعیری احترازی میدر؟
شونک تفصیلاتنه واولاباده کی اختلافک بیاننه مبادرت اولور.
ایمدی واهب هیه یی ایجاب ایتدکنصکره قبض موهوب ایچون
اوج احتمال واردر. احتمال اول، واهبک صراحة قبض موهوبه
اذن ویرمسیدر. بونقدیرده ایکی صورت بولنوب صورت اولی،
موهوبله، ایجاب واهبی مجلس ایجابده قولاً قبول ایامسیدر.
بو حالده مال موهوب دیگر مجلسده دخی قبض ایدیله بیله جکی
۸۴۴ مادهده مذکوردر. صورت ثانیه، موهوبله، ایجاب
واهبی مجلس ایجابده قبول ایتیموب سکوت ایتسیدر. بوصورتده
یعنی مثلاً واهب شو مالی سکا هیه ایتدم آل دیدکده موهوبله
قولاً قبول ایتدم دیمکسزین اول مجلسده قبض ایتدیکی صورتده
هیه تمام اوله جغنه شهه یوقدر. فقط موهوبله اول مجلسده
قبول ایتدم دیمدیکی کی قبض دخی ایتسه دیگر مجلسده قبض
ایده بیلورمی؟ بونده اختلاف فقها واقع اولوب بعض فقهایه

کوره واهب صراحة قبضه اذن ویردیکی جهته ۸۴۴ ماده ده
 مصرح اولدینی اوزره دیگر مجلسده قبضك صحتی و بونکله
 هبه نك تمامیتی لازم کلور که اجل ارباب ترجیحدن بولن ان
 قاضیخان دخی بونی ترجیح ایلمشدر فتاوی قاعده و نهاییه
 و عبداللهم و ابو السعود المصری . شو حالده مجله ده « مجلس
 هبه ده » دینلمس نك سببی شودر که مجله نك مثالنده صراحة قبضه
 اذن مذکور اولماغله ۸۴۴ ماده نك فقره ثانیه سی وجهله
 مجلس هبه ده قبض ایلمسی شرطدر .

بیعه ایجاب و قبولده اتحاد مجلس شرط اکن « بیوعك
 باب اولنك فصل نایسنه باق . » بو قوله کوره هبه ده
 شرط اولماش اولور . فانه تمليك یحتاج الی القبول
 فی المجلس هبه ده فی الباب الحادی عشر . بوکا جواباً
 فتح القدیرده دینلمشدر که رکن هبه یالکیز واهبك
 ایجابندن عبارت اولوب اما قبول استحسانا رکندن معدود
 دکلدر هر نقدر قیاساً رکندن معدود ایسه ده انتهی ایمدی
 بو قول ، استحسانه هبی بولنش اولور . فقط ۸۳۷ ماده شرحنده
 ایضاح اولدینی اوزره مجله قبول دخی هبه نك رکنی ایدوکنه
 دائر اولان قولی اختیار ایلدیکنه کوره شو جواب مجله جه
 مقبول اولسه کرکدر .

دیگر بعض فقهایه کوره قبض مذکور قبول هبه مقامنده
 بولندیغنه و ۱۸۲ ماده ده دخی مذکور اولدینی اوزره مجلس

عقد معتبر یعنی قبول مجلس عقد ایله مقید اولدیغنه نظراً دیگر مجلسده قبض ایله هبه منعقد اولماز . بو قول قیاسه موافقدیرکه قیاسه کوره هبه نك رکنی هم ایجاب همدۀ قبولدن عبارت اولوب مجرد ایجاب رکن دکلدر . حالوکه ایجاب وقبولک مجلس واحده اولسی لازم کلور فتح . مجله رکن هبه ایجاب وقبولک مجموعنی اعتبار ایتدیکی جهتله بو مسئلهده مجله جه شایان قبول قول بودر دینلمک لازم کلور می؟

احتمال ثانی، واهب قبض موهوبه صراحة اذن ویرمیوب سکوت ایلمسیدر . بونک حکمی ۸۴۵ مادهده بیان اولنه جفی اوزره شودرکه موهوبله اولمجلسده قبض ایدرسه صحیح اولوب اما دیگر مجلسده قبض ایلرسه صحیح اولماز .
احتمال ثالث ، واهبک قبض موهوبدن موهوبلهی نهی ایتسیدرکه بونک حکمی ۸۶۳ مادهده بیان اولنور .

ماده ۸۴۲

(قبضده) یعنی کندوسيله هبه تمام اولان قبض موهوبده (واهبک صراحة یاخود دلالة اذنی) بولنسی (لازمدر .)
بو صورتده واهبک اذنی بولنقسزین واقع اولان قبض معتبر دکلدر . زیرا قبض ، ملک واهیده تصرف اولغله بو وجهله واهب طرفندن صراحة یا دلالة اذن بولنقسزین قبض صحیح اولماز . چونکه موهوب قبض ایدلمدکجه آنده بعدالایجاب

والقبول دخی واهبك ملكى باقيدر هدايه. «۹۶» ماده يه باق .
 صراحة و دلالة قبضه اذن ماده آتيده بيان اولنيور .
 بو حالده واهبك بو وجهله اذنى بولنمقسزين قبض ايله هبه تمام
 اولميه جنى كى موهوب له بروجيه مذكور اذن بولنمقسزين
 قبض ايدوبده ينده تالف اولسه ضامن اولور . بوتقديرده
 بر كيمسه نك ينده ملك برخاه بولنمغله ديكر كيمسنيه سن بو
 خانه يي بكا تصدق ايدرك قبضه دخی اذن و يرمكله قبض ايتدم
 ديو ادعا و او كيمسه بنم اذنمسنز قبض ايلك ديو دعوى ايتدكده
 سوز او كيمسنيه نكدر. «۷۶» ماده يه باق . اما اول كيمسه بو خانه
 يدمده ايكن سن بكا صدقه و يرمكله ۸۴۶ ماده حكمنجه جائز
 اولدى ديو ادعا و او كيمسنيه وقت تصدقه بنم المده ايدى اذنم
 اولمقسزين قبض ايلك ديودعوى ايتدكده سوز اول كيمسنيه نكدر.

۸۴۳ ماده

(واهبك ايجابى دلالة قبضه اذندر .) يعنى واهبك ايجابى
 قبضه تسليميدر . بناء عليه بو وجهله دلالة اولان اذنيه موهوب له
 موهوبى قبض ايتدكده آكا مالك اولور .

دلالة اذنيه صحت قبض استحسانى اولوب قياس اولان
 واهبك اذن صريحى اولمدجه قبضك عدم تختيدر . زيرا قبض
 مذكور بلا اذن ملك غيرده تصرف اولمغله ۹۶ ماده حكمنجه
 قياس اولان عدم جوازدر . چونكه قبل القبض واهبك ملكى

باقیدر عنایه . وجه استحسان شودرکه هبه نك حكمی بولنان موهوب لهه ثبوت ملك قبضه توقف ایتدیكى جهتله هبه ده قبض ، ببعده كى قبول كى اولمغله بعد الايجاب قبول بيع يعنى قبول ايجاب ايچون بايعك اذن صريحى شرط اولمدينى كى هبه ده قبض ايچون دخى واهبك اذن صريحى شرط دكلدز . يعنى ان مقصود الواهب من عقد الهبة اثبات الملك للموهوب له واذا كان كذلك فيكون الايجاب منه تسليطا على القبض تحصيل المقصوده فكان اذا دلالة فتح وعنايه وهدايه .

مثلا واهب شومالى سكا هبه ايتدم ديمسى اومالى قبض ايت ديمكه دلالت ايده حكى جهتله بعد الايجاب واهب موهوب لهه صراحة قبض ايت ديمسه بيله موهوب له آنى قبض ايدويورسه هبه تمام اولور هدايه .

استثنا

فقط ايجابك دلالة اذن اولمسى ٨٦٣ ماده ده بيان اولندينى اوزره واهب بعد الايجاب قبضدن نهى ايتديكى تقديرده اولوب يوخسه نهى ايتديكى صورتده اذن اولماز . لان الدلالة لا تعمل فى مقابلة الصريح هدايه . ١٣ « ماده يه باق . بناء عليه شونه بدن صكره موهوب له مال موهوبى نه مجلس هبه ده نه ده بعد الافتراق قبض ايدمن درر .

﴿ اما صراحة اذنى موهوب اكر مجلس هبه ده حاضر ﴾

و موجود (ایسه بومالی سکا هبه ایتدم) دیدکدن صکره (آل دیمک واکر) مال موهوب (غائب عن المجلس ایسه فلان مالی سکا هبه ده ایتدم) دیدکدن صکره (وار آل دیمک کبی امر صریحدر.) بونکله دخی قبضک صحتی واهب قبض موهوبدن موهوب لهی منع یعنی بعد الاذن الصریح نهی ایتدیکی تقدیرده اولوب اما بعد الاذن و قبل القبض قبضدن نهی ایدرسه اذن سابقک حکمی قاناز. و ۸۶۳ ماده حکمنجه موهوب له آرتق مال موهوبی قبض ایده مز .

اذن بالقبضده اوچ صورت واردر

۱. خلاصه ، بونده اوچ صورت بولنوب صورت اولی ، واهبک قبضیله امر یعنی قبضه صراحة اذن اعطا ایتسیدر . بونک حکمی ماده آتیه نک فقره اولیسنده بیان اولنیور . صورت ثانیه ، واهبک قبضدن نهی ایتسیدر . بونک حکمی ماده آنفه یعنی ۸۴۴ ماده شرحنده بیان اولندی . صورت ثالثه ، واهبک قبضدن سکوت ایتسیدر . بونک حکمی دخی ماده آتیه نک فقره ثانیه سنده بیان اولنمشدر عبد الحلیم .

ماده ۸۴۴

(واهب ، صراحة قبضه اذن ویردکده موهوب لیهک آنی) یعنی مال موهوبی (کرك مجلس هبه ده وکرك بعد الافتراق)

یعنی طرفین مجلس هبه دن طاغلدن صکره (قبضی صحیحدر .)
 یعنی شو قبضیه هبه تمام و قیاسا واستحسانا موهوب له مال
 موهوبه مالک اولور . زیرا واهبك قبضیه امری مطلق
 اولدیغندن ۴۶ مادهیه بناء اطلاقی اوزره ابقا اولنوب مجلس
 یا سائر ايله تقید ایلمز . لان الثابت نصا ثابت من کل وجه فیثبت
 فی المجلس وبعد المجلس فتح . بو فقره نك مثالی ماده آنفهدن
 ظاهر اولمغله مجلهده ذکر اولنماش ایسهده مزید توضیح ایچون
 بروجه آتی بر مثال ایراد اولنور . شویله که واهب شومالی سکا
 هبه ایتدم آل دیمسی اوزرینه موهوب له دخی قبول ایتدم
 دیمش اولسه موهوب له آنی اول مجلسده قبض ایده بیله جکی کی
 بعد الافتراق دخی قبض ایده بیلور . اکر قبل القبض واهب
 قبضدن نهی ایتماش ایسه . ۱۳۰ مادهیه باقی .

کذا ۸۴۱ ماده شرحنده ذکر اولندیغنی اوزره قاضیخانک
 ترجیحنه کوره واهب فلان محله کی مالی سکا هبه ایتدم
 وار آل دیمش اولسه موهوب له مجلس هبهده قبول ایتدم دیمسه
 بیله کیدوبده آنی قبض ایدیورسه هبه تمام اولور عبدالحلیم .
 (اما دلالة قبضه اذنی مجلس هبه ايله تقید ایدوب)
 بناء علیه مجلس مذکورده قبض ایدلکده موهوب اکر عین
 ایسه شوقبضی استحسانا « لا قیاسا » معتبر اولور ایسهده
 (بعد الافتراق قبضی) نه استحسانا نه ده قیاسا (معتبر)
 وشوقبض ايله موهوب له مال موهوبه مالک (اولماز .) ده
 بعد الافتراق صحت قبض اذن صریحه توقف ایدر . زیرا ایجاب

هبه تسلیم عد ایدلمسی یعنی قبضه اذنی تضمن ایدر دینلمسی
قبض قبول ایجاب الحاق اولنسندن طولایی اولوب قبول ،
مجلس ایجابله تقید ایتدیکی کبی بوده اولوجهله تقید ایدر
عینی و طحطاوی .

(مثلاً) واهب (شو مالی سکا هبه ایتدم دیوبده) قبض
ایت دیماش ایه (موهوب له دخی آنی اول مجلسده قبض
ایدیورسه صحیح) و هبه تمام (اولور)

بو مثاله « شو مالی الخ » دینلمسیله اشارت اولنیورکه
دلالة اذنیله مجلس هبهده وقوعبولان قبضیه هبه نك تمامتی مال
موهوب عین اولدینی تقدیرده اولوب اما موهوب دین اولدینی
صورتده صراحة قبضه اذن اولدقجه قبض ایدیلهمیه جکی جهته
اول مجلسده قبض اولنسه بیله ینه هبه تمام اولماز . نته کیم
۸۴۸ مادهده « وار آل دیو صراحة » تعبیریه دخی شوکا
اشارت اولنیور عبداللیم . حتی بر کیمسه دیکر کمنهیه شو
یغین بغدادین بش کیله سنی سکا هبه ایتدم دیوب اوده مذکور
بغدادین واهبک حضورنده بش کیله اولچوب آله او کمنه
آکا مالک اوله میوب اما شو یغین بغدادین بش کیله سنی سکا
هبه ایتدم اولچ دیوبده اوده مذکور یغیندن بش کیله اولچوب
آله آکا مالک اولور هندیه فی الباب الثانی فیما یجوز من
الهبه و مالا یجوز ۱۵۸ ماده شرحنه باق .

تفصیلات آنفدن آکلاشیلور که شو ماده نك بو فقره سی

مطلق ایسه ده سالف الذ کر ۸۴۸ ماده ایله تقیید اولنیور .
 (اما مجلس هبه دن آیرلدق د نصکره قبض ایتسه صحیح)
 وهبه تمام (اولماز .) هندیه . حتی آدن نصکره قبض ایتسه
 غاصب اولور .

(كذلك) واهب (فلان محله کی مالی سکا هبه ایتدم دیوبده
 وار آل دیماش اولسه موهوب اهلک کیدوبده آنی قبض ایتسی
 صحیح اولماز .) حتی قبض ایتسه غاصب اوله جغندن واهب
 استرداد وتانی تقدیرنده بدلی طاب ایده بیلور .

— ماده ۸۴۵ —

(مشتری میبئی بایعدن) ۱ (قبل القبض) ۲ (آخره)
 یعنی بایعدن بشقه سنه ۳ (هبه) و موهوب لهه قبض ایله امر
 (ایده بیلور .) وشو هبه و امر اوزرینه موهوب له ماده آفه
 وجهله مذکور میبئی قبض ایتدکده هبه تمام اولور حموی .
 مال موهوب کرك منقول اولسون و کرك عقار اولسون .
 میبیع منقولک آخره بیعی جائز اولمیدینی ۲۵۳ ماده ده
 مصرح اولغله شو خصوصده بیع ایله هبه افتراق ایدر . وجه
 فرق شودر که ۲۵۳ ماده شرحنده ذکر اولمیدینی اوزره هر
 تصرفکه تمامیتی قبض ایله اوله « هبه و اعاره و تصدق و اقراض
 و رهن کی » مشتری میبیع منقوله تصرف مذکور ایله تصرف
 ایتسه صحیح و آخر ، قبضده مشتری طرفندن نائب اولوب
 صکره اول آخر نفسیچون قابض و بو صورتده بعدالقبض

«مثلاً» هبه ایدلمش اعتبار اولنور . لیکن مشتری نیک بو هبه سی ایله بایع ایچون ۲۷۸ ماده وجهله ثابت اولان حق حبس ساقط اولماز . نته کیم بو مسئله ۲۵۳ ماده شرحنده تفصیل اولنمشیدی .

ایضاح القیود

۱ قبل القبض ، بوقید احترازی اولیوب بعد القبض هبه نیک جوازی بطریق الاولیتدر .

۲ آخره ، بوقید احترازیدر . زیرا مشتری مبیعی بایعدن قبض ایتمدن آکا یعنی بایع هبه ایدوبده اوده قبول ایتسه شوهبه اقاله بیع اوله رق حکم اقاله جاری اولور . « ۳ » ماده یه باقی . نته کیم عین اولان بدل ایجاری مستأجر دن قبل القبض آجر آکا یعنی مستأجره هبه و مستأجر دخی قبول ایتسه حکم بویله در . یعنی بونکله دخی عقد ایجار اقاله ایدلمش اولور . ایشته شو ایکی صورتده هبه اقاله دن مجاز اولور . « ۶۱ » ماده یه باقی .

۳ هبه ، بو عباره آنفا دخی بیان اولندیغی اوزره من وجه احترازی اولیوب هر تصرفکه تمامیتی قبض ایله اوله آنده کی حکم دخی هبه کیدر . ومن وجه آخر احترازی اولوب مبیع منقولک قبل القبض اخره بیعی جائز دکلدر . « ۲۵۳ » ماده یه باقی .

ماده ۸۴۶

قبضین تجانس ایتدکده بری دیگر ی مقامنه قائم اولور .

اما تغاير ايتدكده اقوى اضعف مقامنه قائم اولور. لئكن اضعف اقوى مقامنه قائم اولماز. زيرا اقواده ادناك مثليه برابر زياده دخى وارايسه ده ادناده اقواده اولان اولمديغندن ادنى اقوى مقامنه كچه من زياحى و طحطاوى.

بو جهتله (بر كيمسه نك) وديمه يا اجاره يا لقطه يا ديكر بر صورتله امانت يا خود بيع فاسد يا خود غصب ايله مقبوض كى مضمون اوله رق (يدنده بولنان مالى صاحبي آكا هبه ايتدكده) اول مال مجلس هبه ده حاضر و موجود اولسه بيله (موهوب لهك قبول ايتدم يا اتهاپ ايلدم ديمسيله هبه) منعقد و (تمام اولوب) تماميت هبه (مجددا) طرف واهبدن (تسليم و) جانب موهوب لهدن (قبضه) يا خود بمدا لايحاج والقبول قبضه اقتدار حاصل اوله حق قدر وقتك مرورينه (محتاج دكلدر.) فاذا كان الشئ وديعه فى يد شخص اوعارية فوهبه اياه لايحتاج الى تجديد قبض لان كلالقبضين ليسا قبض ضمان فكنا متجانسين عناية. بنابرین شوهبه، موهوب لهك مال موهوبك بولندينى محله واروبده اوراده قبضه اقتدار حاصل اوله حق وقتك مرورينه حاجت قالمقسزين تمام اولور قهستانى حتى موهوبله يدنده مال موهوب تجديد قبضدن اول تلف اولسه موهوب لهك مالى اوله رق تلف اولوب بناء عليه مال موهوب باركيير اولوبده تجديد قبضدن اول موهوبله يدنده تلف اولسه

دکزه آتمق مصارفی موهوب لیه عائد اولور ابوالسعود بتغیرما.
تفصیلات سالفه دن اکلایدیکه ودیعه وعاریتک قبضی
هم جنسی بولنان هبه ده کی قبض مقامنه قائم اوله جفی کبی غصب
وبیع فاسد ایله اولان قبض دخی آندن دون بولنان هبه ده کی
قبض مقامنه قائم اولور. لکن ودیعه وعاریتده کی قبض قبض شرا
مقامنه قائم اولماز هدایه . لان قبض الامانة ضعیف فلا یتوب
عن قبض الضمان عنایه .

ایضاح القيود

۱ مال، مجله ده مال لفظی مطلق اوله رق ذکر اولمئسندن
بروجه بالا امانت و مضمون و منقول و عقاره شامل اولور .
۶۴ ماده یه باق .

۲ قبول ایتدم ، بونکله اشارت اولنیورکه بونده صراحة
قبول شرط اولوب ۸۴۱ ماده یه مقیس دکلدر . زیرا قبول ،
لازم اولمسه قبضه دخی حاجت اولدیغندن موهوب الهک
رضایی اولمقسنزین آکا مالک اولسی لازم کلور رد مختار .
حالبوکه ۱۶۷ ماده شرحنده ذکر اولندیغی وجهله هیچ برکیمسه
دیگرک رضایی وقبولی اولدیغیه آکا مالک اثبات ایدمز .
ولایحوز ان یقع الملك للموهوب له بغير رضاه لما فيه من توهم
الضرر طحطاوی . یالکز میراث بوقاعده دن مستثنا ایدی .
بخلاف ما اذا لم یکن فی یده وامره بقبضه فانه یصح اذا قبض
ولا یشرط القبول لانه اذا اقدم علی القبض کان ذلك قبولاً

و رضا منه بوقوع الملك له فيملكه ۸۴۱ ماده يه باق.

۳ قبضه محتاج دكلدر. بونك تفصيلي شودر كه قبض اوچ
قسمدر. قسم اول، قبض مضمون بقيمة المقبوض او بمثله در.
مال مغصوبده كي قبض كي. زيرا مال مغصوبده كي غاصبك قبض
۸۹۱ ماده ده ذكر اولديني اوزره ضما ني ايجاب ايدر. نته كيم
تسميه ثمن اولنه رق سوم شرا طريقيه مقبوض مال ايله بيع
فاسد ايله مقبوض ماله دخي حكم بويله در. « ۲۹۸ و ۳۷۱ »
ماده لره باق. ايمدي بو وجهله مقبوض اولان مال، صاحبي
طرفدن قابضه بيع صحيح ايله بيع ايدلده كده قبضلر متفق يعنى
ايكيسيده مضمون اولديغندن تجديد قبضه احتياج اوليوب قبض
سابق بيعده لازم كلان قبض مقامنه قائم اوله جنى كي مذكور
مال، صاحبي طرفدن قابضه هبه ايدلده كده موهوب له مجرد هبه ني
قبول ايلمسيه اكا مالك اولوب قبض آخره محتاج دكلدر.
و موهوب له مجرد هبه ني قبول ايلمسيه ضماندن برى اولور
ابوالسعود.

سوآل، بيع فاسد ۳۶۶ ماده ده مذكور اولديني اوزره
عند القبض مشترى يه ملك افاده ايدله جكي جهتله بايع آنى
مشرى يه نصل هبه ايدر. يعنى مشتريك ملكي ايكن مشترى يه
هبة تملكك معناسى نه در؟

جواب، اوچ وجهله در: اول بايع ومشرى بيع فاسدى
فسخ ايدرك ملك بايعه انتقال ايتد كدنصره بايع آنى قابض

قبض مقامنه قائم اولیة جنی و بلکه قبض جدید لازم ایدوکی
بیان اولمشدر نقول بهجه . لان العین وان کانت فی یده
مضمونة الا ان هذا الضمان لا تصح البرائة منه مع وجود
القبض الموجبة له فلم تكن الهبة برائة واذا كان كذلك لم يوجد
القبض المستحق بالهبة فلم یکن بدمن تجدید قبض طحطاوی .
قبض جدید، موهوب ایهک مال موهوبک بولندیفی موضعه
واره رق آنده قبض ممکن اولور بر وقتک مرورندن عبارتدر
جواهر الفقه وعنایه وطحطاوی .

نته کیم بونک نظیری ۲۷۰ ماده نک فقره اخیره سنده کجدی .
قسم ثالث، قبض امانتدر . ودیعه نک وعاریتک ومأجورک
و مال موهوبک قبضی کی . زیرا « ۷۷۷ و ۸۱۳ » ماده لرده
ذکر اولندیفی اوزره مال ودیعه وعاریتده کی قبض ضمانی ایجاب
ایتمیه جکی کی ۸۷۱ ماده ده مسطور اولدیفی وجهله موهوبده کی
قبض دخی ضمانی ایجاب ایتمیه جکنندن جمله سی قبض امانتدر .
بناء علیه بوقسم ثالث دخی هبه ده کی قبض مقامنه قائم اولور زیلعی .
سو آل ، ودیعه ده مستودعک وضع یدی مودع ایچون
اولوب مستودع یدده و حفظده مودعک ناچی ومودع ایچون
عامل اولغله بوقبض هبه ده لازم کلان قبض مقامنه قائم اولیه رق
موهوب ید واهبه ده ایکن هبه ایدلش کی اولمق لازم کلور .
جواب، مستودع مودع ایچون عامل اولدجه مستودعک
یدی مودعک یدی مقامنده ایسه ده بعد الهبة مستودع آرتق

مودع ایچون غیر عامل اولوب حقیقه و دیعه اوزرینه وضع یدی
 دخی موجود اولدیغندن بو اعتباریه مستودع قابض اولور زیلعی.
 و دیعه نك ذی الیده هبه سندن صکره مستحق

چیقدیغنده حق رجوع

و دیعه، بروجه محرر ذی الیده یعنی مستودعه هبه اولندقدن
 صکره یدنده بعد التلف بر مستحق ظهور ایتدکده مستحق
 تحیردر. دیلرسه موهوب له و دیلرسه واهبه تضمین ایتدیرر.
 «۹۱۰، ماده یه باق. و موهوب له تضمین ایتدیرر ایسه نظر
 اولنور. موهوب له بعد الاتهاب و مستحق، واهب مودعه
 تضمین ایتدیرمدین مقدم اول مالد تجدید قبض ایلمش ایسه
 موهوب له واهبه ضامن اولدینی شیله رجوع ایده مز. «۸۶۱،
 ماده شرحه دخی مراجعت اولنه. اما قبضنی تجدید ایلماش
 ایسه موهوب له ضامن اولدینی شیله واهبه رجوع ایدر. فرق
 شودرکه موهوب له تجدید قبض ایتدکجه عقد و دیعه هبه ایله
 منتقض اولیوب شو حالده «۶۵۸» ماده شرحنده ایضاح اولدینی
 اوزره نفی دافعه عائد بر عقدده واقع ضرور اولمش اولور
 ذخیره فصل ۱۳.

نته کیم اب بر مالی طفلنه هبه ایتدکن و او مال تلف
 اولدقدن صکره مستحق حقیقه رق ایه تضمین ایتدیرسه اب
 طفلنه رجوع ایده مز ایسه ده بعد البلوغ طفلنه تضمین ایتدیردکده
 باقیلور. طفل بعد البلوغ مذکور مالد قبضنی تجدید ایلمش

ایسه ابه مراجعت ایده من . اما بمد البلوغ قبضنی تجدید
ایلمامش ایسه مراجعت ایدر هندیه فی الباب السادس فی هبة
الصغیر . « ۶۵۸ » ماده شرحنه باق .

۸۴۷ ماده

دینی مدیونه هبه یا دینندن مدیونی ابراده قبول شرط
دکدر . لکن ردیله مردود اولور . زیرا دینک مدیونه هبه سی
و دینک ابراسی من وجه تملیک ومن وجه آخر اسقاط اولوب
اسقاط اولوق حیثیله بلا قبول صحیح اولدینی کی تملیک بولنق
جهتیه ده ردایله مردود اولور ولوالجیه . بیع مثلاً و سائر تملیکات بعد
الایجاب دبکر طرف رد ایتدکه مردود اولدینی کی .

ایمدی دینی مدیونه هبه و ابرا من وجه تملیک اولدی .
زیرا دین من وجه یعنی مال و آتی اعتباریله مالدر . حتی آنده
زکات واجب اولدینی کی داین آلاجنی مقابلنده مدیونندن
برمتاع اشترا ایتسه صحیح اولور . بیع ایسه مالی ماله مبادله در .
ومن وجه آخر اسقاط اولدی . زیرا دین حال اعتباریله وصف
شرعی اولوب حتی عینی اولیوبده الاجنی بولنان برکسنه مالی
بولنمدیغنه یمین ایتسه حاث اولیه جنی کی برکیمسه نک زید
ذمتده بولنان الاجنی ثمن مبیع قیله رق عمرودن برمال اشترا
ایتمی صحیح دکدر . بناءً علیه دین مال اولوق اعتباریله تملیک
اولغله ردیله مردود اولوب اما وصف بولنق اعتباریله اسقاط

ویالکز مسقط ایله تمام اولوب قبوله توقف ایلمز زیلمی
فی الاجارة مع الايضاح .

ضابطه اولایه متفرع بعض مسائل

۱ مسئله (برکیمسه الاجفی) ۱ (مدیونه) ۲ (هبه)
ویاخود مدیونی آندن ابرا) یاخود الاجفی آکا حلال (ایلیوب
اودخی) هبه یاخود ابرایی یاخود تحلیل (رد ایتسه) شو به یا ابرا
یا تحلیل (صحیح و دین) ۳ (هال) یعنی مدیونک قبوله توقف ایتسه کمترین
(ساقط) و به به دخی ابرا معناسنه بچار (اولور) حموی .
بناء علیه ۸۳۷ ماده ده ذکر اولندیغی اوزره هبه ده قبول لازم
اولدیغی حالده ابراده شرط بولنماغله هبه ایله ابرا بو وجهله
افتراق ایدر حموی . وهب احد الورثة حصته من الدین للمدیون
قبل القسمة وفي التركة دیون وعروض صح استحسانا هندیه
فی الباب الرابع .

۲ مسئله ، برکیمسه مدیوننه ترک دینی علیک یعنی دینی
سکا ترک ایتدم یاخود حق خویش بتوماندم یاخود ترا بجل
کردم دیسه ابرا ایتمش اولوب آرتق مذکور الاجفی طاب
ایده میه چکی کبی برکیمسه همه غریبمازا بجل کردم دیسه اول
کیمسه نک مدیونلری بری اولور لر هندیه وواقعات المفتین .

۳ مسئله ، داین مدیوننک فوت اولدیغی استخبار ایتمه
الاجفی آکا حلال یاخود آلاجنندن آنی ابرا ایتسه ده بعه

مديون بر حیات اولديني ثابت اولسه ۵۱ ماده يه بنا آرتق
الاجغني آله ماز انقروی .

۴ مسئله، داین مشارک کردن بری دین مشترکده کی حصه سنی
مديونه هبه ایتسه صحیح اولور. شویله که برکیمسه زید ذمتنده کی
الاجغنی آلدین فوت اوله رق ورثه سینه موروث اولغله بعض
ورثه مذکور الاجغنی زیده هبه ایتسه لر شو هبه حصه لرنده
صحیح اولور علی افندی. نته کیم ایکی کیمسه نک زید ذمتنده مناصفة
مشترک درت یوز غروش الاجق لری اولغله بریسی حصه سنی زیده هبه
ایتسه یعنی حصه می سکا هبه ایتدم دیسه زید اکیوز غروشدن
بری اوله جغنی کبی نصفی هبه ایتدم دیسه ربعنده نافذ وربع
آخرده دیگر حصه دارک اذینه موقوف قالور. «۸۵۸» ماده یه باقی برازیه
وانقروی. عین مشترک نصفی هبه ده اولديني کبی خانیه قبیل فصل
فی هبه المشاع. و برمالده مناصفة حصه دار اولانلردن بری اومالک
نصفی صاتسه کندی حصه سینه منصرف اولور. لکن فضولی
مذکور مالک نصفی صاتسه ده احد شرکا مجیز اولسه ربعنده
نافذ اولور فصولین فی ۲۴ فصلا .

۵ مسئله، رد ایتسه تعبیرندن آکلاشیله جغنی اوزره مذکور
ابرا یا هبه نک تمامیتنده مديونک ابرا یا هبه بی قبول ایتدم
دیسه ربعنده حاجت قالمیوب حتی قبل القبول مديون وفات ایتسه
هبه لازم اولور جواهر الفقه . عقد ان یكون الموت فیهما بمنزلة

القبول في هبة الدين من المديون اذا لم يقبله حتى مات المديون
والوصية اذا لم يقبلها الموصى له حتى مات الموصى تجب الهبة
والوصية هندية .

فأذه

داينك مديونندن برمقداری معجل و برمقداری مؤجل
آلاجنى اولوبده بودينك برقسمنى مديونه هبه ايتسه شوهبه
هم معجل همده مؤجل قسملرينه منصرف اولور . شوييله كه
مثلا داينك مديونندن بيك غروش معجل و بيك غروشده
مؤجل الاجنى اولوبده داي مرقوم مديونه تعيين ايتمهرك بش
يوز غروشى سكا هبه ايتدم ديسه ايكوز اللى غروش معجلدن
وايكوز اللى غروشده مؤجلدن ساقط اولور هندية في الباب
الحادى عشر .

ايضاح القيود المسئلة الاولى

١ مديونه ، بتعبير بر اعتباريله احترازي اولوب مديونك
غيريسنه هبه دن احتراز اولنيور كه بونك حكى ماده آتیهده
بيان اولنيور . ديكر بر اعتباريله احترازي اوليوب متوفانك
الاجقלוسى الاجغنى متوفای مرقومك وارثه هبه ايتسه صحيح
اولور . ولو كه تركه سى مستغرق بالدين اوله . وبوهبه ي وارث
رد ايتسه امام ابى يوسفه كوره مردود اولوب اما امام محمد كوره
وارثك رديله مردود اولماز تانارخانيه وهنديه في الباب الرابع .
مديون ، تعبيرى مطلق اوله رق ذكر اولمى سندن آكلاشيلور كه

مديون فوت اولمش بولنسه بيله ينه آكا هبه صحیحدر. بناء عليه
داین ، متوفاه کی الاجغنی متوفایه هبه ایتسه صحیح اولوب
بوهیه بی وارثی رد ایتسه بالاده ذکر اولسان اختلاف جاری
اولور. نته کیم داین ، الاجغنی متوفانک بعض ورثه سنه هبه
ایتدکه ینه صحیح ومتوفایه هبه کی اولوب بناء عليه ورثه نك
کلیسی بوهیه دن مستفید و و ابرا دخی علی قول السانی ردیه
مردود اولور هندیه فی الباب الرابع. ولو ابراء الغريم احد الورثة
من الدين صح في نصيبه .

تفصیلات آنه دن آکلاشلیکه هبه دینده اوچ احتمال واردر.
برنجیسی ، داین آلاجغنی برحیات بولنان مديوننه هبه
ایده بیلور. ایکنجیسی ، داین آلاجغنی متوفی مديوننه هبه
ایده بیلور. اوچنجیسی ، داین آلاجغنی متوفی مديونک بعض
ورثه سنه یا کل ورثه سنه هبه ایده بیلور انقروی .

۲ هبه ، هبه نك صحیح اولدینی علی الاطلاق ذکر ایدلمسندن
مستفاد اولورکه دینک مديونه هبه یا ابراسنده دینک بقاسی
یعنی قبض ایدلماش بولنسی شرط اولوب بناء عليه داین
آلاجغنی مديوندن استیفا ایتدکه نصکره مديونتی ابراء
اسقاط ايله ابرا یاخود آلاجغنی مديوننه هبه ایتدکه ینه
صحیح اولور. شویله که داین آلاجغنی مديونندن آلدقنصکره
وامی که مرا بوده است بتو بخشیدم دیسه صحیح اولوب
مديون داننه ویردیکنی استرداد ایدر «۱۵۸» ماده شرحه

باق . نته کیم شودینی دیگر بر شخص تبرعا داینه تأدیه ایتدکن
صکره داین مذکور کلامی سویلسه ابراینه صحیح اولوب
متبرع اولان شخص مرقوم ویردیکنی دایندن کیروآلور هندیه
فی الباب الرابع .

۳ ابرا، علی الاطلاق ذکر اولمنسندن مستفاد اولورکه
ابرا اولنان حقک معلوم اولسی شرط دکلدر . حتی
بر کیمسه دیگر کمسنیه « سنک بنده اولان هر حقکی
بکا حلال ایت » دیوبده اوده حلال ایتسه صاحب حق
یعنی او کمسنه اول کیمسه ده بولنان حققرینی بیلور ایسه
هم حکما همده دیانه بری اولوب اما اکر بیلمیور ایدیسه
امام ابی یوسفه کوره ینه هم حکما همده دیانه بری اولور که
مفتابه دخی بودر . زیرا ساقطک جهاتی صحت - قاطه مانع
اولماز . اما امام محمد کوره حکما بری اولوب لکن دیانه
بری اولماز ولوالجیه .

فقط ابرا بر شرط ایله مشروط اولدقده اول شرطه
رعایت اولنق لازم اولوب والا ابرا صحیح و دین ساقط اولماز .
شویله که بر کیمسه زوجه سنه شو مالی سکا هبه ایتم اوزره
مهرکدن بنی ابرا ایت دیمسی اوزرینه زوجه ابرا ایتدیکی حالد
زوج مذکور مالی زوجه سنه هبه دن امتتاح ایتسه ۸۵۵ ماده
مبنی زوجه نک مهری کماکان باقی قالور بزازیه .

نته کیم رشوت طریقہ ابرا دخی صحیح اولدینی ۸۳۴
ماده شرحنده بیان اولنمشیدی .

قاعده اولیدن مستثنی بعض مسائل

هبة دینده و ابراده قبول شرط دکلدر ضابطه سندن اوج
مسئله مستثنی بولنمشدر . ۱ بدل صرفدن ابرا و ۲ بدل - لمندن
ابرادر . ایمدی آلاحق بدل صرف یا بدل - سلم اولدینی
تقدیرده شو آلاحقدن ابرا عقد صرف و سلمک انفساخنی
موجب اوله جفی واحد عاقدینک یالکزر اوله رق عقد لازمی
فسخ ایدمه جکی جهتله بولک هبه و ابراسنده قبول لازم اولوب
بدون القبول مدیون بری اولماز . یعنی ان توقفه علی القبول
لا من حیث انه هبة الدین بل من حیث انه یوجب انفساخ
العقد بفوات القبض المستحق بعقد الصرف واحد العاقدين
لا ینفرد بفسخه فلهذا توقف علی القبول عنایه .

۳ کفیله هبه و صدقه در . شویله که بر آلاحقک کفیله هبه
و صدقه سنده کفیلک قبولی لازم اوله رق بدون القبول هبه
و صدقه تمام اولماز بحر و هندیه فی الباب الرابع .

ابرا مسئله سی بو ماده ده استطراداً مذکور اولوب مقصود
بالذات اوله رق ۱۵۶۸ ماده ده بیان اولنیور انفروی .

ضابطه ثانیه نک ایضاحی

ضابطه ثانیه بولسان ابرا ردیله مردود اولور مسئله سی
بروجه آتی ایضاح اولنور . شویله که بر کیمسه آلاحقنی مدیوننه

هبه یا خود آلاچغندن مدیونتی ابرا ایتدیکی حالد مدیون
اولمجلسده هبه یا ابرایی رد ایتسه هبه و ابرا مردود اولور
جواهر الفقه . اما بشقه مجلسده رد ایتسه بونده اختلاف
اولمشدر . شویله که شمس الاثمه السرخسی ردک صحتی مجلس
ابراده واقع اولمسینه مشروط اولدیغنه قائل اولمشدر . یعنی ابرا
وقوعبولدیغی مجلسده مدیون ابراء مذکوری رد ایده بیملوب
یوخسه مجلس مذکورده رد ایتیموبده سکوت ایتدکنصکره
دیگر مجلسده ابراء مذکوری رد ایتسه مردود اولماز که
صیرفیه وهندیده صحیح اولان بودر دینلمشدر . دیگر بعض
علما ایتسه مجلس ابراده رد ایتسه مردود اولهجنی کبی
مجلس ابرادنصکره دیگر مجلسده رد ایتسه ینه مردود اولور .
زیرا ابراده اسقاط معنایی بولمغله مجلس ابرا ایله تقید ایلمز
دیمشلردر رد مختار . وهو المروى عن السلف عنایه .

ضابطه ثانیه دن مستثنی بش مسئله

ابرا رد ایله مردود اولور ضابطه سنندن بعض مسائل
مستثنادر که بو مسائل ایچون قاعده شودر : من وجه تملیک
مالی متضمن اولور ایتسه رده قابل اولوب فقط اصلا تملیکی
متضمن اولمینجه رده قابل دکلدر . اصلا تملیکی متضمن
اولیان اسقاط شفعه و طلاق و عتاق کیلردر در منتقی قبیل الصالح .
۱ مسئله ، مکفول له کفیلی ابرا ایدوبده کفیل ابراء

مذکوری رد ایتسه مردود اولماز. بونک سبی ۶۶۰ ماده
شرحنده بیان اولمشیدی.

۲ مسئله، محال له محال علیهی ابرا ایدوبده محال علیه
ابرای رد ایتسه مردود اولماز. بونک حکمتی ۶۷۳ ماده شرحنده
ذکر اولدینی اوزره شودر که حواله نصکره محال علیه ذمتده
نابت اولان دین اولیوب یالکیز مطالبه دن عبارت ومطالبه
ایسه حق مجرد یعنی تملیکی غیر متضمن اولعله ردی جائز
اولماز.

۳ مسئله، مدیون ابرایی قبول ایتدکنصکره رد ایتسه
مردود اولماز رد مختار. بو اوچ مسئله ۱۵۶۸ ماده ده مذکور
بولمشدر.

۴ مسئله، مدیون داینه بنی ابرا ایت دیسی اوزرینه
داین دخی ابرا ایدوبده مدیون شو ابرایی رد ایتسه مردود
اولماز انقروی.

۵ مسئله، داین مدیونی ابرا ایدوبده مدیون مجلس ابراده
سکوت ایتدکنصکره دیگر مجلسده ردایسه شمس الاثمیه کوره
مردود اولماز.

ماده ۸۴۸

دینک مدیونک غیریسنه تملیکی صحیح دکلدر. اما مدیونه
تملیکی صحیحدر.

فقره اولایه منفرع بعض مسائل

بو جهته بر کیمسه دیگر کمنه مک فلان شخصه اولان
اون آلتون بورجنی ادا ایتسه شول شرطیه که مذکور بورج
کندوسنک مالکی اوله صحیح دکلدر . ولوکه اول کیمسه وکیل
بالبع اوله . شویله که مثلاً وکیل بالبع بیخه وکیل بولندی مالی
بر کمنه یه اون آلتونه صادقانه کمره مشتری ذمتنده بولسان
اون آلتون آله حق کندوسنک یعنی وکیل مرقومک مالکی اولمق
اوزره اون آلتونی وکیل مرقوم موکانه ویرسه جائز دکلدر
رد مختار . و بو شرطیه وکیل مرقومک اداسی فاسد اولمغه
وکیل مرقوم ویردیکنی موکلندن استرداد ایدر . و مشتری ذمتنده کی
آلاحق کماکان موکلک مالی اوله رفق قاور اشباه فی القول فی الدین .
ضابطه ثانیه نک ایضاحی : دینک مدیونه تملیکی صحیحدر .
مدیون کرک حقیقه مدیون اولسون و کرک حکما مدیون اولسون .
حقیقه مدیونه تملیک : ماده آنفده ذکر اولندی کی دینک
مدیونه هبه سندن عبارتدر . حکما مدیونه تملیک : داین اولان کیمسه
متوفاده کی آلاحقی متوفالک وارثنه هبه ایتسندن عبارتدر . نته کیم ماده
آنفه شرحنده ایضاح اولندی . بو تملیک کرک هبه طریقیه
اولسونکه مجله ده مذکوردر . و کرک استبدال صورتیه اولسون .
شویله که بر کیمسه نک دیگر کمنه ذمتنده بش آلتون آلاحقی
وار ایکن بدلنه یکر می یدی سیم مجیدیه اخذ ایتسی یا خود
داینک آلاحقی مقابلنده مدیوندن برمال اشترا ایلایسی کی حموی .

ضابطه اولیمن یعنی دینک مذیوندن بشقه سینه تمایکی صحیح دکلدر اصلندن دوت مسئله مستثنی بولنمشدر.

مسئله اولی ، ﴿ بر کیمسه ۱ ینک ذمتنده اولان آلاجنی آخره ﴾ یعنی مذیوندن بشقه سینه ﴿ هبه ایدویده وار آل دیو صراحة قبضه اذن ویرسه و موهوب له دخی واروب قبض ایتسه هبه تمام اولور . ﴾ زیرا موهوب له قبضده دینک وکیلی اولوب اولوجه له بلو کاله قبض ایتد کد انضکره کندو نفسی چون قابض اعتبار اولور .

مثلا بر قادین زوجی ذمتنده کی مهری پد رینه هبه و صراحة قبضه اذن ویر ویده اود، زوج مرقومدن قبض ایتسه هبه تمام اوله جنی کبی دین مثلا سیم مجیدیه ایکن موهوب له بدلنه آلتون آلسه صحیح و کندوسی یعنی موهوب له مذکور آلتونه مالک اولور رد مختار. امرأة لها مهر علی زوجها و وهبت المهر لابنها الصغير الذی من هذا الزوج الصحیح انه لا تصح هذه الهبة لان هبة الدین من غیر من علیه الدین لا تجوز الا اذا وهبت و سلطت ولها علی القبض فیجوز ویصیر ملکاً للولاء. اذا قبض خانیه قبیل فصل فی قبض الهبة للصغیر .

ایضاح قیود المسئلة الاولى

۱ آلاجنی ، آلاق تعبری عیندن احتراز ایچوندر که بر کیمسه نك دیگر کیمسه یدنده کی عینی شخص آخره هبه

ايدرك قبضه رخصت ويره بلور ايسه ده بونك حكمی ۸۴۵
ماده ايله شرحنده ايضاح اولمشیدی .

۲ آخره ، بو تېر ايله مديونه هبه دن احتراز اولنيور که
بونك حكمی ماده آنفده کچدی .

۳ وار آل ديو صراحة اذن ويره ، بو عباره دينك
مديونك غیریسه نه هبه ده صراحة قبضه تسلیط شرط اولدیغی
اشعار ايجوندر که ۸۴۴ ماده شرحنده ذکر اولندیغی اوزره
بو ماده وجهله اولان هبه ده دلالة اولان قبضه اذلك حكمی
يوقدر . بوصورته واهب صراحة قبضه اذن ویرمش دكل ايکن
موهوبله دلالة اولان قبضه بناء اول مجلسده يا ديكر مجلسده
قبض ايتسه صحيح اولماز جواهر الفقه . بناءعليه بر کيمسه بنم
فلان کمنه ذمتنده کی آلاجم سنکدر ديسه بو سوزله مخاطب
اولان شخص اول آلاجه مالک اوله ماز . چونکه بو سوز هبه
اولغله قبضه تسلیط ايدلدکجه تمليك صحيح اولماز حموی .
اقرارده قبضه تسلیط شرط دکدر

بروجه مشروح قبضه تسلیطك لزومی هبه دینده
اولوب يوخسه اقرارده تسلیط لازم دکدر . شويله که ۱۵۹۳
ماده ده ذکر اولندیغی اوزره بر کيمسه باسند فلان کمنه
ذمتنده اولان شوقدر غروش الاجق ياخود الاجم « بونده کی
نسبت بحسب الظاهر فالمراد الدين الذي لی علی فلان بحسب
الظاهر هولفلان ای لفلان فی نفس الامر فلا اشكال طخطاوی ،

هر نقدر سندده بنم نام محرر ایسه ده مبلغ مزبور فلان
 کمنه نکدر سندده اسمم متعاردر دیسه مبلغ مزبور نفس الامرده
 اول کمنه نک حتی اولدیغنی اقرار ایتمش اولوب یوخسه تملیک
 یعنی هبه اولدیغنی جهتله آنده تسلیطه لزوم یوقدر . بناء علیه
 مقرله آنی بدون التسلیط دخی قضاء قبض ایده بیلور . اما
 دیانتیه کنجه اول آله حق نفس الامرده مقرله ک دکل ایسه
 ۱۶۲۸ مادهیه منی اقرار سبب ملک اوله میسه جغندن مقرله
 حلال اولماز . مکرکه مقر آنی قبضه تسلیط ایدوب اوده قبض
 ایده تکمله رد مختار و حموی فی اوائل الهیه .

۴ واروب قبض ایتسه ، بو قید احترازی اولوب ۸۳۸
 مادهده بیان اولندیغنی اوزره قبض ایتدکجه هبه تمام اولماز . بو
 صورتده هبه دینک تمامیتنده هبه عین کبی قبض لازمدر .
 بناء علیه موهوب له مذکور الاجنی مدیوندن قبض ایتدین
 اول ، واهب فوت اولسه هبه باطل اولور . حتی موهوب له
 عوض ویرمش ایسه آنی استردادده مقتدر اولور ابوالسعود
 العمادی .

موهوب له جنس موهوبی قبض ایتسه هبه تمام اولدیغنی کبی
 آنفا ذکر اولندیغنی اوزره بشقه جنس مالی قبض ایتسه ینه
 هبه تمام اولور . شویله که بر کیمسه دیگر کمنه ذمتنده اولان
 الی درت مجیدیه الاجنی زیده هبه و مدیوندن قبضه تسلیط ایدوبده
 زید دخی واروب الی درت مجیدیه یی قبض ایتسه هبه تمام

اوله جغنی کبی آلك بدلنه اون آلتونی قبض ایتسه ینه هبه تمام اولوره ریرا حق قبض زیدک اولغله استبداله مالیکدر واقعات حسامیه .

هبة دین و تسلیطک قبل القبض تمام اولدیغنه آتی الذکر مسائل تفرع ایدر . شویله که اولاً ، واهب الاجغنی بو ماده وجهله آخره هبه ایدوبده قبل القبض هبه سندن رجوع ایله موهوب ایی قبضدن نهی و منع ایدوبیلور رد مختار . یعنی واهبک هبه و تسلیطدن صکره قبل القبض رجوعه حق واردر .

ثانیاً ، واهب قبل القبض اول اله جغنی مدیون مرقومدن اخذ ایدوبیلوب بو تقدیرده موهوب له بونی واهبدن طلب ایدومز . و واهب بونی موهوب لیه ویرسه هبه مبتدئه اولور قاعديه .

ثالثاً ، بر قادین زوجی ذمتنده کی مهرینی شو زوجندن حاصل اولان کبیر اوغلنه هبه و اول قادین مذکور مهری قبض ایتسیله ابن مرقومه امر ایدوبده فقط هنوز قبض ایتسه ابن مرقوم آکا مالک اولماز قنیه و حموی .

مسئله ثانیه حواله در . شویله که محلیک محال علیه کی الاجغندن ویرلمک اوزره دیو مقید اولان حواله ده محال له محال علیه ذمتنده کی دینه یعنی محلیک آنده کی الاجغنه مالک اولور . « ۶۹۲ » ماده یه باق . نتیجه کیم ۲۵۲ ماده مثالنده بوکا دأثر صراحت واردر .

مسئله ثالثه ، وصیتدر . ششویله که بر کیمسه دیگر کمسنه
 ذمتنده کی الاجغی بر شیخه وصیت ایتسه صحیح وموصی له
 متوفانک نافی اولور . نته کیم بر کیمسه ثلث مانی دیگر کمسنه
 وصیت ایدوده فوت اولسه و ترککنک اشخاص سائرده
 آله جقلری بولنسه بو وصیت صحیح اولوب حتی موصی له اولان
 کمسنه وصیت ایدیلان مقدار دیونی مدیونلردن مطالبهیه حتی
 اولور در مختار و حانیة تکمله .

مسئله رابعه ، قنیهده مذکور اولدینی اوزره اجنبی بر
 آدم داینه سنک فلان کمسنه ذمتنده کی الاجغی بکا هبه ایت یاخود
 بکا حلال ایله یاخود اول آلاجغی بنم ایچون قیل دیوبده
 اوده هبه ایتدم یاخود حلال ایتدم یاخود قیلدم دیسه مدیون
 استیحتسانا بری اولور . اما داین ابتداء یعنی اجنبینک بووجهله
 طایب اولقسربن اول اجنبیه هبه ایتسه مدیون بری اولمازحموی .

❦ ماده ۸۴۹ ❦

(قبل القبض) یعنی موهوب له مال موهوبی قبض ایتزدن
 اول احد طرفین یعنی (واهب یاخود موهوب له) یاخود
 ایکسیمیده (فوت اولسه هبه باطل اولور .) ده آندنصرکه
 تسلیم و قبض موهوب ایله هبه سخته منقلب اولماز بزازیه .
 لعدم الملك طخطاوی .

قبل القبض واهب فوت اولنجه هبه باطل اولدی . زیرا
 قبل تمام الهبه مال موهوب واهبک وارثنه انتقال ایتدی .

بوصورتده واهب متوفانك صراحة قبضه اذنى بولنسه بيله موهوب له آنى قبض ايدمه من . وقبل القبض موهوب له فوت اولنجه هبه باطل اولدى . زيرا واهب موهوب له هبه و آكا ايجاب ايتمشدى . يوخسه وارثه هبه و آكا ايجاب ايتمش دكل ايديكه حتى آنك حق قبولى بولنسون . نته كيم بيعده دخى حكم بويله ايدى . شويله كه ۱۸۱ ماده شرحنده ذكر اولنديغى اوزره خيار قبول وارثه انتقال ايتيه جكندن بر كيمسه ديكر كمنه شو مالى اللى غروشه سكا صاادم ديدكدنصكره او كمنه او مجلسده فوت اولمغله اوراده حاضر بولنان وارثى قبول ايتسه بيع منعقد اولماز .

مجاهده قبل القبض تعبيرى مطلق اوله رق ذكرندن آكلا - شيلوركه مال موهوب كرك دين اولسون . نته كيم ماده آنفه شرحنده ذكر اولندي . وكرك عين اولسون . نته كيم قريبا ايضاح اولنور . يعنى ايكي صورتده دخى قبل القبض فوت ايله هبه باطل اولور . بوماده يه متفرع بعض مسائل -

۱ مسئله :

برمرريض مرض موتنده برمالى اجنبى برينه هبه ايدوبده قبل التسليم فوت اولسه هبه باطل اولور . زيرا مرض موتده هبه هر نقدر وصيت اولوب ثلث مالدن معتبر اولمى لازم كلور ووصيتده تسليم شرط دكل ايسه ده بومعامله حقيقته هبه اولمغله تماميتى قبضه توقف ايدر رد مختار .

۲ مسئله :

واهب قبل التسليم فوت اولدقدن صكره وارثى هبه مذ كوره
تامه در ظنيله موهوبى موهوب لهه تسليم واوده قبض ايتسه
هبه تمام اولماز . ۷۲۰، ماده يه باق بزازيه .

واهبك حياتنده يا بعد الموت قبض ايدلديكى

حقننده كى اختلاف

شوحالده واهبك وارثى بومالى مورثم سكا هبه ايدوب
قبل التسليم والقبض وفات ايتدكدن صكره سن قبض ايتمشيدك
ديو وموهوب له حياتنده قبض ايتمشيدم ديو اختلاف ايتدكلرنده
عين كرك يد وارنده اولسون كرك يد مدعى الهبه ده اولسون
وارث لزوم هبه يى انكار ايتمكده اولغلنه ۷۶ ماده يه مبنى سوز
آنكدر درمختار و رد مختار ومنح . قوله واليمين فى يد الوارث
هذا ليس بقيد لما فى الهندية قال المدعى عليه وهب لك والذى هذا
العين فلم تقبضه الا بعد موته وقال الموهوب له قبضته فى حياته واليمين
فى يد الذى يدعى الهبة فالقول للوارث لان القبض قد علم الساعة
والميراث قد تقدم القبض طحطاوى .

— ۸۵۰ — ماده

عاقل وبالغه اولان هبه ده آنك قبضى شرطدر . پدرى يا
زوجى كى ديكر لر ينك فضولا قبضى كافى دكلدر . بوجه تله
(بركيمسه كبير) ولدينه (يعنى عاقل وبالغ اولان اوغلنه)
يا قزينه (برشى) بوشى كرك اول كيمسه نك يا مستودع نك يدنده

بولسون و كرك غاصبي يا مستأجرى النده بولسون (هبه ايتد كده) موهوب له ارلان ولد اول كيمسه نك عيالنده بولانسه ميله واهبك (نسلیم) ی (و) موهوب اهلك (قبضی لازمدر). یعنی ولد کبیره هبه لزوم تسلیم و قبضده اجنبی به هبه کبی اولوب یوخسه ماده آتیہ حکمنده اولماغله پدرک یعنی اول کیمسه نك مال موهوب ذاتا قبضنده بولنسی یا خود بعد الهبه پدرک تجدید قبض ایتسی کفایت ایتز منلامسکین . «۸۳۸» ماده به باقی .

بوجهته بر کیمسه قوناغی بری عیالنده بولان صغیر و دیگرى کبیر ایکی اوغلنه هبه ایتسه هبه مذکورہ عند الکل فاسد اولور . زیرا اول کیمسه هبه ایتدیکی کبی ماده آتیہ حکمنجه صغیرک حصه سنی قابض اولوب صکره بوماده وجهله کبیرک بالذات قبضی لازم اولدیغی جهته وقت قبضده هبه مشاع اولوب بوايسه فاسد اولور . اما ایکی کبیر اوغلنه هبه وایکینسه معا تسلیم ایتسه جائز اولور . چونکه وقت قبضده شیوع یوقدر ولوالجیه فی الفصل الثانی من الهبة . نته کیم ۸۵۸ ماده شرحنده کی لاحقده بوکا دائر تفصیلات ویرله جکدر .

بنه بوجهته بر کیمسه بالغه بر قادینه برشی هبه ایتد کده اول قادینک زوجی آنی فضولی قبض ایتمکه منزوره قادین قبض مذکور ایله اول شیئه مالکله اوله ماز .

ینه بوجهته بر کیمسه زوجه سیچون البسه یحیدر سه مجرد یحیدر مکه هبه تمام اولمیوب نسلیم لازمدر انقروی .

ینه بوجهتله برکیمسه کیره قزینه اثواب بیچدیرسه تسلیم
ایتمدجکه هبه تمام اولماز . اما صغیره بیچدیرسه مالک اوله جنی
ماده آتیه شرحنده ذکر اولنیور .

بومادهده کی کیر لفظی عاقل و بالغ دیو نفسیر ایدلدی .
زیرا آتی ۸۵۱ ماده شرحنده ذکر اولنه جنی اوزره اوغلی
صغیر بولنور یاخود کیر اولوبده جنون مطبق ایله مجنون
اولور ایسه بونده کی حکم ماده آتیه وجهله در . یعنی او شی
اول کیمسه نك یندنه یامستودعی یامستعیری زندنه ایسه مجر دایجاب ایله
هبه تمام اولوب تسلیم لازم دکلدر .

حادثۃ الفتوی : بر صغیره حاکم طرفندن جد صحیحی وصی
تعیین اولندقدن صکره « جد مرقوم ۹۷۴ ماده موجبنجه ولی
مجر اولمغله حاکم طرفندن آنک وصی تعیین ایدلمسینه احتیاج
یوغیسهده ، اول صغیر اون سکز یاشنه رسیده اوله رق اولوجهله
۹۸۶ ماده حکمنجه بالغ اولمش اولوب فقط حاکم حضورنده
رشدی اثبات ایتمدن جد مرقوم ، یندنه بولنان برمالنی حفید
مرقومه هبه ایتسه بوماده وجهله قبض لازم میدر یوخسه حفید
مرقوم و قتیله تحت وصایتہ آلتق صورتیله برنوع حجر ایدلمش
دیمک اولوب هنوز اثبات رشد ایتمدیکی یعنی نفس الامرده
رشد ایتسهده حاکم حضورینه واروب هنوز رشیدنی شهود
اقامه سیله اثبات ایلمدیکی جهتله صغیر حکمنده عد اولنه رق

ماده آتیه وجهه او مال جدك قبضنده بولنسی کافی اولوب حقیق
موقوفه قبضنده محتاج دكلی ؟

فقها دیورکه صغیردن حجری رفع ایدن ایکی شیدر. برنجیسی
ولیسنك آکا اذن ویرمسیدر. ایکنجیسی بلوغیدر تنزیح.
صغیر بالغ اولدقدن صکره آلک اوزرینه غیرک ولایتی قالماز .
لاقطاع الولاية بالبلوغ درمنتقی شرح الملتقی فی باب الاولیاء والا کفاء
قال الطحطاوی الهبة للولد الکبیر لا تتم الا بقبضه ولو کان فی عیاله
ولا یملک المولی قبض ما وهب لعمده المحجور انتهى .

۱۵۱ ماده

(صغیرک) یاخود صغیره نك ابی یا جدی کی ولسی یا
(وصیسی) ولوکه صغیر بونلرک عیالنده یعنی حجر و تربیه سنده
بولنسون (یاخود) صغیر و صغیره نك (مریسی یعنی) بونلرک
(حجر و تربیه سنده بولندیغی) صغیرک اخی و عمنی و خالی کی
اقربادن و کذا اجانبدن (کیمسه کرک یدنده بولنسان و کرک
دیکرک نزدنده و دیعه) یا عاریت (اولان) معلوم (مالی اول
صغیره هبه) یا صدقه (ایتدکده مجرد ايجاب ایله یعنی یا لکزه هبه ایتدم
دیمسیله اول صغیر) و صغیره (آکا مالک اولوب) قبول و
(قبضه محتاج دکلدر). یعنی الخ مرینک نفسیری اولوب یوخسه
تفسیر مذکور وصییه عائد دکلدر. نته کم آنفا اشارت اولندیغی
کی آتیده دخی تفصیل اولنور هندیه فی الباب السادس .

ایضاح القيود

۱ صغیرک، صغیرہ حقنہ کی حکم دخی بروجه مشروح اولمغله اشمل اولان ماده آفہدہ اولدینی کبی طفلک دینلمک ایدیکه طفل تعبیری هم صغیرہ ہمدہ صغیرہ عام وشامل اولور عبد الحليم . التذکیر الواقع فی هذه المسئلة ليس لاختراج المؤنث وانما هولاجری علی ماہو المتعارف فی امثالہا من تغلیب الذکور علی الاناث کما فی خطابات الشرع علی ما تقرر فی علم الاصول فتح القدير . جنون مطبق ایلہ مجنون اولان کہنہ دخی بو حکمدہ صغیر کبدر نتیجہ .

۲ وصیسی، صغیرک ولیسی دخی بطریق الاولی بو حکمدہ اولمغله مجله ولیسی یا وصیسی دیمش اولسہ ایدی اولی یاخوذ وصیسی یرینہ ولیسی دیہرک وصی بہ دخی تشمیل ایدی اعلا اولوردی . بوندہ ولیدن مقصود ، اب واب بولندینی تقدیردہ جدر وترتیب بروجه آتیدر : شویله کہ بو حق اولا ابہ عائددر . ثانیاً اب بولندینی یعنی فوت یاغبت منقطعہ ایلہ غائب اولمش اولدینی صورتدہ ابک اختیار ونصب ایتمش اولدینی وصیسی یا بو وصینک وصیسی ثانیاً اب متوفی یا غائبک بویله وصیسی بولندینی صورتدہ صغیرک جدی یعنی پدرینک پدری رابعا جد وفات ایتمش یاغبت منقطعہ ایلہ غائب بولمش اولدینی صورتدہ بوجدک اختیار ونصب ایتمش اولدینی وصیسی یا بونک وصیسی خامسا حاکمک نصب وتعیین ایلمش اولدینی وصیدر . ۹۷۴ھ

ماده یه باق مجمع الانهر و در متقی و تکمله رد مختار . یعنی محله نك وصیسی عبارتست مندن مقصودی . وصی مختار ایله وصی منصوبدن اعهدر .

شرحاً اشارت اولندیغی اوزره صغیرك ولیسنك یاخود وصیسنك كرك کندی نزدنده و كرك مستودعی یا مستعیری یدنده بولنان مالی صغیره یعنی طفله هبه سی علی الاطلاق صحیحدر . یعنی طفل مرقوم كرك ولی با وصینك حجر و تربیه سنده بولنسون كرك بولنسون .

۳ یاخود مرپسی ، ۸۵۲ ماده ده مرپی ولی یه مقابل معاده استعمال اولندیغی کبی بوراده دخی مرپی ولی یا وصی اولیان کیسه معناسنده اولسی لازم کلور . ایمی مرپسنك هبه سی دخی اولوجهله بلا قبض صحیح اولوب فقط ایکی شرطله مشروطدر . شرط اول ، طفل ، اول مرپنك حجر و تربیه سنده بولمیلدر .

حجر ، حانك فتحیله ده کسر یله ده قرائت اولنوب جمعی حجور کلور که اصل معناسی ، انانك قولتی آلتدن کشینه یعنی بکورینه قدر اولان محله اطلاق اولنوب حجرنده دیمك تربیه سنده دیمك اولغله و تربیه سنده دینامسیله یعنی عطف تفسیر یله بوکا اشارت اولنیور ابوالسعود المصری و طحطاوی . محله ده بو شرط حجر و تربیه سنده بولندیغی عبارتست سیله ذکر

اولنیور. مربی کرک اخوام و خال کی اقربادن بری اولسون و کرک
ماتقط مثللو اجابیدن بری اولسون حکم بر در .

بوجهتله مثلاً صغیرک حجرو تربیه سنده بولندیغی اقرباسندن
یا اجابیدن بر کیسه کرک کندی یدنده و کرک دیگرک نزدنده
ودیه اولان مالنی صغیر مرقومه هبه ایتسه مجرد ایجاب ایله
صغیر مرقوم آکا مالک اولمیوب ماده آتیه وجهله هم قبول
همده قبض لازمدر.

شرط ثانی، صغیرک ولیسی یا وصیسی بولنماملیدر . زیرا
بونلرک صغیرک مالنده تصرفه ولایتلری اولماسی و صغیرک مالنده
تصرفه ولایتلری اولانلر موجود بولنمی بونلره حق قبضک
ثبوتی منع ایدر . ان ولایة القبض لهؤلاء اذا لم يوجد واحد
من الاربعة وهم الاب ووصیه والجد اب الاب بعد الاب ووصیه
فاما مع وجود واحد منهم فلا سواء كان الصبی فی عیال القابض
اولم یکن وسواء کان ذا رحم محرم منه او اجنبیا فتح. واقعا
طحطاوی ظاهر اولان آتی ۸۵۴ ماده شرحنده بیان اولنان
اختلافک بوراده دخی جاری اولسی ایدوکنی بیان ایلمش
ایسه ده بوندن بشقه بونی سویلیانی کورمدم. بوجهتله صغیرک باباسی
وار ایکن حجر و تربیه سنده بولندیغی بر کسه یدنده کی مالنی
آکا هبه ایتسه باباسنک قبول و قبضی لازمدر . حتی بر کیسه
حجر و تربیه سنده بولنان حقیقینه یعنی اوغانک اوغلنه برشی
هبه ایدوب لیکن اول صغیرک باباسی واریکن آکا تسلیم ایتسه

هبه مذکورہ نك حكمی بوقدر نتیجہ و ملتقى و مجمع الانهر و عنایہ .
ولینك بولنامسندن مقصد و فاتی یاخود غیبت منقطعہ ایلہ
غائب یعنی مفقود بولنمسیدر من الحل المزبور .

۴ كرك كندی یدندہ و كرك دیگرى نزدندہ و دیعہ اولان ،
بو تعبیر من وجه احترازی دكلدر . زیرا مستعارده یعنی اول
کیمسہ نك دیگر ك نزدندہ عاریت بولنان مالی ہبہ دخی حکم
بویلہ در .

شویلہ کہ معیر ، دیگر کیمسہ عاریۃ و یردیی بر مالی
حجر و تربیہ سندنہ بولنان بر طفلہ ہبہ ایتدکده مجرد
ایجاب ایلہ طفل مرقوم آکا مالک اولوب تجدید قبضہ
حاجت یوقدر . زیرا عاریت عقد لازم دكلدر بزازیہ .

خلاصہ ، اوج نوع مالک ہبہ سو مجرد ایجاب ایلہ تمام
اولور کہ برنجیسی ، واهب یدندہ بولان ایکنجیسی واهبک
مستودعی نزدندہ بولان اوچنجیسی ، واهبک مستعیری
الندہ بولنان مالدر .

و تعبیر مذکور من وجه آخر احترازیدر . شویلہ کہ
مذکور تعبیر ایلہ آلتی نوع مالاردن احتراز اولیور .

برنجیسی ، فاسدا مشتری یدندہ بولنان مالدر . یعنی بر
کیمسہ بر مالی بیع فاسد ایلہ دیگر کیمسہ بیع و تسلیم
ایتدکدنصکرہ مذکور مال او کیمسہ یدندہ ایکن اول کیمسہ طفلنہ ہبہ
ایتسہ جائز دكلدر مجمع الانهر . یعنی بعد الفسخ و التارکہ ہبہ ایتسہ

دیمکدر والا مشتریك مالی طفله نصل هبه اولنور نته کیم ۸۴۶
ماده شرحنده نظیری ذکر اولندی .

ایکنجیسی، مشتری خیار شرطلا خیر اوله رق بیع اولنوبده
مشتری به تسلیم ایدیلان مالدرکه باع بو مالی طفلنه هبه ایتسه
مجرد ایجاب ایله هبه تمام اولماز .

اوچنجیسی، غاصب یدنده بولنان مالدر . یعنی مثلاً بر
کیمسه نك حیوانی دیگر کمنه غصب ایدوبده مذکور حیوان
ید غاصبده ایکن اول کیمسه آنی طفلنه هبه ایتسه مجرد عقد
ایله هبه تمام اولماز . زیرا مذکور حیوان غاصب اوزرینه
مضمون اولوب ضمان ایسه آحق تقویت ید ایله اوله جغندن
اول حیوان حقیقه آنک یدنده بولندی کبی حکما دخی یدنده
دکلدر مجمع الانهر .

دردنجیسی، مرتهن یدنده بولنان مالدر . شویله که بر کیمسه
مانی بورجی مقابلنده شخص آخره رهن وتسلیم ایدرک شخص
مرقوم یدنده ایکن اول کیمسه مذکور مالی طفلنه هبه ایتسه
تمام اولماز . حتی مؤخره رهن فک اولنسه بیله طفل مرقوم هبه
سابقه به بناء آکا مالک اوله ماز .

بشنجیسی، مستأجر یدنده بولنان مالدر . شویله که بر
کیمسه ملک خانی دیگر کمنه به ایجار وتسلیم ایدرک مدت اجاره
تمام اولماقله مذکور خان هنوز مستأجر یدنده ایکن اول کیمسه
مذکور خانی طفلنه هبه ایتدگدنصکره فوت اولسه سائر

ورثه سی مذکور خانی میراثه ادخال ایدہ بیلورلر . اما مدت اجاره منقضی اولدقدنصکره هبه ایتسه او صورتده هبه تمام اولور رد مختار . نته کیم بر کیمسه ملک تارلا نی آخرینه بالایجار مذکور نارلا مستأجرک اکیذیله مشغول ایکن طفلانه هبه ایتسه صحیح اولماز هندیه .

آلتنجیسی ، متب یعنی موهوب له یدنده بولنان مایدر . شویله که بر کیمسه مالی بلاعوض اجنبی بر کیمسه هبه و تسایم ایتدکنصکره طفلانه هبه ایتسه هبه تمام اولماز . حتی مال موهوبی موهوب له اولدن بالفسخ استرداد ایتسه بیلهینه طفلی آکا مالک اوله ماز مجمع الانهر وعلی افندی .

بو انواع ستهده هبه تمام اولماسنک سببی شودر که مشتری ایله دیگر لرینک قبضلری کندو نفسلریچون اولمغله بونارده هبه نک تمامیتی موجب اولان قبض بقدر ابوالسعود المصری ودرمنتقی وهندیه . واقعا مستعار دخی مستعیرک منفعتی ایچون قبض ایدلمش ایسهده مستعار ایله مأجور آره سننده دیگر صورتده فرق واردر . شویله که اجاره عقد لازم ایکن عاریت عقد لازم دکدر .

۵ مالی بو مالک ایکی شرطی حائز اولسی لازمدر که برنجیسی ، او مال معلوم اولماید . حتی مجهول اولورسه هبه صحیح اولماز . « ۸۵۸ » مادهیه باق . زیرا مجهولک تملیکی صحیح دکدر . « ۲۱۳ و ۴۴۹ » مادهلره باق . مثلاً مالمدن برشیئی سکا هبه ایتدم دیسه جائز دکدر ابوالسعود و تکمله رد مختار .

ایکنجیسی، بو مالک صغیره نافع اولسی شرطدر. نته کیم ماده آتیه شرحنده ایضاح اولنور .

۶ هبه ، صدقه احکام مذکورده هبه کبیدر . شویله که برکیمسه دیکرک زردنده ودیعه اولان مانی یاخود اب کندوسنک ساکن اولدینی منزلی طفلنه تصدق ایتسه جائز اولور بزازیه وهندیه . نته کیم اب کندو اکیلله مزروع ملک عرصه سنی طفلنه تصدق ایتسه جائز اولور لیکن اکین کندوسنک اولمیوب مستأجرک اولور ایسه جائز اولماز هندیه فی الباب السادس . فقط هبه دن مانع رجوع بولمندی فی حالده رجوع اولنه ییلور من المحل المزبور .

۷ مجرد ایجاب ایله، بونده ایکی حکم واردر. حکم اول ، قبولک لازم اولماسیدر. زیرا بوبابده اصل شودر که هر عقدکه ایکی طرفنه یعنی هم ایجاب همده قبول جهتنه بر شخص تولی ایده بو عقدده یالکیز ایجاب کافیدر رد مختار . اگر بو عقدی ایقاع ایدن کیمسه نفسندن اصیل اولور عبارده ایله ایجابی سویلر ایسه. «۱۶۷» ماده شرحنه باق.

بو جهتنه مثلاً اب ، طفلنه یدنده یا مستودعی یا مستعیری زردنده بولنان بر شیئی هبه ایتدکه مجرد هبه ایتدم دیمسی تمامیت هبه ده کافی بوانوب قبوله حاجت یوقدر . طفل مرقوم کرک ابک عیالنده بولنسون کرک بولنسون . زیرا بو مال ابک قبضنده بولمادیغی جهتنه صغیرک قبضی منابنه نائب اولور. چونکه

اب صغيرك وليسى اولمغله شرط اولان آنك قبضيدر زيايى
و مجمع الانهر و در متقى.

مثلا اب ملكم اولان فلان دكانم صغير او غلمكدر ديسه
هبه اولوب مذكور دكان ابك ينده بولندينى تقديرده هبه
تمام اولور. نته كيم بر كيمسه آخر ديارده بولسان ملك منزلى
صغير ولدينه هبه وجضار مجاسى اشهاد ايتسه هبه مذكوره تامه
اولور قنيه و فتاواى يحيى افندى.

ينه بو جهتله بر كيمسه صغير ولدينه البسه ياپيردقدن
صكره مذكور البسه ي بشقه سنه ويره مز. مكر كه وقت اعمال
واتخاذده عاريت ايدوكنى بيان ايده بزازيه. زيرا بو باده معتبر
اولان عرف اولوب عرفا بوندن صله واحسان قصد اولور.
مع ذلك عاريتده خى احتمال بولمغله عاريت ايدوكنى وقت اعمالده
بيان ايدرسه عاريت والا هبه اولور. ۳۶۰ ماده يه و شرحنه باق
ولوالجيه.

ينه بو جهتله بر كيمسه شو مالى صغير او غلم ايچون آلدن
ديسه صغير آكا مالك اوله جنى كى بر قات البسه لك آلوده
صغير او غلنه يچدير سه هبه تمام اولور انقروى. بوماده وجهله اولان
هبه ده موهوبك مشغول يا مشاع اولسى تماميت هبه يي اخلاص
ايلمز. شويله كه بر كيمسه كندوسنك ساكن بولندينى يا خود
درونده اشيا سى موضوع يا خود ديكر بر شخصك بلا اجرة
يعنى عارية ساكن ايدوكى خانه سنى يا خود اعارة اوزرنده اكين

بولنان عرصه سنی یا خود قابل قسمت ملک کنک حصه شایعه سنی
 یا خود ارض میری اوزرنده بولنان باغچه سنی یا خود ملک کرومنی
 طفلنه هبه ایتسه مجرد ایجابیه طفلی آکا مالک اولور . زیرا
 کرک باغچه و کرک یری ابک قبضنده اولوب ابک قبضی دخی
 طفلك قبضی حکمنده در . ومثلا اشیاسنک خانه ده بولنسی هبه یه
 مانع بولنیوب بلکه هبه یی مقرر در ابوالسعود العمادی و علی
 افندی رزیاهی وهندیه فی الباب السادس . رجل تصدق علی ابنه
 الصغیر بدار والاب ساکنها جاز وعلیه الفتوی هندیه باختصار .
 حکم ثانی ، موهوب واهبک یدنده بولندینی یا دیگرک نزدنده
 ودیعه اولدینی شی اولنجه آنده تجدید قبضه حاجت مس
 ایتامسیدر . زیرا آتی ۸۵۲ ماده ده ذکر اولندینی اوزره طفله
 برشی هبه اولندقدده حق قبض بونلرک و ۸۴۶ ماده موجبجه
 موهوب لهک ذاتا قبضنده بولنسی کافی اولوب تجدید قبض
 غیر لازم اولغله بشقه جه قبضه لزوم یوقدر هدایه وجمع الانهر
 وانقروی . چونکه انسانک کندی مالنده قبضی قبض امانت
 اولدینی کی هبه ده کی قبض دخی قبض امانت اولغله بری دیگرکی
 مقامنه قائم اوله جفی مذکور ۸۴۶ ماده شرحنده ذکر اولنشییدی
 نهایه . ایمدی واهبک یدنده بولنان ماله مذکور حکم آشکار
 اولوب مستودعک یدنده بولنان ماله کلنجه مستودعک یدی دخی
 مالکک یدی کبیدر . لکن مستعیرک یدی معیرک یدی کی
 اولدینی ۷۸۷ ماده شرحنده ایضاح اولنشییدی . بوکا کوره

بوکې مستعارك هبه سی جائز اولماملیدی دیوسو آل وارد اولور.
لکن عقد عاریت غیر لازم اولمسندن طولای بونکده هبه سی
جائز ایدوکی آنفا ذکر ایدلدی.

خفی اولمیه که بر کیمسه کندی طفلنه یا حجر و تربیه سنده
بولنان بر طفله بر مالی هبه ایتدکده اعلام و اشهاد ایتلیدر.
اعلام قبض منزلنده اولمغله آنک وجودی لازم اولوب اشهاد
کلنجه هبه نك صحتنده لازم اولوب بلا اشهاد دخی صحیح ايسده
یا واهبك یا خود موتی تقدیرنده سائر ورثه نك انکار لرینه محل قالماق
ایچون اشهاد مقتضیدر رد مختار و بزایه .

ماده ۸۵۲

(بر طفله) یعنی كرك ممیز و كرك غیر ممیز صغیر و صغیره یه
و کذا مجنون و مجنونه یه (آخر کمنه) یعنی صغیرك و لیسندن
و وصیسندن و صغیرك حجر و تربیه سنده بولندیغی کیمسه دن غیر ی
بر شخص (برشی هبه ایتدکده) تسامیم و (ولیسنك یا خود
مریسنك) یعنی صغیرك حجر و تربیه سنده بولندیغی کیمسه نك
(قبضی ايله هبه تمام اولور.) زیرا صغیرك و لیسى صغیر حقنده
نفع ايله ضرر بیننده دائر اولان عقودى «بیع و اجاره کبی»
اجرایه مالك اولوب هبه ايسه نفع محض اولان عقوددن اولمغله
آنى اجرایه مالك اولمسی بطریق الاولیدر هدایه.

ایضاح القيود

۱ طفله، بو تعبیر صغیر و صغیره یه عام و شامل اولدینی کبی

مجنون و مجنونه و معتوه و معتوه ده دخی حکم منوال مشروح
اوزره در .

۲ برشی ، بوشی صغیره نافع مال اولملیدر . حتی ۸۵۳
ماده شرحنده ایضاح اولنه جنی اوزره اولشی ایکی کوزی کور
همار اولوبده بر ایشه یرامدقن بشقه آنی انفاق ایتک کی
صغیره مؤنت لاحق اوله رق مضرتی بولنان برشی هبه ایتسه
چاثر اولماز . ۵۸۰ ماده یه باق .

۳ هبه ، صدقه و هدیه دخی هبه کبیدر . بو وجهله صغیره
بر مال هبه اولندقدده اول مال دراهم و دنانیر کی غیر مأ کول
ایسه ابوینی آنی کندی امورلرینه صرف ایله استهلاک ایده مز لر .
مکرکه فقیر و محتاج بولنه لر . ۷۹۹ ماده شرحنه باق . واکر
عنب کی مأ کول بر مال ایسه بعض فقهایه کوره ابوینی آنی
اکل ایده بیلور لان الاهداء الیهما و ذکر الصبی لاستصغار
الهدیه . اما بعض فقهایه کوره اکل ایده مز ابوالسعود قاله
اکثر ائمة بخاری طحطاوی . و بو حالده صاتیلوب پاره سی
صغیرک امورینه صرف اولملیدر .

۴ قبضیله ، بونکله اشارت اولنیورکه اومال ذاتاً ولینک
قبضنده دکل ایدی . اما اول مال ذاتاً مثلاً ولینک قبضنده
ایسه نظر اولنور . مذکور مال عین اولنجه مجرد قبول ایله
تمام اولور . ماده آفیه باق . لکن عین اولیوبده دین اولنجه
اختلاف فقها واقع اولمشدر . شویله که قول مختاره کوره

قبض لازمدر . دیگر بر قوله كوره قبض لازم دكلدر
منقاری زاده ورد مختار .

شویله که مثلا بر قادین زوجی ذمتنده کی مهرینی شوز و جیندن حاصل
اولان او غلنه هبه و زوجنی قبضه تسلیط ایتد کده مجرد قبول ایله قول
مختاره كوره هبه تمام اولیوب اما زوج بعدالقبول مهر مذ کوری
افراز ایدرک صغیر ایچون قبض ایتسه اول حالدہ تمام اولور .
وقیهده ذکر اولندیغه كوره اولوجهله بعدالافراز قبض ایتسه
بیله بعدالایجاب قبول ایله هبه تمام اولوب تسلیط بالقبضه حاجت
اولمادیگی کی افراز و قبضهده حاجت یوقدر حموی فی شرح الاشباه .
ولینک قبضیله هبه تمام اولدی . زیرا ۹۷۴ ماده وجهله طفلاک
ماننده حق تصرف ولینک اولوب قبض هبه دخی صغیرک ماننده
تصرف بابندندر . طفل کرک و لیسنک حجر و تربیه سنده بولنسون .
و کرک بولنسون آنک قبضیله هبه تمام اولور زیلی .

بوراده کی ولیدن مقصود طقوز کیمسه در که بونلر دخی
۱ اب ۲ وصی الاب ۳ وصی وصی الاب ۴ جد یعنی اب الاب
۵ وصی الجد ۶ وصی وصی الجد ۷ حاکم ۸ وصی الحاکم ۹ وصی
وصی الحاکمدر تکمله رد مختار . و بونلرک ولایتلری دخی بو ترتیب
اوزره در . شویله که مثلا وصی الاب موجود ایکن جدک ولایتی
یوقدر . بوجهتله بر کیمسه فوت اولوبده وصیتی ایله پدرینی
ترک ایتد کده وصی مرقوم متوفانک پدرندن صغیره ولایتده اولیدر
تکمله رد مختار قبیل الوکالة بالخصومه .

مثلاً صغيرك پدری موجود ایکن اجنبی بری طرفندن صغير
مرقومه برمال هبه ایدلدکده اول صغيرك جدی یعنی پدرینك
پدری مذکور هبه یی قبض ایتسه هبه تمام اولماز . اکر صغير
مرقوم بوجدك عیالنده دکل ایتسه . زیرا ابدن مؤخر ولیلرک
تصرفلری برای ضرورت اولوب حالبوکه ابك حضوری حالنده
ضرورت یوقدر هندیه و بحر وقاعدیه وتکمله رد مختار . «۲۲»
ماده یه باق .

موجود اولمقدن مقصود حضوردر . بناء علیه اب غیبت
منقطعه ایله غائب اولدینی صورتده ولایت مذکوره مابعدینه
انتقال ایدر . چونکه غائبك کلنجه یه قدر تأخیر صغيرك منفعتی
نفوبته باعث اوله جغندن ولایت مابعدینه انتقال ایدر تکمله
رد مختار .

مربینك قبضیله دخی هبه تمام اولدی . زیرا مربیسنك
ثبوت یدینه بناء طفلی حفظه احق اولدینی کبی مأکولات
وملبوسات ایچون لازم اولان مالک تحصیل دخی حفظك
ضروراتندن اولغله مربیسنك دخی تصرف نافع ولایتی واردر
تکمله رد مختار .

ایشته بالاده درجاتی محرر ولیلر فوت یاخود غیبت منقطعه
ایله غائب اولنجه مربینك قبضی کافی ایتسه ده مارالذ کر ولیلردن
بری موجود اولنجه مربینك قبضی کافیمیدر ؟ بونده اختلاف
فقها واقع اولوب برجندی وقهستانی وولوالجی کبی بعض فقها

کافی اولسی جهتی ترجیح ایتدکاری مثلاً قاضیخان صحیح
ومفتابه اولان بو، ایدوکنی ذکر و بیان ایلمشدرکه مشارالیه
تصحیحینه اعتماد اولنور فنیه النفس بر ذات عالیصفات اولغله
تصحیحندن عدول اولنیه جغی علامه قاسم بیان ایلمشدر
تکمله رد مختار. قال شیخ الاسلام خواهرزاده فی مبسوطه فن
مشایخنا من سوی بین الزوج و بین الاجنبی والاب والجد والاخ
وقالوا یجوز قبض هؤلاء عن الصغیر اذا کان فی عیالهم وان کان الاب
حاضراً فتح وهو المختار وانه الصحیح وانه به یفتی طحطاوی .
مجله دخی بوراده مسئله بی مطلق اوله رق ذکر ایلمش یعنی
مرینک قبضتک صحتی ولینک عدم حضوری قیدله تقید
ایلمامش اولغله ۶۴ مادهیه بناء بو قول قبول ایدلمشدر
دینیه بیلور .

بناء علیه بر صغیر جد صحیحینک عیالنده بولندیغی حالده اجنبی
بر یسی صغیر مرقومه بر مالی هبه وجد دخی قبول ایتسه صحیح اولوب جد
مرقومک قبضیه هبه تمام اولور . ولوکه صغیر مرقومک پدری بر حیات
وحاضر بولنه . نته کیم بر صغیر اخ ، ام ، وصی واجنبی کی
برینک عیالنده یعنی تربیه سنده بولنوب صغیر مرقومه بر یسی
بر مالی هبه ایتسه بولنرک قبضیه هبه تمام اولور . ولوکه صغیر
مرقومک اب وجدی کی و یسی بر حیات وحاضر بولنه .
کذا صغیره بر قیز اره تزویج وزوجنه زفاف اولنهرق

زوجی عیالنده ایکن بریسی آکا بر مالی هبه ایتسه زو جنك قبضيله
 هبه تمام اولور. ولو كه اب حاضر بولنه. زیر اب صغیره مز بوره بی حفظده
 زوج مرقومی گندی مقامنه اقامه ایلمش اولوب قبض هبه دخی
 حفظده در. و بو هبه بی اب دخی قبض ایتسه ینه تمام اولور. زیر اولایت
 ابكر زیاهی سواء كان من بحامع مثلها اولایا فی الصحیح بحر.
 اما زوج مرقومك صغیره مز بوره نك الاجقارینی قبضه حق
 و صلاحیتی یوقدر طحطاوی. نته کیم قبل الزفاف دخی زو جنك
 حق قبض هبه سی یوقدر.

هرايه و تجرید و جوهره و بحر و منح و شرح مجمعه کافی
 اولم. امسی جهتی ترجیح ایدلمش و بونلرك یعنی ولی بولنیا نلرك
 تصرفی برای ضرورت اولوب یوخسه تفویض اب ابله اولماغله
 مع حضور الاب ضرورت یوقدر دیمش. لردر جوهره و تکمله
 رد مختار و درر متقی. «۲۲» ماده یه باق.

• ولیسنك و مربیسنك قبضی دینلدی. زیرا بونلر قبض
 ایتوبده آخر بر شخصك قبض ایتسنك حکمی یوقدر. شویله که
 بر طفل زیدك حجر و تربیه سنده ایکن اجنبی بر شخص طرفندن
 آکا بر مال هبه اولنوبده دیگر بر اجنبی بو هبه بی قبض ایتسه هبه
 تمام اولماز.

— ۸۵۳ — ماده

(صی ممیزه) یاخود صبیة ممیزه نافع (برشی)
 (هبه اولندوقده) پدری کبی (ولیسی) یاخود مربیسی

«اولسه بینه کندوسنك» قبول و «قبضيله هبه» استحسانا
 «تمام اولور.» زیرا قبض مذکورده صغیر ایچون نفع محض
 بولنوب صغیر ایسه ۹۶۱ ماده ده بیان اولدینی اوزره
 کندوسیچون نفع محض اولان شیئه مباشرته اهلدر هدایه و کفایه.
 وجه استحسان شودرکه عقل میزك عدم اعتباری عقلنك عدم
 اعتدالی حسبیه ظاهر اولان عواقب اموره نظری نام اولما مقدر.
 بناء علیه تصرف مضرک ردی «هبه سی کی» صغیر مرقومك
 نفی ایچون اولدینی کی بین النفع والضرر دائر اولان بیع کی
 تصرف ردی دخی صغیر مرقومه نظر ایچون اوله رق حتی بین النفع
 والضرر دائر اولان تصرفك اجازتنده و ایسی منفعت کوردکده
 حق اجازتی بولنمش اولمغله بر تصرف که صبی حقه نفع محض
 اولور بونده نظرو فائده یعنی صغیره منفعت آنك نفوذنده اولوب
 یوخسه صغیره نفع محض بولسان شو تصرفی یعنی قبول و قبض
 هبه یی رده حکمت و فائده یوقدر زیلعی.

صغیر میز ۹۴۳ ماده ده تعریف اولمغله برابر بوم بحثده کی
 میز یی زیلعی «تحصیلی یعنی جمعی و اله کتورمکی عقل و ادراک
 ایدن کیمنه» دیو تفسیر ایلمشدر.

سوال، صبینك عقلی یا معتبردر یا دکلدر. معتبر دکل ایسه
 کندی قبضيله هبه تمام اولماق لازم کلوب اما معتبر ایسه
 کندوسنك اهلیتی وار ایکن خلفه یعنی ولیسنك قبضنه اعتبار
 ایدلماق اقتضایدردی.

جواب، نفع محضك تحصیلنده عقلی معتبر در. کندی فعلیه
برابر خلفه اعتبار ایدلده صغیر ایچون تحصیل منفعت حقنده
دیگر بر قیو کشاد ایدلش اوله جغندن بونده توفیر منفعت اولمغله
جائز در عینی .

ایضاح القیود

۱ ممیزه ، بوتعبیر بر اعتباریه احترازی اولیوب ممیزه
هیهده دخی حکم بویه در . لیکن ار ایله قادین آره سنده مشترک
بولنان بوکبی مسائلمه فقها ار کشی یی ذکر ایله اکتفا ایدر لر .
دیگر بر اعتباریه قید احترازی اولوب صبی غیر ممیزدن احتراز
اولنیور . شویله که صبی غیر ممیزه برشی هیه اولندقدده آنک
قبضیه هیه تمام اولماز حموی . بلکه ماده آنفده بیان اولندیغی
وجهله ولیسی یا مربیسی قبض ایتملیدر .

۲ نافع ، بوقید احترازی اولوب صغیر غیر ممیزه نافع
ارلیوب بلکه واهبک خانه سنده کی تراب کی برشی اولوبده
بولندیغی محله بیع اولندقدده هیچ برپاره اتمیه جکی کی بشقه
محله نقل اولنه حق اولدقدده فائده سندن زیاده مصرف وقوع بولمق
مضر تنی داعی اولور ایسه هیه مذکور صحیحیه اولیوب موهوب واهبه
رد و ترک اولنور حموی . نته کیم صغیر ممیزه ایکی کوزی کور
بر عبد کی منفعتی اولمدقدن بشقه مؤنت انفاق لاحق اولان
شی هیه اولندقدده قبولی صحیح اولیوب واهبه رد اولنور
ابو السعود و شرنبلالی .

۳ هبه ، هديه و صدقه ده دخی حکم بوبله اولوب فقط بو تعبیر ايله ادای دیندن احتراز اولیور . شویله که صغیر ممیزه مدیون اولان بر کیمسه بورجی صغیر مرقومه تسام ایتسه دیندن بری اولیه جنی جهتله ادای دین بو بابد هبه به مقیس دکدر حموی « ۱۹۶ » ماده یه ماق .

۴ ولیسی اولسه بیله ، بو تعبیر ايله یعنی ولی عباره سیله اشارت اولیور که بوماده وجهله صغیر ممیزه بر شی هبه ده آنک قبضیله هبه تمام اولدینی کی وایسنک یا مر یسنک قبضیله دخی هبه تمام اولور . بو جهتله صبی ممیز ایچون تحصیل نفعت ایکی طریق حاصل اولور زیلی .

۵ قبول و قبضیله ، صغیر ممیز ، کندوسنه هبه اولنان مالی بوجه مذکور قبول ایده بیله چکی کی صغیر مرقوم رد ایتسه مردود دخی اولور . چونکه شور رد صغیر ایچون ثابت اولان بر حقت ابطالنه مؤدی اولیه جنی جهتله صغیر مرقوم آکا مالک اولور حموی فی الهبة . سو آل ، صغیره هبه ایجاب اولندقدده حق قبول ثابت ورد ایتدکده بو حقت ابطالنه مؤدی اولور . جواب ، حق قبول حق مالی اولیوب حقوق مجرده دن عبارتدر . لیکن صغیر ممیزه برمال هبه اولنوبده صغیرک وایسی شو هبه یی رد ایتسه ظاهر اولان شو رد صحیح اولماقدرد . حق بو وجهله هبه یی رد ایتسه ده صکره صغیر ممیز مجاس هبه ده قبول ایتسه صحیح اولور رد مختار و طحطاوی .

بو ماده وجهله صغیره هبه اولندقدده هبه دن رجوع

اوله بيله چكى جهته حق رجوعى اسقاط ايچون مال موهوب
حاكم طرفندن بيع ايدلمليدر. لانه من المصلحة للصبي و انظر
ما حكمه و ان نظرنا الى ما علمنا به كان واجبا ان تيقن الرجوع
وكان الاب و نحوه فى حكم القاضى و يحرر طحطاوى .
يوخسه اسقاط حق رجوع ايچون مال صغيردن عوض
ويريله مز . نتهكيم ۱۵۵ ماده شرحنده ايضاح اولنور انقروى

ماده ۱۵۴

(هبة مضافه) يعنى كله جك بر وقتدن اعتبارا هبه
(صحيح دكلدر .) زيرا ۸۲ ماده شرحنده ايضاح اولنديغى
اوزره على العموم تملكاتك اضاافه سى و شرطه تعليقى صحيح دكلدر .
(متلا كله جك آى باشندن) يا يارينندن (اعتبارا شو
مالى سكا هبه ايتدم) و موهوب له دخى قبول ايلدم (ديسه
صحيح اولماز .) نتهكيم رقبى دخى هبة مضافه اولمغله صحيح
دكلدر طحطاوى و درر .

رقبى، بر كيمسه مالى فوتند نصكره ديكر بنه تملك ايتدكر كه
اول كيمسه نك زمان فوتنه مضاف تملك اولور .

رقبى، انتظار معنا سنه اولان ارتقايدن مأخوذ اولوب كويا
موهوب له واهبك فوتنه منتظر اولور زياعى . يعنى بر كيمسه
ديكر كمسنه بن سندن اول فوت اولور ايسهم بو مال سنك
اولسون و سن بندن اول فوت اولور ايسهك بومال بنم اولسون
ديك اولوب كويا هر برى ديكر ك فوتنه انتظار ايدور . طرفينه

کوره موهوب له مال موهوبه مالک اولماز که علی افندی دخی
بو وجه اوزره افتا ایلمشدر . معنا ها رقبة داری لک و ذلك
جائز و لیکن لما احتمل الامرین لم تثبت الهبة بالشک فتکون
عاریة مجمع الانهر مایخصاً لیکن امام ابی یوسف بونک صحتنه
قائل اولمشدر خایه فی اول الهیه .

فقط موهوب ، ید موهوب لهده عاریت اوله جغندن
مذکور مالی دافع یا بعد وفاته وارثی استردار ایدم بیلور هدایه ۹
و عبدالحلیم .

بو ماده ده کی مضافه معلقه دن احتراز ایچون دکلدر . زیرا
ماله خطر الوجود والعدمه یعنی وجود بولمسنده بولماسنده
محتمل اولان شرطه معلق اوله رق هبه صحیح دکلدر . مال
موهوب کړک عین و کړک دین اولسون . کدخول زید و قدوم
خالد طحطاوی قال صاحب التمر اغیره هولک ان ادرك او قال
اذا کان غد فهو جائز هندیه فی الباب الثامن .

عینه مثال : فلان کیمسه شو خانیه کیرر ایسه یا فلان
شخص سفردن کلور ایسه شومالی سکا هبه ایتدم دیسه هبه صحیح
دکلدر عزمی زاده . امرأة قالت لزوجها ان متنت من مرضك
هذا فانت فی حل او قالت فهری عليك صدقة فهو باطل لانها
مخاطرة و تعلیق مریضة قالت لزوجها ان مت من مرض هذا
فهری عليك صدقة او فانت فی حل من مهری فماتت من ذلك

المرض فقولها باطل والمهر على الزوج هندية في الباب الثامن.
 دینه مثال : یارین کلدکده بنم سنده الهجتم اولان بیک
 غروش سنک اولسون یا آندن سن بری سین یا بر نصفی
 ویردیککده دیکر نصفدن بری سین یا دیکر نصفی سنک اولسون
 دیسه باطل اولور هندیه فی الباب الثامن . شو قدر وار که
 داین مدیوننه بن اولور ایسه سن دیندن بری سین یا دین
 سکا حلال اولسون دیسه صحیح ووصیته حمل اولنه جنی کبی
 شرط کائنه تعلیق ایدیلورسه تجیز اولور . شویله که داین
 مدیوننه بنم سنده الاجتم واریسه سن بری سین دیسه صحیح وایرانام
 اولور درمختار فی مسائل شتی .

اما هبه مضافه تعبیری عمرادن احتراز ایچوندور . زیرا عمری
 صحیح اولوب هبه مضافه دکلدر .

عمری ، بر کیسه دیکر کمسنهیه « شو خانه می سن حیاته
 اولدقه سکا ویردم وفاتکدنصکره بکا رد ایدلمک اوزره » یاخود
 « شو خانه می بن حیاته اولدقه سکا ویردم وفاتکدنصکره
 ورثه مه رد ایدلمک اوزره » دیمکدر . ایشته بروجه بالا وقوع
 بولان تملیک جائز اولوب موهوب له فوت اولسه دخی مال
 موهوب واهبه یا وارثه رد ایدلیوب موهوب لهک ورثه سنه
 انتقال ایدر درر . زیرا عمری ، معمر لهک وفاتکدنصکره
 استرداد شرطیله فی الحال تملیک اولدنی جهته تملیک صحیح
 و شرط باطل اولور . چونکه هبه شروط فاسده ایله باطل

اولیان عقود دندر . و الاصل فی هذا ان کل عقد من شرطه
القبض فان الشرط لا یفسد کالهبة و الرهن « ۸۳ » ماده
شرحنه باق زیلعی و ابوالسعود المصری و هندیه فی الباب الثامن .
نته کیم واهب فوت اولدقده مال موهوب، موهوب لهک
اولوب واهبک ورثه سنه رد ایدلنز درر .
عمری، عقارده اوله بیله چکی کبی منقولات و حیواناتده
دخی اوله بیلور عبدالحلیم .

ماده ۸۵۵

(عوض شرطیله اولان هبه) و صدقه (صحیح و شرط
معتبر در .) زیرا ۸۳ ماده حکمنجه بقدر الامکان شروطه
مراعات اولنق لازمدر . و الصدقة بشرط العوض بمنزلة
الهبة بشرط العوض هندیه فی الباب السابع .
ایضاح القيود

۱ عوض ، عوض لفظی بوراده مطلق اوله رق مذکور
اولغله آکلاشیلور که کړک حقیقه عوض اولسون . مجله نک
آتی الذکر ایکی مثالنده اولدینی کبی . و کړک حکما عوض
اولسون . برلکده سکنی و عدم تطلیق و ترک ظلم کییکه
بو ماده نک شرحی آخرنده ایضاح اولنور .

۲ شرطیله ، بونده کی شرطدن مقصد شرط تقييددن
« ۸۲ » ماده شرحنه باق . بونک تفصیلی شودر که هبه ده
شرط ذکر اولدقده مذکور شرط یا تعلیق اولور که بوده

ان ياخود ايسه کي الفاظ و ادات شرط ايله ذکر اولنور.
شو هبه باطلدر.

موهوب كرك عين اولسون . شويله كه برکيمسه برينه
ني اولنجه بسلا ايسه ياخود ني اولنجه كوروب كوزه در
ايسه سنك اولسون ياخود زوجه زوجه اولنجه بنمله حسن
معاشرت ايدر ايسه سنك اولسون ديو بر عقاری ویرسه
شو هبه باطلدر اتقروی و نتیجه .

و موهوب كرك دين اولسون . شويله كه مثلا خسته
بولنسان بر قادين زوجه اكر بو خسته لقدين فوت اولور
ايسه ذمتكده اولان شو قدر غروش مهرم سنك اولسون
ديو هبه ايلسه صحيح اولماز نتیجه . زیرا ۸۲ ماده شرحنده
ذكر اولنديني اوزره تمليكك شرطه تعلقي باطلدر : حتی
بوهبه ده عوض شرط ايدیلوبده عوض مشروط واهبه اعطاوتسليم
قلنسبه بيله هبه صحت منقأب اولماز فیضیه . «۵۲» ماده یه باق .
و مذکور شرط یا تقيیدی اولور كه شرط مذکور علی
کله سیله و اوزره و یا شرطیله عبارت سیله ذکر اولنور . شو
روبه یی بكا عوض ویرمك اوزره بومالی سكا هبه ایتدم یاخود
وهبتك هذا المال علی ان تعوضنی هذا الثوب دینلمك كبی درر .
شرط تقيیدی ايله هبه ایکی قسمدر .

قسم اول ، شرط مذکورك ملایم اولمسیدر . شو هبه و شرط
صحیحدر . مجله ده بیان اولنسان بودر . نته کیم امثله سی مجله ده
ذكر اولنور .

قسم ثانی، شرط مذکور مخالف یعنی غیر مالیم اولماید. بو
تقدیر ده هبه صحیح فقط شرط باطلدر. شروط فاسده ایله بیع، فاسد
ایکن هبه فاسد اولمور. زیرا شرط فاسد ربا معنا سنده اولوب
ربا ایسه معاوضانده جاری اولوب یوخسه هبه کبی تبرعانده
جاری اولماز. ولانه صلی الله تعالی علیه وسلم اجاز العمری وابطل
شرط المعمر فی رجوعها بعد موت المعمر له وجعلها میراثا لورثة
المعمر له عنایه .

بوجهته برکیمسه بر مالی دیگر کسنه هبه و تسلیم ایتسه
شو شرطیله که اوشخص مذکور مالی دیگر بر آدمه هبه و تسلیم
یاخود بیع ایده یاخود بیع ایتمه هبه صحیح و شرط باطل
اولور تنقیح وهندیه .

ینه بوجهته برکیمسه یری دخی ملک باغی اولنجه یه دک
محصولی کندی آلق یاخود خانه—نی اولنجه یه قدر کندوسی
ساکن اولق اوزره حفیدینه هبه و تسلیم ایتسه هبه صحیح
و شرط باطلدر علی افندی .

ینه بوجهته واهب هبه سندن رجوع اتمک شرطیله هبه
ایتسه هبه صحیح و شرط باطل اولدینی کبی برکیمسه بر مالی
دیگر کسنه هبه یا صدقه و تسلیم ایتسه شو شرطیله که مذکور
مالک ثانی یا ربی کبی بر مقدارینی کندوسنه کیر و ویره یعنی
رد ایده هبه و صدقه صحیح و شرط باطل اولوب او کسنه

مذکور مالدن هیچ بر مقدارینی رده یاخود بوکا بدل عوض
ویرمکه مجبور دکلدر .

ینه بوجهتله برکیمسه دیکر کسمنهیه برخانه هبه وتسایم
ایلسه شول شرطیله که مذکور خانه نک معین یاغیرمعین بر جزئی
عوض اولمق اوزره واهبه ویره هبه صحیح و شرط باطلدر هندیه .
عوض حقیقی یه مثالدر

۱ (مثلا برکیمسه شومقوله) یعنی معلوم (عوض ویرمک
یاخود کندوسنک معلوم المقدار دینی ادا ایتک شرطیله برینه
برشی هبه ایتدکده موهوبله اول شرطه رعایت ایدر ایسه)
یعنی مذکور عوضی ویرر یاخود اول دینی ادا ایلر ایسه هبه
(لازم) یعنی ۸۶۸ مادهده بیان اولندیغی اوزره آرتق شوهبه دن
رجوع ممتنع (اولور .) موهوبله کرک اجنبی اولسون وکرک
۸۶۶ مادهده محرر اقرار بدن بری بولنسون . لکن شوهبه نک لزومی
عوضینک تقابضیله اولوب یوخسه بیع کبی مجرد ایجاب و قبول
وتعهد عوض ایله دکلدر . « ۸۶۸ » مادهیه باق . یعنی واهب
عوض شرطیله برمالی هبه وتسایم ایدر و موهوبله دخی
او مالی قبض ایتدکدنصکره مشروط اولان عوضی واهبه
اعطا و تسلیم و اوده قبض و تسلیم ایلر ایسه ایکی جهتدن دخی
هبه لازم اولورده واهب موهوبی استرداد ایدمهیه چکی کبی
موهوبله دخی عوضی استرداد ایدمهز .

اما بدون التقابض هبه لازم اولماز . شویله که مثلا واهب ایله

موهوب له بوكا یعنی هبه و عوضه اتفاق اید و بدیه فقط موهوب له عوضی هنوز و اهبه تسلیم ایتماش اولنجه موهوب له عوضی تسلیم ایتمه که حاضر و مهیا بولنسه بیله شو هبه لازم اولیوب و اهب عوضی قبول ایتمه رك هبه سندن رجوعه مقتدر اولدینی کبی موهوب لهك عوضدن رجوعه صلاحیتی واردر. ولو که و اهب مال موهوبك تسلیم نه راضی بولنه. نته کیم برکیمسه شو مقوله اشیا عوض ویرمك اوزره آناسنه بعض اشیا هبه و تسلیم ایلدیکی حالده آناسی اشیا مذکوریه یی ویرمینجه اول کیمسه دخی هبه سندن رجوع ایدم بیلور علی افندی. بو وجهله موهوب له شرطه رعایت ایتمینجه و اهبك دخی هبه سندن حق رجوعی بولنمقله موهوب له مال موهوبی استهلاك ایتمش ایسه عوض مشروطی اعطا ایتسیله موهوب له امر اولنور. ویرر ایسه فها. ویرمز ایسه موهوب له استهلاك ایتمش اولدینی موهوبك بدلنی ضامن اولور. یوخسه موهوب له مال موهوبی استهلاك ایتسیله و اهبك حق رجوعی قالمدی دینلمز علی افندی و هندیه.

الحاصل، هبه بشرط العوضده عوض معلوم و علی کله سیله مذکور اولنجه لفظه نظرا ابتداء هبه و معناسنه نظرا انتهاء بیعدر. لانه اشتمل علی جهتین جهة الهبة لفظا و جهة الیبع معنی و امکان الجمع بینهما و کل ما اشتمل علی جهتین و امکان الجمع بینهما و جب اعمالهما لان اعمال الشبهین ولو بوجه اولی من اهل احد هما غایه مرض موده هبه کبی. بو هبه ابتداء

هبه اعتبار ایدلديکندن قبض لازم و شیوع مانع تمامیت غـد اولندی و انتهاء وصیت اعتبار ایدلديکندن بعدالدين ثلثدن معتبر قلندی ۸۷۷ ماده شرحنه باق . اما عوض با حریفـله ذکر اولنور ايسه مثلاً وهبتك هذا الثوب بمالك هذا يعنى شومالك مقابلنده بو روبه بي سكا هبه ايتـدم ديوب اوده قبول ايتسه عقد مذکور هبه اوليوب ابتداء و انتهاء بيعدر درر . « ۳ » ماده يه باق .

هبه بشرط العوضك ابتداء هبه اولمسی اوزرينه آتی الذکر بش مسئله تفرع ايدر شويـله که اولاً عوضينده تقابض شرطدر . يعنى مجلس هبه ده مطلقاً و مجلس هبه نك غيريسنده اذن صريح ايله قبض لازمدر . ته کیم ۸۳۷ ماده شرحنده تفصيل اولندی . ولايـثبت بها الملك قبل القبض ولكل واحد ان يمتنع من التسليم طحطاوی .

ثانياً قابل قسمت اولان ماله بشرط العوض هبه دخی شیوع ايله غير صحيح اولور . بو جهته قابل قسمت بولنان مشاعك بر قسمی بشرط العوض هبه ايتسه باطل اولور ابو السعود . یعنی قابل قسمت بولنان بر مالك نصفی بشرط العوض هبه ایدیلوبده مشاعاً تسلیم قلنسه هبه تمام اولمیه جنی کبی قابل قسمت بر مالك نصفی عوض ویرلسه تمام اولماز رد مختار و عبدالحلیم .

ثالثاً اب صغير ولدينك مالى بشرط العوض هبه ايتسه

امام اعظم و ابی یوسفه کوره جائز دکلدر. ای و لو كانت الهبة بعوض جاء للصبي قبل اويحصل بعد و ظاهره و لو العوض اكثر طحطاوى. چونكه ابتداء تبرع اولوب اب ايسه صغير ولدینك مالنی تبرع ایده من زیلعی. ۵۸۰ مادهیه باق.

رابعا خيار غبن و تغریر و قلت عوضدنطولانی هبه فسخ ایديله من رد مختار.

خامساً مقدار عوضده اختلاف اولنسه تحالف جاری اولماز نتهکیم لاحقه آتیهنك مبحث اولنده بیان اولنور.

انتهاء بیع اولمنسه آتی الذکر ایکی مسئله تفرع ایدر. شویله که اولابعدالتقباض عقد صحیح اولوب بیع حکمنده اولور. بناء علیه خيار عیب و خيار رؤیت ايله رد اولنسه بیلور. قوله فترد بالعیب ای فی العوض والمعوض و کذا خيار الرؤية و کذا الشفعة طحطاوى.

ثانيا عقار ايسه بالشفعة اخذ اولنور. ۱۰۲۲ مادهیه باق. اما عوض غیر معلوم یعنی مجهول اولنجه ابتداء هبه اولدینی کبی انتهاء دخی هبه اولور ابوالسعود و در مختار. زیرا مجهول عوض شرطی باطل اولوب شرط فاسد ايله ايسه هبه فاسد اولماز درر و عبدالحلیم. اذا وهبه بشرط ان يعوض شيئا فالشرط باطل و شرط العوض انما يصح اذا كان معلوما فتح. محشى الدرر عزمی زاده دیورکه دررک شو بیانی خانیده مذکور اولانه موافق ايسه ده حلوانینك «تعین ایدلیان عوض

شرطیله اولان هبه جائزدر. زیرا هبه عوض مجهولی اقتضا
ایدر وعوضده قول یعنی سوز معوضك یعنی موهوب له کدر،
دیو بیاننه مخالفدر انهی. شو مثال آتیده دخی عوض
مجهولدر زیرا نوقت اوله جکی معلوم اولمدیگی کبی نه صورتله
ونه اطعام واکسا ایله بسلنه جکی معلوم دکدر.

۲) كذلك بر کیمسه اولنجه کندوسنی بسلامك
شرطیله ملك عقارینی) یا منقول مالی) برینه هبه و تسام
ایتدکده موهوب له شرط مذکور اوزره واهی) بر مدت
بسلد کندنصرکه بعد ذلك دخی) بسلامکه راضی ایکن واهب
نادم اولوبده هبه سندن رجوع ایله اول عقارینی استرداد
ایده مز) بو وجهله اولان هبه ده موهوب له بر مدت
بسلدکن صکره واهب فوت اولسه وارثی مال موهوبه
مداخله ایده مز. نته کیم موهوب له شرط مذکور اوزره
واهی بسلرکن واهب فوت اولوب وارثی اولسه امین
بیت المال اول عقاره مداخله ایده مز نتیجه. فقط بسلامکه
راضی اولماز یعنی بسلامکدن امتناع ایدر ایسه واهبک
موهوبی استرداد حقی واردر. بو جهتله واهب بر حیات
ایکن موهوب له بو ملکی آخره هبه و بیع کبی بر وجهله
ملکندن اخراج ایده مز. زیرا هنوز موهوب له بوکا قطعیا
مالك و واهبک حقی منقطع اولماشدر.

اما موهوب له واهی بوجه مشروط بر مدت بسلد کندنصرکه

واهب هنوز بر حیات ایکن کندوسی یعنی موهوب له فوت اولسه حکم نصیله در؟ بوکا دأر کتب فقهیه ده صراحت بولنه میوب فقط موهوب له مشروط عوضك تمامنی واهبه ایفا ایده مامش یعنی واهی اولنجه به قدر بسله مامش و بسلمك امکائی دخی قلامش و بناء علیه به هنوز لازم اولماشدر که بونك نظیری اولق اوزره ایکی مسئله یی ذکر ایده لم.

مسئله اولی، بر کیمسه اون آلتون عوض ویرمك اوزره ملك خانه سنی دیگر کمسنه به و تسلیم ایدوبده موهوب له یالکتر آلتی آلتونی و یروب باقیسنی ویرمه و ویرمکن امتناع ایتسه واهب آلدینی آلتی آلتونی موهوب له رد ایدرک خانه سنی استرداد ایده بیلور. نته کیم ۸۶۸ ماده شرحنده ایضاح اولنجه غنی اوزره بعض عوض بالاستحقاق ضبط اولندقد موهوب له باقی عوضی واهبه ردایله موهوبی استرداد ایده بیله جکی کی.

مسئله ثانیه، زوجه کندوسنی دائره زوجیتده طوتوب فلان وقته قدر بوشاماق شرطیله مهرینی زوجه به ایتدیکی حالده زوج آنی اول وقتدن اول تطلیق ایتسه به باطل اولور. اما امساك وعدم تطلیق ایچون وقت بیان ایدلماش ایسه برمدت امساك د نصکره بوشاسه به لازم اولور انقروی فقیل اذا لم توقت لذلك وقتا كان قصدها ان یمسكها معاش قال نعم الا ان العبرة لاطلاق اللفظ هندیه فی الباب الثامن.

ایمدی موهوبله واهی بر مدت بسلدکن صکره
موهوب لهك فوتی حالنده کی مسئله ایچون ایکی احتمال
خاطره کلور .

۱ مارالذکر ایکی مسئله قیاسا واهب، متوفی موهوبله
طرفدن بسلندیکی مدتك نفقه مثانی ورثیه ضامن اوله رق
مال موهوبی ورثه دن استرداد ایدر . یوخسه موهوب لهك
ورثه سنك وموهوب لهك اصلا وارثی اولمدیغی حالده
بیت المالك اول عقاری مجانا ضبط ایدرك واهی محروم
براقق جائز دکلدر .

۲ متوفانك ورثه سی مورثمذك تعهدی وجهله سنی
الی الوفات بسلیوب مال موهوبی ارثا بزضبط ایدرك سکا
رد ایتیه جکز دیملریدر . فقط موهوب لهك ورثه سیله واهب
آره سنده بسلمك شرط ومقاوله سی وعقد هبه سبق ایتدیکی
جهتله بیلرلنده بر کونه حق دعوی وخصومت اوله ماز .
نته کیم اون عدد سیم مجیدیه عوض ویرمك شرطیله برآت
هبه وتسليم ایدیلوبده موهوبله دخی بش مجیدیه سنی بشین
اوله رق ویروب متباقیسنی اوچکونصکره ویرمك اوزره
استمهال ایلمشیکن ایکنجی کون فوت اولسه موهوب لهك
وارثی باقی بش مجیدیه یی دخی ویره رك واهب راضی دکل
ایکن آتی ضبط ایتمه کی حق اوله ماز . بناء علیه بوایکنجی احتمال
اعتباردن ساقط و اولکی احتمال عدالت وفقه موافقدر .

واقعا آتی الذکر لاحقہ نک مبحث ثانی سنده ذکر اولہ جنی اوزرہ
بسلمک شرطیلہ اراضی امیریہ و مستغلات و مستغلات موقوفہ نک
مجانا فراغی حالندہ مفروغہ فوت اولجہ ورثہ سنک فارغی
بسلمک حقنی جائز بولند قلمی درکار ایسده بو مسئلہ
شرعیہ نک شوکا قیاسی جائز دکدر.

آنفا شرحا ایضاح اولندی اوزرہ هبه بشرط العوض
لزومی تقابض ایله اولور. شوکا کوره مثال مذکورده یعنی
بر کیمسه اولجہ کندوسنی بسلمک شرطیلہ ملک عقاری
برینه هبه و تسامیم ایتدکده موهوب له هنوز واهبی بسلمش
دکل ایکن بسلمکه راضی اولسه بیله واهبک حق رجوعی اولور.
بناءً علیه شرحا « بر مدت بسلمد کندنصره » قیدی علاوه
اولندی. واقعا موهوب له بر مدت بسلمش اولسه مدت
مذکورده اولان بسلمسی عوض مقبوض اولمش اولہ جنی
جهتله بعد ازین دخی بسلمکه یعنی مقسطا و تدریجاً ایفاسی مشروط
اولان عوضی اعطایه راضی اولنجہ واهب هبه سندن رجوع ایدہ منکه
شیخ الاسلام علی افندی نک شو مسئلہ ایچون ویردیکی فتواده
دخی قید مذکور موجود بولمشدر.

مثالده « بسلمکه راضی ایکن » دنیلدی. زیرا بر مدت
بسلمد کندنصره بسلمکدن امتناع ایتسه واهب مال موهوبی
موجود ایسه عینا استرداد ایدہ بیلور. و مستهلك ایسه بدلای
تضمین ایتدیره بیلور. یوخسه بسلمکه اجبار ایدیلہ من. زیرا

هبه تبرع اولوب حالبوکه تبرعه اجبار جائز دکلدر .

عوض حکمی

عوض حکمی شرطیله اولان هبه دخی صحیح و شرط معتبردر . عوض حکمی عدم تطلیق و ترک ظلم و برلکده سکنی کبی شیردر . شویله که برقادین زوجی کندوسنی حجه کوتورمک و یا کندوسنه احسان و یا خود سنهده ایکی دفعه روبه دیکمک شرطیله زوجنه مهرینی هبه ایتسه بوده یعنی نفقه حج ايله احسان و قطع ثوب شرط عوض منزلده اولدینی کبی بعض مشایخ برقادین، زوجی کندوسنه ترک ظلم ایتک یا خود زوجی کندوسیله برلکده ساکن اولمق یا خود بوشامامق شرطیله مهرینی هبه ایتسه بوده بشرط العوض هبه حکمنده اولمغله زوج ، زوجهنه ظلم ایتسه یا خود آنکله برلکده اقامت ایتسه هبه ناک بطلاننه حکم ایتشیردر . ترک ظلم ايله برلکده سکنی حقیقه عوض دکلسهده فی الجملة عوضه مشابتهی وارد . چونکه بونلر ايله زوجه انتفاع ایدر ابوالسعود المصری . نته کیم زوجه مهرینی زوجنه کندوسنی ضرب ایتامک و ظلم ایلماک اوزره هبه ایدوبده موخر ازوج زوجهنه ظلم ایتسه مهری حاليله قاله جنی کبی بغیر حق ضرب ایتسه مهری ینه حاليله قالور وان ضربها لتأدیب مستحق علیها لایعود المهر هنديه فی الباب الثامن .

زوجه ، زوجی کندوسیچون هر سنه ایکی دفعه روبه قطع ایتک شرطیله مهرینی زوجنه هبه ایدوب زوج دخی قبول

ایلمش ایکن ایکی سنه کچدیکی حالدہ روبہ بی قطع ایتسه شرط مذکور ہبہ دہ مشروط اولنجہ مہری علی حالہ قالور . زیرا بو ہبہ ، ہبہ بشرط العوض منزلندہ اولمغلاہ عوض حاصل اولمینجہ ہبہ دخی صحیح اولماز انقروی .

عوضك جهالتی ہبہ دہ مضر اولمدیغنی بو مسئلہ دلالت ایدر . نتہ کیم عزمی زادہ دن بالادہ نقل ایدلدی و کذا لو هبت مهرها علی ان یحسن الیها ولم یحسن كانت الهبة باطلة وتكون بمنزلة الهبة بشرط العوض خایہ فی فصل فی ہبۃ المرأة مهرها من الزوج .

لاحقہ

بش مبحثی حاویدر .

مبحث اول

واهب ایلہ موہوب لہ بینندہ کی

بعض اختلافاتہ دائردر

۱ مسئلہ ، واهب ایلہ موہوب لہ ہبہ نک بشرط العوض . وقوعندہ اتفاق ایتلمریلہ برابر مقدار عوضدہ اختلاف ایتسہ لر یعنی واهب عوض مثلاً اون آلتون ایدی و موہوب لہ بش آلتون ایدی دیدکلرندہ مال موہوب قائم و عوض غیر مقبوض اولنجہ واهب بخیردر . دیلر سہ بش آلتون عوضی قبول ایدر . دیلر سہ ہبہ سندن رجوع ایلر . اما موہوب تلف اولمش اولنجہ واهب موہوبک قیمتی موہوب لہ تضمین ایتدیرر .

۲ مسئله ، واهب ايله موهوب له اصل عوضده اختلاف ايتسه لر يعنى واهب عوض مشروط ايدى و موهوب له مشروط دكل ايدى ديو اختلاف ايتدكرنده سوز منكر بولنان موهوب ايهكدر . بوحالده واهب دخى مال موهوب موجود ايسه رجوع ايدر . مستهلك ايسه موهوب ليه بر شى لازم كلز . « ۸۷۱ » ماده يه باق .

۳ مسئله ، واهب هبه سندن رجوع ايتك استمكه موهوب له بن سنك برادر ك ايم ياخود سكا عوض ويردم ياخود او مال هبه دكل صدقه اوله رق ويردك بناء عليه ۸۶۶ و ۸۶۸ و ۸۷۴ ماده لر احكامنجه رجوع اولنه ماز ديسه سوز استحسانا واهبكدر ابوالسعود المصرى .

۴ مسئله ، بر كيمسه ، برمالى ديكر كمسنه يه هبه ايتدكدن صكره هبه يي انكار ايله وديعه اوله رق ويرديكنى ادعا ايتسه سوز مع الين واهبك اولوب واهب يمين ايدر ايسه موهوبى اخذ ايدر . و موهوب يد موهوب ليه تلف اولمش ايسه نظر اولنور . تلف اوليشى قبل دعوى الهبه ايسه ضمان لازم كليوب فقط بعد دعوى الهبه ايسه مستودع ضامن اولور هنديه فى الباب التاسع .

مبحث ثانى

هبيه متعلق بعض شهادت لره دائر در

۵ مسئله ، واهب ۸۴۶ ماده وجهله برمالى مستودعه هبه

ایشد کدنصکره هبه بی انکار ایتکه ایکی شاهد بوکا شهادت ایتسه لر فقط قبضی کورد کلرینه شهادت ایتسه لر جائز اولور. ۸۴۶۰ ماده شرحه باق . نته کیم واهب وقت هبه ده موهوب مستودع مرقوم یدنده بولندیغی انکار ایدوبده شاهد لر هبه یه بالشهادت قبضی کورد کلرینه ویا واهب قبضی اقرار ایلدیکنه شهادت ایتسه لر فقط موهوب وقت مخاصمه ده واهب یدنده بولنسه ینه جائزدر. اگر واهب بر حیات ایسه . « ۵ و ۱۰ » ماده لره باق. اما واهب فوت اولمش ایسه شهادت مذکوره باطلدر هندیه .

۶ مسئله ، بر کیمسه یدنده بولنان بر مال ایچون دیگر کمنه مذکور مالی اول کیمسه بکا هبه و تسلیم ایتشیدی دیو دعوی و اول کیمسه انکار ایتکه اقامه اولنان شاهد لر واهبک هبه و قبضی اقرار ایلدیکنه شهادت ایتسه لر قبول اولنوز . اما شواختلاف بین الشاهدین وقوع بولسه رد شهادتی موجب اولور . شویله که مثلا شاهد لرک بر یسی هبه و تسلیمی کوردیکنه دیگریده واهب هبه و تسلیمی اقرار ایلدیکنه شهادت ایتسه قبول اولنه ماز نته کیم مذکور مال حین دعوا ده موهوب له یدنده بولند قدیه شاهد لر واهبک اقرار بالقبضنه شهادت ایتسه لر قبول اولنه جفی کی هندیه فی الباب التاسع من الهیه .

مبحث ثالث

خیار شرط ایله هبه و برائت حقننده در .

۷ مسئله ، موهوب له شو قدر کون مخیر اولق اوزره

واهب بر مالی هبه ایتدکده قبل الافتراق اجازت ویرنجه هبه
جائز اولوب اما اجازت ویرمدین افتراق ایدرلر ایسه هبه جائز
اولماز. لیکن واهب شو قدر کون مخیر اولمق اوزره هبه
ایتدکده هبه صحیح و شرط باطلدر. زیرا هبه عقد لازم
اولمديغندن ۸۶۴ مادهیه باقی آنده خیار شرط صحیح دکلدر.
نته کیم بیوع شرحنده خیار شرط فصلنده ذکر اولنشییدی.
فقط ذی رحم محرمه و احد زوجینه هبه ایله هبه بشرط
العوض و صدقه لازم اولمغله بوهبه لرده واهب کندوسی ایچون
خیاری شرط ایتسه صحیح اولورمی؟

برائتده دخی حکم بویله در. شویله که مثلاً بر کیمسه دیگر
کمنهیه شو قدر کون مخیر اولم اوزره سنده کی فلان حقمندن
سنی ابرا ایتدم دیسه خیار باطل و برائت صحیح اولور هنده
فی الباب الثامن.

مبحث رابع

بسلمك شرطيله هبه نك نظيرينك

اراضی امیریه ایله مسقفات و مستغلات

وقفیه ده جریاننه دائر در.

۸ مسئله، بر کیمسه اراضی امیریه دن طابو ایله تصرفنده
اولان یری اولنجه یه دك کندوی بسلمك شرطيله فراغ ایلسه
فراغ صحیح و شرط معتبر در. بعد الفراغ مفروغ له شرط
مذکور اوزره فارغی بسلمه که راضی ایکن فارغ فراغنه نادم

اولوبده اول یری مفروغ لهدن استرداد ایده من . فقط شرط مذکور اوزره کندوسنی بسلمدیکنی مفروغ لهک انکارینه مقارن فارغ ادعا ایدرک مفروغ بهی مفروغ لهدن استرداد ایتک مراد ایلسه حقیقت حال ارباب وقوفدن تحقیق واستخبار ایدیلهرک فارغک ادعاسی مقارن صحت اولدینی عائد اولدینی محکمه ده بالحا که تبین ایدرایسه مفروغ به فارغه رد اولنور . مفروغ له فارغدن اول وفات ایدرسه مفروغ لهک اصحاب انتقالدن اولان ورثه سی دخی فارغی الی الوفات بسملرلر . بسلمدکری حالده فارغک مفروغ بهی ورثه دن استرداد صلاحیتی اوله جقدر . مفروغ له اصحاب انتقالدن اصلا وارثی اولمدینی حالده وفات ایدرسه مفروغ به آخره تفویض اولنمیوب آکا کالاول فارغ متصرف اولور . فارغ وفات ایتدکجه کرک مفروغ له وکرک مفروغ لهک اصحاب انتقالدن اولان ورثه سی مفروغ بهی آخره فراغ ایده من . بعدما شرط مذکور ایله وقوعبوله جق فراغلر قبول وشرط مذکور سنداته درج اولنه جقدر . سندده مندرج اولیان شرط دعواسنی حکام استماعدن ممنوعدر . فی ۱۸ صفر سنه ۳۰۶ و فی ۱۲ تشرین اول سنه ۳۴۰

۹ مسئله ، برکیمسه اجارتین ایله تصرفنده اولان بروقف عقاری اولنجهیه کندویی بسلمک شرطیله فراغ ایلسه فراغ صحیح وشرط معتبردر . بعد الفراغ مفروغ له شرط مذکور اوزره فارغی بسلمکه راضی ایکن فارغ نادم اولوبده اول عقاری

مفروغ لهدن استرداد ایده مز . فقط شرط مذکور موجبینجه
 کندوسی بسلمدیکنی مفروغ لهک انکارینه مقارن فارغ ادعا
 ایدرک مفروغ بهی مفروغ لهدن استرداد ایتک مراد ایلسه
 حقیقت حال ارباب وقوفدن تحقیق واستخبار ایدیله رک فارغک
 ادعاسی مقارن صحت اولدیغی عائد اولدیغی محکمه ده بالحا که تبین
 ایدرایسه مفروغ به فارغه رد اولور . مفروغ له فارغدن اول
 وفات ایدرایسه مفروغ لهک اصحاب انتقالدن اولان ورثه سی
 فارغی الی الوفات بسلمدکلی حالده فارغک مفروغ بهی
 ورثه دن استرداد صلاحیتی اوله جقدر . مفروغ له اصحاب انتقالدن
 اصلا وارثی اولدیغی حالده وفات ایدر ایسه مفروغ به آخره
 تفویض اولنمیوب آکا کالاول فارغ متصرف اولور . فارغ وفات
 ایتدکجه کک مفروغ له وکک مفروغ لهک اصحاب انتقالدن
 اولان ورثه سی مفروغ بهی فراغ ایده مز . بعدما شروط
 مذکوره ایله وقوعبوله جق فراغ قبول و شرط مذکورسنداته
 درج اولنه جقدر . سندده مندرج اولیان شرط دعواسی حکام
 استماعدن ممنوعدر .

مبحث خامس

موهوبدن استثنایه دائر

۱۰ مسئله ، منفرداً هبه سی جائز اولان شیئک موهوبدن
 استثناسی دخی جائزدر . شویله که مثلاً واهب بر آغاجک میوه سندن
 شو قدر قیه سی کندوسنه قالمق اوزره باقیسنی هبه ایدرک آغاجدن

طوپلامغه اذن ویرسه صحیح اولور. ۲۱۹۰ مادهیه باق. فقط منفرداً هبه سی جائز اولمیان شیئک موهو بدن استثناسی جائز دکلدر. یعنی استثنا باطل و هبه جمله سنده صحیح اولور. شویله که مثلاً واهب شو قصر اعک حملی یعنی قارنده کی جنینی کندوسنه قالمق اوزره قصر اغنی هبه و تسلیم ایتسه هم قصر اق هم ده یاورو موهوب لهک اولور. زیرا استثنا انجق ایراد عقد ممکن اولان محله اوله بیلوب عقد هبه ایسه وصف قبیلندن اولان حمل اوزرینه مقصودا وارد اوله میه جغندن استثنای واقع مقتضای عقده مخالف شرط فاسد قبیلندن اولوب شرط فاسدایله ایسه هبه باطل اولماز عنایه .

﴿ فصل ثانی ﴾

﴿ شرائط هبه بیاننده در . ﴾

بونده هبه نک هم شرائط صحتی همده شرائط نفاذی بیان اولنه جقدر که شرائط مذکوره اوچ قسمدر .

قسم اول ، نفس رکنه	} راجع اولوب هر بری بروجه آتی بیان اولنور :
قسم ثانی ، واهبه	
قسم ثالث ، موهوبه	

قسم اول ، هبه ماله خطر الوجود والعدمه معلق و بروقته مضاف اولماق لازمدر که ۸۵۴ مادهده متنا و شرحا بیان اولنمشدر .

قسم ثانی ، واهبك هبه يه اهل يعنى واهب حر وعاقل
اولميسيدر كه ۸۵۹ ماده ده ذكر اولنيور هندية .

قسم ثالث ، بش نوعدر . نوع اول ، موهوبك موجود
اولميسيدر كه آتى الذ كر ۸۵۶ ماده ده بيان اولنيور .

نوع ثانی ، موهوبك مال متقوم اولميسيدر . بناء عليه حر
اولان بنى آدم ولاشه كې اصلا مال اولميان شيئك هبه سى
جائز دكلدر .

نوع ثالث ، موهوبك مملوك اولميسيدر . بناء عليه مباحاتك
تمليكى جائز دكلدر . «۸۳۳» ماده شرحه باق هندية .

نوع رابع ، موهوبك مقبوض اولميسيدر كه ۸۳۷ و ۸۶۱
ماده لرده بيان اولنيور .

نوع خامس ، قابل قسمت اولان موهوبك مقسوم ومال
موهوبك غير موهوبدن متميز بولمى ومتصل وغير موهوبله
مشـ غول بولنامسى لازمدر كه ۸۵۸ ماده شرحنده كى لاحقه ده
تفصيل اولنيور هندية .

ماده ۸۵۶

(موهوبك وقت هبه ده موجود اولمى) تحت هبه ده
(شرطدر) . زيرا معدوم اولان شى ملكه محل اولماغله آنك
عقد ايله تمليكى محال اولديغى جهتله هبه مذكوره باطلدر زيلى .
حتى وجود بولايغنده قبضه اذن ورخصت و يرلسه وبعد الوجود قبض
ايدلسه بيله صحته منقلب اولماز . «۵۲» ماده يه باق . نته كيم بيعده

دخی حکم بروجہ مشروح ایدوکی « ۱۹۷ و ۲۰۵ » مادہ لردہ مذکور در.

(بناءً علی ذلک بر باغک حاصل اوله جق اوزومی یاخود بر قصر اغک) یاخود شو قیونک بوسنه (طوغه جق یاورینی هبه) یاخود حامل بولنان قصر اغک قارنده کی یاورینی هبه و عند الولاده قبضه تسلیط و بلکه ده بعد الولاده هبه مذکور هیه بناء تسلیم ایتسه بیله (صحیح دکلدر) یعنی باطلدر. زیرا حملک وجودنده احتمال و شک بولندیغنه مبنی معدوم حکمنده در ابوالسعود المصری. ایضاحات سالفه دن آکلاشیلور که متن مجله ده کی « طوغه جق یاورینی » تعیرینک « اول قصر اق مذکور یاورینی هیه وقت هبه ده کرک حامل اولسون و کرک اولسون » دیو تعمیمی صحیح اولور مجمع الانهر.

نته کیم بر کیمسه بر الماس ایکنه پی غائب ایدوبده آنی بر کسنه یه هبه و قبضه تسلیط و آرامغه مأذون ایتسه ده اوده طلب و قبض ایتسه هبه باطلدر. زیرا وقت طلبنده وجودنده خطر وارد در ابوالسعود.

کذلک شوسوتدن بعده حاصل اوله جق یاغی یا شو بغدایدن یا بیله جق اونی یا شو سیدسامدن چیقاریله جق یاغی هبه و یاغ و اونک وقت حدوئنده قبضه تسلیط ایلسه و حتی بعد الحدوث هبه سابقه یه بنا تسلیم ایتسه بیله سخته منقلب اولماز. زیرا بونلر معدوم اولوب آنجق طحن و عصر ایله وجود بولور. واقعا

بونلرده بالقوه وجود وار ایسهده بالقوه وجود عامه ممکناتده وار ایکن بونلره موجود اطلاق اولنماز عنایه . هر نه قدر بونلره وصیت جائز ایسهده بوجواز معدومک وصیتی صحیح اولمسنه مبنیدر زیایه .

معدومک هبه سی بالاده ایضاح اولندیغی اوزره باطل ایسهده معدوم وجود بولدقن صکره عقد هبه تجدید قیلنسه هبه صحیح اوله جغنه شبهه یوقدر هدایه .

وبرده شوقویون صر تنده کی یوکی ویر اوزرنده کی اکینی وآج اوزرنده کی اثماری وممهده کی سوتی هبه « هبه مشاع » منزله اوله رق بعده مثلاً یوکی قرقره رق تسلیم ایتدکده هبه تمام اولور . زیرا امتناع جواز اتصالدن طولای اولوب بوایسه شایعه اولدیغی کبی قبض کاملی منع ایدر هدایه . یعنی مثلاً سوت صاعیلوب تسلیم اولنجه قبض کاملده حاصل وموهوب لهک واهبک اذنیله فصل ایتسی کافی اولور ابوالسعود و هدایه . کرچه خور ماده کی چکر دکک بیعی جائز اولیوب حتی بعد البیع چکر دک اخراج و تسلیم ایدلسه بیله بیع صحته منقلب اولیوب بیع جدید لازم اولدیغنه کوره ممده کی سوتک هبه سی دخی جائز اولماق اقتضا ایدر ایسهده هبه عقد تبرع و آنده موهوبک بالفعل وجودی کافی اولوب بالفعل موهوبک تعینی اقتضا ایلمز ایکن بیع عقد معاوضه و انعقادنده تسلیمه قدرت لازم اولور سعدی چلبی . وانما جاز فی الابن وان کان فی وجوده شک لانه

قد يكون ربحاً اود مالتزجج جانب الوجود بالتصرف فيه فانه بانفصاله يتقن وجوده بخلاف هبة الحمل فانه لا يصح ولو سلمه بعد الولادة لعدم امكان التصرف وقت الهبة طحطاوى .

ماده ۸۵۷

(موهوب ، واهبك مالى اولمق) هبه نك نافذ اولمسندہ (شرطدر) نته كيم بيعده شرط اولدينى كى . ۳۶۵۰ و ۳۷۸ ماده لره باق . بو صورتده موهوب واهبك مالى دكل ايسه هبه صحيح اولماز . ۹۶۰ ماده يه باق .

موهوب واهبك مالى اولماسى اوج وجهله اوله بيلور . وجه اول ، متيه ودم مفسوح كى هييج مال اولماقله و خمر و خنزير كى مال مقوم بولنماقله اولور . بناء عليه بر كيمسه لاشه يي ديكر كسنه يه هبه و تسليم ايتسه باطل اولور . ايمدى بونلك هبه سى باطل اولدينى كى بونلرى هبه يه عوض ويرمك دخى باطلدر . نته كيم مسلم ايله غير مسلم آره سنده خمر و خنزير ايله معاوضه دخى جائز دكلدر خمرى عوض ويرن كرك مسلم و كرك غير مسلم اولسون لكن ايكي غير مسلم آره سنده خمر و خنزير ايله معاوضه جائزدر هنديه فى الباب الحادى عشر . بو صورتده غير مسلم مسلمه بر مال هبه ايدوبده مسلم دخى عوض اوله رق خمرى ويرسه واهب هبه سندن رجوع ايدوبيلور من المحل المزبور . وجه ثانى ، موهوب ، موهوب لهك مالى اولمقله اولور . شويله كه مثلاً بر كيمسه ديكر كسنه يه اودنج يا خود بر عمل مقابلنده

اجرت اوله رق پاره و یرو بده مذکور پاره هنوز او کمنه یدنده
عینا موجود اولمغله اول کیمسه مذکور پاره یی او کمنه یه هبه
ایتسه صحیح اولماز. حتی بوهبه سندن رجوع ایدرک اول پاره یی
استرداد ایده من قاعده یه.

وجه ثالث، شخص اجنبینک مالی اولمغله اولور که بوجه آتی
تفریع ایدی لان ایشته بودر.

(بناء علیه بر کیمسه بلاذن) صاحب المال (بشقه سنک)
ولو که بو بشقه واهبک زوجہ سی ویا صغیر ویا کبیر اوغلی اوله
(مالی هبه) و تسلیم (ایتسه صحیح) یعنی نافذ (اولماز). ۹۶
ماده یه باق. زیرا بر کیمسه نک مالک اولمدینی شیئی تملیک ایتسی
محالدر هندیه.

بو جهتله بر کیمسه زوجہ سنک اشیاسنی آنک اذنسنز
دیگر بر شخصه هبه و تسلیم ایتدکده زوجہ من بوره شو هبه یی
مجیزه اولمیوب اشیای مرقومه یی موهوب لهدن استرداد ایده بیلور.
ینه بو جهتله اب، ابننک مالی آنک اذنسنز دیگرینه هبه و تسلیم
ایتسه ابن مرقوم مجیز اولمینجه استرداد ایدر هامش بهجه.

و بو ایکی هبه ده مال موهوب له یدنده تلف اولنجه مال
صاحبی کرک واهبه و کرک موهوب له تضمین ایتدیره بیلور.
ینه بو جهتله داین بر کمنه ده کی آلاجنفی آلق اوزره
کندوسنک داینی بولنان بر شخصی او کمنه اوزرینه حواله
مقیده ایله حواله ایتدکد نصکره شخص مرقوم مذکور آلاجنفی

او مدیوندن هنوز آلمدین داین مرقوم ، مبالغ مذکورنی
او کمنهیه هبه ایتسه صحیح وحواله باطل اولماز اقروی
و ولوالجیه. ۶۹۲، مادهیه باق.

(فقط) بشقه سنك مالی صاحبك ابتداء اذنیله یعنی
طرفندن بالو کاله هبه ایتك ۱۴۶۰ مادهده مصرح اولدینی اوزره
صحیح اولدینی کبی بلا اذن (هبه ایتدکنصکره صاحبی مجیز
اولسه) هبه (صحیح) یعنی نافذ (اولور) زیرا ۱۴۵۳ مادهده
مذکور اولدینی اوزره اجازت لاحقه وکالت سابقه حکمندهدر .
بیعده اولدینی کبی. « ۳۷۸ » مادهیه باق . لیکن وقت اجازته
بیعده اولدینی مثلاً واهبک و موهوب لهک و مجیزک و مال
موهوبک قیامی شرطدر .

مجله ۱۰۶ مادهده صحیح لفظی نافذه مقابل و ۱۰۸ مادهده
لفظ مذکور نافذه دخی شامل معناده استعمال ایتدیکی حالده
بوراده یالکیز نافذ معناسنده قوللالمشدر .

شو اجازت ایله منعقد و نافذ اولان هبه ، مال صاحبی
یعنی مجیز طرفندن واقع اولور . نتهکیم مأمور بالهبه کندی
مالندن هبه ایتسه اشبو هبه آمر طرفندن واقع اولهجنی قریبا
ایضاح اولنور .

بناءعلیه موهوبله ، واهبه یعنی فضولا هبه ایدن کیمسهیه
عوض ویرسه یاخود موهوبله ایله واهب آرمسنده « ۸۶۶ »
مادهده محرر اولوب مانع رجوع اولان قرابت بولنسه بیله

مال صاحبی شو به بدن رجوع ایده بیلور قنیه. بالعکس مو هوب له،
مال صاحبیه عوض ویرسه یا خود مو هوب له ایله مال صاحبی
پینده مارالذکر ۸۶۶ ماده ده محرر قرابت بولنسه رجوع
ایده منر هندیه .

استثنا

۱ مسئله، زوجه زوجنك خانه سندن اتمك پارچه سی کی یسیر
برشی تصدق ایتیمده باس یوقدر بزازیه.

۲ مسئله، برکیمسه دیگر کسمیه یه فلان شخصه بنم طرفندن بیک
غروش هبه ایت دیو امر ایتسمیله اوده هبه ایتسه شو بهه آمر
یعنی اول کیمسه طرفندن واقع اولور. حالبوکه واهب عداولنان
آمر او ماله مالک دکل ایدی. مأمور، آمره مراجعت ایده.
میجکی کی مو هوب لهدن دخی مال مو هوبی استرداد ایده منر.
اما آمر مانع رجوع اولمدیغی حالده شو بهه بدن بالرجوع
مبلغ مذکوری شخص مرقومدن استرداد ایده بیلور. فقط
«فلان شخصه بیک غروش هبه ایت بن ضامن اولم اوزره، دیو
امر ایدوبده اوده هبه ایتسه شو بهه ینه آمر طرفندن واقع
اوله رق مانع رجوع اولمدیغی تقدیرده آمرک هبه دن حق
رجوعی اولور. اما مأمورک هبه مذکورده دن حق رجوعی
یوغیسه ده مأمور هبه ایتدیکی مبلغ ایله آمره مراجعت ایدر بحر.

❧ ماده ۸۵۸ ❧

(مو هوبك) یعنی عین اولان مال مو هوبك (معلوم ومعین)

اولسی لازمدر.) موهوبله کړک صغیر اولسون وکړک کیر
 اولسون. زیرا مجهولک تملیکی صحیح دکلدر تکمله رد مختار.
 (بناء علیه واهب) ۱ (لأعلى التعین) بو لأعلى التعین دیسه
 قولنک مقولی جمله سندن عدایدلک جائز اولدینی کبی ایدلامک
 دخی صحیحدر (مالدن برشی) یامالک اولدیغ اشیا مک بر مقدارینی
 ۲ (باخود شو ایکی آتدن برینی هبه ایتدم دیسه) هبه (صحیح
 اولماز.) زیرا صورت اولیده موهوب معلوم اولمدینی کبی
 صورت ثانیه ده دخی معین دکلدر.

مثلا بر کیمسه ترکده کی حصه ارثیه سی نقدر ایدوکی
 یعنی کندوسنه مقدار مال اصابت ایلدیکی معلوم دکل ایکن
 ورثه سائرهن برینه هبه ایتسه صحیح اولیه جنی کبی بر کیمسه
 مالک اولدیغ اشیا مک بر مقدارینی صغیر اوغلمه هبه ایتدم
 دیوب لکن هبه ایتدیکی اشیا بی تعیین و اعلام ایللمسه صحیح
 اولماز تنقیح و علی افندی.

معلوم اولق شرطی واهبه نظرا در. بناء علیه واهب
 شو مالدن کندوسنجه مقداری معلوم حصه سنی هبه ایتدکه
 موهوبله مذکور مالده واهبک حصه سی نقدر بولندیغی
 بیللمسه بیله هبه نک صحیح اوله جنی بزازیه ده ذکر اولنمشدر.
 فقط ولوالجیه ده دنیلورکه واهب شو آتدن نصیبی هبه ایتدم

دیوبده موهوب له اول نصیبك مقـدارینی بیـللمسه موهوب
مجهول اولغله هبه جائز اولماز اتمی بتغیرما.

«وبو ایکی آتدن قنغیسنی دیلرسهك سنك اولسون دیدیکی
صورتده اکر موهوب له مجلس هبه ده آلدن برینی تعیین» و قبض
«ایلرایسه صحیح اولور.» زیراسنك اولسون دیمك هبه ایتدم سنك
اولسون دیمك یعنی بطریق الاقتضا ایجاب اولدینی کبی موهوب لهك
دخی تعیین و قبض ایلمسی ۸۴۱ ماده موجبنجه قبولدر . بو
صورتده کی جهالتك مانع اولماسی سینه کلنجه مجلس طاغیله رق
فساد تا کد ایتدین اول سبب فساد زائل اولغله ممنوع اولان
صحت دخی عودت ایدر . « ۲۴ » ماده یه باق . لان ارتفاع
الجهالة فی المجلس بمنزلة البیان وقت العقد خانیه فی اوائل الهبة .
« اما مجلس هبه دن بعدالمفارقة تعیینی مفید اولماز . » یعنی
واهب شو ایکی مالمدن قنغیسنی ایسترایسهك سنك اولسون
دیدیکی صورتده اکر موهوب له مجلس هبه ده تعیین و قبض
ایتمیوب بعدالمفارقة دیگر مجلسده تعیین و قبض ایتسه تعیین واقع ازاله
فسادده مفید اولماز . زیرا مجلسدن تفرق ملابسسه سیله فساد
تا کد ایتمکه آندن صکره تعیین ایله صحت منقلب اولماز . وان
تفرقا قبل البیان لایجوز لتقرر الجهالة خانیه فی اوائل الهبة .

ائناى شرحده اشارت اولندیغی وجهله موهوبك معلوم
و معین اولسنك لزومی موهوب عین اولدیغی صورتده اولوب
اما دین اولور ایسه معلوم و معین اولق لازم دکلدر . تعبیر دیگرله

دینی مدیونه هبه ده موهوبك معلوم اولسی لازم اولماز . لان
هبة الدين اسقاط و الجهالة لا تمنع صحته الاسقاط و يكون البيان
الى المسقط خانيه في اوائل الهبة .

مثلا بر كيمسه نك ديكر كمسنه ذمتنده جهت قرضدن بيك
غروش و بدل اجاره دن كذلك بيك غروش الاجنى اولغله
اول كيمسه مذكور ايكيك غروشدن بيك غروشي سكا هبه
ايتدم ديسه صحيح و قنغيسنك هبه ايتديكني تعيين ايتك حياتده
ايكن واهبه و بعد وفاته ورثه سنه عاندر . چونكه دنك مدیونه
هبه سی ابرا اولوب ابراده جهالت ايسه ابرانك صحتي اخلاص
ايلمز ولوالجيه .

لاحقه

ايكي مبحثي حاريدر .

مبحث اول

موهوبه متعلق شروط باقيه حقنده در .

مشاعده واقع بعض تصرفات صحيح و بعضی غیر صحيح
اولغله بونلرك اجمالا تعدادند نصكره مشاعك هبه سی حقنده
بعض ايضاحات و يريله جكدرد .

- ۱ بیع ، مشاعك مشاركه واجنبي به بیعی جائزدر . « ۲۱۴ و
- ۲۱۵ ، ماده لره باق كرك قابل قسمت اولسون كرك اولسون .
- ۲ اجاره ، مشاع مشتركه ايجار ايدیلورسه صحيح واجنبي به

ایجار قیلنورسه فاسد اولور . « ۴۲۹ » ماده یه باق .

۳ اعاره ، مشاعك حصه داره اعاره سی جائز اولدینی کبی بر کیسه تماما مالک اولدینی قوناغك نصف شایعنی اجنبی یه اعاره ایدوبده معارك کلیسنی تسلیم ایدر ایسه جائز وکل ایچون اعاره مستثافه اولور والا جائز دکلدر . « ۸۱۱ » ماده شرحنه دخی باق .

۴ رهن ، مشاعك رهنی علی الاطلاق فاسددر . مرهون كرك مقسوم كرك غیر مقسوم و كرك مشتركه و كرك اجنبی یه رهن ایدلسون . « ۷۱۰ » ماده شرحنده کی دردنجی مسئله یه باق .
۵ وقف ، قابل قسمت اولان مشاعك وقفی امام ثانی یه کوره جائز و امام ثالثه کوره غیر جائزدر . اما قابل قسمت اولیان مشاعك وقفی بالاتفاق جائزدر .

۶ ایداع ، حصه شایعنهك مشاركه ایداعی جائزدر . اما بلا اذن المشارك کندی حصه سیله معا مشاركك حصه سنی غیره تسلیم جائز دکلدر . « ۱۰۸۷ » ماده یه باق .

۷ قرض ، حصه شایعنهك اقراضی جائزدر . شویله که بر کیسه دیکر کمسنه یه بیک غروش تسلیم ایدوبده بونك نصفی سکا قرض اولوب نصف آخرده شرکت ایچون عمل ایت دیسه صحیح اولور طحطاوی و فتح القدیر و انقروی .

۸ هبه ، مشاعك هبه سی ۵۵ ماده مثالنده احوالا ذکر

اولندیفی حالدہ بو کتابدہ آکا دائر ایضاحات ویرلماش اولمغله
شرحاً بروجه آتی ایضاحی مناسب کورلدی .

۱ مسئله، موهوب غیر مقسوم یعنی قابل تقسیم اولان مالک
هیه سنده مذکور مال وقت قبضده غیر مشاع اولمق لازمدر . زیرا
هیه ده قبض منصوص علیه اولوب منصوص علیده ایسه کمال
شرطدر . شو جهتله که نص منصوص علیک وجودینه اعتنا
و اهتمام اولندیغنه دلالت ایدر . بناءً علیه هیه نک موهوب لیه
ملکی افاده واثبات ایتسندہ قبض کامل شرط اولوب مشاعک
قبضی ایسه غیر موهوب حصه ایله برلکده اوله جفی جهتله
قبض کامل حاصل اولماز . شو سببله که قبض بر شینک تمامیلہ
خیر قابضده اولمسندن عبارت اولوب مشاع ایسه هر وجهله
قابضک حیزنده اولیوب من وجه حیز قابضده ومن وجه آخر
حیز شریکنده در . کامل ایسه هر وجهله موجود اولان شیدر
زیلعی . فکل جزء فی حیزه یشتمل علی ما یجب قبضه و مالایحوز
قبضه فکان مقبوضاً من وجه دون وجه و فیہ شبهة العدم
النافیة للاعتناء بشانہ عنایہ .

سوآل ، وصیت و بیع صحیحده و قرض و بیع فاسد و سلم
و صرفده مشاعاً قبض جائز ایکن هیه ده جائز اولمیور فرق نه در؟
جواب ، وصیت ایله بیع صحیحده قبض شرط اولمامغله
بونلرده مشاعیت مضر اولمندیفی کبی بیع فاسد و سلم و قرض

و صرفده قبض شرط ايسه ده منصوص عليه اولمدينى جهته له
كمانه مراعات اقبضا ايلمز ابوالسعود المصرى . كالقرض
والوصيه بان دفع اليه الف درهم الى رجل على ان يكون نصفه
قرضا عليه و يعمل فى الصف الآخر بشركته و بان اوصى
لرجلين بالف درهم فان ذلك صحيح فدل على ان الشيوع لا
يبطل التبرع حتى يكون مانعا فتح . فالجواب ما ذكرناه .

ايمدى قابل قسمت اولان مالدين بر حصه يعنى شول حصه كه
آنك افراز و تقسيمى جائز اوله بو حصه هبه ايدلده هبه
نفسنده جائزه ايسه ده موهوب لهه ملكى افاده ايتك ايچون اول
حصه نك بالافراز تسليمى لازم اولوب مشاع اوله رق تسليم ايله
هبه تمام و موهوب لهه ملكى مفيد اولماز عنايه . ولو كه اب طفلنه
هبه ايد . بناء عليه احد شريكين صاحبنه ربجدن حصه مى
سكا هبه ايتدم ديدكده مذكور حصه موهوب له يذنده تماما
قائم موجود اولنجه هبه صحيح اولماز . زيرا قابل قسمنده
مشاعى هبه اولور هندية قبيل الباب الثالث .

استثنا

فقط ايكي كيمسه بننده مشاعا مشترك بر مالده كي حصه
شايعه سنى مشتركردن برى ديكر مشاركه هبه ايتدكده يعنى
مثلا بر قوناق زيد ايله عمرو بننده مشاعا مشترك اولوبده زيد
حصه سنى عمروه هبه و تسليم ايدلده بعض فقهايه كوره بو هبه
صحيحدر . ديكر بعض فقها ايسه صحت هبه يه دائر اولان قول

ابن ابی لیلانك اولوب فقهانك كلاملرندن ظاهر اولان مشاركه
دخی هبه نك عدم حتی ایدوکنی بیان ایلمشلردر طحطاوی
وبرده ۸۵۱ ماده شرحنده ذکر اولندیغی اوزره اب قابل قسمت
مالك نصفنی طفلنه هبه ایتسه صحیح اولور.

۲ مسئله، هبه مشاعده اختلاف اولوب بعض فقها، هبه مذکوره
فاسده اولدیغنه ذاهب اولمشلردرکه دررده بیان اولندیغی اوزره
قول مقتابیه کوره هبه فاسده ملکی افاده ایدر ابو السعود
المصری. بو قوله کوره موهوب الیهك مشاعا اهاب وقبض ایلدیکی
مالده تصرفی صحیحدر. یفید المملک ملکا فاسدا وبه یقی طحطاوی
بناء علیه برکیمسه کندوسنه هبه فاسده ایل هبه اولنان عرصه یی
وقف ایتسه صحیح و قیمتنی ضامن اولور ابو السعود المصری
دیگر بعض فقها دخی هبه مشاع غیر تامه ایدوکنه قائل اولمشلردر
ابو السعود وعلی افندی. والاصح ان هبه المشاع لاتفید المملک
کالهبه قبل القبض طحطاوی بتغیرما. بو قوله کوره مشاعا
هبه قلندقد نصکره افراز وتقسیم ایدیلهرک بعده تسلیم اولتسه
هبه مذکوره تامه وصحته منقلب اولور عبدالحلیم « ۲۴ » ماده یه
باق. واهب کرك بالذات تقسیم ایتسون وکرك نأبئه تقسیم
ایتدیرسون وکرك موهوب لیه امر ایدوبده شریکیله قسمت
ایتسون حکم بردر رد مختار.

بو قوله یعنی هبه مشاع غیر تامه اولسنه متفرع مسائل.
اولا مشاعا هبه قلنان مالده موهوب له آنی بیع کی

بروجهله تصرف ایتسه نافذ اولماز انقروی ودرر . شویله که
برکیمسه مثلاً قابل قسمت اولان برخانهك نصفی هبه ایدوبده
کلیمسی موهوبله به بعدالتلیم موهوبله دخی حصه موهوبه یی
آخره صاتسه صحیح اولماز هدایه و موهوبله اوزرینه مضمون
اولور زیلی و خانیه فی فصل فی هبه المشاع .

ثانیا بوکی مشاع هبه و مشاعا تسلیم قلان مالده واهب
تصرف ایتسه نافذ اولور زیلی .

۳ مسئله، هبهك تمامیتی اخلال ایدن شیوع برنجی مسئله ده
بیان اولندینی اوزره وقت قبضده کی شیوع اولوب یوخسه مجرد
وقت هبه ده کی شیوع دکلدر نه یه .

خلاصه ، بونده درت صورت واردر . صورت اولی ،
هم وقت هبه ده همده وقت تسلیمده غیر مشاع اولمقدر .
بو صورتده هبه صحیحدر .

صورت ثانیه ، وقت هبه ده مشاع و وقت تسلیمده غیر مشاع
اولمقدر . بو صورتده دخی هبه صحیحدر .

بو جهته برکیمسه خانهك نصفی هبه و دیگر نصفی صدقه
اولق اوزره بر شخصه اعطا و جمله سنی برلکده او شخصه
تسلیم ایتسه صحیح و هبه ایدی لان قسمده رجوعه مقتدر اولور
ولوالجیه و هندیه . زیرا بونلك تمامیتی قبض ایله اولوب عندالقبض
ایسه شیوع یوقدر ابوالسعود المصری .

ینه بوجهته برکیمسه برمالك نصفی بر شخصه هبه ایدوب

فقط هنوز تسلیم ایتدین دیگر نصفنی دخی آکا هبه ایدرک
جمله سنی بر لکده تسلیم ایتسه شو هبه صحیح در بحر . ایتدی
شو ایکی مسئله ده وقت هبه ده شیوع وار ایتسه ده وقت قبضه
شیوع یوقدر .

صورت ثالثه ، وقت هبه ده غیر مشاع و وقت تسلیم ده
مشاع اولمقدر . شویله که بر کیمسه بر مالک کلیننی هبه و متفرقا
تسلیم ایتسه هبه صحیح اولور قال فی الهندیة فی الباب الثانی
ولو وهب الجميع وسلم متفرقا جاز کذا فی التاتار خانیة . فقط
بو صورتده کی مشاعیت دیگر قسمک تسلیمله زائل اولمقدر .
و مانع صحت زائل اولمقله ممنوع عودت ایلمقدر . اما مشاعیت
زائل اولیه جق اولور سه صحیح اولماز . شویله که واهب برقوناغک
جمله سنی هبه ایدوبده بعده قبل التسلیم نصف شایعنده بالرجوع
نصف شایع دیگر ی تسلیم ایتسه صحیح اولماق لازم کلور سه ده
مسئله سنی بولمق اقتضا ایدر .

صورت رابعه ، هم وقت هبه ده همده وقت تسلیم ده
مشاع اولمقدر . بو صورتده کی هبه صحیح دکلدر . مکرکه شریکته
هبه ایده . برنجی مسئله یه باق .

بو جهته بر کیمسه قابل قسمت اولان بر مالک نصفنی
بر شخصه هبه و شایعا تسلیم ایتدکن نصکره دیگر نصفنی دخی
آکا هبه و شایعا تسلیم ایتسه ینه شیوعدن چقماز قهستانی .

۴ مسئله، قابل قسمت اولان بر مالک حصه شایعه سنی دیگرینه هبه ایتمک مراد ایدن بر کیمسه اومالک نصفی موهوب لهه بیع ایدرک ثمنندن ابرا ایتلیدر انقروی. بو صورتده هبه ایله استدیکی منفعتی تماماً موهوب لهه ایصال ایلمش اولور.

۵ مسئله، موهوب لهه طرفندن اولان شیوعک تمامیت هبه یه مانع اولسندمه اختلاف واردر قهستانی. شویله که قابل قسمت اولان بر مالی واحد، ائینه هبه ایتدکده امام اعظمه کوره غیر جائزدر. مع ذلك موهوب لهه واحد اولوبده کندوسنه هبه ایدیلان خانیهی قبض ایتمک اوزره ایکی کیمسه یی توکیل ایتمکه آنلرده قبض ایتسه لر بونده شیوع یوقدر رد مختار.

اما قابل قسمت اولان بر مالی واحد، ائینه هبه ایتدکده امامینه کوره جائز اولوب بونده شیوع یوقدر.

مثلا بر کیمسه زید و عمروه خطابا شو قوناغمی سزه هبه ایتدم دیو هبه ایتدکده یعنی موهوب لهه مانک حصه لری ذکر ایدلمدکده بونده امام اعظم ایله امامین بوجه مذکور اختلاف ایتشلردر طحطاوی. فقط حصص موهوبه تفصیل اولندقدمه باقیلور. اکر بو تفصیل بعدالاجمال ایسه امام اعظمه کوره یینه جائز دکلدر. تفصیل کړک تفضیلا اولسون وکړک بلا تفضیل اولسون. اما امام محمد کوره مطلقا جائزدر.

تفضیله مثال : بر کیمسه زید و عمروه خطابا بو قوناغمی

ایکیکزه هبه ایتدم زید سکا ثلثانی و عمرو سکا ده ثلثی .

بلا تفضیلہ مثال: بر کیمسه زید و عمروه خطابا بو قوناغی

ایکیکزه هبه ایتدم زید سکا نصفی و عمرو سکا ده نصفی .

و اگر بو تفصیل ابتداء یعنی من غیر سابقیه الاجال

ایسه بالاتفاق جائز دکلدر. تفصیل کرک تفضیل ایله اولسون

کرک بلا تفضیل اولسون.

لکن شو صوک فقره محتاج ایضاح اولغله بروجہ آتی

تفصیل اولنور. شویله که بر کیمسه نك ایکی شخصه من غیر

سابقیه الاجال هبه سی درت وجه اوزره اولور.

وجه اول، عقد و قبض ایکیسیده مختلف اولقله اولور که

بو وجهله اولان هبه ده بالاتفاق شیوع واردر. شویله که

بر کیمسه قابل قسمت اولان بر مالک نصفی بر شخصه

هبه و تسلیم ایتدکن صکره دیگر نصفی دخی بشقه بر آدمه

هبه و تسلیم ایتم کی. برنجی مسئله یه باق.

وجه ثانی، عقد متفق و قبض مختلف اولور که آنفا ایضاح

اولندینی اوزره اعتبار قبضه اولغله بو وجهله اولان هبه دخی جائز دکلدر.

بر کیمسه قابل قسمت اولان بر مالکی ابتداء تفصیل و عقد واحد

ایله ایکی شخصه هبه ایتدکن صکره آنی بردفعه برینه و دیگر

دفعه دیگرینه تسلیم ایلمک کی.

وجه ثالث، عقد مختلف و قبض متفق اولقندر. وجه رابع

ایکسیده یعنی هم عقد و همدی قبض بر لکده اولمقدر. امام اعظم
شو وجه ثالث و رابع ایله دخی هبه نك غیر جائز ایدوکنه قائل
اولمشدر. مکرکه بالمعبه هبه و تسلیم ایدوب آنلر دخی اقسام
ایتسلر هبه جائز اولور ابوالسعود العمادی و بحر و هدایه و فتح.
شیخ الاسلام علی افندی امام اعظم قولی اوزره افتا ایلمشدر.

۶ مسئله، برکیمسه یدنده بولنوب قابل قسمت اولان برمالنی
بری صغیر دیگر کیبر ایکی اوغلنه هبه و تسلیم ایتسه هبه تمام اولماز.
زیرا ۸۵۱ ماده شرحنده ایضاح اولندیفی اوزره صغیره هبه
مجرد ایجاب ایله منعقد و تمام اولوب کیبر هبه ایسه قبول و تسلیمه
توقف و بناءً علیه صغیره هبه دن تأخر ایده جکی جهته بوهبه ده بالاتفاق
شیوع حاصل اولور بزازیه و بحر. بوهبه نك صحتنده حيله شودرکه
مذکور مالی کیبر اوغلنه تسلیم ایتدکن صکره بروجه مذکور
کیبر مرقوم ایله صغیره هبه ایتسه صحیح اولور تنقیح. زیرا
۸۴۶ ماده ده ذکر اولندیفی اوزره بو حالده کیبره دخی تسلیمه
توقف و صغیره هبه دن تأخر ایلمز. هر حيله که آنکله حرامدن
تخاص یا خود حلاله توصل اولنور حسندر طحطاوی.

۷ مسئله، قسمته قابلیت خصوصی حصه موهوبه نظرادر.
شویله که مثلاً برکیمسه قوناغنی درت نفر اولادینه هبه ایتدکده درت
قسمه تقسیم می ممکن اولدینی تقدیرده هبه صحیح دکسه ده درت
قسمه تقسیم می ممکن اولمیوبده ایکی یا اوچ قسمه تقسیم می ممکن
اولسه بیله ینه هبه مذکور صحیح اولور. نته کیم برکیمسه

یا لکنز ایکی قسمه تقسیم می ممکن اولان بر مالک ربغنی برینه هبه
ایتسه هبه مذکوره جائزدر تنقیح .

۸ مسئله، یا لکنز و اهب طرفندن اولان شیوع تمامیت هبه
بالاتفاق مانع دکلدر. شویله که ایکی کیمسه مشترک و قابل قسمت
ماللرینی بر شخصه هبه ایتسه لر او مال جمله تسلیم و جمله قبض
ایدلایکی جهته جائز اولوب بونده شیوع یوقدر قهستانی و هدایه .

۹ مسئله، صدقه ده متصدق علیه طرفندن اولان شیوع تمامیتی
مخل اولمدینی جامعده و خزانه المفتینده بیان اولمشدر هدایه و هامش
انقروی. مثلا بر کیمسه قابل قسمت اولان بر مالنی ایکی کیمسه
تصدق و معا تسلیم ایتسه صحیح اولور. نته کیم بر کیمسه اون
مجیدیه یی ایکی فقیره هبه یا صدقه ایتسه جائز اولور. لالغنین
لان الصدقة علی الغنی هبه فلا تصح للشیوع ای لا تملك حتی
لو قسمها و سلمها صح در مختار .

بونک هبه دن یعنی ۵ مسئله دن فرقی شودر که صدقه ده
وجه الله تعالی قصد اولنوب او ، ایه واحد و فقیر نائب
اولوب اما هبه ده وجه غنی قصد اولنور او ، ایه ایکدر
هدایه و ابوالسعود و بحر و در مختار .

اما بر کیمسه قابل قسمت اولان مشاعک مثلا نصفی
برینه صدقه ویرسه صحیح اولمیوب هبه ده اولدینی کی بعدالافراز
تسلیم اولندجه صدقه تمام اولماز بحر و انقروی .

۱۰ مسئله، تمامیت هبه مانع اولان شیوع، شیوع مقارن

اولوب یوخسه شیوع طاری دکلدر. «۵۵» ماده یه باق. زیر اغیر شایع اوله رق هبه ایدیلوبده قبض کامل ایله هبه تمام اولدقدنصرکه شیوع طاری اولنجیه بو شیوع موهور لهک ملکی اوزرینه طاری وبعده الهبة والتسلیم حادث اوله جنی جهته شیوع مذکور ملکه منافی و سابقا صحیح وتمام اولان هبه یی مغل اولماز تکمله رد مختار.

مثلا بر کیمسه قابل قسمت اولان بر مالک کلیسنی هبه وتسلیم ایتدکدنصرکه نصفنده رجوع ایتسه شو رجوع ایله مال موهوره شیوع عارض اولور ايسه ده بو شیوع طاری اولوب مقارن اولدیغندن هبه نك تمامیتته مانع اولماز. «۵۶» ماده یه باق. نته کیم بر خانه دن بشقه مالی اولیان بر کیمسه مرض موتنده مذکور خانیه یی بر شخصه هبه وتسلیم ایتدکدنصرکه فوت اوله رق ورثه سی مجیز اولمدقلرنده «۸۷۹» ماده یه مبنی خانه نك ثلثاننده هبه باطل اولور ايسه ده دیگر ثلثنده باقی قالور رد مختار.

۱۱ مسئله، بعض موهورک بالاستحقاق وبالبنیه ضبط ایدلمسندن طولای موهوره عارض اولان شیوع ابن کمالک و صدر الشریعه و کرمانی ونهایه و هندیه نك بیانلرینه کوره شیوع طاری اوله رق مسئله آنفده مذکور ایکی مثاله اولدینی کبی هبه یه مضر دکلدر. فقط قاضیخان و جامع الفقه و ظهیریه و کافی نك بیانلرینه نظرا شیوع مذکور مقارن اولوب بناء علیه تمامیت هبه یه مانع بولنمشدره

مثلاً بر کیمسه ایکی قسمه قابل تقسیم بولان خانەنک کلیسنی دیگر کیمسنه هبه و تسلیم ایتسدکن صکره مذکور خانەنک نصف شایعنه مستحق چیقسه باقیسنده دخی هبه باطل اولور خانیه. حتی صاحب الدرر شیوع مذکورک طاری ایدوکنه قائل اولملری تخطئه ایتمش و بو تخطئه دخی مجلهک ۵۵ مادهسی مثالیه ۴۳۰ مادهسنه وارد بولمشدر.

بالاستحقاق و بالینه موهوبه عارض اولان شیوعک شیوع مقارن اولق مسئلهسی مسئله مشهوره اولوب محل تردد دکلدر نوح افندی.

قهستانی، لعل موهوبه بالاستحقاق عارض اولان شیوعده ایکی قول اولوب بر قوله کوره شیوع مذکورک مقارن و دیگر قوله کوره طاری اولمسیدر دیمشدر.

استحقاق پینه ایله ثابت اولنجه شیوع مقارن اولور شویله که موهوبک نصفی زمان هبه ده مستحقک ملکی اولدینی تبین ایتدکه موهوب بستان اولنجه بعدالاتباب و قبل الاستحقاق مدته موهوبله یدنده حاصل اولان اثماری استهلاك ایلمش ایسه مستحقک اثمارده کی حصه سنک ضمانی لازم کلور. زیرا پینه ملکی اصلندن اثبات ایدر «۷۸» مادهیه و شرحه باقه

اما استحقاق اقرارایله ثابت اولنجه اگر واهبک اقرارایله ثابت اولورسه ظاهر اولان موهوبک ید موهوب لهدن اخذی حقننده بو اقرار لغودر. زیرا بو اقرار غیر علیهنده اولوب

بو ایسه باطلدر. واکر موهوب لهک اقرار یله ثابت اولورسه
 بو اقرار ایله موهوب له موآخذ اولنه جنی درکار ایسه ده
 بو صورتده عروض شیوعدن طولای هبه باطل اولورمی
 طحطاوی. یقول العبد وبالله التوفیق بالاستحقاق موهوبه شیوع
 عارض اولدقه استحقاق کرک بالینه ثابت اولسون و کرک
 باقرار الموهوب له ثابت اولسون بو شیوع طاریدر. زیرا
 مستحق مدعاسنی بالینه یا بالاقرار اثبات ایدنجه تحقق ایلرکه
 نصف موهوبی هبه ده واهب فضولی اولوب مستحقک اجازتنه
 موقوف ایدی. چونکه عقد فضولیده معقود علیه مستحق
 ظهور یله آنی ادعا ایتسی عقد واقعک انفساخنی مستلزم اولوب
 اولمیدینی حقه ده اختلاف اولمیدینی هندیه نک کتاب هبه سنک
 باب تاسعیه کتاب غصبک باب رابع عشرک اولنده بیان اولنان مسائلدن
 مستفاد و مجله نک ۶۳۸ ماده سنندن دخی مجرد استحقاق ایله
 عقد فضولی منفسخ اولمیوب آندن صکره دخی اجازت جائز
 ایدوکی مستبان اولمقده در. بناءً علیه بوندن صکره مستحق هبه یی مجیز
 اولورسه ۸۵۷ ماده حکمنجه جائز و نافذ و مجیز اولماز ایسه
 نصف مستحقده عدم اجازت اوآننده هبه منفسخ
 اولور. ولذلک شیوع شو عدم اجازت وفسخ زماننده حادث
 اولوب یوخسه اولجه موجود دکل ایدی. بو حالده تخطئه یه
 سزا صدر الشریعه دکل مخطیلردر.

هذا انجاز ما وعدناه من التفصيل فی شرح ۵۵ ماده .

۱۲ مسئله، قابل قسمت اولیان — او طه وبر حیوان وبر روبه وبر دیوار کی — بر مالک حصه سنی هبه ایتک صحیحدر. زیرا بوکی مشاعده قبض کامل متصور اولدینی جهتله قبض قاصر ایله اکتفا قلمق لازم کلدی ابوالسعود المصری. چونکه بونده دخی قبض کامله اعتبار ایدلسه بو نوع اموالده باب هبه نك انسدادی لازم کلور.

سوال، بوکی ناقابل قسمت اموالده حصه شایعه نك هبه سی متبرع اوزرینه مهائیه نك ایجابی مستلزم اولور متبرع اوزرینه ایجاب ایسه جائز دکلدر.

جواب، مهائیه ۴۱۹ ماده ده ذکر اولدینی اوزره قسمت منافعدن عبارت اولوب حالبوکه تبرع عینده واقع اولدینی جهتله ایجاب مذکور تبرع ایدلیان شیده اولمغله مضر دکلدر زیلعی وطحطاوی.

مثلا بر حیوان یا معین مجیدیه یا روبه دن معلوم حصه نك هبه سی صحیحدر هدایه وبهجه.

فقط موهوب حصه نك معلوم اولسی لازمدر. « ۸۵۸ » ماده یه باق. بناء علیه بر کیمسه معلوم حیوانده کی حصه سنی هبه ایدوبده مذکور حصه نك مقدارینی بیلیمسه هبه جائز اولماز ابوالسعود المصری.

بوکی مشاع کندوسنه هبه ایدیلان کیمسه واهب ایله قسمت مطالبه سنده بولنه ماز زیرا قابل قسمت دکلدر. اما مهائیه

طلبنده بولانه بیلور بحر. « ۱۱۳۰ و ۱۱۸۳ » ماده لره باق.
 دین دخی قابل قسمت دکلدرد. « ۱۱۲۳ » ماده یه باق.
 بناء علیه احد شریکین صاحبنه ربحدن حصه می سکا هبه ایتدم
 دیدکده موهوب له اول حصه یی استهلاک ایلمش اولدینی تقدیرده
 هبه صحیح اولور هندیه قبیل الباب الثالث. « ۸۷۳ » ماده یه باق.
 قابل قسمت اولان مال ایله اولمیان مال ۱۱۳۱ ماده ده بیان
 اولنیور.

۱۳ مسئله، موهوبك محرز یعنی واهبك ملك و حقوقدن
 مفرز بولنمی لازمدر.

بناء علیه اراضی یی، اوزرنده مزروع اولوب حصا داولنمیان
 اکنسز ویا آغاجی، اوزرنده طوپلانمیان یمشسز هبه ایتسه
 جائز اولماز. زیرا زرع و یمش ارض و آغاج اجزاسندن اولمغله
 هبه مذکوره جزء شایعی هبه منزلنده اولور ولوالجیه و بهجه.
 بو جهتله بو هبه دخی هبه مشاع حکمنده اولور رد مختار.

ایمدی برکیمسه مزروع عرصه سنی واکینی هبه ایده جک
 اولدقده اول ارضی صکره اکنی یاخود اول اکنی صکره
 ارضی هبه ایتدکده اگر تسلیمده جمع ایدرایسه ایکسینده دخی
 هبه جائز اولور. واکر تسلیمده تفریق ایدرسه یعنی اول
 عرصه یی صکره اکنی یاخود اول اکنی صکره ارضی تسلیم
 ایلرسه صحیح اولماز هندیه اوچنجی مسئله یه باق.

نته کیم برکیمسه عرصه سی مقاطعه لو وقف و اشجاری

ملک اولان باغچه سنک عرصه سنی اذن متولی ایله فراغ ایتدین
اشجارینی یاخود ارض میری وکرومی ملک باغکیرینی اذن صاحب
ارض ایله فراغ ایتدین مذکور باغی کبیر اوغلنه هبه ایتسه
صحیح دکلدر. زیرا کوکلر یره کیرمش وتداخل ایلمش اولمغله
مشاع حکمنده در ابوالسعود العمادی. اما صغیره هبه جائز
ایدوکی ۸۵۱ ماده شرحنده کچدی علی افندی.

شوقدرکه واهب بنایی عرصه سز یاخود زرعی ارض سز یاخود
آغاچ اوزرنده کی میمشی آغاچ سز هبه ایدوبده واهب بنایی نقض یا کینی
حصاد و میمشی طویلامق ایله موهوب لهه صراحة اذن ویروبده
اوده بنایی نقض واکینی حصاد ایتسه و میمشی طویلاسه ده قبض
ایلسه صحیح اولور. زیرا موهوب لهک امر واهب ایله فعلی
بالذات واهبک فعلی کبیدر ولوالجیه. اما صراحة اذن ویرمدیکی
تقدیرده مجلس هبه ده موهوب لهه حصاد یا نقض ایتسه یا طویلاسه
بیله هبه صحیح اولمیوب موهوبی ضامن اولور هندیه.

فقط مقاطعه لی وقف یر یاخود ارض میری اوزرنده کی
خانه نک هبه سی جائزدر. بوخانه باغ و باغچه کی دکلدر. چونکه بنا
غرس کی اولمیوب موهوبه اتصالی ضعیف اولمغله مشاع حکمنده
دکلدر ابوالسعود العمادی. بووجهله هبه ایدی لان یالکز ابنیه
اوله جغندن واهب عرصه سندن ابنیه یی موهوب لهه رفع
ایتدیره بیلور. یوخسه ابنیه تهبع عرصه دخی هبه ایدلمش اولماز

على افندى قییل نوع فی الهبة للصغیر . هبة البناء بدون الارض
جائزة هندیة فی الباب الحادی عشر .

۱۴ مسئله، هبة الشاغل جائزدر . یعنی واهب کندى ملکى
شاغل بولنان برمالنى هبة ایتسه جائز اولور لان المظروف یشغل
الظرف اما الظرف فلا یشغل المظروف حموى .

مثلا واهب خانه سى دروننده کى اشیا سنى برینه هبة و خانه
ایله برلکده تسلیم ایتسه صحیح اوله جفى کى برکیمسه کتابخانه .
سندہ بولنان بالجمله کتابلرینى اوغلنه هبة و کتابخانه یى اول
کتابلریله معا تسلیم ایدوب اوده کتابلری و کتابخانه یى قبض
ایتسه هبة تمام اولور على افندى نته کیم چوالده کى دقیقى هبة
ایدرك دقیقى چوال ایله معا تسلیم ایتسه جائز اولور .

کذا حیوان اوزرنده کى یالکز یوکى هبة و حیوان ایله معا
تسلیم ایتسه یاخود قربه ده کى یالکز صویى هبة ایدوب قربه ایله
برابر تسلیم ایتسه جائز اولور هندیة . زیرا بوصورتلرده موهوب
غیر مشغول و بلکه ملک واهبى شاغل اولوب بوایسه واهبک
موهوب اوزرینه ثبوت یدینى ایجاب ایتمز . واقعا واهبک یدى
ظرفده قائم ایتسه ده ظرف ، آلت حفظ اولمغله تبع اولدیغندن
تبعده ثبوت یداصلده یدک قیامنى ایجاب ایلمز ابوالسعود المصرى .
بو مثاللرده موهوبى مشغول ایله برلکده تسلیم ایتسه
دینلده سى یالکز اوله رق موهوبک تسلیم اولنمى صورتندن
احتراز ایچون دکدر . بلکه بو صورتده یعنی موهوب یالکز

اوله رق تسلیم ایدلمسی تقدیرنده هبه بطریق الاولویه تمام اولور .
اما هبه المشغول ، یعنی واهبک متاع و ملکله مشغول بر
مالک هبه سی جائز دکلدر بهجه . زیرا موهوب متاع واهبله
مشغول اولنجه مشاع کبی و مشاع حکمنده اولور .

مثلا بر کیمسه خانه سنی دروننده امتعه سی بولندیغی حالد
آخره هبه و تسلیم ایتسه جائز اولماز . مکرکه مذکور خانه یی
امتعه مرقومه دن بعدالتخلیه تسلیم ایده . او حالد صحیح
اوله جنی کبی امتعه یی دخی هبه ایدرک کلیسنی موهوب لهه تسلیم
ایتدکده ینه صحیح اولور . ۲۴ ، ماده یه باق طحطاوی .

نته کیم بر کیمسه شوایی اوطه یی هبه ایدوبده یالکز بریسنی
مشغول و دیگرینی غیر مشغول اوله رق تسلیم ایتسه هیچ برنده
هبه صحیح دکلدر هندیه اذن بالقبض ، تخلیه و تسلیم دنصکره
اولمسی لازم اولوب اولجه یعنی قبل التخلیه اولان اذنه اعتبار
یوقدر . قبل التخلیه اولان تسلیمه اعتبار اولندیغی کبی .

شو قدرکه موهوب خانه ده اجنبی انسان حرك بولنمسی
سببیه اول خانه مشغول عد ایدلمیه جکندن هبه صحیح اولور
قاعدیه . لیکن واهب یاخود اهلی خانه ده بولندیغی حالد تسلیم
ایدلسه شو تسلیم صحیح اولماز هندیه عن الحانیه .

مستثنیات

اوپچ نوع مشغولک هبه سی جائزدر . شویله که اولاب ،
طفله مشغولی هبه ایتسه جائز اولور درختار . مثلا بر

کیمسه اشیا سیله مشغول منزلی یا خود مزروع ا کینیه مشغول
ملک تار لاسنی طفلنه هبه یا صدقه و اشهاد ایتسه صحیح اولور .
اما بر کیمسه کیر ولدیه معا سا کن اولدینی ملک منزلی متاعیه
مشغول ایکن ولد مرقومه هبه ایتدکده بلا تخلیه و تسلیم هبه
صحیح دکدر علی افندی .

ثانیا زوجه، کندوسنک زوجیه سا کنه بولندینی و ایچنده
اشیاسی اولدینی خانیهی زوجه هبه ایتسه جائز اولور در مختار .
لان المرأة مع الار و المتاع فی يد الزوج فكانت الدار فی يد
الموهوب له معنی فصحت الهبة طحطاوی . حتی تخلیه و تسلیم
اولمدين زوج فوت اولسه ورثه سی اول خانیهی میراثه ادخال
ایده بیلور لر . زیرا زوجه یدنده کی امتعه سیله زوجک یدنده در
حموی و علی افندی .

ثالثا ، مالکک غیری بر کیمسه نک ملکیه موهوبک مشغولیتی
تمامیت هبه یی مغل دکدر مجمع الانهر و علی افندی . شویله که
مثلا بر کیمسه نک ملک دکانی دیگر کسمه نک ذخیره سیله
مشغول ایکن اول کیمسه مذکور دکانی بر شخصه هبه و ذخیره
ایله مشغول اولدینی حالدہ تسلیم ایتسه دکانده هبه صحیح اولور
بهیجه و علی افندی .

نته کیم مستعیرک اشیا سیله مشغول بولنان خانیهی معیر ،
مستعیره هبه ایتسه صحیح اولور ابولسعود . اعار دارا انسا نا
ثم ان المستعير او المعير غصب متاعا و وضعه فی الدار ثم وهب المعير

الدار من المستعير صحت الهبة في الدار لانه تبين ان الشاغل ملك غير الواهب طحطاوى .

كذا موهوب خانه ده واهبك يا موهوب لهلك غضب ايلديكى متاع بولندينى حالده خانه تسليم اولنسه هبه صحيح اولور . لان يد غيره قاصرة عنها فلم يظهر انها مشغولة بمتاع الواهب بحر . ومن صور ذلك مالو وهب دارا بما فيها من المتاع او وهبه جوالق بما فيها من المتاع و سلمها الى الموهوب له ثم استحق المتاع فالهبة تامة في الدار والجوالق لان يد الواهب كانت ثابتة على الدار و المتاع جميعا حقيقة فصح تسليمه طحطاوى .

۱۵ مسئله ، بر كيمسه خانه سنى حفيدينه هبه ايتديكى مجلسده شو خانه مى حفيدمه هبه و تسليم ايلدم خانه ايچنده اصلا نسنه قالمدى ديو اقرار و اشهاد ايتدكدنصكره فوت اولمغله ورثه سى حين هبه و تسليمده خانه مورثمذك متاعيله مشغول ايدى ديو ادعا ايتسه مسموع اولماز . زيرا اول كيمسه نك شو اقرارى صحيحدر . « ۱۵۸۷ » ماده يه باق على افندى وهامش بهجه .

۱۶ مسئله ، هبه مشغولده حيله شو دركه اولاشاغل بولنان مال ، موهوب له ايداع و تسليم اولندقدنصكره خانه تسليم اولنمليدر . بو حالده هبه و تسليم صحيح اولور حموى فى اول كتاب الهبة . ۱۷ مسئله ، مشغول ايله شاغل آيرو آروهيه اولنه رق تسليمده

تفريق اولندقدده باقيلور . اولامثلا خانه هبه و مشغولا تسليم اولنورسه خانه ده كى هبه غير صحيح اولور ۱۴ مسئله يه

باق. اما اولاً متاعی هبه و تسایم ایتد کذا صکره خانه بی هبه و تسایم ایدرسه ایکی سنده دخی صحیح اولور هندیه عن الخانیه. ۱۸ مسئله، هبه مشغول فاسده اولیوب غیر تامه و موقوفه ایدوکی بنایده بیان اولمشدر علی افندی و حموی فی اول الهبه. ۱۹ مسئله، هبه فاسده ایله هبه اولنان مال قبض اولند قدومه ملکی افاده ایتمسنده اختلاف اولندیغی فقط مفتابه اولان هبه فاسده نك ملکی افاده ایتسی ایدوکی ایکنجی مسئله ده بیان ایدلمشدی درر و جمع الانهر و رد مختار.

مع ذلك هبه فاسده هبه صحیحه دن اوچ حکمه افتراق ایدر حکم اول، ۸۶۶ ماده ده مذکور قرابت و کذا سائر موانع رجوع هبه فاسده دن رجوعه مانع اولمیدیگی کبی واهب فوت اولد قدومه وارثی دخی رجوع ایده بیلور. زیرا هبه فاسده مضمونه اولوب بعد الهلاك مضمونه بولنان قبل الهلاك مستحق الرد اوله جغندن واهب هبه دن رجوعه و موهوبی استرداد مالک اولور ابوالسعود المصری و طحطاوی.

حکم ثانی، هبه فاسده ایله مقبوض اولان مال، موهوب له اوزرینه مضموندر. یعنی ید موهوب لهد مال موهوب هلاک اولسه موهوب له اوزرینه ضمان لازم کلور. حالبوکه هبه صحیحه ده ضمان لازم کلیه جکی ۷۸۱ ماده دن مستفاد اولور. رد مختارک نهاییه ایله خیرالدین رملیدن نقلنه کوره مذکور کتابلرده ضمان صورت مطلقه ده مذکور ایکن شرنبالی درر حاشیه سنده تقیید

ایلیه رك دیمشدر كه فاسدا موهوب واهبك اذنیله قبض ایلدیگی
جهتله ید موهوب لهده بلا تعد ولا تقصیر تلفی تقدیرنده ضمان
لازم کلاملیدر. ضمان لازم کلیشی موهوب له آنی کندی صنع
وفعلیه اتلاف ایلدیگی یاخود موهوب له واهبك صراحة اذنی
اولمقسزین مال موهوبی قبض ایلدیگی تقدیرده در انتهى .

هبة فاسده نك مضمونیتنه فروع آتیه تفرع ایدر. شویله كه
اولا برکیمسه دیگر کمسنه یه اون آلتون تسلیم ایدرك بونك اوچی
سنگدر باقیسنی فلان شخصه تسلیم ایدیگز دیدکن صکره
مذکور اون آلتون او کمسنه یدنده تلف اولسه او کمسنه اوچ
آلتونی ضامن اولور. زیرا آنی هبة فاسده ایله قبض ایتمشدر.
اما باقیسی امانت اولغله ضمان لازم کلز .

ثانیا برکیمسه دیگر کمسنه یه اون آلتونی تسلیم ایدوبده بونك
بشی سکا هبه در باقی بشیده یدکده و دیعه در دیدکن صکره
او کمسنه آندن بش آلتونی استهلاك ایتدیگی حالدده دیگر بش آلتون
یدنده تلف اولسه قابض اوزرینه یدی محق آلتونك ضمانی لازم
کلور. زیرا هبة ویریلاں بش آلتور هبة فاسده بولنق جهتله
مضمون اولدینی کبی او کمسنه نك استهلاك ایتدیگی بش آلتونك
نصفی مضمون و دیگر نصفی امانت اولغله یدی محق لیرانك ضمانی
لازم کلدی خانیه فی الغصب.

حکم ثالث ، ۸۳۸ ماده شرحنده ذکر اولسدینی اوزره
هبة فاسده ده تخلیه بالا تفاق قبض دکادر .

مبحث ثانی

صراحة ذکر اولنمقسزین هبه ده داخل اولوب

اولمیان شیرل حقهنده در

۲۰ مسئله، بیع ارضه من غیر ذکر داخل اولان شیرلارضی هبه ده دخی من غیر ذکر داخل اولور. شویله که برکیمسه بر عرصه یی هبه و تسلیم ایتدکده اوزرنده کی ابنیه واشجار من غیر ذکر داخل اولور. اماارضی هبه و صدقه ده اکین من غیر ذکر داخل اولیه جفی کبی اشجاری هبه ده دخی من غیر ذکر اثمار و اوراق متقومه داخل اولماز و بوحالده هبه فاسد اولور لانه یمنع التسليم ۱۴ مسئله یه باق هندیه فی الباب الحادی عشر .

۲۱ مسئله، بیتی هبه ده فلق، سرروسلا لیم مفرزه داخل اولماز ولو که حین هبه ده مرافقیله دیه. لانها بمنزلة متاع موضوع فی البیت الفلق لایدخل فی بیع البیت بذكر المرافق فلا یدخل فی الهبة خانیه فی اوائل الهبة .

— ۸۵۹ — ماده

(واهبك) متصدقك هم حقيقة یا حکماً (عاقل) همده (بالغ) یعنی تبرعاً هن (اولمسی) هبه نك صحتده (شرطدر). چونکه تصرف ضرره اهلیت کامله شرط اولمغله اهلیت کامله بولنیمجه تصرف مد کور صحیح اولماز درمستی و مجمع الانهر . «۹۶۷» ماده یه باق .

مجنونك دخى حال جنوننده كرك مضر و كرك نافع بالجمله
تصرفاتى باطلدر. كرك مجنون مطابق اولسون كرك غير مطابق
اولسون .

حقیقه عاقل، ظاهر اولوب حكما عاقله كلنجه بوده خردن
و بونك كي محرماتدن سكران اولان كيمسه دن عبارتدر كه
بو سكران حكما عاقل و مكلف صاييلمغله هبه سي صحيح اولور
طخطاوى .

(بناء عليه صغير و مجنون و معتوهك) كندى مالى (هبه سي)
ولو بعوض اولسه و حتى عوض مال مو هو بدن زياده بولنسه
بيله (صحيح دكلدر). يعنى باطلدر. ولذلك بعد البلوغ والافاقه
محيز اولسه بيله شو اجازت جائز اولماز. زيرا اجازت عقود
موقوفه للاحق اولور . يوخسه عقود باطله للاحق اولماز.
لكن بعد البلوغ والافاقه مجدداً عقد هبه ايديلورسه اولحاله
صحيح اولور در منتقى. مجنونك تعريفى ۹۴۴ ماده ده و معتوهك
تعريفى دخى ۹۴۵ ماده ده مذكوردر.

بوراده كي صغير لفظى مطلق اوله رق مذكور اولسنندن
آكلاشيلور كه صغير كرك مميز اولسون كرك غير مميز اولسون
وصغير مرقوم مميز اولدني تقديرده كرك مأذون اولسون و كرك
غير مأذون اولسون وصغير مرقوم مأذون بولنديغى صورتده
كرك اذن عام ايله مأذون اولسون و كرك بالخاصه معلوم و معين
مالك هبه سنه مأذون اولسون اعمدر.

بوجهتله صبی ممیز مأذون مال صا تو بدیه پاره سنی کلا یا بعضا
مشتری به هبه ایتد کده کړک ۸۴۷ ماده و جهله قبل القبض هبه
ایتسون و کړک بعد القبض هبه ایتسون صحیح اولماز .

ینه بوجهتله بر صغیر مالنی پدرینک اذنیله صدقه ویرسه
صحیح اولماز هندیه . بوحاله صبینک استرداده حتی اولوب
فقیره اوصدقه حلال اولماز .

ینه بوجهتله بر قادین بالغه اولدینی بیانیه مهرینی زوجنه
هبه ایتد کد انصکره وقت هبه ده بالغه دکل ایدم دیسه نظر اولنور .
اول قادینک وقت هبه ده قد وقامتی بالغه قادینلرک قد وقامتی کبی
ایسه یا خود کندوسنده علامه البلوغ بوانسه بالغه دکل ایدم
دیسی قبول اولنماز ایسه ده بویه اولمدینی صورتده سوز
کندوسنکدر هندیه . ۹۸۹ ماده به باق .

کذا هبه مطلق اوله رق ذکر اولنمندن مستفاد اولورکه
هبه کړک عوض مقابله اید اولسون کړک بلا عوض اولسون
و عوض ایله اولدینی صورتده مذکور عوض کړک قیمتیجه
مال موهوبه مساوی یا آندن زیاده یا ناقص اولسون اعمدر .
یعنی صور مذکور نک کلیسنده هبه صحیح دکلدر ضمانات .

بوجهتله صغیر مالنی بر کمسنه به هبه و تسلیم ایدوبده
او کمسنه دخی اول صبی به عوض ویرسه هبه باطل اولدینی کبی
عوض دخی غیر صحیح اوله جغندن موهوبله مال موهوبی
رد ایله عوضی استرداد ایدر خانیه .

شرحاً اشارت اولنديني اوزره صغيرك هبه سنك عدم صحق
صغير كندی مانی هبه ايتديكي تقدیرده اولوب اما صغير
بر كمسنيه هديه كوتور و بده پدرم بو هديه يي سكا كوندردی
ديسه او كمسنيه بو هديه يي تناول ایده بيلور. مكر كه صبي مرقومك
كاذب ايدوكی قلبه واقع اوله هندیه .

ولی الصغير دخی مال صغيری بعوض یا بلا عوض هبه
ایده مز. «۵۸» ماده یه باق.

بو جهتله صغيرك پدری یا وصیسی یا قاضی صغيرك مانی
بعوض یا بلا عوض برینه هبه ایتسه شو هبه صحیح اولماز. زیرا
بونده ضرر دنیوی واردر جواهر الفقه ودر منتقی .

ینه بو جهتله بر کیمسه نك دیگر كمسنيه هديه ايتديكي
یوغورت اول کیمسه نك صغير اوغلنك اینك نك سودندن
پایلدیني تین ایتسه هديه جائز دكلدر . و اب مذکور سوتدن
یوغورت اعماليله آکا مالك اوله ماز هندیه .

ینه بو جهتله متوفانك بر شخص ذمتنده بولنان آلا جفنی
متوفای مرقومك صغير اوغلنك وصیسی اول شخصه هبه وعامه
دعوادن آنی ابرا ایتسه صحیح اولیوب صغير بالغ اولدقده
مذکور آلا جفنی شخص مرقومدن آلور.

شو قدر واركه ولی یا وصی الصغيرك هبه ايتديكي آلا جق
كندی عقیده لازم كلش بر آلاحق ایسه امام اعظم و محمد
رحمهما الله تعالی یه كوره شو هبه و ارا صحیح اولوب صغير

ایچون مثلاً وصی مرقوم ضامن اولور . اما امام ابی یوسفه کوره مذکور ابرا وهبه صحیح اولماز علی افندی .
متولینک هبه و ابراسنده دخی حکم منوال مشروح اوزره در .
« ۶۸۵ » ماده شرحه باق .

(اما) موهوب لهک عاقل و بالغ اولسی شرط دکلدر .
بناء علیه (بولره) یعنی صغیر و مجنون و معتوه (هبه صحیحدر) .
۸۵۲ مادهده محرر اولدینی اوزره ولیسنک یا مرپسنک یا خود
۸۵۳ مادهده مذکور اولدینی وجهله صغیر ممیزک قبضیه هبه
تمام اولور . « ۹۶۷ » مادهیه باق . چونکه صغیرک شول تصرفیکه
حقنده نفع محض یعنی من کل وجه صغیره نافع اوله و صغیره
اصلاً ضرری بولمیه اول صغیر ، ممیز اولور ایسه ولیسنک اذننه
موقوف اولمیه رق صحیح اولور . زیرا صغیره نفع محض اولان تصرفانده
صغیرک اهلیت قاصره سی کفایت ایدر مجمع الانهر و در متقی .
بروجه محرر بو کبی قاصرینه هبه صحیح ایسهده شو هبهیه
مقابل مال صغیردن عوض ویریه من ولوکه هبه بشرطالعوض
اوله حتی صغیره برشی هبه ایدیلوبده و اهب رجوع ایده مامک
ایچون صغیرک ولیسی صغیرک مالندن ولوکه جزئی بر شیئی
عوض ویرسه صحیح اولمیدینی یعنی باطل اولدینی جهتله
واهب دخی هبه سندن رجوع ایده بیلور بزازیه و انقروی .
واهبک حق رجوعنی اسقاط ایچون ولی الصغیر طرفندن
مال موهوب دکر فثاتله بیع اولنمیدر .

بو فقره ده بونلره دینلمسی حملدن احتراز ایچوندر .
 شویله که موهوبله حمل یعنی بطن امده کی جنین اولور ایسه
 هبه باطلدر . مثلاً بر کیمسه زوجه سی بطننده کی جنینه بر مالی
 هبه یا تصدق ایتسه صحیح اولماز بهجه . نته کیم بر کیمسه مالی
 حی ومیته یاخود انسان و دیواره هبه ایتسه هبه نك کلیسی حی
 وانسان ایچون اولور هندیه فی الباب الثانی . اشارالی ان الایجاب
 اذا وقع لمن یملک ولمن لایملک بوجه من الوجوه کان الایجاب
 بکماله لمن یملک هندیه فی الباب الثانی عشر .

﴿ ۸۶۰ ماده ﴾

﴿ هبه ﴾ وهدیه وصدقه وایرانک نفاذن ﴿ ده واهبک رضاسی
 لازمدر ﴾ ده واهبک رضاسی اولماق ایکی صورتله اولور .
 صورت اولی ، جبر واکراه ایله اولقله اولور . ﴿ بناء علیه
 جبر واکراه ایله ﴾ ورضاسی اولیه رق اولان ﴿ هبه صحیح ﴾
 یعنی اکراه اولنان قسمده نافذ ﴿ دکلدر ﴾ بلکه فاسددر .
 ﴿ ۱۰۰۶ ماده یه باق .

بوجهته بر کیمسه زوجه سی ضرب و شتم یاخود ابوینک
 زیارتنه کیتمکدن منع ایدوب مهرینی هبه ایتدیرسه شو هبه
 صحیح دکلدر انقروی .

ینه بوجهته بر کیمسه بالا کراه هبه ایدوبده مجبر حضورنده
 طایعا تسلیم ایتسه بیله ینه هبه صحیح دکلدر . زیرا هبه یه اکراه
 تسلیم موهوبه اکراهی مستلزم اولور . بونده مجبر حضورنده

دیندی . زیرا وقت تسلیمده مجبر حاضر اولسه هبه صحیح
اولور رد مختار فی الاکراه .

ینه بوجهتله برکیمسه دیکرینه برشی هبه استدکدن صکره
شوهبه اکراه ایله اولمشیدی دیو دعوی واثبات ایتسه موجود
اولنجه موهوبی استرداد ایدر علی افندی . وموهوب له غائب
اولوبده استردادی ممکن اولسه بدلتی مجبردن آلور ضمانات .

ینه بوجهتله مال موهوب موهوب له یدنده تلف اولسه
واهبک حق تضمینی واردر . شویله که واهب هبه ایتسیله اکراه
اولندینی کی موهوب له دخی قبول هبه ایله اکراه ایدیلهرک
قبول ایتسه نظر اولنور . موهوب له اگر واهبه اعاده ایچون
قبض ایتدم دیرایسه یمینی ایله تصدیق اولنهرق موهوب له یدنده
امانت اولور . اما موهوب له کندیمه ملک اولمق یاخود مجبره
ویرمک اوزره آلم دیر ایسه مکره « ۹۱۰ » مادهیه مبنی مخیر
اولوب دیلرسه مجبره دیلرسه موهوب له تضمین ایتدیرر
ضمانات . « ۲ » مادهیه وشرحنه باق . نتهکیم موهوب له مکره
اولمیهرق آلور ایسه واهب ینه بروجه محرر تضمینده مخیردر .
جبر واکراه ایله اولان هبه صحیح یعنی نافذ اولمبوب فاسد
اولغله موهوب له مال موهوبه ملک فاسد ایله مالک اولور .
وبعد زوال الاکراه اجازته توقف ایدر . زیرا عقد هبه وتسليم
ملکی اثبات ایدر . ولوکه بالاکراه اوله . لکن اکراه نفاذی
منع ایلر مجمع الانهر فی الاکراه علی البیع ودرمنتقی فی الاکراه .

بوجهتله یعنی بالا کراه وقوعبولان هبه وتسليم قابل اجازت اولمغله مکره بعد زوال الا کراه هبه مذکورہ یی مجیز اولسه نافذ اولورکه اجازت یا قولاً اولور. مجیز اولدم وراضی یم دیمک کبی. یا فعلاً اولور. مجبر حضورنده اولمیه رق مال موهو بی طایعا تسليم یا خود هبه نك عوضنی طایعا قبض وقبول کبی. حتی بالا کراه عقد هبه اولندقدن صکره واهب عوضی طایعا قبول ایتسه بالا کراه واقع اولان هبه یی مجیز اولمش اولور علی افندی و ضمانات .

مجمله ده هبه صحیح دکلدر دینامسیله ایکی حکم مستفاد اولور .

حکم اول ، هبه یا لکزا کراه واقع اولان قسمده نافذ دکلدر . اما اکراه واقع اولیان قسمده هبه نافذدر . شویله که قابل قسمت اولیان بر مالک بر حصه سنی بر شخیصه هبه ایله اکراه اولنان کیمسه اومالی او شخص ایله دیگر بر آدمه هبه ایتسه شخیص مرقوم حقنده کی هبه صحیح دکل ایتسه اول آدم حقنده کی هبه صحیحدر ضمانات . نته کیم واهب هبه ایدلمکه اجبار اولنان مالک غیر سنی هبه ایدرسه هبه نافذ اولور . شویله که مجبر مثلاً الی مجیدیه یی هبه ایله اکراه ایتدیکی حالد مکره اون آلتونی هبه ایتسه جائز وجنسین تخالف ایتدیکی جهتله واهب هبه سنده طایع اولور .

حکم ثانی ، مکره اکراه اولنان عقدک غیر سنی ایقاع

ایدرسه اول عقد نافذ اولور . بناءً علیه مجبر هبه یه اکره
ایتمشکن مکره تصدق ایتسه نافذ اوله جنی کبی مجبر تصدقه
اکراه ایتدیکی حالدده مکره هبه ایتسه نافذ اولور ضمانات .

صورت ثانیه، واهبه واقف اولمدیغی لساندن هبه ایتدم
جمله سنك معناسنی متضمن سوزلی سويلتمك ايله اولور. شویله که
موهوب له واهبه « وهبت منك مالی عليك من الالف » دی
دینلمسیله واهب دخی لسان عربی یه وبو جمله نك معناسنه غیر
واقف ایکن مذکور کلامی سویلسه آکا الاجق هبه ایدلمش
اولماز . کرچه بومسئله ده اکره یوغیسه ده واهبک رضاسی
یوقدر انقروی .

فائدتان

۱ معناسی عاقدك معلومی اولمیان لفظ ايله بعض فقها هیج
بر عقد صحیح اولمیه جنی وبعض فقها هر عقد صحیح اوله جنی
وبعض فقها نکاح کبی هزل وجدی مساوی اولان عقد صحیح
وبیع کبی هزل وجدی مساوی اولمیان عقد غیر صحیح اوله جنی
بیان ایلمشلردر در منتقی شرح الملتقی فی اول النکاح .

۲ اون پاره ظنیله سائله قرق پاره ویرلدکه بعض فقها
ویررکن اون پاره یی ویردم دیرایسه استرداد اولنور . بونی
ویردم دیرایسه اولنه ماز دیمشله و دیگر بعض فقها ایسه ایکی
حالدده دخی استرداد اولنه میه جنی بیان ایتشلردر هندیه فی الباب
الثانی عصر .

— باب ثانی —

﴿ احکام هبه بیاننده اولوب ایکی فصلی شاملدر ﴾

— فصل اول —

﴿ هبه دن رجوع حقننده در ﴾

یعنی بوفصلده هبه دن رجوع جائز اولان و اولیان مسائل بیان اولنه جقدر .

بوعنوانده کی هبه لفظی موهوب معناسنده در . زیرا رجوع آنحق اعیان حقننده اوله بیلوب بوخسه اقوال حقننده اوله ماز ابوالسعود . و هبه نك موهوب معناسنده استعمال قلندینی ۸۳۳ ماده شرحنده بیان ایدلمشیدی .

هبه ده هدیه دخی داخل اولمغله و اهیک رجوعی جائز اولان مسائلده مهدی دخی هدیه سننده رجوع ایده بیلور قهستانی . صدقه دن رجوع جائز اولمغله بونده هبه تعبیری صدقه دن احتراز ایچون اولدینی مثللو بونده کی هبه دن مقصود دخی غنییه اولان هبه اولوب اما فقیره ایدیلاان هبه صدقه اوله جغندن بوندن دخی رجوع اولنه ماز .

هبه دن رجوع آتیده بیان اولنه جنی اوزره صحیح ایسه ده دنائت اولمغله برابر بعض علمایه کوره رجوع عن الهبة کراحت تحریمیه ایله مکروه در تنویر وقهستانی . و دیگر بعض فقهایه کوره کراحت تنزیهیه ایله مکروه در که کراحت تنزیهیه کراحت

تحریمه دن اخف و مباح قیلندن یا خود مباحه قریبدر
مجمع الانهر و در متقی .

۸۶۱ ماده

(موهوب له) بعد الایجاب آنک یا نائینک (قبض)
ایتمی (ایله موهوبه) بطریق الهبه ملک غیر لازم ایله (مالک)
اولور . (هدایه . موهوب له واحد ایسه مستقلا و متعددا ایسه
بالاشتراك مالک اولور لر که شو ملک مستحق السلامه دکلدر .
مثلا برکیمسه ایکی کسنه خطا با بومالی ایکی کزه هبه ایتدم
دیوب تسلیم و آنلرده اتماب و تسلیم ایدر لر ایسه موهوب لهما
مناصفة مالک اولور لر . فقط ثبوت ملکده شرائط آتیه نک
وجودی لازمدر .

۱ موهوب محوز یعنی واهبک ملک و حقوقدن مفرز و ۲
موهوب واهبک ملکله غیر مشغول اولمق و ۳ هبه بطریق
المواضعه اولماق و ۴ قبض مذکور قبض کامل بولمق یعنی وقت
قبضده قابل قسمت اولان موهوب مشاع اولماق شرطدر که
تفصیلاتی ۸۵۸ ماده سی شرحنده ذکر اولنمشدر . مواضعه دخی
قریبا ایضاح اولنور .

خلاصه ، موهوبده موهوب لیهک ملکینک ثبوتنده
موهوبک قبضی شرطدر . بوکا متفرع بعض مسائل بوجه آتی
بیان اولنور .

۱ بعد العقد وقبل القبض موهوبده حادث اولان زوائد

واهیکدر . حالوکه بعد البیع وقبل القبض بیعده حادث اولان
زوائد مشتریك ایدوکی ۲۳۶ ماده ده مصرح اولغله بو خصوصه
بیع ايله هبه افتراق ایدر قاعديه .

۲ قبل القبض واهب خود بخود رجوع ایده بیلور .
« ۸۶۲ » ماده یه باق .

۳ واهبك بعد الایجاب موهوب الهی قبضدن نهی
ایده بیلور . وبعد النهی موهوب له آرتق قبض ایده من . « ۹۶ »
ماده یه باق .

۴ قبل القبض طرفیندن بری فوت اولسه هبه باطل اولور .
« ۸۶۲ » ماده یه باق .

۵ قبل القبض موهوبده واهبك تصرفی صحیح وموهوب
لهك تصرفی غیر صحیحدر . « ۹۶ » ماده یه باق . حتی واهب
رجل غائبه دراهمی هبه ایدوبده بر رسول ايله کوندر .
دیکنده موهوب له رسوله بو مباحی سکا تصدق ایتدم دیسه
جائز اولمدیغی کبی رسوله بنم طرفدن فقرایه تصدق ایت دیسه ده
اوده تصدق ایتسه واهب رسوله تضمین ایتدیرر خانیه
فی اوائل الهبة .

ایضاح القیود

آنك یا نائبك ، موهوب لهك قبضی ظاهر اولوب نائبك
قبضی بروجه آتی ایضاح اولنور . شویله که برکیمسه برمالی
دیگر کسمنه هبه ایدوبده موهوب له اومالی قبل القبض مجلس

مذکورده بر نخسته هبه یا بیع یا ایجار ایدوب شخص مرقوم
آنی قبض ایتسه شوقبض اوکمنهك قبضی مقامه قائم وهبه
جائز اولور . اما ایکنجی بیع یا هبه ثابیه یا ایجار جائز اولماز
قاعدیه .

۲ بطریق الهبه ، موهوب لهك موهوبه مالکیتی هبه
ایله اولوب یوخسه بشقه شی ایله دکلدر . بناءً علیه مدیون ،
داینه بر مالی هبه و تسلیم ایتسه داین ، مذکور ماله
هبه ایله مالک اولوب یوخسه دینی یعنی آله جنی مقابلنده مالک
اولمش اولماز هندیه . بو حالده مدیون دینی بشقه جه موهوب
لهه ویرمسی لازم کلور .

۳ غیر لازم ، موهوب له قبض ایله موهوبه مالک اولور
ایده شوملك صور سبعةك ماعداسنده لازم اولماغله واهب
هبه سندن مع کراهة التحريم رجوع ایده بیلور مجمع الانهر
وطحطاوی .

۴ بالاشترک ، مثلاً واهب بر مالی بر اوغلنه و بر قزینه
حصه لری تعیین ایتمهرك بطریق الاجمال هبه ایتسه امام ابی
یوسفه کوره مناصفة مالک اولور لر . یوخسه ارثده اولدیغی
کبی ثلث و ثلثان اوله رق دکل انقرونی .

۵ مستحق السلامه دکلدر ، عقد هبه و عقد صدقه تبرع
اولمغله مستحق السلامه دکلدر درر . شویله که موهوب قبض
اولندقدنصکره موهوب له یدنده تلف اولوبده بعده بر

مستحق حبسه مخیردر . دیلرسه واهبه تضمین ایتدیرر .
 وبوحالده موهوب له رجوع ایدهمز . و دیلرسه موهوب له
 تضمین ایتدیرر . و بو وجهله موهوب له تضمین ایتدیرسه
 موهوب له واهبه رجوع ایدهمز هدایه وکنز وندیه . «۶۵۸»
 مادهیه و شرحنه باق . شو قدرکه واهب موهوبك سلامتی
 موهوب له ضامن اولورسه اول حالده موهوب له یدنده تلف
 اولمغله مستحق آکا تضمین ایتدیرسه موهوب له دخی واهبه
 رجوع ایدر عبدالحلیم و غایه عن الذخیره و هندیه فی الباب
 الخامس .

موهوب له ، مال موهوبه مالک اولمق ایچون هبه نك بطریق
 المواضعه اولماسی شرطدر . بطریق المواضعه اولورایسه موهوب
 ینه واهبك ملک اوله رق قالور . شویله که بر کیمسه ملک
 خانه سنی بطریق المواضعه زوجه سنه هبه و تسلیم ایتدکدنصکره
 اول کیمسه فوت اولسه مذکور خانه اول کیمسه نك بالجمله
 ورثه سنه موروث اولور . اکر مواضعه ثابت اولور ایسه .
 یوخسه زوجه مزبوره آتی مستقلة ضبط ایدهمز .

صحت هبه یه مانع اولان مواضعه ، عقد هبه یه مباشرت
 ایتدن اول ، موهوب واهبك ملکته مقرر اولمق اوزره
 واهب ایله موهوب له اتفاق ایدوبده صورة هبه یی اقرار
 و تصدیق ایتدکن عبارتدر ابوالسعود العمادی .

(قبل القبض واهب خود بخود) یعنی ۸۶۴ ماده ده ذکر
 اولندینی اوزره رضا و قضایه حاجت قالمی برق (هبه دن)
 و هدیه و صدقه دن کلایا بمضا (رجوع) یعنی اتمام هبه و هدیه
 و صدقه دن امتناع (ایده یلور) مواد آتی ده بیان اولنان
 موانع رجوع دن بری کرک بولنسون و کرک بولنسون و واهب
 طرفندن موهوبك قبضی ایچون موهوب لهه اذن صرح کرک
 ویرلمش اولسون کرک اولسون و موهوب له کرک حاضر اولسون
 و کرک غائب اولسون. زیرا قبل القبض هبه ذاتا تمام دکلدر.
 «۸۳۷» ماده یه باق.

مثلا بر کیمسه کبیر اوغلنه بر مالی هبه ایدوب قبل التسلیم
 نادم اوله رق رجوع ایتسه صحیح اولور بهجه.
 شرح ماده صره سنده اشارت اولندینی اوزره قبل القبض
 واهبك کل هبه سندن رجوعه حق بولندینی کی بعض هبه-ندن
 دخی رجوعه حق واردر. شویله که مثلا واهب اون آلتونی
 هبه ایدوبده قبل القبض دردنده رجوع ایدرك آلتیسنی تسلیم
 ایتسه رجوعده اتمامده صحیح اولور قبل القبض هبه ذاتا تمام
 اولندینی جهته رجوع اتمام هبه دن امتناع دن عبارتدر. نته کیم
 اثنای شرحده اشارت اولندی. ای فلم یخرج الموهوب عن
 ملك واهبه فلا يقال ان له رجوعا فيه طحطاوی.

قولا رجوع، رجوع ایتدم هبه یی ابطال ایلدم و هبه یی

نقض ایتدم و موهوبی ملکمه اعاده ایلدم دیمک کبی سوزلردر
 هدیه . فعلا رجوع دخی بعد الهیه قبل التسلم واهب مال
 موهوبی شخص آخره هبه و تسلیم یاخود بیع و تسلیم ایلتمک
 کبی شیردر . بو جهتله واهب بر مالی زیده هبه ایدوبده بعده
 قبل التسلم و القبض عمروه هبه ایدوب ایکیسنده قبضیه امر
 ایتسهده آنلرده قبض ایتله مال موهوب عمروک اولور وزیده
 قبضیه امر ایدوبده اوده قبض ایتسه باطل اولور هندیه فی الباب
 الثانی . زیرا قبل القبض شخص ثانی یه هبه ، اوله اولان هبه دن
 رجوع اولوب مؤخر اوله قبض ایله امر ایتسی هبه اولوب
 امانه قبض اولور .

قبل القبض تعبیری دلالت ایدرکه بوراده کی هبه دن مقصود
 هبه الاعیان اولوب بناءً علیه دینک مدیونه هبه سندن رجوع
 اولمه ماز . نته کیم ۸۷۳ ماده ده ذکر اولنیور بحر .

۸۶۳ ماده

((واهبک بعدالایجاب)) یعنی مثلاً بونی سکا هبه ایتدم
 دیدکدنصکره قبل القبض ولوکه بعدالقبول اوله ((موهوب الهی
 قبضدن نهی ایتسی)) هبه دن ((رجوع)) منزلنده ((در)) زیرا
 ۸۴۱ ماده حکمنجهده هبه ده قبض ، بیعده قبول منزلنده اولوب بایع
 بعدالایجاب قبل القبول مشتری قبولدن نهی ایتسه بو نهی
 ایجابدن رجوع اوله جفی کبی نهی عن القبض دخی هبه ده کی
 ایجابدن رجوع اولور طحطاوی .

کرچه ۸۴۳ ماده حکمنجه واهبک ایجابی دلالة قبضه اذن
ایسه ده بو ماده وجهله نهی ایدلمسی صراحت اولمغله ۱۳ ماده
موجبجه صراحت ترجیح ایدلدی . بناءً علیه بوندنصکره
موهوب له موهوبی کرک مجلس هبه ده و کرک بعدالافراق
قبض ایتسه غاصب اولور .

قبضدن نهیک رجوع اولمسی مطلقدر . یعنی واهب بعدالایجاب
قبض موهوب ایچون موهوب لهه کرک صراحة اذن ویرمش
اولسون کرک اولسون . شویله که مثلاً واهب کبیر اوغلنه
خطابا این پنج دینار ترا دیهرک آنک طرفنه آتدقدنصکره اوغلی
مومی الیه آتی قبض ایتدین اول، واهب مذکور دینارلری کیرو
آلسه هبه صحیح اولماز یعنی ایجابدن رجوع ایله هبه باطل اولور
هنده و طحطاوی . صراحة اذن ویردکدنصکره دخی
رجوع ایده بیلور . زیرا بونده دیکرک حقنک ابطالی یوقدر
چونکه ایجاب و قبول بدون القبض حکمی افاده ایلمز واقعا
واهبک رجوعی موهوب لهک حق تملکنی ابطاله مؤدی
اولور سده حقیقت ملک حق تملکدن اقوی اولمغله حق تملک
حقیقت ملکه معارضه ایده من ۱۸۴ ماده شرحنه باق .

— ۸۶۴ — ماده

﴿ واهب ﴾ وکذا الواهبة المتعارف فی امثالها تغليب الذکر
علی الاناث کفی خطابات الشرع ﴿ بعدالقبض موهوب لهک ﴾
وکذا مهدی لهک ﴿ رضاسیله هبه و هدیهدن ﴾ کلا یا بعضا

«رجوع ایدہ بیلور.» ولو کہ واہب حق رجوعی اسقاط ایتمش بولنہ
و موہوب مدیون دن بشقہ سنہ ہبہ ایدی لان دین بولنہ. لان الہبۃ ہبنا
تملیک لا اسقاط طحطاوی .

ہبہ دن رجوعک جوازی حدیث شریف و معقول ایلہ
ثابتدر. حدیث شریف دخی الواہب احق بہبتہ «ہوندہ کی ہبہ
دخی موہوب معناسنہ در» مالم یثب منها قول شریفیدر کہ مالم
یعوض دیمکدر . یعنی واہب مال موہوبی موہوب الہہ تسلیم
ایتدکد نصکرہ دخی عوض ویرلمدکجہ ہبہ سنہ احقدر . و مقصود
عالی بعد التسلیم بیان احقیتدر . زیرا قبل التسلیم حقیقۃ ہبہ
اولماز . لا یقال یجوز ان یکون المراد منه ما قبل التسلیم فلا
تکون حجة لانا نقول لا یصح ذلك لانه اطلق اسم الہبۃ علی المال
و ذالا یکون قبل القبض و التسلیم ولانہ علیہ الصلاۃ و السلام
جعلہ احق بہا و هذا یقتضی ان یکون لغيرہ فیہا حق و ذلك
انما یکون بعد القبض ولانہ لوکان كذلك لحالا قوله مالم یثب
منہا من الفائدة اذہوا حق وان شرط العوض قبلہ فتح القدير.
ہبہ نک واہبہ راجع ضمیرہ اضافتی ماکان اعتباریلہ در .
نتہ کیم اکلنا خیز فلان دینسور . ہر نقدر آکل آنی اول
فلان دن اشترا ایتمش ایسہدہ .

دلیل عقلی شودر کہ ہبہ دن مقصود عادۃ عوضدر . حتی
الایادی قروض یعنی احسانلر اودنجدر زیدہ عمروہ ایولک
واحسان ایدرسہ اودنج اولہ جغندن عمرو دخی زیدہ ایولک

ایتمیدر . سیئته نک جزاسی سیئه اولدینی کبی حسنه نک جزاسی
دخی حسنه اولمق اقتضا ایدر . لان العادة المطردة ان الانسان
یهدی الی من فوقه لینصره بجاهه والی من دونه لیخدمه والی
من یساویه لیعوضه و اذا تطرق الخلل فیما هو المقصود من العقد
تیمکن العاقد من الفسخ کالمشتری اذا وجد بالمیع عیبا غنابه .

هبه دن مقصودك عوض اولیشنی شرع ایله دخی تأید
ایامشدر . شویله که تهادوا تحا بو احدیث شریفی وارد
اولمشدر که تفاعل صیغه سنک جانیمندن فعلی اقتضا ایدر .
ایمدی هبه دن مقصود عوض اولدینی خالده واهبک مقصودی
اولان عوض حاصل اولینجه واهب ایچون حق رجوع
ثابت اولدی . مشتری میبعده عیب قدیم بولدقده مقصودی
بولنان صفت سلامت فوت اولسی جهتمیله اعاده مبيع ایله
استرداد ثمن حق مشتری ایچون ثابت اولدینی کبی زیلعی .
بو دلیلله شو وجهله اعتراض اولنورکه واهب اثنای هبه سنده
نفی عوضی تصریح ایدر سه رجوعك تمتنع اولسنی اقتضا ایدر .
لانه ظهران العوض لیس بمقصود . حالبوکه حدیث عالی مطلق
اولمغله نفی عوض ایله تصریح ایدلسه بیله جواز رجوعی اقتضا
ایدر . لکن بوکا ایکی وجهله جواب ویریلور وجه اول ، وجه
مذکور نوع حکمی اثبات ایچون علت نوعیه نک بیانی اولوب
بو ایسه هر صورتده اطرادی ایجاب ایتمز . وجه ثانی نفی عوض
صورتنده دخی واهبک مقصودی عوض اوله بیلوب نفی عوض

موهوب لهك مروتنك هيچانه سبب اولسون ايچوندر فتح .
ايضاح النبود

۱ واهب ، مهدي دخي واهب کي هديه سندن رجوع
ايدہ بیلہ جکی جهته واهب تعبیری مهديدن احتراز ايچون
دکسه ده متصدقدن احتراز ايچون اوله رق ۸۷۴ ماده ده دخي
ذکر اولنديغي اوزره متصدق صدقه سندن رجوع ايدہ من
طحطاوی .

۲ بعد القبض ، بو تعبیر احترازی اوليوب ۸۶۲ ماده ده
ذکر اولنديغي اوزره قبل القبض دخي رجوع ايدہ بیلوب فقط
بوایکی رجوع بینده فرق واردر . شویله که قبل القبض رجوع
اتمام هبه دن امتناع ايکن بعد القبض رجوع هبه تامه يي فسخ اولور .
۳ رضا سيله ، فقره آتیه ده مذکور اولديغي اوزره بو
تعبیر قضا دن احتراز ايچون دکسه ده رضا ویا قضا اولمق سزین
جبرا و غصبا واهبک موهوبی استرداد ایتسندن احتراز ايچوندر که
بو حالده واهب غاصب اوله رق ضمان لازم کلور .

۴ هبه دن ، بوندن مقصود موهوبدر . زیرا رجوع اعیانده
ممکن اولوب یوخسه اقوالده ممکن دکلددر بحر . نته کیم شوفصل
اول عنوانی شرحنده ذکر اولندی .

۵ کلایا بعضا ، هبه دن کلا رجوع صحیح اولديغي کي بعضا
رجوع دخي صحیح اولور طحطاوی . کلا رجوع ظاهر اولوب
بعضا رجوعه کلنجه مثلا بر کیمسه کندی برادريله بر اجنبی به

بر مالی هبه و تسلیم ایتدکد نصر کره واهب برادری حصه سنده
 « ۸۶۶ » ماده یه مبنی رجوع ایده من ایه ده اجنبی حصه سنده
 رجوع ایده بیلور .

نته کیم بر کیمسه بر مالی زیده هبه و عمر وه صدقه اوله رق
 معا اعطا ایتدکد نصر کره زیدک حصه سنده رجوع ایتسه صحیح
 اولور .

کذا بر کیمسه بر قوناغی زیده عرصه سیله معا هبه و تسلیم
 ایتدکد نصر کره قوناغی محترق اولوبده عرصه سنده رجوع ایتسه
 صحیح اوله جنی کبی ایکی کیمسه بر مالی دیگر کیمسنه یه هبه
 و تسلیم ایلدکلرند نصر کره بر یسی حصه سنده رجوع ایتسه صحیح
 اولور و اقامات .

کذلک ایکی کیمسه بر شخصه بر بارگیری هبه و تسلیم
 ایدوبده بر یسی غائب اولسه حاضر اولان حصه سنده رجوع
 ایده بیلور خایه .

۶ رجوع، رجوع عن الهبه صحیح ایه ده شوفصل اول
 عنوانی شرحنده ذکر اولندیغی اوزره رجوع مذکور قبیحدر .
 زیرا العائد فی هبه کالعائد فی قبیئه والعائد فی هبه کالکلب یقی ثم یعوض
 حدیث شریفلری وارد اولمشدر . مانع رجوع اولیان مواده
 واهب رجوع ایدوب موهوب له دخی رجوعی قبول و موافقت
 ایتدکده رجوع تمام وملکیت واهبه عودت ایتمش اولوب
 بونک تمامیتده قبض واهب شرط دکلدر هندیه فی الثانی عشره .

ایمدی رجوع عن الهبه رضاء ایسه بونده کلام یوغیسه ده
قضاء اولنجه حاکم ایچون بوکی مکروه و معصیت اوزره اعانه
برله معصیت اخرای ارتکاب ایتسی نصل صحیح و معصیتیه
اقدامی حاکم ایچون نصل جائز اولور. و موهوب الهک امتناعی
حالتده رضاء رجوع جائز اولنجه قضاء دخی جائز اولماق
اقتضا ایدر. زیرا قضاء القاضی حرامی تحلیل و حلالی تحریم
ایلمز.

جواب مکروه اولان هبه دن رجوعک نفسی اولوب یوخسه
هبه دن رجوعک جوازی دکلدر. محل حکم ایسه جواز رجوع
اولوب یوخسه نفس رجوع دکلدر. چونکه حاکم انشای
حکمنده هبه کدن رجوع ایت دیموب بلکه مع الکراهه هبه دن
رجوع سنک ایچون وارد دیر. بوصورته واهب رجوع
ایتدکده مکروهی بطوع نفسه کندوسی ارتکاب ایتش اولوب
یوخسه اعانه قاضی ایله دکل فتح التقدير. القلب لا یطعن الی
هذا الفرق.

الفاظ رجوع ۸۶۲ ماده شرحند. ذکر اولنمشیدی.
ایمدی واهب رجوعه دلالت ایدم جک بر شی ایله رجوع
ایتموبده بلکه مال موهوبی موهوب الهه تسلیم ایتدکدن سکره
شخص آخره هبه و تسلیم یا رهن و تسلیم یا خود بیع و تسلیم
ایسه یا خود موهوب ثوبی بویاتسه یا خود موهوبی جنسیله
خلط ایتسه رجوع اولماز هندیه. بلکه ضمان لازم کلور.

رجوع، ایکی نوعدر. نوع اول، حقیقه رجوعدر. واهب
 هبه مدن رجوع ایتدم ویر دیوبده موهوب له دخی اعاده ایتسه
 حقیقه رجوع اولور. نوع ثانی، حکما رجوعدر. شویله که
 طرفین رجوع اوزرینه تراضی ایتدکاری کی حاکم دخی رجوع
 ایله حکم ایتدیکی حالده موهوب له مل موهوبی واهبه هبه
 ایتسه ده ارده قبول ایتسه واهب آنی قبض ایتدکجه آکا مالک
 اوله ماز. و قبض ایتدکده بالتراضی یا بقضاء الحاکم رجوع منزلنده
 اوله رق موهوب له ایچون بوهبه سندن رجوعه حق یوقدر
 هندیه و طحطاوی.

شو وجهله بالرضاء رجوعک صحتنده فقره آتیته ده اولدینی
 کی موانع رجوعدن بری بولنماسی لازمیدر؟ یعنی مثلاً برکیسه
 کبیر اوغلنه برمالی هبه و تسلیم ایتدکدن صکره شو هبه سندن
 رجوع ایتدیکی بیانیله موهوبی طلب و اوغلی دخی رجوع
 مذکوره بناء مال موهوبی پدرینه اعاده و تسلیم ایتسه رجوع
 مذکور صحیح میدر؟ بومسئله محتاج تفصیلدر. شویله که موهوب له
 مانع رجوعه واقف ایکن اعاده و تسلیم ایدرسه صحیح اولور.
 یعنی واهبک رجوعی اوزرینه موهوب له دخی مانع رجوعه
 واقف اوله رق موهوبی رضا سیله موهوب له اعاده و تسلیم
 و واهب دخی تسلیم و قبض ایدرسه رجوع صحیح و هبه مستقله
 اولمق اوزره منعقد اولور.

واهب قبض ایدرسه دینلدی. زیرا واهب قبض ایتدکجه

موهوب اهلك ملكى اولمق اوزره قاله جنى جهتله موهوب له
آنده تصرف ايتسه جائز اولور طحطاوى. مانع فيسخ بولنان
هرهيه نك فسخته حكم بويله در. يعنى واهب قبض ايتدكجه
آكا مالك اوله ماز هنديه فى الباب الثانى عشر.

نته كيم متصدق اقاله صدقه يي طلب ايتمكه متصدق عليه
اقاله ايتسه متصدق اول صدقه يي قبض ايتدكجه اقاله تمام اولماز.
زيرا معامله مذكوره حقيقته اقاله اوليوب بلكه هبه مستقيله در
حتى متصدق آنى قبض ايتدين متصدق عليه فوت اولسه مناقضه
يعنى اقاله صدقه باطل اولور. ۸۶۶ ماده ده محرر اشخاصه وقوع
بولان هبه نك حكى دخی بويله در بزايه ورد مختار و هنديه.

اما واهبك رجوع مذكوري اوزرينه موهوب له مانع
رجوعه واقف اوليه رق واهبك حق رجوعى وار ظنيله اعاده
وتسليم ايتسه شور رجوع صحيح اولماز. ۷۲۵ ماده يه باق. مثلا
بركيسه شوقدر اچقه سنى بر شىخص اجنبى يه هبه وتسليم و شىخص
مرقوم دخی آنى استهلاك ايتدكدن صكره اول كيمسه نام
اولوب هبه مدن رجوع ايتدم مبلغ مذكورك ضمانى سكا لازم
كلور ديو دعوى و مو آخذه ايتدكده شىخص مرقوم دخی كندويه
ضمان لازم كلور ظنيله يعنى ۸۷۱ ماده نك حكمنه عدم وقوفه
مبنى اول كيمسه يه اولقدر اچقه يي ويردكدن صكره اول كيمسه نك
هبه سندن رجوعى مشروع اولمديغنه شىخص مرقوم واقف
اولدقده مبلغ مزبوري اول كيمسه دن طالب واخذ ايده بيلور
بهجه.

۷ ولوکه حق رجوعی اسقاط ایده، واهب ایچون حق رجوع مطابقدر . یعنی واهب انشای هبه سنده حق رجوعی اسقاط اتمسه رجوع ایده بیله چکی کبی اسقاط وبرا ایتدکده شواسقاطک حکم و تأثیری اولیوب حق رجوع ینه باقی قالور. چونکه بوحق قابل اسقاط وبرا اولدیغندن ۱۵۶۲ ماده نك فروعاندن اوله ماز . ۵۱۰» ماده شرحنه دخی باق . شو قدرکه حق رجوعدن برمال اوزرینه مصالحه اولسه لر صحیح و اومال هبه یه عوض اوله رق حق رجوع ساقط اولور انقروی وجواهر الفتاوی و درمختار .

﴿موهوب له﴾ رجوع واهبه ﴿راضی اولماز ایسه حاکمه مراجعت﴾ ایله موهوب له هبه یی انکار ایلرایسه واهب هبه یی بالاثبات یاخود تکلیف اولنان یمیندن موهوب له بالنسکول مال موهوبك استردادینی طلب ﴿ایلر .﴾ شو ایکی فقره دن اکلاشیلورکه هبه دن رجوع تراضی طرفین ایله صحیح ولدینی کبی حکم قاضی ایله دخی صحیح اولور . ایمدی رضای طرفین ایله رجوع جائز اولدی . زیرا طرفینك نفسلری اوزرینه ولایتی واردر . حکم حاکم ایله ده رجوع جائز اولدی . زیرا حاکم عامه یعنی قضاسی داخلنده اولان اهالی اوزرینه ولایتی واردر .

اما بووجهله تراضی طرفین یا حکم حاکم اولمقسزین هبه دن رجوع جائز اولماز . زیرا هبه دن مقصود اولان شیئك حصول یا عدم حصولنده خفا واردر . چونکه واهبك هبه دن مقصودی

ثواب و تجب اولیٰ جائز و محتملدر . بوحالده واهب رجوع
ایده مامك لازم كلور . شو جهتله كه عقد واهبك مقصودی افاده ایتمشد .
نته كیم واهبك مقصودی عوض اولیٰ دخی جائز و محتملدر .
بوحالده واهب رجوع ایده بيلمك لازم كلور . شو سینه كه عقد
واهبك مقصودی افاده ایتماشدر . ایسته شوایکی ختمك بری تعیین
و تخصیص ایچون بروجه مشروح رضا یا قضا لازم كلدی
جمع الانهر و درر .

(حاكم دخی مواد آتیدهه بیان اولنه حق) ۱ (موانع
رجوع) دن بری حال عقد هبهده (بوغیسه هبهیی) ۲ (فسخ
ایده بیلور .) یعنی فسخ ایتمی لازم كلور . اما موهوب له
راضی اولمدینی کی حاكم دخی فسخیله حکم ایتدین اول مال
موهوب لهك ملكندن چیقماز . (اما موانع رجوعدن بری بولنسه)
حاکم هبهیی (فسخ ایده مزه)

ایضاح القيود

۱ موانع رجوع ، اما موانع سبعه رجوعدن بری بولنور
ایسه حاكم بطلان رجوع ایله یعنی واهبك حق رجوعی
اولمدیغنه حکم ایدر . شو قدر كه هبه فاسدهده مانع رجوع
بولنسه بیله ینه رجوع جائز و صحیحدر لان المقبوض منها
مضمون بعد الهلاك فله الرجوع قبله طحطاوی نته کیم ۸۵۸
ماده شرحنده کی ۱۹ مسئلهده ذکر ایدلدی . موانع رجوع دمع
خرقه حرفلریله جمع ایدلمشدر كه ۸۶۶ ماده شرحنده تفصیل
اولنور . فقط بوحکمدن صکره مانع رجوع زائل اولسه حق

رجوع دخی عودت ایدر . « ۲۴ » ماده یه باق مانع رجوع زوجیت، قرابت . هلاک العین و موت العاقدین صورتلرنده زائل اوله ماز طحطاوی . اما عوض و خروج عن الملك و زیاده متصله صورتلرنده زائل اوله بیلور .

عوضده زوال ، ۸۶۸ ماده شرحنده ایضاح اولنه جنی اوژره اعطا اولنان عوض بالاستحقاق ضبط اولنورسه و اهب دخی رجوع ایده بیلور .

زیاده متصله ده زوال ، بروجه آتی ایضاح اولنور شویله که مثلاً موهوب عرصه ده بنا انشا ایدلمکله ۸۶۹ ماده وجهله زیاده متصله حاصل اولمغله حاکم حق رجوع بولمدیغنه حکم ایتدکن صکره موهوب له مذکور بنایی بالهدم عرصه هیئت اصلیه سنه رجوع ایتسه و اهبك حق رجوعی عودت ایدر . بو، هر نقدر ساقط اولان حق عودت ایتمز قاعده سنه منافی کورینور ایسه ده بونده حق رجوع ساقط اولمیوب حق رجوعه مانع بولنمق جهته رجوع اولنه مدی و هذا من باب زوال المانع کما اذا تزوجت المرأة وسقط حقها فی الحضانة فانها اذا بانت عاد حقها فیها لزوال المانع طحطاوی . تفصیلات مذکوره « ۸۶۸ » ماده شرحنده بیان ایدیلان « بالعکس زوجیت » فقره سنه منافی دکلدر . زیرا بوراده مانعدن مراد بعد الهبه طاری اولان مانع رجوع اولوب مذکور مانع طارینک زوالیه حق رجوع عودت ایتمکده اولوب لیکن فقره مذکوره ده مانع رجوع مانع مقارن اولمغله

آنک زوالیله حق رجوع عودت ایلمز درر. خروج عن الملك ده
زوال مانع صورتی دخی بوجه آتی بیان اولنور شویله که ۸۷۰ ماده
شرحنده تفصیل اولنه جفی اوزره موهوب له مال موهوبی شخص
آخره هبه و تسلیم ایتدکه واهب آرتق رجوع ایده من ایسه ده
موهوب له بالرجوع موهوبی استرداد ایتدکه واهب دخی رجوع
ایده بیلور .

رجوع دن امتناع ، مانع مقداریله تقدیر اولنور . شویله که
برکیمسه بر آتی برادر یله اجنبی به هبه ایتسه برادری حصه سنده
رجوع ایده من . اما اجنبی حصه سنده رجوع ایدر . نته کیم
بر کیمسه بر مالی زیده هبه و عمروه صدقه اوله رق ویرسه
هبه دن رجوع ایده بیلوب اما صدقه دن رجوع ایده من واقعات .
«۸۷۴» ماده یه باق. کذا موهوب له مال موهوبك نصفه مقابل
عوض و یرویده واهب دخی قبول ایتسه نصف مذ کورده
۸۶۶ ماده یه منی رجوع ایده من ایسه ده دیگر نصفده رجوع
ایدر ابوالسعود المصری .

۲ فسخ ایده بیلور ، بو تعبیر دلالت ایدر که فسخ هبه ايله
لحوق حکم دن اول موهوب ملک موهوب لهده باقیدر . بوجه تله
واهب رجوع ایتدیکی بیانیله موهوبی طاب ایتدیکی حالد
موهوب له اعاده دن امتناع ایدوب بوائنده تلف اولسه یا خود
آخره هبه و تسلیم یا بیع کبی بر وجهله استهلاك ایتسه جائز

اولوب موهوب لهه ضمان لازم گلز لقیام ملکه عنایه . تصرفات مذکوره ولوکه اثنای محاکمه و مرافعه ده اوله بزازیه و اصلاح ایضاح . ینه بو جهتله ماده آتیسه ده ذکر اولندیغی اوزره بعد از قبض و اهب بالرضاء و لا قضاء مال موهوبی موهوب لهدن استرداد ایتسه غایب اولور .

اما فسخیله حکم دینکره مال موهوب موهوب لهک ملکندن حیثوب آتک یدنده امانت اوله رق قالور . بو جهتله بعد حکم الحاکم مال موهوب ید موهوب لهده تلف اولسه موهوب له ضامن اولماز . زیرا ابتدای قبض غیر مضمون اولغله استمرار قبض ایله مضمون اولغله منقلب اولماز زیلعی . اما بعد حکم الحاکم بالرجوع و اهب موهوبی استدیکی حلاله موهوب له اعاده دن امتناع ایتدیکندن صکره یدنده تلف اولسه ضامن اولور . « ۷۹۴ » ماده یه باق هدایه و درر . انظر ما لومنعه بعد الرجوع بالرضاء والظاهر ان الحکم واحد طحطاوی بونده فسخ تعبیری استعمال اولدی . زیرا بالقضاء رجوع یعنی و اهبک دعواسی اوزرینه حاکم رجوع عقد هبه یی فسخ ایتسی مستقبله فسخدر یوخسه هبه مبتدئه دکلدر یعنی فسخ مذکورله موهوب له مال موهوبی و اهب هبه ایتش اولماز فلهمذا لا بشرط فیه قبض الواهب والموهوب یکون امانة فی ید الموهوب له حتی لو هلك لا یضمن طحطاوی اما بالرضا رجوعه کلنجه بوده بعض روایته کوره فسخ و دیگر بعض روایته کوره عقد جدید

و مبتدأ درر . فقط بالرضی رجوع دخی فسخ اولدیغنه شو
مسائل دلالت ایدر . شویله که اولا قابل قسمت بر مال هبه
و تسلیم اولندقدده مثلاً نصف حصه شایعه سنده رجوع صحیحدر .
اگر فسخ اولیوبده هبه جدید اولسیدی صحیح اولمازدی .
ثانیاً بو رجوعک حتی قبضه توقف ایتمز . لان القبض انما
يعتبر فی انتقال الملك لا فی عود ملك قدیم . اگر هبه مبتدئه
اولسه ایدی قبضه توقف ایدردی . ثالثاً موهوبله ، مال موهوبی
آخره هبه و تسلیم ایتدکن صکره رجوع ایله استرداد ایدنجه
واهب اول دخی رجوع ایده بیلمور . اولکی موهوب لهک
رجوعی هبه جدید اولسیدی اولکی واهبک حق رجوعی
اولمازدی ۹۸ مادهیه باق هندیه فی الباب الخامس .

مستقبلده دیمک حاکمک فسخ هبهیه دائر اولان حکم
وقضاسندن ابتدا ایدرک آندنصکره کی زمان ایچون فسخ دیمک
اولوب یوخسه وقت هبهدن اولجه زماندن ابتدا ایدرک آندن
مؤخر زمان ایچون دخی فسخ دیمک دکلدر عبدالحلیم وردمختار .
تعبیر دیکرله واهبک هبه و تسلیمی زمانسندن حاکمک حکمی
اوانه قدر مدتده موهوب موهوب لهک ملکنده بولنش
اولوب اما فسخ وقتندن اعتبارا ملکندن چیقمش اعتبارا اولنور .
خلاصه ، بوفسخ ماسبق ایچون فسخ دکلدر . اما آتی ایچون
فسخدر .

ماسبق ایچون فسخ اولدیغنه شو مسائل آتییه تفرغ ایدر .

۱ فسخ مذکور له مال موهوب ملك واهبه عودت ايدرسه ده
ملك قديم ايله عودت ايتمه چكى جهته قبل الفسخ و بعد الهبه
والقبض موهوبدن حاصل اولان زوائد منفصله موهوب لهك
مالى اوله رق قالب يوخسه بوده اصل موهوب كى ملك واهبه
رجوع ايلمز. مثلاً بر كيمسه نك آخره هبه و تسليم ايتديكى
قصر اق يدموهوب لهده ايكن طوغوردقدنصره رجوع ايتدكه
ياوريسى موهوب لهه قالور. «۸۶۹» ماده يه باق.

۲ هبه و تسليم ايديلان بر خانه ياننده بر عقار بيع
اولندقدن صكره واهب هبه سندن رجوع ايتسه اول عقارى
بالشفعه آله ماز رد مختار و عبدالحليم ولو عاد ايله ملكه فيما مضى
و جعل كان الدار لم نزل عن ملكه كان له الاخذ بالشفعه
هنديه فى الباب الخامس.

۳ ولا وجنبا عليه زكاة ماله الموهوب اذا رجع فيه لما
مضى من السنين مع انه لا يجب عليه طحطاوى.
آتى ايجون فسخ اولديغنه يعنى رجوع مذكورك فسخ
اولوب هبه مبتدئه اولديغنه آتى الذكر مسائل تفرع ايدر
ابوالسعود المصرى.

۱ بو فسخك تماميتنده واهبك قبضى لازم دكلدر.
حالبوكه هبه مبتدئه اولسيدي بدون القبض تمام اولمازدى.
۲ واهب قابل فسمت بولنان بر مالى كاملا هبه و تسليم
ابتدكدنصره جزء شايغنده رجوع ايتسه شو رجوع دخى

صحیح‌در. زیرا بالذات تجویز اولمیان شی بالتبع تجویز اولنور.
حالبوکة قابل قسمت بولنان مالک جزء شایعنک هبه‌سی جائز
دکلدردر مختار .

۳ واهب بو وجهله هبه‌سندن رجوع ایتدکدنصکره کرک
رضاء رجوع ایتسون و کرک قضاء رجوع ایتسون میببی عیب
ایله بایعنه رد ایده‌بیلور رد مختار اکر قبل الهبه عینه مطلع دکل
ایدیسه . حالبوکة هبه مبدئه اولمش اولسه ایدی رد ایده‌من
ایدی. زیر ۹۸ ماده حکمنجه سبب تملکک تبدلی ملکک تبدلی مقامنه
قائمدر درر . بخلاف الرد بالغیب ای لواشتری شیئا ثم باعه ثم
رد المشتري الثانی علی الاول بعیب قدیم فان رده بقضاء کان
فسخا فیثبت حق الرد للمشتري الاول علی یاعه وان کان برضاه
لا لانه بمنزلة البیع الجدید طحطاوی والفرق یطلب من الطحطاوی
قبیل فصل فی مسائل متفرقة من الهبة .

۴ بر کیمسه بر مالی دیگر کمسنیه هبه و تسلیم و او کمسنه
دخی دیگر بر شخصه هبه و تسلیم ایتدکدنصکره او کمسنه
هبه‌سندن رجوع ایدرک مذکور مالی او شخصدن آله بو
رجوع کرک قضاء و کرک رضاء اولسون اول کیمسه دخی
هبه‌سندن رجوع ایله مال مذکوری او کمسنه‌دن استرداد ایدر.
حالبوکة او کمسننک هبه‌سندن رجوعی فسخ اولیوب هبه متبدئه
اولسیدی اول کیمسه هبه‌سندن رجوع ایده‌مزدی . « ۹۸ »
و « ۸۷۰ » ماده‌لره باق هندیه و عنایه .

آنحقی هبه‌دن بالرضی رجوع آتی الذکر مسئله‌ده بعض
روایاتده هبه جدیده اعتبار ایدلمشدر . شویله که موهوب لهک
حال صحتمنده اتهاب و قبض ایتدیکی مالی موهوب له مرض موت
یله مریض ایکن واهب هبه‌سندن رجوع ایتمکه موهوب له
رضاسیله موهوبی رد ایتسه مریضک هبه جدیده سی منزلنده در .
حتی موهوب له مدیون اولینجه آنحقی ثلث مالندن معتبر اولور .
(۸۷۹) ماده یه ماق . موهوب لهک دینی مالی محیط اولورسه
رجوع مذکور باطل اوله رق مال موهوب موهوب لهک
نرکه‌سنه رد اولنور هندیه .

لکن رجوع مذکور بالرضی اولمیوب بالقضا اولنجه
موهوب لهک فوتند انصرکه داینلرینک یاخود ورثه‌سنک حق
مداخله لری اوله ماز هندیه و بزازیه . موهوب لهک مرض
موتنده بالرضی وقوعبولان رجوع هبه متبدله منزلنده اولق
آنفا ذکر اولندیغی اوزره بعض روایاتده اولوب اما دیگر بعض
روایاتده من کل وجه فسخ عد ایدیلهرک موهوب لهک جمیع
اموالندن معتبردر رد مختار و هندیه فی الباب العاشر « ۸۸۰ »
ماده شرحنده بو مسئله تکرار ذکر اولنور .

۸۶۵ ماده

بدون الرضی و القضا هبه‌دن رجوع صحیح دکلدر . بناء علیه
(بعد القبض) یعنی موهوب له مال موهوبی واهبک صراحة
یا دلالة اذنیله قبض ایتدکن انصرکه واهب اکر موهوب لهک

رضاسی یا خود حاکم حکم و قضاسی اولدن خود بخود
 موهوبی) موهوب لهدن (استرداد ایدر ایه غاصب اولور.)
 زیرا ماده سابقه مذکور اولدینی وجهله واهب بدون الرضی
 والقضاء رجوعده منفرد اوله ماز . بو حالد موهوب له آتی
 واهبدن عینا استرداد ایده ییلور . و بعده واهب دخی حاکمه
 بالمراجعة ماده آنفه وجهله هبه بی بالفسخ موهوبی استرداد ایدر .
 (و بو صورتده) واهب موهوبی استهلاك ایتسه ضامن
 اوله جنی کی (یدنده موهوب تلف یا ضایع اولسه) موهوب له
 بدلتی یعنی قیمیاندن ایه قیمتی ومثلیاندن ایه مثلی (ضامن
 اولور .) ۸۹۱ ماده یه باق . بو حالد واهب دخی هبه سندن
 رجوع ایده مز . ۸۷۱ ماده یه باق .

مثلا واهب هبه ایتدیکی روبه بی موهوب لهدن بالاختلاس
 استهلاك ایتسه ضامن اوله جنی کی موهوب له بعد القبض مال
 موهوبی واهبه ایداع و تسلیم ایله غائب اولدقدنصکره واهب
 هبه سندن نادم اولغله بلا رضاء ولا قضاء موهوبی استهلاك ایتسه
 ضامن اولور اقروی وعلی افندی . ولو واهب له شیأ و قبضه
 فاختلسه الواهب و استهلكه عزم قیمته لاموهوب له ولو کان شاة
 فذبحها الواهب بعد قبض الموهوب له يأخذ الشاة المذبوحة
 من غیر تعزیم بخلاف مالوکان ثوباً فقطعه الواهب فان الموهوب له
 يأخذ الثوب ویغرم الواهب له ما بین القطع والصحة طحطاوی .
 سوآل ، بعض کتب فقهیه ده اب ، صغیر ولدینه اولان

هبه‌سندن حکما رجوع ایده بیلور . هر نقدر مروته مخالف
ایسه ده دینلیور . صغیردن ایسه رضی ممکن اولماغله بدون الرضی
والقضا رجوعك حتى آکلاشیلور .

جواب، بونك معناسی اب طرفندن صغیر ولدینه وقوعبولان
هبه‌دن رجوع ایده بیلور دیمك دكلدر . چونكه بو معنی ۸۶۶
ماده حکمنجه مخالفدر . بلکه اب محتاج اولدیغی صورته
صغیر ولدینك نفقه جنسندن اولان مالی آلوب برای نفقه
نفسنه صرف ایده بیلور . ولوکه بو مال صغیره هبه ایدلمش مال
بولنه دیمکدر ابوالسعود المصری . « ۷۹۹ » ماده شرحه باق .

۸۶۶ ماده

نسبا اولان قرابت یعنی ذی رحم محرمیت بالنسب هبه
صحیحده مانع رجوعدر . ولوکه اختلاف دین ویا تابعیت بولنه .
یعنی (برکیمسه اصول) نه یعنی پدرینه یا پدرینك پدرینه
و کذا بونك پدرینه و آناسنه و شونك آناسنه و پدرینك
آناسنه و آناسنك پدرینه (وفروعنه) یعنی اوغلنه یا قزینه
یاخود بونلرك اولادینه و اولاد اولادینه (با) خود کندوسنك
(برادر و همشیره سنه یا بونلرك اولادینه) یعنی برادر زاده سنه
یا همشیره زاده سنه (یاخود پدر و مادرینك برادر و همشیره سنه)
یعنی کندوسنك اعمام و عمات و اخوال و خالاتنه (بر شی
هبه) صحیحده ایله هبه (ایتدکنصکره رجوع ایده مز .)
وهب لوکیل اخیه لایرجع فی الهبه لان الملك والعقد وقعا لایخیه

هنديہ فی الباب الرابع . بو عدم رجوع ايکي وجهله اثبات اولمشدر .

وجه اول ، سندر . شويله که رسول اکرم صلى الله عليه وسلم اذا كانت الهبة لذی رحم محرم لم يرجع فيها بيورمشدر .
وجه ثانی ، دليل عقليدر . شويله که هبه مذکور هبدن مقصود حله رحمك ايفاسی اولوب بو مقصد مذکور هبدن حاصل اولديغنه و هر عقد که مقصودی افاده ایده لازم اوله جغنه بناء مذکور هبه دخی لازم اوله رق بو وجهله صله رحم حاصل اولان هبدن رجوعده قطع رحم بولمغله رجوع جائز دکلدر زیایي و درر .

شرحا دخی اشارت اولدیفی اوزره شو ماده مطلق اوله رق ذکرندن دخی آکلاشيله جفی وجهله واهب یا موهوب لهدن بری اسلام دیکری خرستیان یا بری تبعه دوات علیه دن دیکری تبعه اجنبیه دن اولمق کبی اختلاف دین یا دار بولنسه بيله حق رجوع یوقدر زیلی و ابوالسعود المصری .

نته کیم بر کیمسه برادری طرفندن اتهاب ایچون تعیین قلنان وکیلنه بر شی هبه و تسلیم ایتسه رجوع ایده مز . زیرا ملک و عقد برادری ایچون واقع اولمشدر قنیه . د ۱۴۶۰ ، ماده یه باق .

اما بونلرک غیر یسنه یعنی مثلا ذی رحم غیر محرمه بر شی هبه اولندقدده مانع رجوع دکلدر . ذی رحم غیر محرم ابن

العم ، بنت العم ، ابن العمه ، بنت العمه ، ابن الخال ، بنت الخال ،
ابن الخاله و بنت الخاله کیلر در . بناء علیه بر کیمسه عم زاده سنه
برشی هبه ایتدکده هبه سنندن رجوع ایده بیلور . عمه سی اولادینه
هبه ده دخی حکم بویله در . نته کیم بر کیمسه دای زاده سنه
برشی هبه ایتدکده رجوع ایده بیله چکی کبی تیزه زاده سی
اولادینه هبه دخی حکم بویله در . زیرا بونلر آره سننده کرچه
قربت وار ایسه ده نکاحجه محرمیتی مستلزم دکدر هدایه .

کذا ذی رحم محرم بغیر النسبه بر شی هبه ایدلدکده مانع
رجوع دکدر . شویله که بر کیمسه نسبا عم زاده سی ورضاعا
برادری بولنلر بر کیمسنه هبه ایتسه شو هبه سنندن
رجوع ایده بیلور . واقعا او کیمسنه عم زاده سی اولق
جهتیه ذی رحم اولدینی کبی رضاعا برادری بولنق حسیله
دخی محرم ایسه ده اشبو محرمیت من جهت النسب اولیوب
نسبک غیری بر شیدن طولانی یعنی رضاعا بولنمشدر .

و کذا قرابة المحرمية بالسبب دخی مانع رجوع دکدر .
رضاعا یا خود امهات النساء و ربائب و ازواج البنین والبنات
منللو مصاهرة قربت کبی هندیه فی الباب الرابع . شویله که
مثلا بر کیمسه سوت آنا یا خود سوت باباسنه یا خود قان آناسنه
یا اوکی اولادینه یا دامادینه یا کلینه بر شی هبه ایتسه رجوع
ایده بیلور . نته کیم بر کیمسه جمله اشیاسنی آخرت اوغلنه هبه
و تسلیم ایتسه رجوع ایده بیلور منقاری زاده .

بو مبحثده کی هبه دن مقصود ، هبه صحیحه در . زیرا قربت

محرمیت بالرحم و کذا سائر موانع رجوع هبه فاسده دن رجوعه مانع دکلدر . چونکه هبه فاسده «۸۵۸» ماده شرحنده ذکر اولدنی اوزره بعدالهلاك مضمون اولغله قبلالهلاك حق رجوعی واستردادی واردر طحطاوی و ابوالسعود .

مثلاً بر کیمسه قابل قسمت بولنار مالک حصه شایعه سنی اوغلنه هبه و شایعاً تسلیم ایلسه اول کیمسه شو هبه دن رجوع ایده یلور اقروی .

خلاصه موانع رجوع

فقها هبه دن رجوعه موانع سبعه یی دمع خرقة حرفلریله جمع ایشلردر . ایمدی دال ، زیاده اشاره تدرکه ۸۶۹ ماده ده ذکر اولنیور . میم ، واهب یا موهوب له دن برینک موتنه اشاره تدرکه ۸۷۲ ماده ده ذکر اولنیور . عین ، عوضه اشاره تدرکه ۸۶۸ ماده ده ذکر ایدیلیور . خا ، مال موهوبك موهوب له یدندن خروجنه اشاره تدرکه ۸۷۰ ماده ده مسطوردر . زاء ، زوجیه اشاره تدرکه ۸۶۷ ماده ده مسطوردر . قاف ، قرابت اشاره تدرکه شوماده ده بیان اولنمقده در . هاء ، هلاک اشاره تدرکه ۸۷۱ ماده ده ذکر اولنیور . بو موانع سبعه بحر کاملدن بولنان ابیات آتیة عربیه ایله جمع ایدلمشدر منع الرجوع من المواهب سبعة فزیادة موصولة موت عوض و خروجها عن ملك موهوب له زوجیه قرب هلاک قد عرض .

﴿ زوج ايله زوجهدن برى بىنلرنده زوجيت قائم ايكن يكدىكرينه برشى هبه وتسليم ايتدكن صكره ﴾ زوجيتدن افتراق وقوعبولسه وياخود زوج مسلم ايكن زوجهدن غير مسلمه بولنسه بيله ﴿ آرتق آندن رجوع ايدمهز ﴾ زيرا زوجيت قرابتك نظيريدر. حتى بىنلرنده بلا حاجب توارث جريان ايدر. وزوجيندن هر برينك دىكرى لهنه شهادتى جائز دكلدر. بوجهته اقربانك هبه لرنده اولدينى كې بونلرك يكدىكره اولان هبه لرنده مقصود صله وتواد اولوب يوخسه عوض دكلدر. بوجه محرر هبه دن غرض ومقصود حاصل اولاجه رجوع اولنمه ماز زيلعى.

زوجيت قائم ايكن تعبيرندن آكلا شيله جنى اوزره هبه دن رجوعه مانع اولان زوجيت وقت هبه ده كى زوجيت اولوب يوخسه وقت رجوعده كى زوجيت مانع رجوع دكلدر ملتقى . مثلاً بركىمسه اجنبیه بولسان برقادینه برشى هبه ايتدكن صكره آنى تزوج ايتسه هبه سندن رجوع ايدمه بيلور . بشقه مانع رجوع يوغيسه . زيرا بوصورتنده واهبك مقصودى عوض اولوب بناء عليه حق رجوعى ثابت اوله جغندن تزوج ايله بو حقى ساقط اولماز زيلعى .

بركىمسه نامزدلېسنه هديه اوله رق بعض امتعه كوندروب زوجهدن دخی زوجنه عوض اولمق اوزره بعض هدایا كوندردكده عوض اولديغنى كرك تصریح ايتسون كرك ايتسون بعده زفاف

اولد قیلرندن صکره افتراق ایتدکارنده زوج کوندر دیکی امتعه
هبه اولمیوب عایت ایدوکنی ادعا ویمین ایدوب استرداد ایتک
استدیکنده زوجه دخی استرداد ایده بیلور. زیرا هبه اولمنجه
عوض دخی اولماز. و بونلری زوج یا زوجه دن بری استهلاک
ایدنجه ضامن اولور. زیرا استهلاک عایت موجب ضماندر
در مختار. نته کیم برکیمسه باینا بوشامش اولدینی زوجه سنه
برمال هبه ایتسه صکره رجوع ایده بیلور. بشقه مانع رجوع
یوغیسه.

بالعکس زوجیت بیلرنده قائم ایکن هبه ایدوبده بعده
افتراق ایتسه لر یعنی زوج زوجه نی باینا بوشامسه هبه مندن
رجوع ایده مز. وان کانت حایله کان مقصوده الصلة دون العوض
وقد حصل فسقط الرجوع فلا يعود بالانابة طحطاوی.

اما وصیتده حکم بویله دکلدر. یعنی آنده اعتبار زمان وصیته
اولمیوب وقت فوته در. شویله که هبه ده وقت هبه نظر اعتباره
آلندی حالد و صیتده وقت موت نظر اعتباره آلوب یوخسه
وقت ایصاء نظر اعتباره آلماناز. بوجهته برکیمسه زوجه سنه
وصیت ایتدکدن صکره باینا تطلیق ایدوب بعده مصرا علی
ایصائه فوت اولسه وصیت صحیح اولدینی حالد برکیمسه بر
اجنبیه وصیت ایتدکدن صکره آنی تزوج ایدوب بعده فوت
اولسه وصیت صحیح دکلدر جواهر الفقه.

بوماده ده زوج ایله زوجه دن بری دینلدی. زیرا زوج ایله

زوجہ دن برینک اقرباسی دیکرینک اقرباسنہ برشی ہبہ ایتسہ
 بوہبہ دن رجوع جائزدر . شویله کہ قزک اقرباسی اوغلانک باباسنہ
 برشی ہبہ وتسلیم ایدوب صکرہ زوج ایله زوجہ افتراق ایتسہ
 واہب ہبہ سندن رجوع ایدہ بیلور قاعدیہ . بشقہ مانع رجوع
 یوغیسہ .

❧ ماده ۸۶۸ ❧

کل (ہبہ) مقابل مال موهوبك غیرى بر مالدن
 ہبہ یا ہدیہ یا صدقہ (عوض ویریلوبده واہبك دخی)
 عوض مذکورى (قبض ایتسی) ہم ہبہ دن ہمدہ عوضدن
 (مانع رجوعدر .) اول عوض كرك اشای ہبہ دہ مشروط
 اولسون كرك اولسون . یعنی بعد الہبہ والقبض بلا شرط اعطا
 ایدلسون . واقعا بعض فقہا شو ایکنجی عوض حق رجوعی
 اسقاط ایتیمہ جکنی ادعا ایللمشدر ایسہ دہ فروع مذہب مطلقا
 عوضك حق رجوعی اسقاط ایدہ جکنہ دائردر طحطاوی .
 فالتعویض المتأخر عن الہبہ ہبہ مبتدأہ بلا خلاف یصح بما
 یصح بہ الہبہ ویبطل بما تبطل بہ الہبہ لاجتالفہا الا فی اسقاط حق
 الرجوع فاما فیما وراء ذلك فهو فی حکم ہبہ مبتدأہ ہندیہ
 باختصار .

مکرکہ عوض موهوب لہہ سالم اولہرق قالمیہ . زیرا
 رسول اکرم صلی اللہ تعالیٰ علیہ وسلم الواہب احق بہبہ مالم
 یتب منها بیورمشدر زیلعی .

و برده «۸۶۴» ماده شرحنده ایضاح اولندیفی اوزره هبه ده رجوعك ثبوتی و اهبك مقصودنده خلل واقع اولدیغنه مبنی اولوب عوض ویرلمکه خلل زائل اولدیغی جهته حق رجوع دخی اوله مانر. نته کیم مشتری مبیعه عیب قدیم بولوبده مذکور عیب زائل اولیورسه رد ایده میه چکی کی زیاهی.

ایضاح القيود

۱ کل هبه یه ، بو کل لفظی علاوه ایدلدی . زیرا یالکز نصف موهوبه مقابل عوض ویرلدکده واهب بو نصفده کی هبه سندن رجوع ایده منر ایسه ده دیگر نصفنده رجوع ایده بیلور. چونکه ۸۶۴ ماده شرحنده ایضاح اولندیفی اوزره رجوعدن امتناع مانع مقدار یله تقدیر اولنور هدایه و غنایه . ایمدی مانع رجوع بولنان تعویض آنجق نصفده بولمغله امتناع رجوع دخی نصفه منحصر اولور. و بو وجهله نصفدن رجوع ایله موهوبه شیوع عارض اولورسه ده بو شیوع طاری اولمغله صحت هبه یی اخلاص ایلمز . «۵۵» ماده یه باق.

۲ مال موهوبك غیری بر مالدن ، بوکا دائر ایضاحات قریبا اعطا اولنه جقدر.

۳ هبه یا هدیه یا صدقه ، هبه یه مقابل عوض اوله رق صدقه ویرلسه یا خود عمری ایدلسه بونار دخی عوض ویرمك کی اوله رق حق رجوعی اسقاط ایدر. زیرا واهبك مقصودی

اولان عوض حاصل اولنجيه اختلاف عبارتيه اعتبار يوقدر
ولو الجيه .

۴ عوض، بو لفظ مطلق اوله رق ذكر اولنمندن مستفاد
اولور كه عوض مذكور كرك مال موهوب جنسندن اولسون
موهوب آريه عوض دخي آريه اولمق كبي . لانا ليست بمعاوضه
محضة فلا يتحقق فيها الرباعنايه . لان العوض ليس ببدل حقيقة
اذ لو كان كذلك لما جاز بالاقول للربا يحقق ذلك ان الموهوب له
ملك للهبة والانسان لا يعطى بدل ملكه لغيره وانما عوضه ليسقط
حقه في الرجوع طحطاوي . كرك بشقه جنسندن اولسون .
موهوب آريه ايكن عوض بغدادى اولمق كبي . ياخود موهوب
بغدادى ايكن عوض اول بغدادين اعمال ايدلمش دقيق اولمق كبي
در منتقى . ويشترط فيه شرائط الهبة كقبض وافراز عن مال
المعوض فان عوضه ثمراً على شجر لا يتم حتى يفرزه وعدم
شروع ولو العوض مجاناً او يسيراً طحطاوي .

بو عوض ، مانع رجوع اولمق ايچون آنده اوچ شرط
لازمدر . شرط اول ، عوض ويرلديكي آكلاشلمق ايچون
موهوب له عوضى شول لفظ ايله اعطا ايتليدركه كندوهبه سنه
عوض اوله رق اعطا اولنمش ايدوكنى واهب بيله . هبه كه عوض
يا هبه كه بدل ، يا هبه كه مقابلنده آل ، يا هبه كه جزاء يا هبه كه
ثوابا آل ديمك كبي سوزلر ايله هبه يه عوض ويرمك مثللو مثلاً
مسكين وزيلعى . زيرا حق رجوعى مسقط عوض اولوب بو

ایسه آنجق واهبک رضاسیله تمام اولور زیلعی . رضاده ایسه علم لازمدر . نته کیم مجله نك آتی الذکر مثالنده عوض اولمق اوزره عباره سننده بوکا اشارت واردر . وفی الجوهره مایفیدانه بکفی العلم بانه عوض هبته طحطاوی . بو جهته برکیمسه دیگر کسمنه به برشی هبه ایدوبده اوده قبض ایتدکدنصرکه موهوب له دخی واهبه برشی هبه ایدوب هبه که عوضدرکی کلامی سویلمسه عوض اولیوب هبه مبتدئه اوله جغندن ایکسمنک دخی حق رجوعی واردر هدایه و هندیه فی الباب السابع .

شرط ثانی ، عوض موهوبک غیری اولمق لازمدر . یعنی هبه به مقابل اعطا اولان عوض مال موهوبدن بشقه مال بولنمق مقتضیدر . ای ان لا یكون العوض فی العقد مملوکا بذلک العقد هندیه بوجهته عوض مذکور مال موهوبک جزئی بولنورسه جزء مذکورده فسخ هبه اوله رق حقیقه عوض اولیه جفی جهته عوض مذکور مانع رجوع دکلدر درمتمتی و انقروی . چونکه واهبک کل موهوبده حق رجوعی ثابت اولوب بعض موهوب عوض نامیله یدینه واصل اولمسیله باقیده حتی ساقط اولماز . لانا نعلم بیقین ان قصد الواهب من هبته لم یکن ذلک فلا یحصل به . لکن امام زفره کوره بعض موهوب دخی عوض اوله بیلور زیلعی . فانه قال التحق بسائر امواله وبالقلیل من ماله ینقطع الرجوع فکذا بهذا عنایه .

مثلا موهوب له ، موهوب شو الی مجیدیه دن بش مجیدیه سنی

بالافراز واهبه عوض ویرسه مانع رجوع اولیوب واهب متباقی
 قرق بش مجدیہ بی دخی استرداد ایدہ بیلور .

کذا موهوب خانه دن بر او طه عوض ویرلسه مانع رجوع
 اولماز . نته کیم عقد واحد ایلہ آت ایلہ قصراق هبه و تسلیم
 اولندقدنصکره موهوب له واهبه آتی قصراغه مقابل عوض
 ویرسه مانع رجوع اولیوب قصراغی دخی استرداد ایدر .

بناءً علیہ موهوبدن بر جزء معین یا جزء غیر معین عوض
 ویرمک شرط قلنسه شرط مذکور لغو اولوب مانع رجوع
 دکلدر عبدالحلیم .

بو شرطدن ایکی مسئله مستثنی بولنمشدر .

۱ موهوب شول وجهله تغیر یتسه که تغیر مذکور هبه دن
 رجوعه مانع اوله بوحالده بونک بعضیسنی عوض قلمق صحیحدر
 هندیه . شویله که واهب اون کیله بغدای هبه و تسلیم ایتدکن
 صکره موهوب له بونک بر کیله سنی اون یاپدقدنصکره عوض
 ویرسه صحیح اوله رق حق رجوعی اسقاط ایدہ جکی کبی
 موهوب لهه ایکی ثوب هبه و تسلیم اولنوبده بونک بریسنی
 بویاندقدن یاخود دیکدکدنصکره واهبه عوض ویرسه صحیح اولور
 رد مختار و خانه فی فصل فی العوض .

۲ عقد هبه متعدد اولور ایسه بر عقد هبه ده کی موهوب
 دیگر عقد هبه ده کی موهوبه عوض اوله بیلور . زیرا اختلاف
 عقد اختلافی عین کییدر عبدالحلیم ورد مختار . شویله که مثلاً واهب

بر عقد ایله بر آتی دیگر بر عقد ایله دخی بر قصر اغی هبه و تسلیم ایدوبده
موهوب له دخی آتی قصر اغه یا قصر اغی آته مقابل عوض ویرسه
صحیح اولور . نته کیم بر کیمسه بر مالی بر آدمندن هبه و دیگر بر مالی
دخی عین آدمندن صدقه اخذ و قبض ایدوبده صدقه آلدیغنی
هبه اخذ ایتدیکنه عوض ویرسه صحیح اولور هندیه فی الباب
السابع نته کیم قصر اق هبه اولوبده موهوب له یدنده ایکن
یا ورو تولید ایدوب بو یا وروی موهوب له واهبه عوض ویرسه
صحیح اولور . لانه لیس للواهب حق الرجوع فی الولد فصیح
العوض تنویر و شرحه للعلائی .

شرط ثالث ، سلامة العوض للواهبدر . بناءً علیه عوض
ید واهبدن بالاستحقاق ضبط ایدلسه عوض اولمیه جغندن واهب
دخی کل هبه سندن رجوع ایده بیلور اگر موهوب بعینه موجود
اولوب آنده زیاده حاصل و مانع رجوع دیگر بر حال حادث
اولماش ایسه هندیه فی الباب السابع .

اما بعض عوض بالاستحقاق ضبط ایدلده عوض مذکور
اثنای عقدده غیر مشروط اولنجیه واهب عوضک یدنده باقی
و موجود اولان قسمنی اعاده ایدرسه کل هبه سندن رجوع
ایده بیلور . اگر هبه دن رجوعه مانع بر حال حادث اولماش
ایسه . زیرا واهبک حق رجوعنی اسقاط ایلمسی کل عوض
کندوسنه قالمق ایچون اولمغله کل عوض سالم قالمینجه باقی عوضی
رد ایله موهوبی استرداد ایتمهک حقی ثابت اولور غنایه .

لیکن باقی عوضی اعاده ایتیمینجه رجوع ایدمه من . چونکه
باقی عوض ابتداء عوض اولمغله صالح اولدینی کی بقا ابتداء
اسهل اولمغله بقاء دخی عوض اولمغله صالحدر درر و کیز و غایه .
و بعض عوض بالاستحقاق ضبط اولندقدده موهوب
تلف اولمش یا خود موهوبده رانده حاصل اولمق کی مانع رجوع
حدوث بولمش ایسه عوض اثنای عقدده مشروط اولدینی
تقدیرده خو تضمین یوفد . ریرا موهوبک تلفی تقدیرنده
رجوع عک اسحاله منه مبی ۸۷۱ ماده حکمینجه مانع رجوع
اولدغندن تعویض . عدم تعویض مساوی اولدینی کی حصول زیاده
دخی هلاک مثللو ۸۶۹ ماده . وجینجه مانع رجوعدر طحطاوی .
شویله که واهب بر مالی هبه و تسلیم ایدوبده موهوب له
دخی آکا عوض ویردکدن و مال موهوب ید موهوب لهده
ایکن تلف یا آنده زیاده حاصل اولدقدنصکره عوض بالاستحقاق
ضبط اولنسه واهب مال موهوبک بدلای موهوب لهه تضمین
ایتدیره من . ولوکه موهوبی موهوب له اتلاف ایتمش بولنه
عبدالحلیم ورد مختار و ابوالسعود المصری . اما عوض اثنای
عقد هبهده مشروط ایسه حق تضمین واردر . نتهکیم آتیده
ایضاح اولنور .

سلامة المعوض یعنی الموهوب دخی تعویضک شرطیدر
بناء علیه مال موهوبه عوض ویرلدکدنصکره کل موهوب
بالاستحقاق ضبط اولندقدده موهوب له دخی کل عوض ایله

رجوع ایدہ بیلہ جکی کبی مثلاً نصف موهوب بالاستحقاق ضبط اولندقدہ موهوب له دخی نصف عوض ایلہ رجوع ایدرہ . زیرا موهوب له ایچون نصف عوضہ مقابل مال سالم قالمشدر غایہ و ہندیہ . بوتقدیردہ موهوب له ایچون مال موهوبک باقیسنی اعادہ برلہ عوضک کلیدنی استرداد ایتک حتی یوقدر ہندیہ .

نتہ کیم موهوب بالاستحقاق ضبط اولندقدہ عوض تلف اولمش یاخود مثلاً آندہ زیادہ حاصل اولوبدہ مانع رجوع حادث اولمش ایسہ امام ابی یوسف ایلہ امام اعظمین برروایتہ کورہ واہبہ ضمان لازم کما کہ بوقولہ کورہ عوض ایلہ اصل موهوب آرہ سندہ فرق یوقدر . وفی الہندیہ ولو استحق نصف الموهوب فللموهوب له ان یرجع فی نصف العوض ان کان الموهوب مما یتمثل القسمۃ سواء زاد العوض ونقص فی السعر او زاد فی البدن ونقص فیہ کان له ان يأخذ نصفه ونصف النقصان انتہی . وعوض اثنای عقددہ مشروط اولنجہ یعنی واہب برمالنی عوض معلوم ویرلمک شرطیلہ ہبہ وتسلیم ایدرک عوض مذکورہ قبض ایتدکن صکرہ عوضک کلیدی بالاستحقاق ضبط اولندقدہ واہب دخی عیناً موجود موهوبی استرداد ایدہ بیلہ جکی کبی تلف اولمش یاخود موهوب له آنی اتلاف ایلمش ایسہ واہب آنک بدلنی تضمین ایتدیرہ بیلور .

نتہ کیم عوضک مثلاً نصفی بالاستحقاق ضبط اولندقدہ

واهب دخی موهوبك نصفی استرداد ایدہ بیلور . زیرا عوض
مشروط اولنجه عقد هبه مبادلہ اولہ جنی جہتلہ بدل مبادل
اوزرینہ توزیع و تقسیم ایدیلور رد مختار و ابوالسعود المصری
وغنایہ وجواہر الفقه .

کذلک عوض شرطیلہ اولان ہبہ و تقابضدن صکرہ موہوب
بالاستحقاق ضبط اولندقدہ موہوب لہ دخی عوض موجود ایسہ
عینا استرداد ایدہ بیلہ جکی کبی تلف اولمش یا اتلاف ایدلمش
ایسہ بدلنی تضمین ایتدیرر . وان کان العوض مستهلكا ضمن
قابض العوض بقدر ما وجب الرجوع للموہوب لہ بہ من العوض
ہندیہ .

عبد الحليم ایلہ ہندیہ دہ آنف البیان استحقاق مسئلہ سنی
قابل قسمت اولیان مالہ حصریلہ قابل قسمت بولنان موہوبك
یا عوضك بعضیسی بالاستحقاق ضبط اولندقدہ ہبہ نك بطالانی
ایجاب ایدہ جکندن موہوبك و عوضك کلیسنندہ رجوع اولنہ جنی
ذکر ایدلمشدر . نتہ کیم طحطاوی دہ دخی ہذا اذا استحق نصف
معین اما اذا لم یکن معینا فنبطل الہبۃ اصلا دینلمسی بوکا مبذیرہ .
فقط شو بیان ۸۵۸ مادہ شرحندہ تفصیل اولندیغی وجہلہ
استحقاقدن طولای عارض اولان شیوع شیوع مقارن اولسنہ
مبنی اولوب مجملہ یہ کورہ شیوع مذکور طاری اولدیغندن بیان
مذکور بورادہ قبول ایدیلہ میوب موہوب با عوض کرک قابل

قسمت اولسون كرك اولسون شو شرحده بيان اولنان احكام
تخلف ايلمز ابوالسعود .

اشراط عوضده اختلاف

واهب عوض مشروط ایدی موهوب له دکل ایدی دیو
اختلاف ایتدکارنده سوز موهوب ایهکدر . « ۷۶ » مادهیه باق .
بوخالده موهوب موجود ایسه واهب دخی هبهسندن رجوع
ایده بیلوب اما تلف اولمش ایسه ۸۷۱ مادهیه مبنی رجوع
ایده مز . ولكن يخلف الموهوب له ههنا علی دعوی الواهب بالله
ما شرط الواهب العوض یرید به اذا كان الموهوب مستهلكا هندیه
فی الباب التاسع .

نته کیم واهب رجوع ایتک ایستیوبده موهوب له سکا
عوض ویرمشیدم دیو ادعا و واهب انکار ایتدکده سوز ینه
واهبکدر رد مختار .

اما هبه بشرط العوض ینه سیله مجانا هبه ینه سی جمع اولسه
هبه بشرط العوض ینه سی اولیدر عبد الرحیم .

هبه بشرط العوض اولدیغنه طرفین اتفاق ایدوب فقط
مقدار عوضده اختلاف ایتسه لر موهوب موجود وعوض غیر
مقبوض اولنجه واهب بخیردر . دیلرسه موهوب لهی تصدیق
وموهوب لهک ادعا ایتدیکی مقداری قبض ایدر ایستر ایسه
هبه دن رجوع ایله موهوبی استرداد ایلر . وموهوب تلف

اولم ش ایسه قیمتی تضمین ایتدیرر هندیه فی الباب التاسع
ورد مختار .

(بناء علیه کرک موهوب له طرفندن کرک دیگر برکمنه)
یعنی اجنبی (جانبندن) کرک موهوب لهک امر واذنیله وکرک
بلا اذن (واهبه) کل (هبهسنه عوض اولمق اوزره برشی
ویریلوبده او دخی قبض ایلسه آندن صکره هبهسندن) یعنی
هبهسنک هیج بر مقدارندن (رجوع ایده من .) یعنی واهبک
غیری برکمنه طرفندن دخی عوض ویرمک صحیح اولوب
بوده واهبک حق رجوعنی اسقاط ایدر . زیرا عوض واهب
ایچون سالم اولنجه واهبک حق رجوعی قلماز . ایمدی
تعویض مذکور دن صکره واهب هبهسندن رجوع ایده میه جکی کی
اجنبی مرقوم دخی عوضندن رجوع یعنی ویرمش اولدنی
عوضی واهبدن استرداد ایده من . زیرا اجنبی مرقوم اسقاط
حق رجوع ایچون موهوب له طرفندن تبرع ایتمش اولور درر
ونوح افندی . نته کیم اجنبی مرقوم عوض مذکور ایله
موهوب لهه بالرجوع بدلنی طلب ایده میه جکی کی . کرک
موهوب لهک اذن و امریله عوضی ویرمش اولسون کرک
بلا اذن و لا امر ویرمش اولسون بحر ودرر . عوض مذکوری
اجنبی بلا امر ویردیکی تقدیرده رجوع ایده مامسی ظاهر اولوب
امریله عوض ویردیکی تقدیرده ینه رجوع ایده مدی . زیرا
رجوعده اصل وقاعده شودرکه : برکمنه دن برشی حبس

وملازمته « خرج بذلك الامر بالتكفير عنه و اداء النذر فانه وان كان يطالب بهما لكن لا بالحبس والملازمة طحطاوى »
مطالب اولنجه « دين ونفقة الزوجة والاولاد كجى » اول كيمسنةك
ديكر كمسنةيه اول شيئك اداسيله امرى بلا شرط الضمان دخى
او كمسنةك حق رجوعنى مثبت اولور . والا اولماز . « واما
اذا كان بامرہ فلان التعويض لما كان غير مستحق على الموهوب له
كان امره بذلك امرا بالتبرع بمال نفسه على غيره وذلك لا يوجب
عليه الضمان ما لم يضمن عنايه . » مكر كه آمر نفسه ضمانى
شرط ايده بو اصله شو ايكي مسئله تفرع ايدر . لكن يخرج
من الاصل مالو قال انفق على بناء دارى فانه يرجع فيه بلا شرط
رجوع مع انه لا يطالب بهما لا بحبس ولا بملازمة كانه لان
العرف قاض بضمان ما يدفع فى ذلك طحطاوى .

١ مديون ، بورجنى ادا ايله ديكر كمسنةيه امر ايدوبده
اوده ادا ايتسه ضمانى شرط ايتسه بيله مديونه رجوع ايدر .
١٥٠٦ مادهيه باق ابوالسعود عن كفالة الخانية .

٢ بركيمسه اهل وعياله مصرف ايتك اوزره ديكر كمسنةيه
امر ايدوبده اوده مصرف ايتسه آمرينه رجوع ايدر « ١٥٠٨ »
مادهيه باق .

ايمدى تعويض مذكور له موهوب له بالحبس والملازمة
مطالب اولما مغله آنك تعويض ايله امرى موجب رجوع دكلدر .
مكر كه ضمان شرط ايديله . شويله كه موهوب له اجنبىيه بن ضامن

اولم اوزره عوضی ویر دیو امر ایدوبده اجنبی دخی شوکا
بناء عوض ویرمش ایسه موهوب لهه عوض ایله رجوع ایده بیلور
انقروی. بوکا دائر ایضاحات کتاب وکالنده اعطا اولنه جقدر.

۸۶۹ ماده

موهوبده تزايد قیمتی موجب زیاده متصله نك حصولی
مانع رجوعدر عنایه زیرا رجوع آنحق موهوبده صحیح اولوب
زیاده ایسه موهوب اولمیدیغندن آنده رجوع ممکن اولمیدیغنی کی
فصل ایدیلرک اصلده رجوع و زیاده ده عدم دخی متعذر اولدیغندن
رجوع اصلا ممتنع اولدی. ۸۶۰» مادهیه باق.

سوآل، هم اصل همده زیاده ده منع رجوع حق واهبک
بطلانی مستلزم اولوب لکن ایکسینده دخی رجوع حق
موهوب لهک بطلانی مستلزم اولور. اولکنی ترجیحده
سبب نه در؟

جواب، حق واهب یالکز اصلده حق تملکدن
عبارت ایکن حق موهوب له هم اصل همده زیاده ده
حقیقت ملکدر. بناء علیه عند تعذرالفصل حقیقت ملکه رعایت
اولی اولدی. موهوب له اوزرینه ایجاب ضمان دخی ممکن دکدر.
زیرا حق تملک مقابلنده عوض آلق جائز دکدر. بوتقدیرده
واهبک حقنک بطلانی لازم کلدی زیلعی.

مثلا (مال موهوب ارض اولوبده موهوب له) مذکور
ارضک کلیسینده قیمتجه زیاده لکی موجب اولور صورته

(آنك اوزرينه) بيعدہ من غير ذك داخل اوله جق آزا چوق
 (بنا احداث ياخود آجاج غرس ايتك) ياخود صو چيقاريله جق
 دولاب نصب ايتك هندیه . ياخود موهوب البسه لك اولوبده
 ديكملك « اما اذا قطعه فلا يمنع الرجوع ولو قطعه نصفين فخط
 نصفه وبقى النصف الآخر له الرجوع في الآخر طحطاوی . »
 (ياخود موهوب زبون حيوان اولوبده موهوب له ياننده
 سميرلنك) ياخود موهوب كاغد اولوبده اوزرى يازلق ياخود
 موهوب صغير حيوان اولوبده يد موهوب لهنده بيومك وياخود
 موهوب البسه اولوبده بويامق قنغی رنك بويایله اولورسه
 اولسون (كبي زياده متصله) يعنى قيمته زياده لكى موجب
 اوله جق زياده فى العين (حاصل اولدقده) يعنى نفس موهوبده
 شول وجه اوزره زياده حاصل اولسه كه اول شى موهوبك
 قيمتنده زياده لكى موجب اولور ، بوزياده كرك موهوب لىك
 فعليله حاصل اولسون وكرك آنك فعلى اولقسزین حاصل
 اولسون واول زياده كرك متولد اولسون وكرك اولسون
 (ياخود) موهوب (بغداى اولوبده اون ايدملك) ياخود
 موهوب اون اولوبده اتمك ياييلمق ياخود موهوب سوت
 اولوبده پنیر يا ياغ ايدملك ياخود موهوب يمورطه اولوبده
 پايچ اولق (كبي موهوبك اسمى ديكشه جك صورتده تغير
 اولدقده) بوتغير موهوبده زياده قيبيلندن اولميوپ بلكه حكما
 هلاك موهوب قيبيلندن اولمغله شو مادهده كى « ياخود بغداى

اولوبده الخ ۸ فقره سی ۸۷۱ ماده ده ذکر اولنسه ایدی انسب اولوردی . نته کیم ۸۹۹ ماده بی ۸۹۸ ماده یه مقابیل ذکرندن دخی بو، یعنی زیاده قییلندن اولمدینی آکلاشیلور (هبه دن رجوع صحیح اولماز) . ولوجلتم ولم تلدهل للواهب الرجوع قال فی السراج لا وقل فی الزیلعی نعم درمختار . وان وهب بهیمة حاملا فرجع فیها قبل الوضع ان کان رجوعه قبل ان نمضی مدة یعلم فیها زیادة الحمل جاز والا فلا هندیه فی الباب الخامس .

ایضاح القیود

۱ بنا احداث الخ ، مقصود شول بنا وغرس و زیاده متصله درکه ارضک قیمتیجه زیاده لکی موجب اولور . بوجهتله ارض کبیره اولوبده بنا وغرس آنک بر قطعه سنده احداث اولمش اولغله قطعه مذکور ده قیمتیجه زیاده لکی موجب ایسه ده غیریسنده زیاده لکی مستلزم اولمدینی صورتده اول قطعه ده هبه دن رجوع اولنه بیلور . وقد تكون الارض عظمیة بعد زیادة فی قطعة منها فلا یمتنع الرجوع فی غیرها هدايه وطحطاوی .

ینه بوجهتله برکیمسه موهوب ارضده اهمیتسن بر باراقه احداث یاخود اهمیتسن عاری آغاج غرس ایتیکله مذکور بنا وغرس اول ارضک قیمتیجه زیاده لکنی موجب اولسه ارضک هیچ بر مقدارنده حق رجوعی ساقط اولماز زیلعی اما اذا لم یعد زیادة اصلا کبناء تنور الخبز فی غیر محله فانه لا یمنع الرجوع طحطاوی . مذکور ارض ، بر کره بنا

و غرسدن عاری بر کرده بنا و غرس موجود اولدینی
حالده تقویم اولوب ایکی قیمت بیننده تفاوت وار یعنی مثلاً
بنا موجود اولدینی حالده کی قیمت زیاده ایسه بنانک زیاده لکی
موجب اولدینی آکلاشیله جنی کی تفاوت یوغیسنه زیاده لکی
مستلزم اولدینی تبین ایدر .

ینه بو جهتله موهوبله حامی خانه حالنه افراغ ایتدکده
بنا اگر حالی اوزره باقی ایسه مانع رجوع دکلدر . اما قپو
آچق و صیواتمق کی زیاده حاصل اولدقده مانع رجوع در هندیه .
نته کیم مال موهوب بر مکاندن دیگر مکانه نقل اولدقده
نقل مذکور موهوب کی قیمتند زیاده لکی موجب اولور و مؤنت
نقله حاجت مس ایدر ایسه امام اعظم و محمد کوره مانع رجوع در .
زیرا بو نقدیرده رجوع اولنسه موهوب لهک کراده و مؤنت
نقلده کی حقنک ابطالنه مؤدی اولور انقروی و شرنباللی
ورد مختار و طحطاوی . اما امام ابی یوسفه کوره مانع رجوع
دکلدر . زیرا زیاده لک عینده حاصل اولماغله سمرده کی زیاده لک
کی اولدی زیلعی .

مانع رجوع اولان زوانده دائر مسائل عدیده : ولو وهب
کرباسا فقصره (۱) الموهوب له لایرجع لانه زیاده متصلة وصفه
متمومه ولو غسله يرجع ولو حدد السکین لایرجع ولو وهب له
سیفا فجعله سکینا او کسره وجعل منه سیفا آخر لم يرجع فيه

(۱) قصر لکه چیقارمق چر بچیلک .

ولو وهب شجرة واذن له بقطعها فقطعها وانفق في القطع
كان للواهب ان يرجع فيه ولو وهب شجرة باصلها فقطعها
الموهوب له كان للواهب ان يرجع فيها وفي مكانها من الارض
هو الصحيح فلو انه جعل الشجرة ابوابا او جذوعا لا يرجع
الواهب فيه وروى انه يرجع في الجذوع كما اذا جعلها حطبا
فانه يرجع في الحطب هندي في الباب الخامس .

رجل وهب ترابا فبله الموهوب له بالمال بطل حق الواهب
في الرجوع لان اسم التراب قد زال وصار شيئا آخر خائيه
في فصل في الرجوع في الهبة .

كذا بركمسه نك اتها بيلديكي مر آتى توزدن سيلمسي
واتها بيلديكي اودوني كسمسي مانع رجوع دكلدر قنيه
وحموى .

وكذا موهوبك قيمته زياده لكي موجب اوليوب بلده
نقصاني موجب اولان زياده مانع رجوع دكلدر . لان
مالا يورث زياده في قيمة الموهوب نقصان في الحقيقة وان
كان في صورة الزيادة كالاصبع الزائدة مثلا فتح . شويله كه
بركمسه نك اتها وقبض ايلديكي حيوان ينده ايكن سن
شاخصى يعنى موجود ديشارك خارجده مرتفع بر ديشى
حيقارسه بو ، حقيقة زياده اوليوب بلده باعث نقصان عيوبدن
اولغله مانع رجوع عد اولنماز . وكطول فاحش تنقص به
القيمة فانه لا ينقطع به حق الرجوع طحطاوى وابوالسعود

المصرى لان القصان كقطع الثوب سواء كان بفعل الموهوب له
اولا غير مانع طحطاوى .

۴ زیاده متصله ، یعنی هبه دن رجوعه مانع اولان قیمته
زیاده لکی موجب اولان زیاده فی العین اولوب یوخسه عینده
اولیوبده مجرد ترقی اسعار ایله حاصل اولان زیاده فی القيمة
مانع رجوع دکدر . شویله که بر کیمسه مثلا الی غروش
قیمتلو بر مالی دیگر کیمسنه هبه و تسلیم ایتدکدنصکره
ترقی اسعار ایله قیمتی یوز غروشه چیقسه مانع رجوع
دکدر کنز و ابوالسعود . بو مسئله ایله موهوبک دیگر مکانه
نقل صورتیله حاصل اولان زیاده که آنفا مانع رجوع
اولدینی بیان اولمشیدی آره سنده فرق واردر . بو مسئله ده کی
زیاده ایچون موهوب لیک هیچ بر فعل وضعی موجود دکل
ایکن نقل صورتیله حاصل اولان زیاده ایچون موهوب
لیک فعل و عملی واردر .

حصول زیاده ده اختلاف

موهوب له ، موهوب حیوان زبون ایکن یا نمدی سمیز لنگله
مانع رجوع حاصل اولدی دیو ادعا و واهب انکار ایتدکده
سوز واهبکدر . زیرا واهب لزوم عقدی انکار ایدیور . ۷۶۰
مادهیه باق . هر زیاده متصله ده حکم بویله اولوب فقط بنا
و خیاطه و صبغ یعنی بویامق مثللو شیرده سوز موهوب لیکدر
رد مختار و مجمع الانهر و بزازیه و هنديه .

مثلا موهوب ارض اولوبده آنده بنا يا شجر بولمغله
 موهوب له ارض صحراء ايكن بكا هبه و تسليم ايدوب آنده كي
 بنا و آغاچلري بن احداث ايلدم ديو ادعا و واهب ارض هبه
 و تسليم ايدليكي زمان آنده مذكور بنا و آغاچ موجودايدى
 ديو ادعا و اختلاف ايتكلرندن سوز موهوب لهكدرك. موهوب
 توب مخيط يا مصبوغ يا خود سيف محلى اولدقمه حكم بروجه
 مشروحدردنديه .

شوقدركه مال موهوب موهوب لهه تسليم ايدليكي تاريخندن
 اعتبارا موهوب له ينده بولنديني مدتده بنا و انشاسى قابل
 اولميان شيلر مستثنى بولمشدرد بجر. هذا ظاهر لنيقن كذب
 الموهوب له من حيث ان العادة تحيل احداث هذا البناء في
 مثل هذه المدة طحطاوى .

مجلده زياده تعميري نقصانندن احتراز ايجوندرد. شويله كه
 زياده ماليه نك حصولى مانع رجوع ايسدهه نقصان مانع
 رجوع دكلدرد. مذكور نقصان كرك موهوب لهك فعليله
 حاصل اولسون كرك ديكر سبيله حاصل اولسون. وبو نقصانى
 موهوب له ضامن اولماز انقروى و هندية . شويله كه مثلا
 موهوب له موهوب قويونى ذبح ايتسه واهب هبه سندن
 رجوع ايله موهوبى استرداد ايدوبيلور. اما پشوردكدن
 صكره استرداد ايدومز هندية . وهب سويقا قبله الموهوب
 له بالماء لا يبطل حق الواهب فى الرجوع لان اسم السوق لا يبطل

و لم يحدث فيه زيادة بل حدث فيه نقصان فلا يبطل حق الواهب
في الرجوع كما لو وهب حنطة فبلاه الموهوب له بالماء خايبه في فصل
في الرجوع في الهبة .

(اما زيادة منفصله مانع رجوع اولماز .) زیرا زياده نك
موهوب له يذنده ترك ايله اصلده رجوع ممكندر كفايه .
بو زياده ولد و لبن و ثمر كبي كرك اصل موهوبدن متولد
اولسون و كرك غله يعنى مثلاً موهوبك بدل ايجارى كبي
غير متولده اولسون هنديه في الباب الخامس .

زيادة منفصله رد بالعيبه مانع ايكن رجوع عن الهبيه
مانع اوليور زيادة متصله ايسه بالعكس هبه دن رجوعه مانع
ايكن رد بالعيبه مانع اوليور واجيب بان الرد في المنفصلة اما
ان يرد على الاصل و الزيادة جمعا او على الاصل وحده لا سبيل
الى الاول لان الزيادة اما ان تكون مقصودة بالرد او بالتبعية
و الاول لا يصح لان العقد لم يرد عليها و الفسخ يرد على مورد
العقد و كذلك الثانى لان الولد بعد الانفصال لا يتبع الام لاحالة
و الى الثانى لانه تبقى الزيادة في يد المشتري مجانا و هور با بخلاف
الرجوع في الهبة فان الزيادة لو بقيت في يد الموهوب له مجانا لم
تفرض الى الربا و اما في المتصلة فلان الرد بالعيب انما هو ممن
حصلت على ملكه فكان فيه اسقاط حقه برضاه فلا تكون الزيادة
مانعة عنه بخلاف الرجوع في الهبة فان الرجوع ليس برضا ذلك
و لا باختياره فكانت مانعة عنه .

(بناءً عليه برکیمسه نك آخره هبه ایلدیکی قصراق)
 ید موهوب لهنده ایکن (حامل اولدقده هبه دن رجوع
 ایده مزه) زیرا حمل زیاده متصله در. شو تفریع، بوماده نك
 فقره اولیسنه متفرع در. (اما) مذکور قصراق (طوغوردق دن
 صکره) مانع رجوع زائل اولمغله ۲۴ ماده یه مبنی (رجوع
 ایده بیلور) یاورونك ارضاع دن استغناسنه دکن رجوع
 ممتنع میدر؟ بنی آدمده ولد، بشقه سنك ممه سنی آلمیه جق
 اولورسه استرداد ممتنع در. یعنی ولد سوتدن مستغنی اولنجه یه
 قدر ام موهوبه استرداد اولنه ماز. اما بشقه سنك سودنی آله جق
 اولورسه واهبك رضای اولدقجه بعد الرجوع ام امساک
 اولنه ماز طحطاوی. لکن حیوانات سائر حقه صراحت
 مسئله موجود دکل سده خایه ده ولو ولدت الهبه ولذا کان للواهب
 ان یرجع فی الام فی الحال وقال ابو یوسف رحمه الله تعالی لا یرجع
 فیها حتی یستغنی الولد عنها ثم یرجع فی الام دون الولد. دیو
 مذکور در.

مجله بوفقرده حق رجوعی مطلق اوله رق ذکر ایل مسندن بنی
 آدمک غیر یسنده قبل الاستغنادخی رجوع اولنه جفی آکلا شیلور (وبو
 صورتده یاوریسی موهوب لهنه قالور) یعنی مانع رجوعك زوالیه
 حق رجوع عودت ایدر. مانع رجوعك زوالی کرك قبل المرافعه
 والحکم اولسون وکرك بعد المرافعه والحکم اولسون.
 قبل الحکم زواله مثالدر:

۱ مثال، برکیمسه نك آخره هبه و تسليم ايلديكي قصراق
يد موهوب لهنده حامل اولوب بعده طوغورسه هبه دن رجوع
ايد بيله چكي كي برکیمسه حامل قصراغي ديكر كيمسه يه هبه
و تسليم ايدوب مذکور قصراق يد موهوب لهنده طوغورسه
هه سندن رجوع ايد بيلور. بوصورتلرده ياوري موهوب لهنه
قالور ابن نجيم .

۲ مثال، موهوب عرصه اوزرينه موهوب لهنه ياپديغي
بنا منهدم اوله رق عرصه حالت اوليسنه رجعت ايتسه واهبك
حق رجوعی عودت ايدر انقروی .
استشنا

برکیمسه ، صبي رضيعي اتهاب و قبض ايدوبده ينده ايكن
اختيارلنهرق قيمتي زمان هبه ده كي قيمتندن دخي تنزل ايتسه
رجوع اولنه ماز . زيرا وقتا كه بيودي و قيمتي تزايد ايلدي
حق رجوعی ساقط اولوب آندن صكره نقصان ايله حق رجوع
عودت ايلمز زيلعي .
بعد الحكم زواله مثالار:

۱ مثال، قصراق يد موهوب لهنده حامل اولدقن صكره
هنوز طوغورمدين واهب حاكمه بالمراجعه رجوعی ادعا ايتكه
حاكم دخي بطلان رجوع ايله حكم ايتدكن صكره قصراق
طوغورسه ينه حق رجوعی عودت ايدر.

۲ مثال، موهوب ارض اولوبده اوزرنده بنا و غرس كي

زیاده حاصل اولدقن صکره واهب حاکمه بالمراجعة فسخ
هیهی ادعا ایتمی اوزرینه حاکم زیاده متصله نك وجودینه بناء
فسخ هیه ايله حکم ایتوب فقط مؤخرًا موهوب له زیاده یی
بالهدم ارضی حالت اولسنه رجعت ایتدیرسه واهبک دخی
حق رجوعی عودت ایدر. «۲۴» ماده یه باق.

اما برمال رددن طولایی خیارک سقوطنه حاکم حکم ایتدکن
صکره مانع رد زائل اولسه آرتق خیار عودت ایتمز. «۵۱»
ماده یه باق. شویله که مثلاً رکیمه سه اون کون مخیر اولمق اوزره
بر حیوان صاتون آلوب اوچنجی کون خسته لشمش ایکن حاکمه
بالمراجعة مخیرلکی جهتیله فسخ بیعی طلب وادعا ایدوبده حاکم
دخی مبیع اول کیمه سه یدنده ایکن عیبک حدوث ووجودی
جهتیله حق فسخک بطلاننه حکم ایتدکن صکره سکزنجی کون
یعنی ینه مدت خیاردنه حیوان کماکان ایولشسه مشتری مدت
خیارم هنوز باقی بولمغله ینه حق ردم اولور دیه مز.

ایمدی هیه ايله بیع بیننده بوبابده فرق شودرکه هیه ده
حق رجوع اسقاط وابطال ايله ساقط وباطل اولماز. نته کیم
۸۶۴ ماده شرحنده ذکر اولمشیدی. بناء علیه زیاده سببیله
ممتع اولدی ومانع زائل اولنجه حق رجوع دخی عودت ایدر.
اما بیعده مشتری نك خیار شرط ايله حق فسخی اسقاط ايله
ساقط اوله جنجی کبی اسقاط حاکم ايله دخی ساقط اولور
کفایه شرح الهدایه.

موهوبك ملك موهوب لهدن خروجى مانع رجوعدر .
 يعنى « موهوب له موهوبى بيع ايله ياخود » آخر شخصه « هبه
 وتسليم ايله » ياخود برجهت بره وقف وتسليم الى المتولى وتسجيل
 شرعى ايله « ملكندن اخراج ايلسه واهبك » هبه سندن « رجوعه
 صلاحيتى قالماز . » ولو كه بعده تكرار سبب آخر له ملكنه عودت
 ايده . بعض كتب فقهيه ده بوماده يرينه « موهوب موهوب لاهك
 ملكندن چيقسه الح » عبارته سيله ذكر اولمش اولغله خروج
 تعبيرندن موهوب لاهك وفاتيله موهوبك وارثه انتقالى دخی
 ادخال قلمشدر هندیه .

بوجهتله واهب اول ، اول مالى واهب ثانییدن طلب
 ایده مز . ولو كه بسبب آخر ملكنه كيرمش بولنه . زیرا برشیده
 سبب تملكك تبدلى اول شئیك تبدلى مقامنه قائمدر . « ۹۸ »
 مادهیه باق .

موهوب له ثانییدن دخی طلب ایده مز . زیرا موهوب لاهك
 مال موهوبى ملكندن اخراج و دیگرینه تمليك ایتسی واهبك
 تسليط ایتسی ايله اولغله صكره دن رجوع ایتسی كند و طرفندن
 تمام اولان شئیك نقضنى تضمن ایدر . « ۱۰۰ » مادهیه باق زیلعی .
 ينه بوجهتله موهوب له ، مال موهوبك يالكز نصفى
 ملكندن اخراج ایتسه كرك نصف شایع اولسون و كرك نصف
 مقسوم اولسون واهب دیگر نصفده رجوع ایده بیلور فتح .

زیرا رجوع ایتمکدن امتناع مانع مقداریله تقدیر اولنسی لازم کلوب بونده مانع رجوع یالکیز نصفده در زیلعی. نته کیم واهب موهوبک هیچ بر مقدارینی موهوب له ملکندن اخراج ایتامشیکن یالکیز نصفده رجوع ایده بیلجکی کی. زیرا شول کیمسه که کلدیه رجوعه حق واردر کل حقنی استیفایه حق اولدینی کی بعض حقنی استیفایله بعضیسنی ترکه دخی حق واردر. نته کیم کل حقنی ترکه حق اولدینی کی یالکیز بعضیسنی ترکه دخی حق واردر عینی. «۸۶۲» ماده شرحنه باق.

ینه بوجهتله واهب بر مبلغی برینه هبه و تسلیم ایتدکن صکره آندن استقراض ایتسه یاخود موهوب له آنی بشقه سنه اقراض ایلسه موهوب استهلاک ایدلش اولدینی جهتله آرتق رجوع ایده مز. موهوب ملک موهوب لهدن چیققدن صکره ینه ملکنه عودت ایتدکده باقیلور. اکر سبب آخرله عودت ایدرسه رجوع ایده مز.

بوجهتله موهوب له مال موهوبی برشخصه بیع ایتدکن صکره بعد التسلیم آندن اشترا ایتسه واهب آرتق هبه سنندن رجوع ایده مز.

ینه بوجهتله موهوب له مال موهوبی دیگر برشخصه هبه و تسلیم ایتدکن صکره ارث یا وصیت ایله او مال ینه موهوب لهه یعنی واهب ثانییه عودت ایتسه حق رجوعی یوقدر.

ینه بوجهتله موهوب له مال موهوبی برشخصه هبه و تسلیم

ایتدکن صکره شخص مرقوم مذکور مالی موهوب لیه سع
 یا هبه و تسلیم ایلسه یا خود موهوب له فقیر اولمغله آکا صدقه
 و تسلیم ایتدکنده واهب ینه رجوع ایده من هندیه و هجه و درر
 و عزمی زاده و انقروی ولو باع الموهوب له الموهوب من آخر
 فردہ المشتري بعیب ایسلا واهب ان رجوع هندیه فی الباب الخمس .
 اما عین موهوب ملک موهوب لیه سبب آخر له عودت
 ایتیموب فسخ سبب له عودت ایدرسه واهب اولک دخی حق
 رجوعی عودت ایدر . شوبله که مثلاً موهوب له ، مال موهوبی
 آخره هبه و تسلیم ایتدکن صکره هبه سندن رجوع ایتسه کرک
 بالرضی رجوع ایتسون کرک بالقضاء و حکم الحاکم رجوع ایتسون
 واهب اول دخی رجوع ایده بیلور . « ۲۴ » ماده یه باق انقروی
 و عزمی زاده . زیرا ۸۶۴ ماده شرحنده ایضاح اولندیغی اوزره
 بورجوع فسخدر . یوخسه عقد جدید دکلدر .

﴿ ۸۷۱ ﴾ ماده ﴿ ۸۷۱ ﴾

هلاک موهوب مانع رجوعدر . یعنی ﴿ موهوب له یدنده
 موهوب مستهلك اولسه ﴾ یعنی حقیقه یا حکماً هلاک اولسه
 مستهلكده ﴿ رجوعه محل قلماز . ﴾ اما مستهلك اولمیان قسم
 وار اینسه آنده رجوع اولنه بیلور .

یعنی واهب موهوب مستهلك بدلی موهوب لیه تضمین
 ایتدیره من . کرک موهوب له استهلاك ایتسون کرک بشقه سی
 استهلاك ایتسون و کرک خود بخود تلف اولسون هندیه . زیرا

مال موهوبك بعد الهلاك ردی متعذر اولديغی کبی مضمون دخی اولماغله بدلنك اودنمسی دخی لازم کمر زیلعی .

نته کیم موهوب له اتهاب و قبض ایلدیکی بش عدد آلتونی صرافه ووروب عین جنسدن دیگر بش عدد آلتونی مبادله اخذ ایتسه واهب رجوع ایده من رد مختار . بوراده کی هلاک حقیقه هلاک ايله حکما هلاکدن اعمدر . حقیقه هلاک عینک تلفیه حاصل اوله جغی کبی ملکیتک بقاسیله برابر عامه منافعتک تلف وفوتی ايله حاصل اولور درممتقی ای تلف عینها او عامه منافعهها مع نقاء الملك ولا تظن ان الخروج عن الملك مغن عنه فلو وهب سيفاً فجعله سكيناً او سيفاً آخر لارجع لخلاف شاة ذبحها طحطاوی . حکما هلاک موهوب بغدای اولوبده اون یا موهوب یحاق اولوبده سيف یاخود موهوب آغاج یعنی برعمرصده نابتا موجود اولوبده بالقطع اودون قلنمق یا موهوب تراب اولوبده صو ايله قاریشیدیریلوب چامور یا یلمق یاخود موهوب بش مجیدیه اولوبده مثلی بولسان دیگر مجیدیه لر ايله قاریشیدیرمق کبی . بومسئله ۸۶۹ ماده شر حنده ایضاح ایدلمشیدی . تقریر مشروحدن آکلانیلورکه بوماده ماده آفقه ايله مستغنی عنه اولماز قهستانی .

اختلاف الواهب والموهوب له

بو تقدیرده واهب هبه سندن رجوع ایتک ایستمکه موهوب له مال موهوب تلف اولدیغی ادعا ایتسه سوز بلا یمن موهوب

لهکدر. «۱۷۷۳» مادهیه باق. زیرا موهوبله اوزرینه وجوب ردی منکر در. بو جهتله مستودعه مشابه اولدی ابوالسعود المصری. عین لازم کلامسی دخی شونندرکه موهوبله کندی مالک تلفی اخبار ایدیور.

فقط واهب مال موهوب شو مال ایدوکنی دعوی ایتدکه موهوبله مال موهوب، مذکور مال اولدیغنه تحلیف اولنور ابن نجیم. نته کیم واهب هبه سندن رجوعی دعوی ایتکه موهوبله کندوسی واهب برادری ایدوکی جهتله ۸۶۶ مادهیه مبنی هبه دن رجوع اولنه میه جفی در میان ایتسه لدی انکار موهوبله، کندو برادی اولدیغنه واهب تحلیف اولنور. لانه یدعی مسبب النسب یعنی المال فکان المقصود اثباته دون النسب ولوکان المقصود النسب لایجری فیہ الیمین علی قول الامام طحاوی.

کذلک واهب هبه سندن رجوعی مراد ایتدکه موهوبله عوض ویردیکنی ادعا ایتسه سوز واهبکدر هندیه. نته کیم واهب رجوع ایتک ایستدکه موهوبله سن آنی بکا صدقه اوله رق ویردک دیسه ده واهب تکذیب ایتسه سوز واهبکدر لانه المملک وجهة التملیک تعلم منه طحاوی.

مجله ده موهوب لفظی مطلق اوله رق ذکرندن آکلا شیلورکه کل موهوب تلف اولسه رجوع اولنه میه جخی کبی بعض موهوب تلف اولسه تلف اولانده رجوع اولنه ماز. اما تلف اولمیانده

رجوع اولنه بیلور. شویله که مثلاً موهوب خانه منهدم اولسه واهب عرصه ده هبه سندن رجوع ایده بیلور انقروی.

۸۷۲ ماده

(واهب و موهوب لهدن برینک) بعدالتسلیم (وفاتی مانع رجوع عدر. بناء علیه موهوب له فوت اولسه واهب هبه دن رجوع) ایله موهوبی ورثه دن استرداد (ایده مدیکی کبی واهب فوت اولدقده ورثه سی) هبه دن رجوع ایله (موهوبی استرداد ایده مز.) واهبک وفاتی مانع رجوع یعنی واهب فوت اولدقده خیار فسخ و رجوع باطل اولدی. چونکه خیار مذکور وصفدن عبارت اولغله خیار رؤیت و شرط کبی موروث اولماز. و برده شارع هبه دن رجوعی واهب ایچون مشروع قلمش و وارثی ایسه واهب بولنماشدر. موهوب لهک وفاتی دخی مانع رجوع اولدی. زیرا موهوب له فوت اولدقده ملک ورثه سنه انتقال ایده جکی و ورثه ایسه ملکی واهب دن اخذ و استفاده ایتدکاری جهته موهوب له، برحیات ایکن ملک بشقه سنه انتقال ایتدیکی صورتده واهب رجوع ایده میه جکی کبی بونده دخی رجوع ایده مز. و برده سبب ملکک تبدیلی عینک تبدیلی مقامنه قائم اوله جفندن موهوبک ورثه یه انتقال ایتسیله عین اخیری اولمش اولور. « ۹۸ » ماده یه باق زیلعی.

سوآل، بو ماده ده واهبک وفاتی مانع رجوع عدر دینلمک کافی اولوب موهوب لهک وفاتنک مانع رجوع اولسی مارالذکر

۸۷۰ ماده ده داخل اوله جغندن آروجه ذکره و بو ماده ده
بیانه حاجت یوقدر. چونکه بوسورتده موهوب موهو- لهک
ملکندن چیقمش یعنی وارثه انتقال ایلمش اولور.

جواب، متوفی تجهیز و تکفین و قضاء دین و تسفید و سیت کی
احکامده حی حکمنده در که بو باده اقتصا ایده جک اموال
ورثه یه انتقال ایتیه جکی درکا د قهستانی. فریما یظن الالهبة
من تلك الاشياء فکان النص صرحا علی الموت اولی طحطاوی.

— ۸۷۳ — ماده

دینک مدیونه هبه سی ارادر.

بو وجهله (دان آلاحفی مدیونه) منجزا (هبه ایتدکده)
شو هبه جانب مدیونه دالیه (آرقی آندن رجوع
ایده مز.) ولوله مورد انفه ده مذکور موانع رجوعدن
هیچ بری بولنیه ان مجم را شو هبه اسقاط اولوب ساقط ایسه
عودت ایتمز. (۵۱ ۸۴۸ ماده اف) در منتقی ایمدی موانع
رجوعدن ری بولنمدی حالد هبه دن رجوع اولنه بیله جکی
۸۶۴ ماده ده محرر و دینک مدیونه هبه سندن رجوع اولنه میه جفی
شو ماده ده مسطور اولمغله عینی هبه ایله دینی هبه یعنی ابرا
بو وجهله افتراق ایدر حموی.

مثلا برکیمسه ملک منزلی ثمن معلومه مقابلنده والده سنه بیع
ایتدکن صکره صحتنده ثمنی والده سنه هبه ایدوب فوت اولسه

سائر ورثه ثمن مذکوری آندن مطالبه یا خود خانه یه مداخله
ایده منزل علی افتدی .

ایضاح القیود

۱ مدیونه ، بو تعبیر احترازیدر . زیرا دینی مدیوندن
بشقه سنه هبه و قبضه تسلیط ایتمکه اوده قبول و قبض ایتدکن
صکره و اهب هبه سندن رجوع ایله ید موهوب لهده بولسان
مقبوضنی استرداد ایده بیلور . زیرا بو وجهله وقوع بولان هبه
تملیک العین اولوب یوخسه اسقاط دین دکلدر ابوالسعود .

۲ منجزا ، بو قید احترازی اولوب معلقا هبه اولندقدده
بو هبه باطل اولور . یعنی دینک مدیونه هبه سنک معلق بالشرط
اوله رق ذکر ی باطلدر . مثلاً داین مدیونه یارین کلور ایسه
آلاجم سنک اولسون یا سن آندن بریسن یا خود نصفی
ویرر ایسه ک دیگر نصفی سنک اولسون یا سنکدر دیسه باطل
اولوب ابرا یا هبه حاصل اولماز . زیرا دینک مدیونه هبه سی
ابرا اولوب ابرا ایسه قبوله متوقف اولماق جهتیه من وجه
اسقاط ایسه ده رد ایله مردود اولق جهتیه ده من وجه آخر
تملیک اولدیغنه و تعلیق ایسه طلاق و عتاق کی اسقاطات محضه ده
اوله بیلوب یوخسه تملیکات ایله من وجه اسقاطاده غیر صحیح
بولندیغنه بناءً معلق بالشرط اوله رق دینک مدیونه هبه سی
صحیح اولماز عنایه .

بروجه محرر شرط تعلیق ایله هبه صحیح اولماز ایسه ده

شرط تقيیدی ايله صحيح اولور . شوبله که داین مديوننه سنده کی
آله جغمك نصفندن بریسهین شو شرطيله که دیگر نصفنی بکا
تأديه ایدمه سین بو شرط صحيح اولور . زیرا شرط مذکور
شرط تعلیقی اولیوب بلکه تقيیددر ابوالسعود .

﴿ ۸۷۴ ماده ﴾

﴿ بعد القبض صدقه دن بر وجهله رجوع اولنه ماز . ﴾
موانع رجوعدن بری کرک بولنسون کرک بولنسون اصلاح
ایضاح . زیرا صدقه مقابلنده متصدق ثوابه نائل اولدینی جهتله
عوض حاصل اولمغله رجوع جائز اولمدی .

سوآل ، صدقه کی عمل خیر مقابلنده داراخراده حصول
ثواب رب کریمك فضل واحسانی اولوب یوخسه معتزله نك
دیدیکی کی عمل خیره مقابل ثواب ویرمك واجب الوجود
اوزرینه واجب اولمدینی جهتله حصول ثواب مقطوع به و محزوم
دکلدر . بناء علیه صدقه دن رجوع جائز اولملی ایدی .

جواب ، ثوابدن مراد حصول الوعد بالتوابدر . بوده
عوضدر ابوالسعود وعنايه الثواب مقطوع الحصول فی الاخره
لان الله تعالى لا یخلف الميعاد سعدی چلبی .

صدقه اوچ بوعدر . ۱ هم لفظا همده معنا صدقه در .
فقیره صدقه لفظیله برمال ویرمك کی . ۲ یا لکز معنا صدقه در .
فقیره یعنی محتاجه هبه لفظیله برمال ویرمك کی . نته کیم برکیمسه
سائل یا محتاجه علی وجه الحاجة برمال ویروبده صدقه اوزرینه

نص ایتسه استحسانا رجوع اولنه ماز هندیه فی الباب الثانی عشر .
 ۳ مالکیز لفظا صدقه در . غنی به صدقه لفظیه بر مال
 ویرمک کی . بو انواعک هبج بریسنده رجوع اولنه ماز .
 ایمدی غنی به ویریلان صدقه دن رجوع اولنه مامسی لفظ اعتباریله در .
 زیرا غنیک کثرت عیالی سببیه آکا ویریلان صدقه دن بعضا
 ثواب قصد اولنور . ابوالسعود . ۸۳۵ ماده شرحنده ذکر
 اولندیغی اوزره غنی به تصدق هبه اوله جفته نظرا بوندن رجوع
 اولنه بیلمسی ایجاب ایدرسده بونده عدم رجوع استحسانیدر .
 اما فقیره و محتاجه ویریلان هبه دن رجوع اولنه مامسی معنی
 اعتباریله در . حتی بر کیسه دیکر کمسنه صدقه نیتیه بر مال
 ویرمکه او کمسنه کندوسنه ودیعه یا عاریت اولمق اوزره ویرلدیکی
 ظننده اوله رق بونی دافعه اعاده ایتسه دافعک آلمسی حلال
 اولماز . « ۷۲ » مادهیه باق . آلور ایسه رد واعاده ایتسی
 لازم کلور هندیه . نته کیم بر کیسه محتاجه و سائله علی وجه
 الحاجه بر مال ویروبده صدقه ایدوکنه نص ایتسه بیله صدقه
 اوله جغندن استحسانا رجوع اولنه ماز هندیه فی الباب الثانی
 عشر و بر مالده هبه ایله صدقه اجتماع ایتدکده هبه دن رجوع
 اولنوب اما صدقه دن رجوع اولنه ماز . شویله که مثلا بر کیسه
 برخانه یی دیکر کمسنه یه نصفی هبه و نصفی صدقه اولمق اوزره
 ویرسه هبه دن رجوع ایده بیلوب فقط صدقه دن رجوع ایده مز
 هندیه . بعد القبض ، تعبیری ۸۳۷ مادهیه مبنی بولمشدر .

و یریلان مالک هبه یا صدقه اولمسی

حقنده اختلاف

واهب ، هبه ایدی بناء علیه حق رجوعم واردر دیو
ومو هوبله صدقه ایدی دیواختلاف ایتدکرنده سوزواهبکدر
جمع الانهر. تعویضده ومانع رجوع قرابتده ومو هوبده حصول
زیاده متولدهده اختلاف اولندقدده سوزینه استحسانا واهبکدر
هنديه فی الباب التاسع .

۱ مسئله، بر مالی فلان کیمسهیه صدقه ویرمکه وکیل
بولنان آدم اول مالی دیگر بر فقیره صدقه ویرسه بعض فقهایه
کوره ضمان لازم کلوب اما دیگر بعض فقهایه کوره ضمان لازم
کمز. لان المقصود ابتغاء وجه الله تعالى وقد وجد فی حق فقیر
هنديه .

۸۷۵ ماده

(بری بر کیمسهیه مطعوماتدن) یعنی ینهجک وایچیلهجک
(برشی اباچه ایتدکده اول کیمسه اکرچه اول شیء آلوده
آخره صاتمق یاخود هبه) وهديه وصدقه (ایتمک کبی لوازم
تملکدن اولان بروجهله تصرف ایده مز.) زیرا اول کیمسه
آنی اکل ایتدکجه مییحک آنده کی ملکی زائل اولماز و
بناء علیه قبل الاکل نهی ایدرک اباچه دن رجوع
ایده بیلور . بو صورتده اول کیمسه نک آنده تصرفی
غیرک ملکنده بلا اذن تصرف اولور. بو ایسه جائز دکدر.

«۹۶» ماده‌یه باق. واول کیمسه آنی یدکدنصکره آنده تصرف ممکن اولماز ولوالجیه شوقدر وارکه بر کیمسه ضیافت اتخاذا ایدرک متعدد صفره لر قوروب جماعتی صفره لره تقسیم ایتسه بر صفره ده اوطوران کمنه او صفره ده کی مسافره یاخود خدمت ایدنه صفره دن برشی ویرسه جائز اولدینی کبی دیگر صفره ده بولنان کمنه یه ویرسه ینه استحسانا جائز اولور اما بعض فقهایه کوره بو جائز دکلدرکه قیاس اولانده بودر دررهنده قیل الباب الرابع من الهبة.

(فقط اول شیدن اکل و تناول ایده بیلور).

تناول، یمک و بخشیش و یرمک معناسنه اولوب لکن فقره اولادن مستفاد اوله جنی اوزره بوراده معنای ثانی قصداولنه ماز. لکن اکل مأ کولاته مخصوص ایکن تناول هم مأ کولاته همده مشروباته شامل اولوب بو حالد تناولک اکله عطفی عطف العام علی الخاص اولور.

(وبعدہ صاحبی آنک) یعنی اکل اولنان شی قیمیاتدن ایسه (قیمتی) ومثلیاتدن ایسه مثلی اکل ایدن کمنه دن (مطالبه ایده من).

(مثلا برباغ صاحبنک اذن و اباجه سیله بری باغدن بر مقدار اوزوم ییسه باغ صاحبی صکره دن اول اوزومک اچقه سنی) یا مثلی (آله ماز). و بر کیمسه دیگر کمنه یه باغمه کیروب اوزوم قوپار دیدکده فقیهک بیاننه کوره او کمنه یا لکیز طویه بیله جک

مقدار اوزوم قوپاره بیلور. زیرا بوسوز مخاطبك فى الحال محتاج اولدینی مقداره اذندر خانیه. دیگر بعض فقها ایسه مخاطب بوسوزله آنجق بر صلقم قوپاره بیلور بزازیه .

نته کیم برقادین کندی مالنی زوجی زید ایله اکل ایدوب یعنی مزبوره قادین کندی مالنی کندی ایله صرف و برلکده اکل ایدرک فوت اولدقده سائر ورثه سکا یدیردی دیو زیده حصه لرینی تضمین ایتدیرمکه صلاحیتلری اوله ماز ابو السعود العمادی. اما زوجنه ویروب زوجی صرف ایتسه بونک حکمی ۸۳۸ ماده شرحنده بیان ایدلمشیدی.

هیهده رجوع جائز اولدینی کبی اباحه ده دخی رجوع جائزدر. شویله که میحک اباحه سندن حق رجوعی واردر. نته کیم ۱۲۲۶ ماده ده بیان اولنیور.

شیوع، اباحه نك صحتی منع ایتیه چکی کبی اباحه اولنسان مالک و کذا اباحه ایدیلان کیمسه نك معلوم اولسی شرط اولدینی ۸۳۲ ماده شرحنده بیان اولمشیدی. شمدی میحک اباحه سنه مباح لهک واقف اولسی شرط میدر؟ بونی ایضاح ایده لم بو مسئله ده بین الفقهاء اختلاف واقع اولمشدر قینه نك بیاننه کوره شرط دکلدر. بناءً علیه میحک اباحه سنه مباح له واقف دکل ایکن اباحه اولنسان شیئی اکل ایتسه مباح له ضمان لازم کلز خانیه فی رائة الغاصب والمدیون وجامع الفتاوی . بجرده وولوالجیه ده مذکور اولدیغنه کوره شرطدر. بناءً علیه جمله

ناسه اذن ویردم و اباحه ایتدمکه باغمدن اوزوم ییه لر کیمکه باغمدن اوزوم آلورسه آنکدر دیدکده بو سوزی کیمکه و جاها یا غیا با استماع ایتمش ایسه آله بیلور ایسه ده بو سوزی ایشتمیان کمنه آله ماز. فان ناول فلان من ذلك بالجهل فانه يتناول حراما ولا یسعه ذلك ما لم یعلم بالاذن والاباحه هندیه فی الباب الثالث. زیرا اباحه اطلاقدن عبارت اولوب اطلاق ایسه و کالت کبی قبل العلم حکمستزدر .

۱ مسئله، بر کیمسه بر خاندن حیوان باغلا یوب کیتد کدنصکره اول حیواندن قالان کوبره نی کیم آلور ایسه آنک اولوب صاحب خان آکا احق اولماز هندیه .

لاحقه

تحلیله متعلق بعض مسائل بیاننده در

۲ مسئله، بر کیمسه دیگر کمنه یه « انت فی حل مما اكلت من مالی » یعنی « بنم مالندن ییه جکک سکا حلالدر » دیسه او کمنه آنک مالنی اکل ایده بیلور. مکرکه اول کیمسه نک شو کلامنده اماره نفاق بولنه هندیه فی الباب الثانی. نته کیم بر کیمسه من اکل من مالی فهو فی حل یعنی کیمکه بنم مالنی اکل ایده آکا حلال اولسون دیسه آنک مالندن فقیر وغنیسک اکل ایتسی حلال اولور من الحل المزبور .

قال لرجل مرابحل کن فقال بحل کردم اگر مرابحل کنی

فقال بحل کردم لایصح ابراءه و یصح ابراء الثانی هندیه فی الباب الرابع وفيها تفصیل .

۳ مسئله، بر کیمسه دیگر کمسنه یه سنک بنده کی هر حقکی بکا حلال ایت دیوبده اوده حلال و ابرا ایتسه اول کیمسه بری اولور. او کمسنه مذکور حقوقه کړک عالم اولسون و کړک اولسون هندیه. زیرا ساقطک جهالتی مانع اسقاط دکلدرد. نته کیم مدیون، داینه سنک بنده کی هر حقکدن بی ابرا ایت دیوبده اوده ابرا ایتسه مدیون قضاء جمله حقدن بری اولور. زیرا قضا ظاهره مبنی اولوب لفظک ظاهری ایسه عامدر. لکن بعض علمایه کوره دیانة آنجق داینک مدیوننده نقدر آله جفی بولندیفی ظن و تخمین ایدیور ایدیسه او قدردن بری اولوب زیاده سندن بری اولماز. زیرا اخرت رضایه مبنی اولوب رضا ایسه آنجق بو مقدارده در بزازیه فی الغصب و طحطاوی فی اوائل الهبة .

۴ مسئله، تحلیل، ذمتده واجب اولان شی اوزرینه واقع اولور. یو خسه عین قائم اوزرینه دکل . بناء علیه مغضوب منه غاصبی تحلیل ایتسیله غاصب، عیناینده موجود بولنان مال مغضوبه مالک اولماز هندیه فی الباب الثالث. بلکه او مال بوند نصکده دخی مغضوب منهک اولوب فقط غاصب آنک ضمانندن بری اوله رق بوند نصکده مغضوب یدنده امانت اولور طحطاوی .

(ختان یا خود زفاف دو کونلرنده کلان هدیله لری اصحابی چو جوق یا کلین و بابا و آنالرندن هر قغیسنه دیو) یعنی بونلردن هر قغیسنه مال اولمق اوزره (کتور مشلر ایسه اول هدیله لر آنکدر) . یعنی مهدی له بالغ ایسه کندوسنک وصغیر ایسه ولی یا وصی یا مربیسنک قبضیله آکا مالک اولور . بوفرده آلتی صورت اولدینی ادنی ملاحظه ایله آکلاشیلور . شو فقره « ۸۶۱ » ماده نك فرعی اولوب بونك حکمی ماده مذکوره ایله بیان ایدلمش ایسه ده بوراده فقره آتییه توطئه ایچون ذکر اولنیور . مع ذلك بوماده بوفصلك مسائلمندن دکلدر .

مثلا برکیمسه ختان دو کوننده برالماس ایکنه یا کوپه یا بر ساعت ی نسوانه مخصوص چارشب یا کبیرک تلبسنه مخصوص پالطو کتور و بده چوجغکدر یا باباسنکدر یا آناسنکدر یعنی آکا هبه ایتدم دیر ایسه و اصولی دائره سنده قبول وقبض وقوعبولور ایسه آنک اولور . چوجق الماس ایکنه یا کوپه یی یا نسایه مخصوص چارشبی یا خود چوجغک آناسی پالطوی نه یا پسون دینلمز . زیرا هبه ده موهوبك مال اولمی شرطدر . یوخسه موهوب حال حاضر یله موهوب لهك استعمالنه صالح اولمی شرط دکلدر .

(واکر) بروجه بالا (کیمک ایچون کتور دکلرینی بیان ایتیوب کندولرندن سهوآل ایله تحقیق) قابل اولور ایسه

آنلردن تحقیق اولنه رق اصحابی کیمک ایچون کتوردکلرینی بیان ایدرلر ایسه آنلرک سوزلری قبول اولنور . زیرا مملک اولان آنلردر هندیه . مثلاً مهدی ، صورت اولیده هدییه یی پدره یا مادره کتوردم دیر ایسه قبول اولنه جنی کبی صورت ثانیه ده زوج یا کلینه کتوردم دیر ایسه ینه قبول اولنور طحطاوی . اما آنلردن سوآل ایله تحقیق (دخی قابل اولماز ایسه اولحالدہ عرف وعادت بلده یه رعایت اولنور) ۳۶۰ ماده یه باق . شویله که ختان دوکونلرنده کلان هدیهلر اکر صبیانه صالح وصبیانک استعمال ایتدکلری شیلردن ایسه هدیهلر صینکدر صولجان « چوکان فارسی اولوب جرید اوینونده حیوان اوستنده طوی طوتوب آلمغه مخصوص اوجی اگری دکنک ، وکره «طوپ» وسائر اوینونچاق وصبیان البسه سی کبی لان هذا تمليك للصبي عادة واکر هدیهلر یالکیز رجاله صالح ایسه هدیهلر بابانکدر . رجاله مخصوص البسه واسلحه حربیه کبی . واکر یالکیز نسایه صالح ایسه آنانکدر . قادینلره مخصوص البسه ومجوهرات کبی . واکر ایکینسنده صالح اولور ایسه — دراهم ودنانیر وبارداق وقاشیق وساعت کبی — نظر اولنور . هدییه یی کتورن بابانک اقربا واحبساندن ایسه بابانکدر لان التملك ههنا من الاب وآنانک اقربا واحبساندن ایسه آنانکدر لان التملك ههنا من الام الحاصل بونک وامثالنده تعویل واعتماد عرف وعادته اولمغله بوکا مخالف حکمه دلالت ایده جک برسبب

ووجه بولنورایسه آکا اعتماد ایدلک لازم کلور بحر وفتاوی جدیده وطحطاوی .

بوماده ده کی ختان یاخود زفاف دوکونلرنده تعمیری احترازی اولیوب برکیسه سفر دن کلرک دیگر کمنه نك خانه سنه نازل اولوب « بواشیایی اولادک وزوجه ک آره سنده تقسیم ایت » دیهرک برطاقم اشیایی ویردکده اول کیسه یه مراجعت ایله اول اشیادن هانکیلری عیالنده بولنانلردن کیملره عاقد اولدینی سوآل و تحقیق اولنهرق آکا کوره ایجابی اجرا اولنور . ممکن دکل ایسه نظر اولنور . اول اشیادن صغار ذکوره صالح اولنلر آنلرکدر « بوصغار متعدد اولور ایسه فصل تقسیم اولنور » وصغار اناثه صالح اولنلر آنلرکدر . وکیره قیزلره صالح اولنلر آنلرکدر . وکیر رجاله صالح اولنلر آنلرکدر . وهم رجال همده نسایه صالح اولنلره کلنجه مهدی رجلاک اقربا و احباسندن ایسه هدیه لر آنکدر . واکر قادینک اقربا و احباسندن ایسه قادینکدر ولوالجبه وهندیه .

خاتمه

بوکی دوکونلرده ارسال اولنان شیلرک دفع و تسلیمی عرف و عادت ایجابجه علی وجه البدل اولمق ایسه مثلیاتدن ایسه مثلی و قیمیاتدن ایسه قیمتی ایفا ایتمق قابض اوزرینه لازم اولدینی کی اکر عرف و عادت ایجابجه بولنر علی وجه البدل

ارسال اولمئوب علی طریق الهبه والتبرع ارسال اولنورایسه
بونک حکمی هبه نك حکمی کیدرکه بعد الهلاک او الاستهلاک
رجوع یوقدر. بوباده اصل شودرکه عرفا معروف ینلرنده
مشروط کیدر. «۴۳» ماده یه باق خیریه .

— فصل ثانی —

یعنی باب ثانینک ایکنجی فصلی

﴿ هبه مریض حقنده در. ﴾

بوراده کی مریضدن مراد، تعریفی ۱۵۹۵ ماده ده مذکور
اولان مرض موت ایله مریضدر.

مرض، بدنک برحالتیدرکه آنکله اعتدال الطبعه زائل
اولور ابن ملک شرح منار .

مریضک تصرفاتی صحیحک کی اولمئوب آنک تصرفاتنده
بعض تقييدات بولندیغندن بالخاصه مریضه عائد بعض احکام
شرعیه ذکر اولمنقده در . کورلمز میکه صحیح اولان کیمسه
کندی مالنی دیلدیکنه دیلدیکی بها ایله بیع و هبه و هرشیئی
هرکس ایچون اقرار ایده بیلورکن مریض بویله دکلددر. نته کیم
بیع مریضک احکامی ۳۹۳ ماده ایله مواد تالیه سنده واجاره
مریض ۴۴۴ ماده شرحنده و کفالت مریض دخی ۶۲۸ ماده
شرحنده و رهن مریض دخی ۷۰۸ ماده شرحنده و هبه مریض

دخی بو فصلده و اقرار مریض دخی ۱۵۹۵ ماده ایله مواد
تالیه سنده بیان اولنیور .

مرض ، عجز خالص بولنان سبب موت اولمغله
وارث ایله غریمک حقنک مال مریضه تعلقی موجب اولور .
بناء علیه بونلرک حقوقی صیانه مرض ، موته متصل اولمق
شرطیله اسباب حجردن بری اولمشدر . بو حجر دخی یالکز
بو حقوقک صیانتی ممکن اوله حق مقدارده در . بوده وارثه کوره
مالک ثلثاندن وغریمه کوره مقدار دیندن عبارتدر .

ایمدی مرض ، موته متصل اولور ایسه اول مرضه مستندا
اسباب حجردن اولور . اول مرضه استنادینک سببی شودر که
موته متصل اولان مرض اولندن اماته ایله موصوف اولمش
اولور . چونکه مرضدن هر جزء المی موجب اولوب موت ایسه
الامک ترادف و تعاقبندن حاصل و بناء علیه موت کل الامه
مضافدر . یوخسه یالکز الم اخیره مضاف دکلدر .

مرضک اسباب حجردن اولسی موته متصل بولنسی شرطیله
مشروط اولسنه شو مسئله تفرع ایدر . هر تصرفکه فسوخه
محملمدر هبه و محاببات کبی « ۳۹۴ مادهیه باق ، مریضک مذکور
تصرفی فی الحال صحیح اولور . زیرا مرضک حجره سببیتی مرض
مذکور موته متصل اولمده قچه مشکوک و بناء علیه حجر دخی
مشکوک اولمغله حجر ثابت اولماز . بوندن حق غریم و وارثک
فواتی لازم کلز . زیرا مرض ، مؤخره موته متصل ومؤدی

اولور ايسه تصرف مذکور نقض اولنق صورتيله مذکور حقلر
محافظه اولنور ابن ملك شرح المنار .

۸۷۷ ماده

﴿ وارئى ﴾ ودينى ﴿ اوليان كيمسه مرض موتنده جميع
اموالنى برينه هبه وتسليم ايتسه صحيح اولور. ﴾ چونكه مرض
موتده هبه وصيت اولوب غير مديونك ثلث مالدين زياده سنده
وصيتك عدم جوازى ورثه نك حقى ايجون اولديغى سندن ورثه
اولينجه وصيت مذكوره صحيح اولور مجمع الانهر فى الفرائض .
نته كيم مديون مستغرقك وصيتك عدم جوازى حق غرامان
طولاي اولوب غريم بولمى نجه وصيت صحيح اولور. ﴿ وبعد الوفاة
تركه سنه امين بيت المال مداخله ﴾ وموهوبك هيچ بر مقدارينى
موهوب لهدن طلب ﴿ ايدمه مز. ﴾ زيرا علم فرائضده بيان اولنديغى
وجهله بيت المال موصى له باكثر من الثلثدن مؤخردر .

علم فرائضده مذکور اولديغى اوزره تركيه مستحق اولنلر
اون صنف اولوب اوننجيسى بيت المال ايسه ده بيت المال مال
متوفانك وضعى ارث طريقيله اوليوب بلكه فى جهتيله در .
چونكه بيت المال وضعى ارث طريقيله اولسه ايدى بر كيمسه نك
وارث خاصى اولمديغى تقديرده ثلث مالى معين بر فقيره وصيت
ايتد كده اشبو وصيتى وارثه وصيت اوله جنى جهتيله صحيح
اولماق يعنى بقيه ورثه نك يعنى سائر بالجهله فقرانك اجازته موقوف
اولمق لازم كلور رد مختار فى الفرائض .

بو ماده ده هبه و تسلیم دنیای . زیرا بو کیمسه مرض
موتنده جمیع اموالی برینه هبه ایدوبده قبل التسلیم فوت اولسه
هبه نك حکمی یوقدر . اگرچه مرض موتده هبه، وصیت
وبناء علیه ثلث مال دن معتبر و وصیتده قبض غیر لازم ایسه ده
حقیقتده هبه اولدینی جهته ۸۳۷ ماده یه منی قبضه توقف ایدر
رد مختار. ۸۵۵ ماده شرحه باق.

۸۷۸ ماده

﴿زوجه سندن ماعدا وارثی﴾ و دینی ﴿اولیان کیمسه مرض
موتنده جمیع اموالی زوجه سنه و یا خود زوجندن ماعدا وارثی﴾
و دینی ﴿اولیان قادین جمیع اموالی مرض موتنده زوجه هبه
و تسلیم ایسه صحیح اولور﴾ زیرا مرض موتده هبه وصیت
اولوب مزاحم اولدینی صورتده وارثه دخی وصیت صحیح
اولور درممتقی فی الفرائض .

بو ماده نك حکمی زوج ایله زوجه یه تخصیص قلمشدر .
زیرا بو ایکدن بشقه وارثلر ترکه نك کلیمسه فرضا وردا وارث
اوله رق کل ترکه یی احراز ایده جککری جهته وصیت هبه یه
حاجت یوقدر درممتقی فی اقرار المریض . یعنی زوج ایله زوجه نك
یکدیگرک اموالی احرازده وصیت احتیاجلری واردر . چونکه
بونلر فرضا حصه ارثیه آلورلر ایسه ده من لایرد علیهما
اولدقلری جهته ردا حصه آله مازلر ایکن سائر ورثه فرضا
وردا متوفانك جمیع اموالی احراز ایده یله جککرینه بناء

بونلره وصیتک فائده و ثمره سی اوله ماز. مثلاً زوجه سندن ماعدا وارثی اولمیان بر کیمسه فوت اولسه ربع مالی زوجه سنه موروث اولور ایسه ده ثلاثه ارباعی بیت الماله قالور. بناء علیه اول کیمسه جمیع اموالی مرض موتنده زوجه سنه هبه و تسلیم ایتدکده جمیع اموال زوجه مزبوره به قالوب امین بیت المسال مداخله ایده مز. لکن بر قزندن بشقه وارثی اولمیان بر کیمسه فوت اولدقده ترکه سنک نصفی فرضا مزبوره قزی آله جنفی کبی دیگر نصفی دخی مزبوره قزی رداً آله رق جمله ترکیبی احراز ایدر. ایمدی بر کیمسه مرض موتنده جمیع اموالی قزینه هبه و تسلیم ایتسه صحیح ایسه ده اول اموالی هبه و تسلیم ایتماش اولسیدی ینه مزبوره به قاله جنفی جهتله هبه ایدوب ایتماسنده بر فائده و ثمره یوقدر.

(وبعد الوفاة) یعنی اول کیمسه یا مزبوره قادین مذکور مرضدن فوت اولدقدنصکره (بونلردن برینک ترکه سنه امین بیت المال مداخله) و حصه ارثیه لرندن فضله سننی استرداد (ایده مز.) زیرا ثلثدن زیاده سنده وصیتک عدم صحتی ورثه نک حق ایچون اولوب وارث مرقومدن بشقه وارثی اولمینجه وارثه دخی هبه صحیحدر. وماده آنفه شرحنده ذکر اولندیغی اوزره بیت الماله وارثی بولنمیانک مالک وضعی ارث طریقله اولیوب بلکه فی طریقله در مجمع الانهر فی الفرائض .
مثلاً زوجه سندن ماعدا وارثی اولمیان بر کیمسه مرض

موتنده جميع اموالي زوجه سنه هبه و تسليم ايتد كدنصكره
فوت اولسه امين بيت المال زوجه يه ربع حصه ارثيه كي آل
ثلاثة ارباعي بيت المال ايچون آلورم» ديه مرز .

۸۷۹ ماده

(بر كيمسه مرض موتنده) متعدد (ورثه سندن) يعنى
وقت موتده وارث اوله جقلدن (برينه برشى هبه) و تسليم
(ايدوبده) اول مرضدن (فوت اولدقده ديكر ورثه) نك
اجازتنه موقوف اولوب بناء عليه ورثه مرقومه شو هبه يي
بعد موت المورث مجبز اولور ايسه هبه نافذ اولور . « ۲۴ »
ماده يه باق . و آرتق بعدالاجازه ندامت فائده ويرمز . « ۵۱ »
ماده يه باق فيضيه . و ورثه متعدد اولوبده بعضيسى مجبز اولمش
و بعضيسى فسخ ايتمش اولسه مجبز اولانك حصه سنده نافذ
و فسخ ايدنهك حصه سنده منفسخ اولور . فقط شو اجازتك
صحتنده اجازت ويرن وارثك عاقل و بالغ و صحيح يعنى غير مريض
اولملري لازمدر . حتى هبه مذكوره يي ورثه دن بولسان صغير
ميز يا مجنون مجبز اولور ايسه معتبر اوليوب وصيلري بعدالاجازه
دخى حصه ارثيه لرinx آلورلر بهيجه .

فقط بو اجازت بعد موت الواهب اولمق شرطدر . حتى
قبل موت الواهب اولان اجازتك حكى يوقدر . زيرا ورثه نك
حقلى مورث واهبك فوتند نصكره ثابت اولوب قبل الفوت

ورثه نك بر كونه حقلى يوقدر كه حتى اجازت ايله آنى اسقاط ايلمىش اولسونلر جامع الفصولين.

مثلا مريض بر قادين مهرينى زوجنه هبه ايدوب ورثه سى دخى بونى مجيز اولدقدنصكره قادين فوت اولسه هبه مذكوره نافذه اولماز انقروى . چونكه اول قادين فوت اولمزدن اول ورثه نك هبه اولسان مهرده بر كونا حقلى يوقدر. ورثه نك حقلى هبه اولسان مالك ورثه يه موروث اولمسيله متحقق اولوب ارث ايسه مورثك فوتدنصكره ثابت اولور.

شو هبه نك عدم نفاذى ورثه نك حقلرندنطولاى اولوب يوخسه واهبك عدم اهليتندن ناشى دكلدر. نته كيم شو فصلك عنوانى شرحنده بيان اولنان مسائل اصوليه دن دخى مستفاد اولور. بناء عليه بر مريض ، مالى وارثنه هبه و تسليم ايتدكدن صكره ديكر ورثه سى بولنديغندن طولاي شو هبه غير نافذه ايدوكى بيانيله استرداد ايتك ادعا سنده بولنسه شو دعواسى قبول ايديله مز . نته كيم مريض بر قادين مهرينى زوجنه هبه ايتدكدنصكره شو هبه مرض موده اولدى ديكر ورثه دخى موجوددر ديه رك وغير نافذ اولديغنى بيان ايله رك مهرينى ادعا ايدمك اولورسه دعواسى رد اولنور. و صكره اول مرضدن فوت اولورسه سائر ورثه سى حصه ارثيه لرني موهوب لهدن طلب ايدمك بيلورلر هندية فى الباب العاشر. كذلك بر قادين مرض موتنده زوجى ذمتنده كى مهرينى آكا هبه ايتدكدن صكره

غزبوره هنوز بر حیات ایکن زوجی فوت اولدقده مزبوره
آرتق مهر مذکوری دعوی ایده مز فوتنندن صکره ورثه سی
دعوی ایده بیلور قیه. بوماده ده کی ورثه دن مقصود وقت موته
وارث اولنلدر. یعنی موهوب لهک وارث یا غیر وارث اولسی
امرنده معتبر اولان وقت موت اولوب یوخسه وقت هبه دکلدر.
بناء علیه اوغلی بولنان بر مریض مرض موتنده برادرینه
بر مالی هبه و تسلیم ایدوبده قبل موت الواهب ابن مرقوم
فوت اولغله اخ مرقوم واهبه وارث اولسه دیگر ورثه دخی
موجود ایسه هبه مذکوره نافذ اولماز. بالعکس بر کیمسه وارثی
بولنان برادرینه مرض موتنه بر مالی هبه و تسلیم ایتدکن صکره
اوغلی طوغسه اخ مرقومه اولان هبه صحیحدر رد مختار.

کذا بر مسلم مرض موتنده غیر مسلم اوغلنه بر مالی
هبه و تسلیم ایتدکن صکره ابن مرقوم اسلامه کلوب بعده
مریض فوت اولسه هبه چاژ اولماز جمع الانهر فی الوصایا.
نته کیم بر کیمسه مرض موتنده بر طاقم اشیاسنی بر قادینه هبه
و تسلیم و بعده اول کیمسه مزبوره یی تزوج ایتدکن صکره اول
مرضدن فوت اولسه سائر ورثه هبه یی طوتمیوب اشیای موهوبه یی
میراثه ادخال ایده بیلور لر نتیجه. حالبوکه اقرارده حکم بر عکسدر.
شویله که مریض وارثنه اقرار ایتسنده وارث یا غیر وارث
اولمقده معتبر اولان وقت اقراردر. زیرا اقرار فی الحال تصرف
اولوب بناء علیه وقت مذکوره کی حاکم معتبر اولسی لازم کلدی.

«۱۵۹۹» ماده‌یه باقی جمع الانهر فی الوصیه.

وورثه هبه مذکوریه بی (مجیز اولماز) لر (ایسه اول هبه صحیح اولماز). یعنی باطل اولور. زیرا مرض موتده هبه وصیت اولوب وارثه ایسه وصیت صحیح دکلدر. چونکه رسول اکرم صلی الله تعالی علیه وسلم ان الله اعطی کل ذی حق حقه فلا وصیه لوارث بیورمشدر. ایمدی وارثه وصیت درت وجه اوزره اولوب هربری باطلدر. وجه اول، صوره وصیتدر شویله که مریض مرض موتنده بعض اموالی بعض ورثه‌سنه بیع ایتدکه نافذ اولماز. «۳۹۳» ماده‌یه باقی. ولوکه قیمت حقیقه سیله بیع ایده. زیرا بو بیع سببیه مشتری بولنان وارثی دیگر ورثه اوزرینه مذکور عینی آکا ویرمسیله ایتار واختیار ایلمش اولور.

وجه ثانی، معنی وصیتدر. مریض مرض موتنده معین بعض اموالی ورثه‌سندن بعضیلرینه اقرار ایتسی کی. بودخی معنی وصیتدر. زیرا مقر به مقر لهه بلا عوض سالم ومختص اولمش اولور وشبهه الحرام دخی حرامدر.

وجه ثالث، حقیقه وصیتدر. شویله که مریض مرض موتنده معین بعض اموالی بعض ورثه‌سنه وصیت ایلمسی کی. بوماده ده بیان اولنان بوقیلدندر.

وجه رابع، شبهه وصیتدر. شویله که مریض مرض موتنده جید برمالی بعض ورثه‌سنه اول بعضک ردی مالنه مقابل بیع

ایتمی کی کشف الاسرار شرح المنار فی فصل والامور المعترضة
على الاهلية .

مجلده اول هبه صحیح دکلدر دینلمسیله اشارت اولنیورکه
هبه هیچ بر مقدارنده صحیح اولماز . یوخسه فقره آیهده
ذکر اولندیغی وجهله ثلث مساعد اولدیغی مقدارده صحیح
اولور دینیه من .

ایضاح القيود

۱ مرض موتنده ، بوتعیر احترازیدر . زیرا مرض مونک
غیری بر مرضله مریض اولانک هبه سی صحیح اولانک هبه سی
کبدر ولوالجیه .

۲ فوت اولدقده ، بوتعیردن مستفاد اولورکه اول کیمسه
فوت اولیوب کسب افاقت ایتدکده هبه مذکور صحیح و نافذ
اوله جفی جهتله بعده فوت اولسه آرتق دیگر ورثه موهوبه مداخله
ایده من .

مثلاً برقادین خسته اولدقده زوجی ذمتنده اولان مهرینی
آکا هبه ایتدکن صکره افاقت بولوب بعده بر مدت مرورنده
فوت اولسه هبه لازم اولور علی افندی . نته کیم بر کیمسه
حال صحتنده جمیع اموالی ورثه سندن برینه هبه وتسلیم ایتدکن
صکره فوت اولسه سائر ورثه هبه مذکوریه مداخله
ایده منزل علی افندی .

مثلاً متعدد اولادی بولسان بر کیمسه حال صحتنده جمیع

اموالی بر او غله هبه و تسلیم ایتسه صحیح اولور بزازیه .
 مع ذلك بووجهله بعض اولادی ترجیح ایتک کراحت تحریم
 ایله مکروهدر ابوالسعود المصری . ویکره ذلك عند تساویهم
 فی الدرجة واما عند عدم التساوی کما اذا کان احدهم مشغلا
 بالعلم لا بالكسب لا بأس ان یفضله علی غیره ای لایکره اذا کان التفضیل
 لزیاده فضل له فی الدین . بناءً علیه هبه ده مساواته رعایت ایتلیدر
 وحتی بر او غلی و برده قزی اولان کیمسه قزینده او غله
 ویردیکی قدر ویرملیدر که مقتابه اولان بودر طحطاوی .

حتی صحابه کرامدن بر ذات روایت ایدر که پدرم بکا بر مالی
 هبه ایتمش و رسول اکرم صلی الله تعالی علیه وسلمک بو هبه
 شاهد اولمی آرزو ایدلمش اولغله پدرم بنی حضور انوار نشور
 نبوی ایصال و بیان حال ایدنبجه رسول عدالت قرین پدرمه
 بشقه اولادک وارمی سو آلی ایراد ایلمی و پدرمه وارجوانی
 ویرمی اوزرینه آنلرده بونک مثلنی هبه ایتدکی دیه صورمش
 و پدرمه یوق دیمش اولغله هذا جور یعنی بو ظلمدر بیورمشدر
 عنایه . شوقدر وار که اولاددن برینک فضل و کمالی زیاده اولنبجه
 بونک دیکر لری اوزرینه ترجیحده مساع بولندیغی دخی کتب
 فقهیه ده بیان اولمشدر ابوالسعود المصری . ان کان فی ولده
 فاسق لاینبغی ان یعطیه اکثر من قوته کیلا بصیر معینا له فی المعصیه
 ولو کان ولده فاسقا فاراد ان یصرف ماله الی وجوه الخیر و یحرمه
 عن المیراث هذا خیر من ترک طحطاوی باختصار .

صحت ومرضه اختلاف

موهوب له هبه وتسليم واهبك حال صحتنده وقوعبولديغنى
ادعا وورثه حال مرضه وقوعنى دعوى ايتدكده سوز على قول
هبنك حال مرضه وقوعنى ادعا ايده نكدر. «۱۱» مادهيه باق.
لانه نيكر لزوم العقد والملك اما على قول آخر سوز حال صحتده
وقوعنى ادعا ايده نكدر. لان تصرفات المريض نافذة وانما تنقض
بعد الموت واختلف فيه فالقول لمن نيكر النقص . اما بينه حال
صحتده وقوعنى دعوى ايده نكدر. «۱۷۶۶» مادهيه باق تنقيح
وهنديه فى الباب التاسع من الهبة وتقول على افندى فى ترجيح
البيئات .

۳ هبه، بوتعبير دلالت ايدركه شوحكم يعنى بعض ورثه نك
مرض موده عدم ترجيحى املاكه مخصوص اولوب اما اراضى
اميريه ايله مسقفات ومستغلات وقيقه نك فراغنده خكم بويله
دكلدر . شويله كه اراضى اميريه وموقوفه نك مرض موده
كرك بعض اصحاب انتقاله يعنى ورثهيه وكرك اجنبى يه فراغى
معتبردر . ولو كه فارغ مديون مستغرق اولسون . بناء عليه
حين فراغده منع اولئهميه جنى كې بعد الفراغ مريض فوت
اولدقده ورثه فراغى مجيز اولمدي بهانه سويله فراغ مذكور
فسخ اولنه ماز . نته كيم مريضك اصحاب انتقالدن كسنه سى
اولمديغى تقديرده اراضى مأمورى اراضى بي محلولدن قاجير يورسين

دیو فراغدن منع وبعد الفراغ والوفاة اراضی به مداخله
ایده میه جکی کبی .

کذلك برکیمسه بالاجارتین تصرفده بولنان وقف
مسقفاتی مرض موتنده اذن متولی ایله بعض اصحاب انتقالنه
یاخود اجنبی به فراغ ایده بیلور . ولوکه فارغ مدیون مستغرق
بولنه . وبوفراغ مرض موتده اولمش دیه سائر ورثه یا فارغك
داینلری مفروغ بهه مداخله ایده مزلر . نته کیم متولی
دخی فراغه اذن ویرمکدن اصلا امتناع ایده میه جکی کبی .
شوقدر وارکه مریض مرض موتنده بروجه محرر اذن متولی
ایله فراغ ایتدکدنصکره اصحاب انتقالدن کمسنه سی اولمدیغی حالده
فوت اولدقده متولی وقف ، مفروغ لهدن مفروغ بهی استرداد
ووقف ایچون ضبط ایدر . مفروغ له دخی بدل فراغی متوفانك
ترکه سندن طلب ایدر . (اما) مریض مرض موتنده (ورثه -
سندن بشقه سنه) بلا شرط العوض (هبه و تسلیم ایتدکده
ثلث مالی موهوبك تمامنه مساعد ایسه) شو هبه (صحیح)
ونافذ (اولور) . زیرا مرض موتده اجنبی به هبه آکا وصیت
حکمنده اولغله بعدالتجهیز و التکفین و بعد اداء الديون باقی
اموالك ثلثدن معتبر اولور . ورثه کرک مجیز اولسون و کرک
اولسون یجب ان یعلم ان هبة المريض هبة عقد ولیست بوصیة
واعبارها من الثلث ما کان لانها وصیة ولكن لان حق الورثة
یتعلق بالمريض وقد تبرع بالهبة فیلزم تبرعه بقدر ما جعل

الشرع له و هو الثلث فشرط في هذا العقد قبض الموهوب قبل موت الواهب طحطاوى. (مساعد اوليو بده) كل (ورثه دخى هبه يي مجيز) اولور ايسه كليسنده هبه صحيح اولوب مجيز (اولماز ايسه) ثلث مالئك (مساعد اولديغى مقدارده هبه صحيح اولوب باقيسنى موهوبله) ورثه يه (رده مجبوردر .) وبونده موهوبله مخير دكلدر . حالبوكه ۳۹۴ مادهده مذکور اولديغى اوزره بيعده مشتري مخير ايدى .

مرض موت سکنز طقوز آي تمامدى ايتسه بيله حکم مذکور جاريدر .

مثلا بر مريض ديكر كمسنه ذمتنده كى بيك غروش الاجتنى مرض موتنده آكا هبه ايتدكه ثلث مالى يالكيز يوز غروشه مساعد اولسه يوز غروشه هبه صحيح ولازم اولوب متباقيسنى ايفايه مجبوردر على افندى ان كانت الهبة دارا فقبضها ثم مات ولا مال له غيره جازت الهبة فى ثلثها ورد الثلثين الى الورثة وكذا سائر ما يقسم وما لا يقسم هنديه فى الباب العاشر . نته كيم بر اينكندن بشقه مالى اوليان بر كيمسه مرض موتنده مذکور اينكى برينه هبه وتسليم ايدوبده موهوبله دخى آنى آخره صاندقدنصكره واهب فوت اولسه بيع فسخ اولنه ميوب اول اينكك قيمتك ثلثانى موهوبله ورثه يه ضامن اولور انقرى .

مريض ، كرك وارثه وكرك اجنبى يه بعد الهبة والتسليم موهوبله آنى آخره بيع ايتدكدن صكره واهب فوت اولسه

بیع نقض اولنه میوب فقط موهوبله وارث ایسه موهوبك تمام بدلی ضامن اولوب بو بدل بین الورثه تقسیم اولنور .
وموهوبله اجنبی ایسه ثلث مساعد اولدیغی مقداری ضامن اولوب بدل ضمان ورثیه اعطا اولنور قاعدیه وانقروی .

شرحاً بلا شرط العوض دنیلیدی . زیرا مریض مرض موتنده بر مالی وارث اولمیان بر کیمسه یه اومالک ثلثان قیمتته معادل یا اکثر اوله رق عوض ویرمك شرطیله هبه و تسایم ایتدکده مذکور مالدن بشقه مالی اولسه بیله هبه صحیح اولور . اما عوض مذکور موهوبك ثلثان قیمتندن اقل اولوب واهبك بشقه مالی دخی بولنماز ایسه موهوبله مخیردر . دیلرسه ثلثان قیمتته ابلاغ واکمال ایدر . استر ایسه جمع هبه یی ردایله عوضی استرداد ایلر . من غیر شرط العوض هبه ایدوبده موهوبله عوض ویرسه حکم بویله در هندیه فی الباب العاشر عن التاتار خانیه . شفعه ده دخی حکم بویله در . شویله که واهب مرض موتنده اوچیوز لیرا دکرنده کی خانه سنی یوزایرا قیمتنده کی معلوم آتی عوض ویرمك شرطله بر کیمسه یه هبه و تسایم ومذکور آتی عوضاً تسلیم ایتدکدنصکره ۱۰۲۲ ماده یه مبنی شفیع مذکور آنک قیمتتی موهوبله ویره رك خانه یی بالشفعه ضبط ایتدکدنصکره واهب فوت اولوب ورثه مجیز اولماسه لر شفیع مخیردر دیلرسه خانه نك ثانی ردایدرک ثلثی آلیقور دیلرسه کلیسنی رد ایدرك ویدیکی بدلی استرداد ایدرلکن عوض حین

هبه ده مشروط دکل ایکن اعطا ایدلسه شفعه جریان ایلمز من
الحل المذكور .

❦ ماده ۸۸۰ ❦

(ترکه سی مستغرق دیون اولان کیمسه مرض موتنده)
آزچوق (اموالی وارثنه یاخود بشقه سنه) یعنی اجنبیه
(هبه و تسلیم ایتد کدنصکره) اول مرضدن (فوت اولسه
داینلر هبه بی طوتمیوب اول اموالی قسمت غرمایه ادحال
ایدبیلور) ۴۶ ماده یه باق .

ترکه سی مستغرق دیون دیمک دین ترکه سنه مساوی یاخود
دین زیاده اولمق دیمکدر .

شو وجهله هبه و تسلیم اولنان مال ید موهوب لهده
قیمتیه مضموندر . بناء علیه موهوب له مال موهوبی قبول
موت الواهب بیع ایتسه غرما بیعی نقض ایده میوب موهوب
لهه تضمین ایتدیررلر جامع الفصولین .

ایضاح القيود

۱ مرض موتنده، بوقید احترازی اولوب حال سحتنده هبه
و تسلیم ایتد کدنصکره خسته لهرق وفات ایتسه داینلر موهوبه
مداخله ایده مزلر علی افندی .

۲ اول مرضدن فوت، بوقید دخی احترازیدر . زیرا بر
کیمسه حال مرضنده اموالی وارثنه یا بشقه سنه هبه و تسلیم
ایتد کدنصکره اول مرضدن افاقت بولسه هبه صحیح و لازم

اولور. چونکه مرض مذکورک مرض موت اولمديني تحقّق ایلدی هندیه .

۳ اموالی، بوتعبیر اراضی امیریّه ایله مستغلات وقفیه دن احتراز ایچوندر. زیرا مستغرق دیون اولان کیمسه مرض موتنده عهدّه تصرفنده بولان بالجمله اراضی امیریّه سنی یاخود بالاجارتین تصرفنده بولان مستغلات وقفیه سنی بدل مقابله یه یاخود بحانا اذن صاحب ارض یاخود رأی متولی ایله اجنبی یه یا وارثنه فراغ ایتسه صحیح اولوب داینلر مفروع به مداخله ایده منزلر. زیرا داینلرک حققری مریضک اموالنه تعلق ایدوب بونلر ایسه اموال دن دکلدرلر .

۴ هبه ایتسه، بوتعبیر موهوبک بالرضی رد واعاده سنندن احتراز ایچون دکلدر. شویله که موهوبله، مرض موت ایله مریض ایکن واهبک طلبی اوزرینه مال موهوبی واهبه رد واعاده ایتدکده بو اعاده هبه جدیده حکمنده در. بناء علیه موهوبله مدیون دکل ایسه ثلث مالندن معتبر اولوب اما مدیون مستغرق ایسه رجوع عن الهیه ورد باطل اوله رق مال موهوبک موهوب لهک ترکه سنه اعاده سی لازم کلور. اما موهوبله مرض موتنده رضاسیله رد واعاده ایتیوب بلکه حاکمک حکم وقضاسیله اعاده ایتدکده بورجوع واعاده صحیح اولوب نه موهوب لهک غرماسی نه ده وارثلری مال موهوبه مداخله ایده منزلر هندیه .

«۸۶۴» ماده شرحه باق .

۵ ایدہ بیلورلر، بو تعبیر دلالت ایدرکہ غرمانک کلیسی
اهل تبرعدن اولدقلری حالده مجیز اولسه لر جائز اولوب آرتق
فسخ ایدہ میہ جکلری کبی یالکز بعضیسی مجیز اولسه مجیز اولانک
حصہ سنده ہیہ صحیح اولور .

اللہ سبحانہ و تعالیٰ اعلم
واستغفر اللہ العظیم الکریم

— ❧ فهرست کتاب الهیه ❧ —

صحیفه


- | | |
|---|----|
| کتاب سابع هبه حقه در هبه نك ادله مشروعیتی
و محاسنی . | ۲ |
| مقدمه هبه به دائر اصطلاحات فقهیه بیاننده در وهبه نك
لغت و شرع مغالری . | ۳ |
| هبه ده کی تمليك لفظیه خارج اولان اشیای اربعه و تمليك
لفظندن مستفاد اولان احكام وهبه ایله اباحه آره سنده کی
فرق لر . | ۵ |
| تعریف الهیه اوزرینه ایراد اولنان اسئله اربعه . | ۹ |
| هدیه ایله رشوت بیننده کی فرق . | ۱۴ |
| عقد هبه ده درت شی آرانور . | ۱۷ |
| رکن هبه و آنده کی اختلاف فقها . | ۱۸ |
| قبضه موقوف عقود و هبه ده لزوم قبضه ادله سی . | ۲۳ |
| قبل القبض هبه نك حکمی اولما سنه متفرخ مسائل خمس . | ۲۹ |
| مطلقا قبضه و صکره قبض کاملک تقسیمی . | ۲۸ |
| هبه ده ایجاب و قبول و بوجنس مسائلده کی قاعده . | ۳۰ |
| مزاح و تعاظی ایله هبه . | ۳۸ |


- ۴۲ قبول هبه ایکی درلو اولور .
- ۴۸ اذن بالقبضده اوچ صورت واردر .
- ۵۲ قبضینک تجانس و تغیری .
- ۵۵ قبض اوچ قسمدر .
- ۵۸ و دیعه ذی الیده هبه اولندقدنصکره مستحق حیهقدقه
حق رجوع .
- ۵۹ دینک مدیونه هبه سنک یا ابراسنک ایضاحی .
- ۶۳ هبه دینده اوچ احتمال واردر .
- ۶۵ هبه دینده قبول شرط دکلدر قاعده سندن مستثنی مسائل .
- ۶۶ ابرارد ایله مردود اولور ضابطه سندن مستثنی مسائل .
- ۸۷ صغیردن حجری رفع ایدن ایکی شیدر .
- ۷۸ مجرد ایجابله هبه تمام اولان مسائل .
- ۸۰ مربینک قبضیه صحت هبه ایکی شرطله مشروطدر .
- ۸۲ اوچ نوع مالک هبه سی مجرد ایجابله تمام اولور آلتی
نوع مالک هبه سی غیر جائدر .
- ۸۲ صغیره هبه اولنان مالد هبه ایکی شرط لازم اولور .
- ۹۷ هبه مضافه و عمری و رقبی و هبه مغلقه .
- ۱۰۰ عوض شرطیه اولان هبه و شرط تعلیق و تقیدی .


- ۱۰۴ ہبہ بشرط العوضك ابتداء ہبہ وانتهاء بیع اولسی
وبوکا متفرع مسائل.
- ۱۰۷ بسلمك شرطیہ اولان ہبہ دہ واہیدن اول موهوبلہ
فوت اولدقده جریان ایدہ جك احکام .
- ۱۱۲ واہب ایلہ موهوبلہ بینندہ کی بعض اختلافات .
- ۱۱۳ ہبہ یہ متعلق بعض شہادتلر .
- ۱۱۴ خیار شرطلہ ہبہ وبراءت .
- ۱۱۵ بسلمك شرطیہ ہبہ نك ایکی نظیری .
- ۱۱۷ موهوبدن استثنایہ دائر مسئلہ .
- ۱۱۸ شرائط ہبہ نك اقسام ثلاثہ سی .
- ۱۲۲ موهوب واہبك مالی اولسی شرطی و مالی اولسامق
اوج صورتلہ اولسی .
- ۱۲۸ مشاعدہ کی تصرفاتك تفصیلی .
- ۱۲۹ بعض موهوبدن بلاستحقاق ضبطی حالندہ کی شیوع .
- ۱۴۶ اوج نوع مشغولك ہبہ سی جائزدر .
- ۱۵۱ صراحۃ ذکر اولنمقسزین ہبہ دہ داخل اولوب اولیانلر .
- ۱۵۶ طفلہ وجنیہ و دیوارہ و میتہ یہ ہبہ .
- ۱۵۹ معناسی عاقدك معلومی اولیان لفظلہ عقد .

- ۱۶۱ قبل القبض هبه نك حكمی اولماسنه متفرع مسائل .
- ۱۶۷ رجوع عن الهبه به دائر ايضاحات .
- ۱۷۹ بطلان رجوعه حكمدن صكره حق رجوعك عودتی .
- ۱۸۰ رجوع عن الهبه ماسبق ایچون فسخ اولدیغنه و آتی ایچون فسخ اولدیغنه متفرع مسائل .
- ۱۸۸ خلاصه موانع رجوع .
- ۱۹۳ عوض مانع رجوع اولق ایچون آنده اوچ شرط لازمدر .
- ۲۰۰ اشتراط العوضه اختلاف .
- ۲۰۳ زیاده متصله نك مانع رجوع اولسی وبوكا دائر سوال وجواب .
- ۲۰۸ حصول زیاده ده اختلاف .
- ۲۲۲ صدقه دن عدم رجوعك سببی و سوال و جواب و صدقه اوچ نوعدر .
- ۲۲۴ ویریلان مالك هبه یا صدقه اولمسنده اختلاف .
- ۲۲۹ ختان و زفاف دوكونلرنده كتوریلان هدایانك حكمی
- ۲۳۲ هبه مریض و تصرفات مریض وارثه وصیت درت وجهله در .
- ۲۴۳ صحت و مرصده اختلاف .











3 1761 07358565 5